


АВ
Б-24

ШАЙХ ОИЗ
АЛ-ҚАРНИЙ



МАҲЗУН
БҮЛМА



ШАЙХ ОИЗ
АЛ-ҚАРНИЙ



**МАҲЗУН
БЎЛМА**

Иккинчи нашири

ТОШКЕНТ
«O'ZBEKISTON»
2020

УЎК 28
КБК 86.38
Қ-24

*Қуръони карим оятларининг таржима ва
изоҳлари муаллифи:*

Шайх Алоуддин МАНСУР

Араб тилидан

Заҳириддин МАНСУР таржимаси

*Ўзбекистон Республикаси Вазирлар Маҳкамаси ҳузуридаги
Дин ишлари бўйича қўмитанинг 19.06.2018 йил 3412-сонли
хулосаси асосида тайёрланди.*

ISBN 978-9943-25-734-4

© Заҳириддин Мансур, 2019, 2020

© «O'ZBEKISTON» НМИУ, 2019, 2020

2937

Занжота АҚМ

БИСМИЛЛАҲИР РОҲМАНИР РОҲИЙМ

Ислом оламининг навқирон уламоларидан доктор Оиз ал-Қарнийнинг «Маҳзун бўлма» («Ла таҳзан») китоби ниҳоят фойдали бир мавзудан баҳс этгани сабабли ўқувчилар томонидан қизғин кутиб олинди ва қайта-қайта, бир неча миллион нусхада нашр қилинди. Китобда мусанниф Қуръони карим оятлари, ҳадиси шарифдан иқтибослар ва саҳобаю тобеинлар ҳаётларидан ибратли лавҳалар келтириш билан ҳамда ўта таъсирли ҳикматларни мисол қилиб, ўқувчини маҳзун бўлмасликка – инсонлиги учун, мўмин-мусулмонлиги учун, бениҳоя Меҳрибон Оллоҳнинг бандаси, энг Буюк Инсон, севикли Пайғамбаримиз Муҳаммад соллаллоҳу алайҳи васалламнинг уммати бўлишдек улуғ саодатга эга бўлгани учун севиниб, шукроналар айтиб, бахтиёр ҳаёт кечиришга даъват қилади. Жозиб тил ва гўзал услуб билан битилган ушбу асарни ўқиб, олган роҳатларимизни, Сиз азиз диндошларимиз билан баҳам кўриш ниятида, «Маҳзун бўлма» китобининг бир жузъини фарзанди аржумандимиз Заҳириддин таржимасида эътиборингизга тақдим қилинмоқда. Оллоҳ барчамизга ҳаёти дунёда ҳам, Охират диёрида ҳам маҳзун бўлмаслик бахтини ато этсин.

Шайх Алоуддин МАНСУР

Ё, ОЛЛОҲ!

Осмонлар ва Ердаги (барча) жонзот (Унга муҳтождир ва бор тилак-мақсадларини Ёлғиз) Ундан сўрар. У Зот ҳар куни иш-амалдадир. (Ар-Роҳман сураси, 29-оят)

Шамол эсиб, мавжлар қутуриб, денгиз изтиробга тушганида, кема аҳли нидо қилар: «Ё Оллоҳ!».

Саҳродаги ёлғиз одам адашса, отлиқ йўлдан оғса, карвон аро йўлда қолса, нидо қилар: «Ё Оллоҳ!».

Бошга мусибат тушиб, фалокат вақти кирса, бало-офат бошланса, бахтсизлик эгалари нидо қилурлар: «Ё Оллоҳ!».

Қоқилган эшик ёпилса, одамлар юзидан парда тортилса, қичқиришар: «Ё Оллоҳ!».

Йўллар тор бўлса, истаклар ниҳоя топиб, арқон узилса, нидо қилинар: «Ё Оллоҳ!».

Агар сенга кенг ер торлик қилиб, дилинг юкни кўтара олмай сиқилса, ҳайқиргин: «Ё Оллоҳ!».

Чунки хуш сўз, холис дуо, ҳаққоний хитоб, беайб кўз ёш ва ҳаяжонла қийналмоқ – Унга юксалур.

Саҳар пайти кафтлар, муҳтожликда қўллар, офат вақти кўзлар, бахтсизликда илинж – Унга юзланур.

Унинг исми билан тиллар айланиб, ёрдам сўраб, ҳамд ўқиб, нидо қилур. Унинг зикри билан қалблар хотиржам, руҳлар оромда, туйғулар сокин, асаблар тинч, ақл жойида, эътиқод мустаҳкамдир. «**Оллоҳ бандаларига Меҳрибондир**». (Шўро сураси, 19-оят)

ОЛЛОҲ – Энг чиройли исм, гўзал ҳарфлар, ҳаққоний таъбир, бебаҳо калимадир. «Унинг учун бирон «тенг»ни билурмисиз?! (Йўқ, билмассиз!)».

Бойлик ва Боқийлик, Қувват ва Нусрат, Куч-Қудрат ва Ҳикмат – Унингдир. «Бу Кунда подшоҳлик кимникидир? Яккаю Ягона ва Ғолиб Зот – Оллоҳникидир!» (Ғофир сураси, 16-оят)

Лутфу Иноят, Ёрдам ва Мадад, Дўстлик ва Муруват – Ундандир. «Сизларга берилган барча нознеъматлар Ёлғиз Оллоҳдандир». (Наҳл сураси, 53-оят)

Оллоҳ Улуғлик ва Фазилат, Куч-Қувват ва Қадр-Қиммат Эгасидир.

Оллоҳим, Ўзинг бизларга азоб ўрнига тасалли, қайғу мукофотига шодлик, хавф пайтида тинчлик бергин!

Оллоҳим, Ўзинг қалб аламини эътиқод қори билан ювиб, руҳлар чўғини иймон суви билан ўчиргин!

Парвардигор, Ўзинг бедор кўзларга ором уйқусини, безовта нафсларга осудаликни бергин!

Парвардигор, бу ҳайрон кўзларни Ўз Нуринга, Йўлдан оғанни Тўғри Йўлингга ва У Йўлингдан бўйин товлаганларни Ўз Ҳидоятингга йўллагин!

Оллоҳим, Ўзинг барча ташвишларни субҳи содиқ нури билан йироқлаштир, ғирром виждонни ҳақиқат кўшини билан узоқлаштир, ҳамда шайтон найрангларин Ўз аскарларинг кўмаги билан қайтаргин!

Оллоҳим, Ўзинг бизлардан ғам-андуҳларни кетказгин, нафсларимиздан безовталикни олиб ташлагин!

Барча хавфлардан Сенинг паноҳингга қочамиз. Ишонч ва таваккул, сўров ва ёрдам Сенгадир фақат. Бизнинг Хожамиз Сенсан! У Зот нақадар яхши Хожа ва нақадар яхши мададкордир!

Муаммоларни ўз ҳолича қўйгин, уларни катталаштирма.

Ўзингни фитна ва жирканч ботқоғидан олиб қочгин.

Ҳаётни соддалаштир, хашаматни тарк этгин, чунки ортиқча айш бандилик, ўта танпарварлик руҳ азобидир.

Сен ҳақингда айтилган ёмон сўзлар ҳақида ўйлама, уларнинг сенга зиёни йўқ, айтгувчининг ўзига зиён.

Онгли бўл, неъмат, фазилат ва нажот ҳақида фикр юритгин.

Бировдан раҳмат кутмагин, эҳсонни фақат Оллоҳ учун қилгин.

Ўзинг учун фойдали лойиҳаларни белгилаб ол, шу ҳақида ўйлаб, у билан машғул бўлгин, ғам-қайғуларни унутасан.

Бугунги ишни эртага қолдирмагин. Фойдали илм ўрган, фойдали ишни қилгин.

Оллоҳнинг берган неъматлари ҳақида тафаккур қилгин, у ҳақида сўзла, Оллоҳга шукр қил. Оллоҳ сенга берган соғлик, мол-давлат, аҳли-оила ва иш-амал билан қаноатлан.

Яқин билан ҳам узоқ билан ҳам яхши муомалада бўлгин, айб-нуқсонлардан кўз юмгин.

Бадантарбия билан шуғуллан, сайр қил, саломатлигинг ҳақида ўйла, чунки соғлом танда соғлом ақл бўлади.

Оллоҳ таолога доимо афв-мағфират, яхши кайфият ва соғлик-омонлик сўраб дуо қилгин.

Кун бугундир

Тонг отгач, тунни кутмагин, яхши-ёмон ўтган кечаги кунни эмас, ҳали келиб улгурмаган эртани ҳам эмас, яшаётган бугунингни ўйлагин.

Куёши чарақлаган бу кун – сенинг кунинг, бир кунлик умр... Гўё бу кунда туғилиб, шу кунда ўладигандек, бугунги ҳаётингни бугун учун бағишлагин. Шундагина сенинг ҳаётинг ўтмиш ғам-ташвишлари, келажакнинг хатарнок шарпаларига тўқнаш келмайди.

Барча ижод, меҳнатларингни бугунинг учун сарфлагин.

Бу кунда хушуъ билан намоз ўқигин, тадаббур билан Қуръон тиловат қил, бугунинг ҳақида мушоҳада юрит, ҳусни хулқли бўлгин, қазойи қадарга рози бўл, ўзгаларга манфаат етказ.

Бу кунда соат, дақиқаларни йилларга, сонияларни ойларга айлантиргин, бу кунда яхшиликни экиб, гўзаллик ҳосилини йиғиб олгин, гуноҳлардан мағфират сўра, Парвардигорни зикр қил, рихлат тадоригини кўр, бу кунни хурсандчилик билан ўтказгин, ризку рўзга, Оллоҳ таоло сенга берган неъматларга рози бўлгин. **«Бас, сенга ато этган нарсамни олгин ва шукр қилгувчилардан бўлгин!»**. (Аъроф сура-си, 144-оят). Бу кунни қайғу ҳасратсиз, гина-ҳасадсиз ўтказгин.

Ушбу сўзларни қалбинг ойнасига ёзиб қўйгин:

КУН БУГУНИНГДИР!

Агар сен шу нарсаларни жиддий, қатъий ирода билан тасдиқласанг, ўз нафсингни «мен фақат шу кун учун яшайман» иборасига буйсундирасан ва ўша пайтда ўз борлигингни бино қилишга, иқтидорингни ривожлантиришга бу кунингни ҳар бир лаҳзасидан фойдаланасан ва дейсан: Бу кунда сўзимни ўнглайман, ёмон, фаҳш сўзларни сўзламайман, ғийбат қилмайман, бу кун ўз уйимни тартибга келтираман, бу кунда жисмим тозалигига, юриш-туришимга эътибор бераман.

Бу кунда қалбимга фазилат уруғини экаман, униб-ўсгач, ундан кибр-ҳаво, ҳасад, риё, ёмон гумондан иборат ёмон илдизларни тиконли шохлари билан бирга юлиб ташлайман.

Бу кунда бошқаларга манфаат етказиш умидида бўламан, ўзгаларга яхшилик қиламан, касал ҳолидан хабар оламан, муҳтож, мазлумларга ёрдам бераман, олимни сийлайман, кичикни иззат, каттани ҳурмат қиламан.

Ўтган нарса ўтиб кетди, қуёш каби ботди. Эй ўтмиш, энди сен учун кўзёши тўкиб қайғураётганимни кўрмайсан, чунки сен бизни тарк этдинг, бизлардан узоқлашдинг ва абадул-абад қайтиб келмайсан.

Эй келажак, сен ғайб оламидасан, бас, мен ҳавойи орзулар билан ҳамкорлик қилмасман ва ҳаётдаги бугунимни хаёлдаги эртага алишмайман, ўз нафсимни тасаввурга сотмайман, келажак учун шошилмайман, чунки эртанги кун ҳали йўқдир, ҳали яратилмаган, ҳали тилга олгулик бир нарса эмасдир.

Кун бугунингдир, бу сўз ҳаётни гўзал суратда кўришни истаган инсон учун саодат луғатида энг гўзал сўздир.

Келажак келгунга қадар, уни ўз ҳолига қўй

«Оллоҳнинг фармони (яъни, Қиёмат) келиб қолди. Бас, сизлар уни шоштирмай қўяқолинглар». (Наҳл сураси, 1-оят). Воқеа-ҳодисаларга шошилмагин, ахир ҳомила ой-куни етмай дунёга келишини, мевалар пишмай терилишини истайсанми? Ҳали-ҳозир эрта йўқдир, мавжуд эмас, унинг на бир таъми ва на



бир ранги бор, бас шундай экан, нега бизлар нафсла-
римизни у билан машғул қиламиз, унинг мусибатлари-
дан хавфсираймиз, унга эътибор қиламиз? Ахир бизлар
келажакнинг яхши ё ёмонлигига йўлиқамизми-йўқми
билмаймиз. Энг муҳими – келажак ғайб оламидир, бас,
унга етмай туриб, кўприк қуришга шошилмайлик, ким
билади, эҳтимол у кўприкка етмай туриб тўхтармиз
ёки бизлар етмай туриб кўприк вайрон бўлар ёки у ер-
дан салом берган ҳолда ўтармиз.

Келажак ҳақида фикр юритиб, ғайб китобини очиш-
га, сўнгра унинг ташвишларига ўралашиб қолишга
зеҳн учун имконият яратиб бериш шаръан ман этил-
гандир, чунки келажак – чексиз орзудир, у ақл томо-
нидан ҳам маломатланур, чунки келажак ҳақида пуч
орзуларга берилиш таназзулга дучор қилур.

Бу оламда келажакда очлик, яланғочлик, касал-
лик, фақирлик ва мусибатларни кутиб яшаётганлар оз
эмас, буларнинг барчаси шайтон мактабининг дас-
турларидир: **«Шайтон сизларни (агар инфоқ-эҳсон
қилсангиз) камбағал бўлиб қолишингиздан кўрқи-
тади ва фаҳш ишларга буюради. Оллоҳ сизларга Ўз
тарафидан мағфират ва фазлу карам (бойлик) ваъ-
да қилади. Оллоҳ (фазлу карами) Кенг ва Билгувчи-
дир».** (Бақара сураси, 268-оят)

Ана у кўзёш тўкаётганлар эртага оч-наҳор бўладилар,
бир йил ўтиб дардга йўлиқадилар, бу дунё ҳам қачондир
бир кун ўз ниҳоясига етади. Жони Оллоҳнинг қўлида
бўлган кимса, йўқ нарсага гаров боғламаслиги лозим-
дир, қачон ўлишини билмаган кимса мафқудликка –
ҳали дунёга келмаган нарсага машғул бўлмаслиги ке-
рак.

Келажак келгунига қадар уни тарк этгин, қачон бостириб киришлигини кутмагин, чунки сенинг маш-ғулотинг бу кундир.

Ҳали куёши чиқмаган, нури кўринмаган кунда бе-риш учун ғамни қарз қилиб олганларга ажаб...

Чексиз орзудан ҳазир бўлгин!

Ноҳақ танқидга қандай муносабатда бўласан?

Тубан, беақл кимсалар Холиқу Розик бўлган жал-ла ва аълони, бирон шериги бўлмаган Ёлғиз Оллоҳни ҳақорат қилдилар-у, энди мен, сен, биз хатокорлар, гуноҳкор бандалар улардан нимани кутяпмиз ўзи?

Сен ўз ҳаётингда модомики хайру саховат, бунёд-корлик, фидокорлик билан кўзга кўринар, гуллаб-яшнар экансан, шак-шубҳасиз аччиқ бўҳтон, ёмонлаш-ларга, ҳеч тинчимайдиган тишли-тирноқли тўқна-шувларга дуч келаверасан.

Улар токи сен **«Ерга (кириб кетадиган) бирон те-шик ёки осмонга (чиқиб кетадиган) бирон нарвон истаб – топиб»**, қочиб кетмагунинггача сенга тинчлик беришмайди, аммо сен ўшалар орасида яшар экансан, сенга ёмонлик қилишларига, кўзингдан қонли ёшлар оқизишларига, ётоғингда ҳам тинч қўймасликларига кўз тутавергин.

Ерда ўтирган одам йиқилмайди, одамлар ўлик итга тегмайдилар, лекин улар ғазабланурлар, чунки сен улардан ё илм ё адаб ёки мол-давлат борасида юқори-сан, демак, сен уларнинг наздида то бу хислатларинг-дан, Оллоҳнинг сенга берган неъматларидан, мақтовга лойиқ сифатларингдан ажраб, улар каби аҳмоқ, бахтсиз,

тугаган мирқуруқлар, беақл-бефаҳмлар қаторига тушиб қолмагунинггача кечириб бўлмас гуноҳкорсан гўё. Улар аниқ шуни хоҳлайдилар. Бас, сен уларнинг сўз ва танқидларига, бўҳтон ва ҳақоратларига Ухуд тоғининг саботи каби, саботли бўлгин; ўзининг мавжудлигини, боқий қудратини исботлаш учун ҳар қандай дўл-довул остида қолса ҳам мардона турадиган ҳайбатли харсанг тош каби бўлиб олгин. Агар сен уларнинг гапига қулоқ тутсанг, ундан таъсирланадиган бўлсанг, уларнинг ҳаётинг, умрингни кир-бахтсиз қилишдек жирканч орзуларини рўёбга чиқарган бўласан, балки сен уларни чиройли тарзда кечиргин, улардан юз ўгир, уларнинг макр-ҳийлаларига сиқилмагин, чунки уларнинг тубан танқидлари сенинг таржимаи ҳолингда ҳурматга лойиқ саҳифа бўлиб қолади.

Сен уларнинг оғизларини ёпишга, тилларини боғлашга қодир эмассан, лекин сен уларнинг аҳмоқлигига бепарво бўлишга, уларнинг сўзларини тингламасликка қодирсан: **«Шу адоватларинг билан ўлиб кетинглар!» деб айтинг!»**. (Оли Имрон сураси, 119-оят). Сен ўз фазилатларингни яна ҳам оширишинг, янада ўзингни тўғри тутишинг билан уларнинг оғизларига қалампир уруғини солиб қўйган бўласан. Демак сен, агар барчага бирдек манзур, маҳбуб бўлишни, айбсиз кўринишни истасанг – узун ва ушалмас орзуни умид қилибсан.

Бировдан раҳмат кутмагин

Оллоҳ таоло мени зикр қилсин, деб бандаларини яратди, шукр қилсин, деб уларга ризқ берди. Аммо кўплар Оллоҳдан бошқага қул бўлдилар, бошқаларга шукр қилдилар, нонкўрлик, жафокашлик табиати ун-

дай тубан нафсларга ғолиб келди. Бас, улар сенинг эҳсонингни кўра олмасалар, яхшиликларингдан тонсалар, балки сен уларга яхшилик қилганинг эвазига улар сенга душманлик қилсалар, яширин адоват ўқини отсалар, ларзага тушма: **«Улар (мунофиқлар) фақат Оллоҳ ва Унинг Пайғамбари уларни ўз Фазлу Карами билан бой-бадавлат қилиб қўйгани учунгина (шукроналар айтиш ўрнига Оллоҳ ва Унинг Пайғамбарини) ёмон кўрдилар, холос».** (Тавба сураси, 74-оят).

Одамзот тарихига назар ташласанг, ибратли воқеаларни кўрасан: ота фарзандини тарбиялади, едириб-ичирди, одоб, таълим берди, боласининг ороми учун, тунни бедор ўтказди, боласининг тўқлиги учун очликка рози бўлди, унинг роҳати учун машаққат чекди... фарзанд улғайиб, мўйлаби сабза уриб, билаклари кучга тўлгач, ўз отасига қопағон ит каби ташланиб, унга илтифот кўрсатмай, беписанд бўлиб, падари бузрукворига оқ бўлди...

Тубан табиатли, иродаси парчаланган кимсаларга қилган яхшиликлари ёниб кетган кишилар хотиржам бўлсинлар ва хазиналари туганмас Зот даргоҳида оладиган ажру савобларини хуш-хурсанд ҳолда кутсинлар.

Ушбу ўтли нидо ҳаргиз сени яхшиликни тарк қилишга, бошқаларга эҳсон қилмасликка чорламас, балки ўша қилган яхшилик, эҳсонингга одамлар томонидан тониш, ношукурлик келиши мумкин экани хусусида огоҳлантирар. Бас, сен уларнинг бундай нонкўрликларидан ғамга тушма!

Яхшиликни Оллоҳнинг Юзи учун қилгин, чунки сен ҳар ҳолатда зафар топурсан, бас, сенга пасткашларнинг беписандликлари, нонкўрларнинг таъналари зарар қилмас, Оллоҳга ҳамд айтгин, чунки сен эҳсонкорсан,

зеро, баланд қўл паст қўлдан яхшироқдир: «(Улар айтурлар): **«Биз сизларни Ёлғиз Оллоҳнинг Юзидан таомлантирурмиз. Сизлардан (бу ишимиз учун) бирон мукофот ва миннатдорчилик истамасмиз – кутмасмиз».**

Кўп онгли-ақлли кишилар ҳам оломоннинг нонкўрлик табиатидан ғофилдирлар. Гўё улар ушбу табақа хусусида келган Буюк Ваҳийни эшитишмагандек: **«Қачон инсон зотига бирон зиён – мусибат етса, ётган ҳолида ҳам, ўтириб ҳам Бизга дуо-илтижо қилур. Энди қачонки Биз ундан зиён-мусибатини кеткизсак, гўё (ҳеч қачон) ўзига етган бало-мусибатдан Бизга дуо-илтижо қилмагандек (юз ўтириб) кетур».** (Юнус сураси, 12-оят)

Бир аҳмоққа қалам совға қилсанг, у ўша қалам билан сен ҳақингда ҳажв ёзса; ёки муҳтож бўлганида суянсин, мол-қолга қарашда ишлатсин, деб асо ҳадя қилсанг, у ўша асо билан бошингни ёрса, ҳайрон бўлмагин, чунки нонкўрлик кафанига ўралиб олган кимсалар Яратган Буюк Парвардигорнинг сонсаноксиз неъматларигаки ношукрлик қилганларидан кейин, сен билан мен – гуноҳкор бандаларга нима қилишлари мумкин?!

Замонасоз бўлмагин

Ўзганинг ўзлигини ўзлаштирма, бошқалар ичида сингиб йўқолма. Бу туганмас азобдир. Кўплар ўзгалар ўзлигини ўзлаштириш учун ўзларини, овозларини, ҳаракату сўзларини, ҳатто ўз қобилият ва шарт-шароитларини нутиб юборадилар. Бу эса кулфат-машаққатдир, куйишдир, ўзликни йўқотишдир.



Одам Атодан охирги зурриётига қадар икки инсон бир суратда бўлмаган, бас уларнинг хулқ-атворлари қандай бир бўлсин?

Сенга ўхшаш инсон аввал бўлмаган, кейин ҳам бўлмайди. Сен Зайд каби ҳам Амр каби ҳам эмассан, бас, нафсингни тақлид ғорига ташламагин.

Ўз ҳайъат, табиатингга боққин: **«Ҳамма одамлар ўз сувларини билдилар»**. (Аъроф сураси, 160-оят) **«Ҳар кимнинг ўз юзланадиган тарафи бор»**. (Бақара сураси, 148-оят)

Яралганингча ҳаёт кечиргин, овоз-оҳангингни, юриш-туришингни ўзгартирма, нафсингни илҳом билан тарбия қил, ўз истиқлолингни нобуд этмагин.

Сенинг ўзингга хос ранг-рўйинг бор, биз сени ўшандай кўришни истаймиз, чунки сен шундай яратилгансан, бизлар сени шундай таниймиз. **«Бирортанглар замонасоз бўлмасин»**.

Инсоният ўз табиати билан наботот оламига ўхшайди, ширин, нордон, узун, қисқа... Агар сен анжир меваси бўлсанг, беҳига ўхшайман дема, чунки сенинг жамолинг ҳам қийматинг ҳам анжир мевасига лойиқдир.

Рангимиз, тилимиз, иқтидоримиз ва қазойи қада-римизнинг хилма-хиллиги Яратгувчининг мўъжизаларидан биридир, бас, У Зотнинг мўъжизасини инкор этма!

Қазо ва қадар

«На Ерга ва ўзларингизга бирон мусибат етмас, магар (етса) Биз уни пайдо қилишимиздан илгари Китобда (Лавҳул Маҳфузда битилган) бўлур». (Ҳадид сураси, 22-оят)

Қалам қуриб, саҳифалар кўтарилиб, буйруқ бажарилди, қазойи қадар ёзиб қўйилди. **«Бизга фақат Оллоҳ биз учун ёзиб қўган нарсагина етур».** (Тавба сураси, 51-оят)

Сенга етган нарса хато кетмас, хато кетгани – сенга етмас.

Агар шу ақида нафсингда ўрнашиб, қалбингда қарор топса, кулфат тухфага, мусибат мукофотга ва барча ҳодисалар ютуқ, шарафга айланади. **«Оллоҳ таоло бирор бандасига яхшилиқни хоҳласа, ўша яхшилиқ унга етиб боради».** Бас, сен касаллиқдан, ўлим яқинлигидан, молиявий зарардан, уйинг куйишидан изтиробга тушмагин, чунки тақдир шундай битилган, ихтиёр эса Оллоҳникидир. Бу мусибатлардан ажр ҳосилдир, гуноҳ каффоротдир. Мусибат аҳлининг бергувчи ва олгувчи, ризқни танг ва кенг қилгувчи бўлган Зотнинг қадарига сабр қилиб, ундан рози бўлишлари қандай гўзал. **«У Ўзи қиладиган бирон нарса ҳақида масъул бўлмас, улар** (яъни, бандалар эса қиладиган ҳар бир иш-амаллари хусусида) **масъул бўлурадилар».** (Анбиё сураси, 23-оят)

Қазойи қадарга иймон келтирмагунигча – асабларинг тинчланмас, нафсинг безовталиги сокинлашмас, қалбинг васвасаси йироқ кетмас.

Қалам қуриди, бас, нафсинг ҳасратларга бормасин, девор тик туриши, сув тўкилмай туриши, бўрон турмаслиги, идиш синмаслиги – буларнинг барчаси сен ва менинг хоҳишимиз билан эмасдир, тақдирдаги нарса бўлади, қазо ўз ҳукмини ўтказди, пешонада ёзилгани бўлади. **«Бас, хоҳлаган киши иймон келтирсин, хоҳлаган кимса кофир бўлсин».** (Каҳф сураси, 29-оят)

Тақдир сени ўзининг ғазаб, норозилик ва ҳасрат аскарлари билан қуршаб олмай туриб, унга бўйинсунгин, надомат ёмғири ёғмай туриб, қазони тан олгин. Хотиржам бўлгинки, барча чораларни қилиб битганиндан кейин ҳам сен эҳтиёт бўлган нарса бошингга тушади, чунки бу бўлиши керак бўлган нарсадир ва **«Агар бундай қилганимда мана бундай бўлар эди демагин, балки: Оллоҳнинг тақдири экан, У Зот хоҳлаган нарса бўлади»**, деб айтгин.

«Албатта, ҳар бир оғирлик-машаққат билан бирга бир енгиллик ҳам бордир».

Эй инсон, билгинки, очликдан кейин тўқлик, чанқоқдан кейин қониш, бедорликдан сўнг уйқу, дарддан кейин соғлик бордир. Кун келади, йўқолган топилади, адашган ҳидоят топади, машаққат чекувчи ундан озод бўлади, зулмат тарқалади. **«Шояд Оллоҳ (мусулмонларга) ғалаба берса ёки Ўз ҳузуридан (бу мунофиқ кимсаларни шарманда қиладиган) бирон ишни келтириб, улар ичларида яширган нарсаларига надомат қилувчиларга айланиб қолсалар».** (Моида сура-си, 52-оят)

Кечага тоғлар, водийлар узра субҳи содиқ чиқшининг хушхабарини бергин, ғам-қайғу эгасига нур тезлигида, кўз очиб юмгунча ёруғ кунлар келишини, Жабрланганларга эса лутфу иноят хушхабарини бергин...

Билгинки, бепоён сахро ортида соя-салқин, ям-яшил чаманзор бордир.

Арқон ўралаверса, тезда узилур.

Кўзёш билан бирга табассум, хавфдан кейин тинчлик, қўрқув ортида сакинат бордир.

Олов Иброҳимни куйдирмади, чунки Раббоний рия-асраш «**Иброҳимга салқинлик ва омонлик** (дарчасини очиб қўйди)». (Анбиё сураси, 69-оят)

Денгиз Мусо Калимуллоҳни чўктирмади, кучли содиқ овоз деди: «**Йўқ, аниқки, мен билан бирга Парвардигорим бор. Албатта, У мени (нажот) йўлига бошлар**». (Шуаро сураси, 62-оят)

Горда турган маъсум зот (Муҳаммад соллаллоху алайҳи васаллам) дўсти (Абу Бакр)ни Оллоҳ жалла ва аъло улар билан бирга эканлигини айтиб тинчлантирди, бас, шундан сўнг тинчлик, омонлик бўлди.

Ҳозирнинг ҳузурини кўзлаган, устларидаги шароитнинг қули бўлиб қолган кимсалар фақат торлик, бахтсизлик-омадсизликнигина кўра оладилар холос, чунки улар фақат хона деворларига, ҳовли дарвозаларига қарайдилар. Огоҳ бўлсинлар, кўзларини, фикр жиловларини девор ортига ташласинлар.

Заифликдан сиқилмагин, чунки аҳвол ўзгармай бир ҳолда туриши амри маҳолдир. Фаровонликни кутишлик ибодатнинг афзалидир, кунлар ўзгарувчандир. Замон ўзгарур, кечалар оғироёқ, ғайбга парда тортилгандир, Ҳикматли зот эса: «**...У Зот ҳар куни иш-амалдадир**». «**...Эҳтимол Оллоҳ бундан кейин бирон ишни пайдо қилар**». (Талоқ сураси, 1-оят). «**Албатта ҳар бир оғирлик-машаққат билан бирга бир энгиллик ҳам бордир. Албатта, ҳар бир оғирлик-машаққат билан бирга бир энгиллик ҳам бордир**». (Шарҳ сураси, 5–6-оятлар)

Аччиқ лимондан ширин шарбат тайёрла

Заковат ва қобилият эгаси зиёни фойдага айлантиради, кўрқоқ жоҳил эса бир мусибатни икки мусибатга айлантиради.

Расулуллоҳ соллаллоҳу алайҳи васаллам Маккадан ҳайдалдилар, Мадинада эса бутун тарихнинг қулоқ ва кўзини эгаллаган бир буюк давлат барпо қилдилар.

Зиндонда ушлаб, қамчиланган Аҳмад ибн Ҳанбал суннат имоми бўлди, Ибн Таймийя қамоқдан олим ҳолида чиқди, эски бир қудуқ қаърига ташланган Сарахсий фикҳ илми ҳақида йигирма жилд китоб ёзди, тўшакка михланиб қолган Ибн Асийр «Жомиъул усул, Ал бидоя ван-ниҳоя» китобини тасниф этди, Бағдоддан ҳайдалган ибнул Жавзий етти қироатни ўрганди, Молик ибнур Рийбга ўлим соати яқинлашганида бутун оламга, ўзининг Аббосийлар давлатининг шоирларининг девонлари билан тенглаша оладиган гўзал ва машхур қасидаларини юборди.

Агар сенга бахтсизлик ҳамла қилса, бошқа томонга қараб олгин, агар сенга биров лимон суви тўла идиш берса, сен ўша сувга шакар солгин, агар сенга биров илонни берса, унинг қимматбаҳо терисини шилиб олиб, қолганини улоқтиргин, агар сенга чаён ниш урса, билгинки, у илон захрига қарши зардобдир.

Ёки музтар – ночор одам дуо-илтижо қилган вақтида (дуосини) ижобат қиладиган Зотми?!

Қайғу эгаси илтижо қиладиган, жабрланувчи инсон ёрдам сўрайдиган, бутун коинотга паноҳгоҳ бўлган барча махлуқотга сўраганини берадиган, унинг зикри билан тиллар айланадиган, дилларни танҳо илоҳи бўлган Зот ким? Албатта, у Ёлғиз Оллоҳдир.

У Зотга қаттиқлик ва фаровонликда, яхши-ёмон кунларда дуо қилмоқ, офат вақти ёрдам сўраб, ўзимизни У Зотнинг эшигининг остонасига ташлаб, тавба қилган ҳолимизда йиғлаб, зорланиб, сўрашимиз сенинг, менинг, биз бандаларнинг ҳаққимиздир. Ўша

пайтда У Зотнинг ёрдам-мадади келур, шодлик келур ва эшик очилиши осон бўлур: **«Ёки музтар – ночор одам дуо-илтижо қилган вақтида (дуосини) ижобат қиладиган Зотми?!»**. (Намл сураси, 62-оят). У Зот ғарқ бўлганни қутқарур, йўқолганни қайтарур, дард-мандга даво, мазлумга ёрдам берур, адашганни ҳидоятлар ва барча ғам-андухдан халос этар: **«Қачон улар кемага минсалар, (ғарқ бўлишдан қўрқиб) Оллоҳга, У Зот учун динни холис қилган ҳолларида (яъни, чин ихлос билан) дуо-илтижо қилурлар»**. (Анкабут сураси, 65-оят)

Мен сенга ғам-қайғуларни кетказадиган дуоларни ўргатмоқчимасман, балки юзингни бурмоқчиман, токи сен ҳам муножот ва нидолар, дуо-илтижолар қилгин. Агар Уни топсанг – барча нарсани топибсан, агар Унга бўлган иймонни йўқотсанг, – барча нарсани йўқотибсан. Албатта, Парвардигорингга дуо қилишингнинг ўзи алоҳида бир ибодат, сен сўраган нарсани берилишидан баландроқ бўлган буюк тоатдир.

Дуо илмини яхши билган банда ғам-қайғу чекмасликка, беқарор бўлмасликка лойиқ кишидир.

Оллоҳ таолонинг арқонидан бошқа арқон узилур, У зотнинг эшигидан бошқаси ёпилур, У Зот яқин, дуоларни эшитгувчи ва музтар-ночорнинг дуо-илтижоларини ижобат қилгувчи Зотдир. Кучли ва Беҳожат, Улуғ ва Ёлғиз бўлган Зот сен фақир, муҳтож бандасига: **«Менга дуо-илтижо қилинглр! Мен сизларга (қилган дуоларингизни) мустажоб қилурман»**, деб амр қилди.

Бошингга фалокатлар тушиб, бахтсизлик келганида, Оллоҳни зикр қил, унинг исмини айтиб хитоб қил, ундан ёрдам-мадад сўрагин, хурлик тожигга эга бўлишлик учун пешонангни саждага қўй, нажот нишо-

инини олиш учун бурнингни бандалик тупроғига ургин, қўлингни чўз, кафтингни кўтар, тилингни айлантир, сўрайвергин, Оллоҳнинг эшигини қоқ, эшик очилишини кутгин, Унинг исми билан сўрагин, У Зот томонига ўтгин, **«Унга бутунлай берилиб, (чин ихлос билан бандалик қилинг)!»**, шундан сўнг сен бахтли ва нажот топган бўласан.

Уйинг сенга кенг бўлсин!

Шаръий суннатга мувофиқ узлат – ёмонлик ва унинг ақлидан, бекорчи хўжалардан, бошвоқсиз беҳудагўйлардан узоқ бўлишингдир. Шунда тарқоқ фикрларинг жамланади, ором ва хотиржамлик топасан, леҳнинг ҳикмат дурларини инъом қилади, кўзинг маърифат бўстонларида яйрайди.

Яхшилик ва тоатдан тўсадиган барча нарсалардан узлат қилиш қалб табиблари тажриба қилган ва мунаффақият қозонган қимматли дори-малҳамдирки, мен ҳам сенга шуни тавсия қиламан. Ёмонлик ва лағвдан ҳамда оломондан узлат қилишлик фикрни ўнглашдир, ор-номусни тиклашдир, тавба ва ибратнинг туғилиш байрамидир. Одамлар орасида бўлиш, тўпланиш, агар намозларда, жумаларда, илм мажлисларида ва савобли ишлардаги ҳамкорликда бўлса, мақталур. Аммо беҳуда-бекорчилик мажлисларидан ҳазир бўлгин, ўзингни узоқ тутгин, хатоларингга қайғургин, тилингга эҳтиёт бўл, уйинг сенга кенг бўлсин. Жоҳиллар билан ҳаммажлис бўлиш ўзликка қарши аёвсиз жангдир ва нафсингнинг хотиржамлик дунёсига хатарли таҳдиддир. Чунки сен мишмишлар устунлари билан, ёлғон-яшиқ тарқатувчилар билан ва фитна, бахтсизлик, бало-офатларни тарғиб қилувчиларнинг усталари билан бирга ўтирар экансан,



ўлим соатинг етиб келгунига қадар ҳар куни етти марта ўласан: **«Агар улар (яъни, ўша мунофиқлар) сизларнинг орангизда (жиҳодга) чиққанларида ҳам сизларга фақат ортиқча зиён бўлган ва ўраталарингизда сизларни фитнага солиш учун югуриб-елиб юрган бўлур эдилар».** (Тавба сураси, 47-оят)

Менинг бирдан-бир мақсадим шудир, аҳволингга назар ташлагин, яхши гап ва яхши ишдан бошқасига аралашмагин, ана шунда қалбинг ўзингга қайтганини, вақтинг зое бўлмаётганини, умринг бекор кетмаётганлигини, тилинг ғийбатдан, қалбинг изтиробдан, қулоғинг беҳаё гаплардан, нафсинг ёмон гумондан холи эканлигини биласан.

Ким тажриба қилса, англаб етади, аммо ким ваҳму жаҳолат отига минса, авом-оломонга аралашиб кетса, камдан-кам омон қолади.

Эваз-ажр Оллоҳдандир.

Оллоҳ таоло сени бирор нарсадан маҳрум қилса, сен сабр қилсанг ва бошингга тушган мана шу мусибатдан савоб умид қилсанг, У Зот сенга ўша нарсадан яхшироғини эваз қилиб беради. **«Кимни икки азиз нарсаси (кўзи) ни олсам, ўшанинг ўрнига жаннатни эваз қилиб бераман».** ... **«Кимдан бу дунёдаги чин дўстини тортиб олсам, йўқотган инсон сабр қилса, жаннатни унга эваз қилиб бераман».** Ким ўз фарзандини йўқотса ва сабр қилса ўша инсон учун охиратда шараф уйи қурилади. Бошқа нарсаларни ҳам шу тариқа қиёслаб кўргин, чунки бу ибратли мисолдир.

Бошингга тушган мусибатга афсус чекма, чунки уни тақдир қилган Зотнинг ҳузурида жаннат, савоб, эваз ва ажри азим бордир.

Оллоҳнинг авлиёлари бўлмиш мусибат эгаларига Фирдавс жаннатида нидо қилинур: «(Оллоҳ йўлида меҳнат-машаққатларга) **сабр-тоқат қилиб ўтганларингиз сабабли** (энди бу жаннатларда) **сизларга тинчлик-осойишталик бўлмай. Охират диёри нақадар яхши!**». (Раъд сураси, 24-оят)

Мусибатнинг ажр-савоби ва унинг ўрнини қоплайдиган яхшилик ҳақида фикр юритмоғимиз даркор: «**Ана ўшаларга Парвардигорлари томонидан саловот (мағфират) ва раҳмат бордир. Ана ўшалар Ҳақ йўлни топгувчилардир**». (Бақара сураси, 157-оят). Мусибат эгаларига Охиратда ана шундай яхшиликлар, гўзал хушхабар бордир.

Дунёнинг умри қисқа, унинг хазиналари арзимасдир, **Охират яхшироқ ва боқийроқдир**. Бу дунёда кимга мусибат етса, У дунёда мукофотланар, бу дунёда машаққат чеккан – У дунёда роҳат топар. Аммо бу дунёга ёпишиб, унга ошиқ бўлганлар, унга суянганлар, ана ўша дунёнинг насибаларидан маҳрум бўлишдан, роҳатлари тугаб қолишидан қаттиқ изтиробга тушурлар, чунки улар шу дунёнигина дейдилар, шунинг учун уларга бу дунё мусибатлари катта кўринади, чунки улар оёқларини остига қарайдилар холос, шунинг учун улар фақат арзон ва аҳамиятсиз, ўтқинчи дунёнигина кўрадилар холос.

Иймон ҳаёт демақдир

Иймон бойлигидан, ишонч сармоясидан қашшоқ бўлган инсон ҳақиқий бахтсиздир. Улар умрбод хорлик ва бахтсизликда ҳаёт кечирадилар: «**Ким Менинг Эслатмамдан юз ўгирса, бас, албатта, унинг учун танг – бахтсиз ҳаёт бўлур**». (Тоҳа сураси, 124-оят)

Оламлар Эгаси, Парвардигори бўлмиш Оллоҳга иймон келтирмоқгина нафси бахтли қилади, поклайди, уни фараҳбахш онларга етказди, ундан беқарорлик, бахтсизликни кетказди.

Иймонсиз ҳаётнинг таъми йўқдир.

Динсиз кимсалар, агар иймонга келмасалар, ҳаётларидаги ноҳақлик кишанларидан, зулматлардан, алдовлардан қутулиш учун топган энг «афзал» йўллари ўз-ўзини ўлдиришдир! Иймонсиз ҳаёт нақадар бахтсиз, Оллоҳ Йўлидан четга чиқувчилар гирифтор бўлган мангу қарғиш нақадар мудҳиш! **«Ва биз худди аввалбошда унга (яъни, Оллоҳнинг оятларига) иймон келтирмаганлари каби уларнинг дил ва кўзларини айлантириб қўюрмиз ва ўз туғёнларида адашиб-улоқиб юрган ҳолларида тарк қилурмиз».** (Анъом сураси, 110-оят).

Асрлар давомида, узоқ синовдан сўнг, бут-санамлар бидъат-хурофот, куфр-динсизлик лаънат, элчи-пайғамбарлар рост, Оллоҳ таоло Ҳақ, мулк ҳам ҳамд ҳам Унинг учун ва У Зот барча нарсага қодир эканлигига ақллар етгач, Оллоҳдан ўзга илоҳ йўқ, деб иймон келтирмоқлик ва мана шунга қаноат қилмоқлик вақти келди.

Саодатинг, роҳатинг ва хотиржамлигинг, иймонингни кучли ё заифлиги, илиқ ё совуқлиги миқдорига қараб бўлади. **«Эркакми ё аёлми – кимда-ким мўмин бўлган ҳолида бирон яхши амал қилса, бас, Биз унга покиза ҳаёт ато этурмиз ва уларни ўзлари қилиб ўтган энг чиройли амаллари сабабли бериладиган ажр-савоблар билан мукофотлаймиз».** (Наҳл сураси, 97-оят).

Бу гўзал ҳаёт Парвардигорнинг ваъдаси сабабли нафслар ором-осойишталик топишидир, мўминларнинг

қалблари Яратгувчини севганлари сабабли саботли-барқарор бўлишидир, уларнинг диллари оғишдан – бузилишдан пок бўлишидир, асаблари ҳар қандай ҳодисалар олдида сокин – хотиржам қола олишидир. Улар Оллоҳни Парвардигор деб, Исломни дин деб, Муҳаммад соллаллоҳу алайҳи васалламни пайғамбар ва элчи деб билганлари сабабли қалблари қазойи-қадар тушган пайтида хотиржамдир, тақдир тақозосига розидир.

Асалини ол, уясини бузма

Юмшоқлик бор иш – гўзал безакли, акси – хунук ва уятлидир. Юмшоқсўзлик, ширин табассум, хуш-калом – буларнинг барчаси бахтлиларнинг кийими, мўминнинг сифати. Улар, гўё гулларга уларни синдирмай оҳишта кўнадиган, тоза нарсани тановул қилиб, тоза маҳсулот берадиган, жонзот – асалари кабидир. Оллоҳ таоло юмшоқ бўлиш учун берган неъматини қаттиққўллик учун бермагандир.

Одамлардан шундайлари борки, уларнинг келишидан бўйинлар эгилади, уларнинг чиқишига кўзлар тикилади, уларга қалблар салом йўллаб, руҳлар кузатар. Бунга сабаб – улар сўзларида ҳам, олди-берди савдоларида ҳам, учрашув ва хайрлашувларида ҳам суюкли бўлганликларидир.

Дўст орттириш фақат аслзода, яхшиларнинг қўлидан келадиган фандир. Улар мудом одамлар томонидан ёруғ юз билан кутиб олинадилар. Улар келганларида барча хурсанд, дўст кетганида – ортларидан кўмсаш, дуойи хайр. Уларнинг бундай гўзал ахлоқ дастурларининг номи: «Сиз (ҳар қандай ёмонликни) энг

гўзал сўзлар билан даф қилинг! (Шунда) баногоҳ сиз билан ўрталарингизда адоват бўлган кимса қайноқ-содиқ дўст каби бўлиб қолур». (Фуссилат сураси, 34-оят)

Улар ўзларининг жўшқин хайрихоҳликлари, ҳалимликлари ва пок кечиримлиликлари билан ҳар қандай гина-кудуратларни кетказадилар. Улар ёмонликларни унутиб, яхшиликларни эслайдилар, ёмон сўзлар уларнинг қулоқларига ўрнашмайди, балки унга яқинлашмай, қайтиб келмас бўлиб, узоқларда қолиб кетади. Улар роҳатдадирлар, одамлар улардан тинч, мусулмонлар ҳам саломатдир: **«Мусулмон шундай кишики, мусулмонлар унинг тилидан ва қўлидан саломатдирлар, мўмин шундай кишики, одамлар унга қонларини ҳам молларини ҳам ишонадилар».** «Оллоҳ менга мендан узилганга уланишни, менга зулм қилганни афв қилишни, мени маҳрум қилганга эҳсон қилишни буюрди».

«(У тақводор зотлар) яхши-ёмон кунларда инфоқ-эҳсон қиладиган, ғазабларини ичларига ютадиган, одамларнинг (хато-камчиликларини) афв этадиган кишилардир». (Оли-Имрон сураси, 134-оят). Уларга хотиржамлик, сакинат ва тинчликдан иборат нақд савоб хушхабарини бергин. Яна уларга Мағфиратли бўлган Парвардигорга қўшни бўлиб, жаннатларда ва дарёлар устида бўлишдек улкан Охират савобини ҳам хушхабар қилгин: **«Албатта, тақводор зотлар жаннатларда ва дарёлар (усти)да, Қодир Подшоҳ хузуридаги рози бўлинган ўринда бўлурлар».** (Қамар сураси, 55-оят)

Огоҳ бўлингизким, Оллоҳни зикр қилиш билан қалблар ором олур

Ростгўйлик Оллоҳнинг ҳабибидир, сидқидиллик қалбларни ювгувчи совундир. Тажриба эса ҳужжатдир.

Одил раҳбар ўз қўл остидагиларни алдамайди. Оллоҳни зикр қилишдек қалбни равшан қилувчи, буюк ажрга лойиқ бирор иш йўқдир: **«Бас, Мени эслангиз, Мен ҳам сизларни эслайман»**. (Бақара сураси, 152-оят). Зикр Оллоҳнинг ердаги жаннатидир, унга киришни истамаган одам Охират жаннатига ҳам кира олмайди. Зикр кишини руҳоний касаллик, машаққат ва изтироблардан озод этади. Зикр нажотга етиш учун энг осон йўлдир. Шифо топиш учун сен Ваҳий девонларини (Қуръони карим ва ҳадиси шарифни) мутолаа қил, кунларингда зикр малҳамини синаб кўр.

У Зотнинг зикри билан хавф, беоромлик ва ғамқайғу булутлари тарқалади, ташвиш, хафалик тоғи сурилади.

Оллоҳни зикр қилгувчиларнинг роҳатда яшашлари ажабланарли ҳол эмас, бу исбот талаб қилинмайдиган ҳақиқатдир, лекин таажжуб, У Зотни зикр қилишдан ғофил бўлган бандалар қандай хотиржам яшар эканлар. Улар жонсиз ўликлардир. Ва улар қачон қайта тирилишларини ҳам сезмайдилар.

Эй бедорликдан шикоят қилаётган, аламдан йиғлаётган, ҳодисалардан фожиа ясаётган инсон, Оллоҳнинг муқаддас исми билан У Зотга зорлангин: **«Унинг учун бирон «тенг»ни билурмисиз?! (Йўқ, билмасиз!)»**. (Марям сураси, 65-оят)

У Зотни қанча кўп зикр қилсанг – хотиранг кенгаяди, қалбинг таскин топади, нафсинг бахтиёр, дилинг

яйрайди, чунки У Зотни зикр қилишда У Зотга таваккул қилиш, Унга ишониш, суяниш, унга қайтиш, Ундан кенгликни кутиш бордир. Дуо қилсанг У Зот яқиндир, нидо қилсанг эшитар, сўрасанг жавоб берар. Бас, Унга зорлан, бўйин эг, сажда қилгин. Тавҳид, сано, мадҳ, дуо ва истиғфор айтиб, У Зотнинг муборак исмини тилингда такрорла. Шунда У Зотнинг куч-қудрати билан саодат, тинчлик, сурур ва шодликни топасан: **«Бас, Оллоҳ уларга ҳам бу дунё савобини (ғалаба ва молдавлатни) ва ҳам Охиратдаги гўзал ажрни (жаннатни) ато қилди. Оллоҳ чиройли амал қилгувчиларни севади».** (Оли Имрон сураси, 148-оят)

«Ёки улар одамларга (яъни, Муҳаммад алайҳиссаломга) Оллоҳ ўз фазлу карамидан берган нарсага (яъни, пайғамбарликка) ҳасад қилиптиларми?»

Ҳасад суякни кемирувчи тузли таом кабидир. Ҳасад жисмга фасод уруғини сочувчи тузалмас касалликдир.

Дерларким, ҳасадгўйда роҳат йўқдир, у мазлум кийимидаги золимдир, дўст кўйлагидаги душмандир.

Дерларким, Худо ҳасаднинг хайрини берган, мунча адолатли бўлмаса, дастлаб ҳасадгўйнинг ўзини ўлдиради-я!

Бошқаларга мурувват қилишдан аввал ўзимизга мурувват қилишни истаб, ўзимни ҳам, сени ҳам ҳасад қилишдан қайтараман, чунки бизлар ҳасад қилиш билан вужудимизга ғамни таом қилиб берамиз, қайғуни қонимизга сингдирамиз ва уйқуларимизни бошқаларга тақсимлаб берамиз.

Ҳасадгўй оловни ёқиб, сўнгра ўзи унга тушиб ёнади.

Кирлик кадар ва ғам-ташвиш, роҳат ва гўзал ҳаётни барбод қиладиган ҳасаднинг касалманд болаларидир.

Ҳасадгўйнинг офати, у қазойи қадар билан баҳс-лашади, Яратгувчига адолат борасида тухмат қилади, шариатга одобсизлик қилади, тўғри йўлдаги инсонга тескари чиқади.

Эҳ, бу ҳасад қандай дардки, унга чалинган одамга ажр йўқ, қандай балоки, унга мубтало бўлганга савоб йўқ! Ҳасадгўй то ўлгунича, ёки одамларга берилган неъматлар йўқ бўлмагунича, ўзининг ёғига ўзи қовурилаверади!

Барча билан келишиш мумкин, аммо ҳасадгўй билан, то сенга берилган Оллоҳнинг неъматларидан ажрамасанг, қобилиятингдан маҳрум бўлмасанг ва фазилатларингни йўқотмасанг, у сен билан ҳеч қачон келишмайди. **Ҳасад қилаётган ҳасадгўйнинг ёмонлигидан паноҳ беришини сўраб илтижо қилайлик**, чунки у соғлом жисмга ўз захрини солмагунича тинчимайдиган заҳарли қора илон кабидир.

Ҳасад балосидан сақлангин. Оллоҳдан ҳасадгўйнинг ҳасадидан паноҳ сўрагин, чунки у сенинг ҳар бир босган қадамингни кузатиб турибди: **«Шакшубҳасиз, Парвардигорингиз (барча нарсани) кузатиб тургувчидир».** (Вал-фажр сураси, 14-оят)

Ҳаётни ўз ҳолича қабул қил

Дунёнинг аҳволи берадиган лаззатлари кирли, машаққатлари кўп, юзи хўмрайган, тинимсиз ўзгариб турувчидир. У нопоклик билан ўралган, бахтсизлик бўтқасидир. Сен эса у томондан доим меҳнат-машаққатдасан.

Ота-онанг, жуфти ҳалолнинг, дўстинг, ҳурматли инсон, уй-жой, касб-хунар барчасида бирор кирликни топасан, баъзан улар сени хафа қиладилар. Бас, сен тўла-тўқис

нажот топишинг учун уларнинг ўша ёмонликларининг ўтини яхшиликларининг суви билан ўчиргин.

Оллоҳ таоло бу дунёни қарама-қаршилик, икки хиллик, икки тараф ва икки хил фикр, яхши ва ёмон, солиҳ ва фасод, шодлик ва қайғудан иборат қилиб яратди, соф яхшилик, шодлик барчасини жаннатда, ёмонлик қайғуни эса дўзахда тўплади. Ҳадисда келур: **«Дунё лаънатлангандир. Ундаги Оллоҳнинг зикридан ва у билан бирга бўлган нарсалардан, олимдан ва илм истагувчидан бошқа барча нарса лаънатлангандир».**

Борингга яша, беҳуда хаёл билан машғул бўлма, улгу-ибрат оламида парвоз қил, дунёни ўз ҳолича қабул қил, ўзинг билан келиш, ўзлигингни бил. Эҳтимол, унда баъзан софликни тополмассан, комилликка етолмассан. Зотан софлик, тўла баркамоллик ҳар кимда топилмас, ҳар ким бундай сифатга эга бўлмас.

Сенга жуфти ҳалолинг ҳам етук – комил бўлолмас. **«Мўмин мўминани (эр аёлини) ёмон кўрмасин. Чунки у томонидан бирон хулқни ёқтирмаса, бошқа рози бўладиган хулқлари бор».**

Демак, ўзимизни ўнглаб, бир-биримизга яқин, кечиримли бўлмоқ, муяссар бўлганини олиб, қўлдан келмаганини ташламоқ, баъзи нарсалардан аҳён-аҳён кўз юмиб, қадамни тўғри босмоқ ва ҳар нарсага эътибор бериб ўзимизни қийнайвермаслигимиз мақсадга мувофиқ ишдир.

Мусибат аҳлини кўриб ибрат ол

Ўнг ва сўл томонингга қарасанг, қайғу эгаларини кўрасан, ҳар ҳовлида фарёд, ҳар ёноқда кўзёш, ҳар воқияда Бану Саъдлар бордир.

Қанча мусибатлар бўлса, шунча сабрлилар ҳам бордир, мусибат фақат сенга келмайди, балки сенинг мусибатинг бошқаларга қараганда оздир. Неча йил тўшакка михланиб, оғриқнинг зўридан ўнгу сўлига ағдарилиб фарёд чекаётган касаллар қанча.

Неча йиллар кўёшни кўрмай, зиндон бўлмасидан бошқа жойни билмайдиган маҳбуслар қанча.

Умрларининг энг яшнаган, ёшлик даврларида жигар парчаларини йўқотган эркак ва аёллар қанча.

Бахтсизлар, қарзга ботганлар, турли балоларга дучор бўлганлар қанча.

Бас, сен ана шулардан ибрат олмоқлигинг ва аниқ билмоқлигинг керакки, бу ҳаёт мўмин учун қамоқ ва қайғулар ҳовлисидир.

Қанча қасрлар кунни ўз эгалари билан тўлиб-тошган ҳолда бошласа, кечага бориб хувиллиб қолмоқда-ку! Қанча тўкис-тугал, баданлари соппа-соғ, бой-бадавлат, серфарзанд оилалар саноқли кунларда камбағалликка, ўлимга, тирқираб йўқ бўлишга, турли дарду ситамларга дучор бўлмоқда-ку! «...Уларни қандай (ҳалок) қилганимиз ҳам сизларга аниқ маълум эди. Биз сизлар учун (қанчадан-қанча) мисоллар келтирган эдик (лекин сизлар бу кўрган-билганларингиздан ибрат олмадинглар, Ҳақ Йўлга юрмадинглар)». (Иброҳим сураси, 45-оят)

Демак, сен нафсингни худди жиловланган туя чўкишга ўргатилганидек, бало мусибатларга кўнишни ўргатишинг лозим. Бошингга тушган бало-мусибатни атрофиндагиларнинг мусибатларига, бу замон чархпалагида сендан аввал ўтиб кетганларнинг балоларига солиштириб кўргин! Шунда сенинг уларга нисбатан тинчлик-офиятда эканинг, сенга етса бор-йўғи игна-

нинг учидек бало етгани аён бўлади. Бас, сен Оллоҳ таолога лутфу карами учун ҳамду сано айт, сенга берганига шукр қил, олиб қўйганидан савоб кут – атрофингдагилардан ибрат ол!

Сен учун Расулуллоҳ соллаллоҳу алайҳи васалламда намуна бордир, дарҳақиқат, У Зотнинг бошларига туянинг ичак-чавоқларини ташлашди, оёқлари тирналди, юзи ёрилди, қамал қилинганларида, дарахт баргларини ейиш даражасида оч қолди, Маккадан ҳайдалди, тишлари синди, завжайи шарифаларининг обрўлари топталди, етмиш саҳобаси ўлдирилди, ҳаётлик чоғларида ўғли ва бир неча қизларини йўқотди, очликдан қоринларига тош боғлади, У Зотга шоир, коҳин, мажнун, ёлғончи, деб тухмат тошлари отилди, лекин Оллоҳ таоло у зотни Ўзи асради. Буларнинг барчаси кўрмаслик мумкин бўлмаган балолар эди, тенгсиз Илоҳий имтиҳон эди. У зотдан аввал Закариё ўлдирилди, Яҳё сўйилди, Мусо қувилди, Иброҳим Халилуллоҳ ўтга ташланди, саҳобаларнинг пешволари – Умар ўз қонига бўялди, Усмонга суиқасд қилинди, Алига найза санчилди, қанчадан-қанча улуғ инсонлар қамчиланди, ахёрлар зиндонбанд, тақводорлар кишанбанд этилди: **«Ёки (эй мўминлар), сизлардан илгари ўтган зотлар мисоли – ибрати сизларга келмай туриб жаннатга киришни ўйладингизми? Уларга бало ва мусибатлар (устма-уст) келиб, шундай ларзага тушган эдиларки, ҳатто Пайғамбар ва иймонли кишилар: «Ахир қачон Оллоҳнинг ёрдами келади?!» дейишган эди».** (Бақара сураси, 214-оят)

Намоз... намоз...

«Эй мўминлар, сабр қилиш ва намоз ўқиш билан (Мендан) мадад сўранглар! Албатта, Оллоҳ сабр қилгувчилар билан биргадир». (Бақара сураси, 153-оят)

Агар сенга хавф ҳужум қилиб, қайғу қуршаб олса, дарҳол намозга тургин – руҳинг ором топади, чунки намоз Оллоҳнинг изни билан ғам-қайғуларни кетказишга ва ташвиш парчаларини қувиб солишга кафилдир.

Расулulloҳ соллalloҳу алайҳи васалламни бирор иш ташвишга солса, муаззинларига: **«Эй Билол, намозга чақир, бизни роҳатлангир»**, дер эдилар. Намоз – у зотнинг кўз қувончи, шодлик, саодати эди.

Мен аввал ўтган буюк инсонлар ҳаётини ўқиб-ўргансам, уларга балолар юзланиб, оғир аҳволда қолишганида, хушув – шикаста нафс билан намозга берилишар ва шунда уларга ўз қувват иродалари қайтиб келар эди.

Бошлар учиб, жонлар қилич остида қолганида, қўрқув ва даҳшат вақтида ҳам хавф намозини ўқиш буюрилди. Бас, қалбни мустаҳкам-сокин қилувчи энг буюк нарса намоздир.

Албатта, турли касалликлардан боши чиқмаётган авлод энг аввал масжидга ўрганмоғи, Парвардигорини рози қилиш, жонини доимий азобдан сақлаш учун пешонасини саждага қўймоғи керак. Акс ҳолда, кўзёш қовоғини куйдириб, қайғу-ғам асабларини парчалайди, ана шундай тоқатсиз пайтда намоз унга хотиржамликни беради, ёрдам қўлини чўзади.

Агар фикр қилсак, бир кеча кундуздаги беш вақт намоз, Оллоҳ таолонинг бизларга берган улуғ неъматла-



ридан эканлигини англаймиз, ахир у гуноҳларимизга каффоратгина бўлиб қолмай, Парвардигор ҳузурида даражаларимизни ҳам кўтаради, бундан ташқари ғам-ташвишларимиз, дардларимизнинг ҳам давосидир. Намоз қалбларимизни иймоннинг тоза нури билан тўлдиради, дилларимизга таскин беради. Аммо масжиддан қочганлар, намозни тарк этганларга эса ғам устига ғам, ташвиш устига ташвиш, бахтсизлик устига бахтсизлик: **«Кофир бўлган кимсалар учун эса ҳалокат бўлур ва (Оллоҳ) уларнинг амалларини зое кетказур».** (Муҳаммад сураси, 8-оят)

«Бизга Ёлғиз Оллоҳнинг Ўзи кифоя. У Зот энг яхши Ишончли Вакилдир!».

Ишни Оллоҳга топшириб, Унга таваккул қилиб, ваъдасига ишониб, ҳукмига рози бўлиш ва чиройли умид билан У Зотдан кенгликни кутиш – иймоннинг энг буюк самараларидан ва мўминнинг улуғ сифатларидандир. Банда оқибатни чиройли бўлишига ишонганида, ҳар бир ишида Парвардигорига суянганида, Оллоҳ таоло унга боқиб турганини, Унинг Ўзи кифоя қилишини, қувват ва ёрдам берувчи дўст эканини кўради.

Иброҳим алайҳиссалом оловга ташланганларида: **«Бизга Ёлғиз Оллоҳнинг Ўзи кифоя. У Зот энг яхши Ишончли Вакилдир!»** – дедилар, Оллоҳ таоло оловни Иброҳимга тичлик ва салқинлик қилди.

Пайғамбаримиз соллаллоҳу алайҳи васалламга ва у зотнинг асҳобларига кофирлар ўз лашкарлари билан таҳдид қилганида айтдилар: **«Бизга Ёлғиз Оллоҳнинг Ўзи кифоя. У Зот энг яхши ишончли вакилдир!»** – дедилар. Бас, (у юришдан) бирон нохушлик етмай Оллоҳнинг неъмат ва фазли билан қайтдилар. Улар Оллоҳнинг ризолигини истадилар. Оллоҳ эса улуғ

фазлу марҳамат Соҳибидир». (Оли Имрон сураси, 173–174-оятлар).

Инсон барча ҳодисалар, кулфатларга қарши туриб, улар билан кураша олмайди, чунки у заиф, ожиз қилиб яратилган, лекин Оллоҳ таолога таваккул қилиб, Унга ишонса, ишларини У Зотга топширсагина бундай мусибатларни енга олиши мумкин, акс ҳолда, балло-офат ўраб олган пайтда бу фақир, ҳақир банданинг қўлидан ҳеч нарса келмайди:

«... Агар мўмин бўлсанглар, Ёлғиз Оллоҳгагина суйнинглар!».

Эй ўз нафсига насиҳат қилишни истаган кимса, сени ҳалокатлардан кутқариб, балло-машаққатлардан озод этиши учун Кучли, Беҳожат, мустаҳкам Қувват Эгаси бўлган Зотга таваккул қил ва **«Бизга Ёлғиз Оллоҳнинг Ўзи кифоя. У Зот энг яхши Ишончли Вакилдир!»** сўзини ўз шиоринг қилиб олгин. Молдунёинг озайиб, қарзинг кўпайса, ҳеч нарса тополмай ҳолинг танг бўлса, нидо қилгин: **«Бизга Ёлғиз Оллоҳнинг Ўзи кифоя. У Зот энг яхши Ишончли Вакилдир!».** Душмандан кўрқсанг, золимнинг зулми ёки мусибат остида қолсанг, нидо қил: **«Бизга Ёлғиз Оллоҳнинг Ўзи Кифоя. У Зот энг яхши Ишончли Вакилдир!».** «Парвардигорингизнинг Ўзи етарли Етакчи ва Ёрдамчидир».

Айтинг: «Ерни айланиб сайру саёҳат қилинглр...»

Турли диёрларга сафар қилиш, ер юзида айланиб саёҳатларга чиқиш, турли-туман боғу бўстонларни кўриш, табиат саҳифасига гўзал мўъжизаларни ёзган

қалам қудратини кўрмоқ учун коинот китобларига назар ташламоқлик, қалбни шод қилар, ғам-қайғу булутларини кетказар.

Ташқарига чиқ, атрофингдаги нарсалар ҳақида фикр юрит, тоғлар ошгин, водийлар узра юр, дарахтларга тирмаш, шаффоф сувдан тотгин, ясмин шоҳини ҳидла, ана шу пайтда саодат осмонида сузиб юрган сайроқи қуш каби ўз руҳингни эркин, шодон ҳис қиласан. Ташқарига чиқ, кўзингдан қора пардани олиб ташла, сўнгра Оллоҳнинг кенг ерида зикр, тасбеҳ айтиб юр.

Қаттол бекорчилик, тор хонада қамалиб олишлик ўз-ўзини ҳалок қилишлиқдир. Уйинг бутун олам дегани эмас, сен ҳам одамларнинг ҳаммаси эмассан, бас, қайғу олдида бош эгмоқ нечун? Кўз-қулоғинг, қалбингга мурожаат қил: «(Эй мўминлар), **хоҳ енгил, хоҳ оғир ҳолингизда** (яъни, хоҳ ёш, хоҳ кекса, ҳолларингизда, истасангиз-истамасангиз жиҳодга) **чиқингиз...**». (Тавба сураси, 41-оят)

Келгин, Қуръонни ана у анҳорлар, дарахтзорлар орасида, муҳаббат хутбаларини тиловат қилаётган қушлар орасида, тоғ-тошлардан тушиб қандай етиб келгани ҳақида қисса сўйлаётган сувлар орасида ўқигин.

Бу ернинг йўлларида сафар-саёҳатлар қилиш, нафси изтиробда қолиб, тор хонаси зулматга айланган кимсага табиблар тавсия қилган фойдали ишдир. Кел, бахтли шод бўлиш, фикр ва тадаббур қилиш учун биргаликда сафар қилайлик: «**Улар турганда ҳам, ўтирганда ҳам, ётганда ҳам Оллоҳни эслайдилар ҳамда осмонлар ва Ернинг яралиши ҳақида тафаккур қилиб (дейдилар): «Парвардигоро, бу (борлик)ни беҳуда яратганинг йўқ! Сен (беҳуда бирон иш қилиш айби-**

дан) **Поксан! Ўзинг бизни жаҳаннам азобидан асра-
гил!».** (Оли Имрон сураси, 191-оят)

Чиройли сабр

Сабр билан безанмоқ буюк инсонларнинг сифат-ларидандир. Улар кўнгилсиз ишларни бағрикенглик, мустаҳкам ирода ва матонат билан қабул қила оладилар.

Ахир сабрдан бошқа яна нима қилишимиз мумкин?

Бизнинг олдимизда сабрдан бўлак ечим борми ўзи?

Аввалги ўтган улуғлар гўё мусибатлар, кулфатлар мусобақа қиладиган майдон каби эдилар, бир кулфатдан қутулсалар, иккинчиси келар эди, уларнинг қалқони сабр, совутлари эса Оллоҳга бўлган ишончлари эди.

Улуғлар шундай қилишади, мусибатларни енгиб, офат-балоларни ерпарчин қила оладилар.

Касал бўлган Абу Бакрнинг олдига келган кишилар сўрашди: – Табиб айтдирайликми? Абу Бакр: – Табиб мени кўрди, – деди. Улар: – Табиб нима деди? – дейишди. У зот: – **У, албатта, Мен истаган нарсамни амалга оширгувчиман**, деди, – деб жавоб бердилар.

Сабр-тоқат қил! Ёлғиз Оллоҳ (ёрдами) билангина сабр қила олурсан. Ёруғ кунларга, гўзал оқибатга ишонгувчи, ажр истаб, гуноҳларини ўчирилишига рағбат қилгувчи инсон каби сабр қилгин. Йўлингни сўқмоқлар зулматда қолдириб, мусибатлар бостириб келса ҳам, сабр қилгин. Чунки ғалаба сабр биландир, шодлик қайғу биландир ва албатта, қийинчилик билан енгиллик бордир.

Бу дунёдан ўтган буюкларнинг сийратларини ўқиб, уларнинг сабр-тоқатли, чидам-бардошли эканликларини кўриб ҳайратда қолдим. Гўё улар тоғ бўлсалар мусибатлар уларнинг бошларига майда сув томчиларидек тушар эди. Кулфат вақти қисқа вақтдир, яқинда шодлик тонги отиб, фараҳбахш онлар келиб, ғалаба асри бошлангач, уларнинг юзларида қуёш порлагай. Уларнинг ҳар бири ёлғиз сабр қилибгина қолмади, балки балоларга қарши курашди, мусибатлар қаршисида тиз чўкмай, «қани, кучингни кўрсат ва мени қандай сабрли эканимни кўргин» дея олди.

Ер шарини бошингга кўтариб олмагин

Бир тўп одамлар бор, ухлаб ётганларида ҳам «жаҳон уруш»ини кўрадилар. «Уруш» тиниши билан ошқозон ғамига тушадилар, ё қон босимининг юқорилигидан ёки қанд касалларидан нолиб юрадилар. Юз берган ҳар қандай ҳодиса уларнинг шикоятига сабаб бўлаверади. Улар ҳали нархлар кўтарилиб кетганидан ғазабланадилар, ҳали ёғингарчилик бўлмаётганидан нолийдилар, ҳали ишчиларнинг ойлик маошлари камлигидан сиқиладилар. Хуллас, улар доим бесаранжом, беором. **«Улар (юраксизликлари сабабли) ҳар бир қичқириқ овозни устларига (тушаётган бало-офат деб) гумон қиладилар».** (Мунофиқун сураси, 4-оят)

Сенга насиҳатим, бу куррайи заминни ёлғиз бошингга кўтарма, ҳодисаларни ичингга эмас, ерга ташлагин. Баъзи инсонларнинг қалби худди миш-миш хабарларни ютиб оладиган булутлар каби арзимас нарсаларга ҳам сиқилишади барча нарсага изтиробга тушишади, бундай қалб ўз эгасини аниқ вайрон қилади.

Ибрат ва мавъизалар ҳақиқат устидаги кишиларнинг иймонларига иймонни зиёда қилса, зилзилалар турли ҳодисалар беқарор инсонларнинг хавфларига хавфни зиёда қилади.

Бўрон-довул олдида фақат шижоатли қалбгина тура олади, чунки жасур паҳлавонлар қалби кенг ва собит, иймони мустаҳкам, асаблари хотиржам бўлади. Аммо кўрқоқлар миш-миш, ваҳму-жаҳолат қиличи билан ўз жонларини ҳар куни неча маротабалаб қурбон қилурлар.

Агар барқарор ҳаётни истасанг, ишларга тоқат ва шижоат билан юзлангин, (Охиратга) **ишонмайдиган кимсалар Сизни ҳаргиз бетоқат қилмасинлар. Уларнинг макру ҳийлаларидан сиқилманг ҳам!** Барча ҳодисаларга бардошли бўл, танглик шамолига бош эгма, тушкунликка тушма, буларнинг барини заиф қалблар эгасига отгин, ундай заиф қалбларни кунлар қанчалар мағлуб қилган: «...Сиз уларнинг ҳатто мушриклардан ҳам ҳаётга (яшашга) очкўзроқ кишилар эканини кўрасиз...». (Бақара сураси, 96-оят). Дунё машаққатларига бўйин эгмайдиган кишиларга эса (Оллоҳ таоло доимо мададкордир.

«Бас, У Зот уларнинг дилларидаги нарса (садоқат ва вафо)ни билиб, уларга сакинат-ором туширди...». (Фатҳ сураси, 18-оят)

Арзимас нарсалар сени синдирмасин!

Қанча ғам-ташвишга ботиб юрадиган кимсалар борки, сабабини суриштирсанг айтишга ҳам арзимас нарса бўлиб чиқади. Мунофиқларни кўр, нақадар ҳиммати наст, мақсадсиз кимсалар улар! Мана уларнинг сўз-

лари: «Бу иссиқда урушга чиқманглар», дедилар». (Тавба сураси, 81-оят). «Уларнинг орасида: «Менга (жангдан қолиш учун) изн бергин, мени фитнага – ба-
лога солмагин», дейдиган кимсалар ҳам бор эди». (Тавба сураси, 49-оят). «Улардан (мунофиқлардан) яна бир гуруҳ эса «Уйларимиз очиқ-сочиқ (қолган эди)», деб Пайғамбардан изн сўрардилар». (Аҳзоб сураси, 13-оят). «Бас, Сиз дилларида мараз бўлган кимсалар: «Бизга бирон бало етишидан кўрқамиз», деган ҳолларида (кофирлар) томонга шошаётганларини кўрасиз». (Моида сураси, 52-оят). «Ўшанда мунофиқлар ва дилларида мараз бўлган (яъни, эътиқодлари заиф бўлган) кимсалар: «Оллоҳ ва Унинг Пайғамбари бизларга фақат ёлғон ваъда қилган эканлар», дея бошладилар». (Аҳзоб сураси, 12-оят)

Нақадар ноумид бу шўртумшуқлар! Нақадар бахтсиз улар!

Уларнинг ғамлари қорин, овқат, иморат, қасрлардир. Улар кўзларини мисол самосига қаратмайдилар, фази-
лат юлдузларига боқмайдилар. Уларнинг ҳар бирини ға-
ми – минган оти, кийим-кечаги, маишати. Одамлар-
нинг кўпчилигини кузатсанг, эрта-кеч аёлидан, фар-
зандидан ёки яқин бир кишисидан шикоят қилаёт-
ганини, ёхуд жон қулоғи билан ножўя сўзларни тинг-
лаётганини, ё бўлмаса арзимас мансаб-лавозим ор-
тидан тушганини кўрасан. Булар ўша инсонларнинг
фожиасидир. Уларнинг бирор бир олий мақсадлари,
вақтларини сарфлайдиган фойдали ишлари йўқдир.
Айтганларидек, идишнинг суви тўкилса, ўрнини ҳаво
эгаллайди. Демак, сен ўзинг ташвишини тортиб юрган
нарсанг ҳақида бир ўйлаб кўр, ўша нарса сенинг чек-
кан машаққатларингга арзийдими? Чунки сен унинг

учун гўшту қонингни, роҳат-оромингни ва вақтингни бердинг. Бу савдойингда зиён тортиб юрмагин тагин! Рухшунос олимлар дейдилар: «Сен ҳар бир нарса учун маъқул ҳад-чегара белгилаб олгин». Бас, сен ҳар бир масалада унинг ҳажмига, вазнига ва қадрига қараб иш тутгин.

Саҳобаларнинг ғам-ташвишлари дарахт тагида берган байъатларига вафо қилиш эди. Бас, улар Оллоҳнинг ризосига етишди. Лекин улар билан бирга бўлган бир киши эса туяси билан овора бўлиб, байъатдан маҳрум бўлди, бас, арзимас ишларни ташла, у билан машғул бўлма, шунда ташвиш кетиб, шод-хуррамлик келади.

Оллоҳнинг тақсимига рози бўл - энг бой инсон бўласан

Бу ҳақда аввал айтиб ўтган бўлсак ҳам, тушунарлироқ бўлсин, деб шуларга баъзи бир қўшимчалар қилмоқчиман:

Сенга берилган мол-давлат, бола-чақа, уй-жой ва бошқа неъматларга қаноат қилмоқлигинг лозим, бу менинг эмас Қуръони Каримнинг сўзидир: «...**Бас, сенга ато этган нарсамни олгин ва шукр қилгувчилардан бўлгин!**». (Аъроф сураси, 144-оят)

Салаф солиҳларнинг кўпларининг гўзал иморатлари, от-уловлари ва хизматкорлари бўлмаган, шу билан бирга улар ўз ҳаётларида яхши из қолдирдилар, бахтиёр ҳолда ҳаёт кечирдилар, чунки улар Оллоҳ таоло ўзларига берган яхшиликларни Оллоҳ йўлига йўналтирдилар ва умрларига, вақтларига баракотлар берилди. Яна бошқа бир одамлар бор эдики, уларга мол-давлат, бола-чақа неъматлари берилди ва улар-

нинг бахтсиз бўлишларига мана шулар сабаб бўлди, чунки улар тўғри фитратдан, ҳақ йўлдан тойдилар бу эса ҳамма нарсани ҳам мол-дунё белгиламаслигига очиқ ҳужжатдир.

Агар саодатни истасанг, Оллоҳ яратган суратингга, оилавий аҳволингга, фаҳму фаросатинг, даромадингга рози бўлгин. Айрим аҳли зуҳд мураббийлар ҳатто «сен ўзингнинг турмуш аҳволингдан пастроғига рози бўлиб яшагин», деб тарбия беришади.

Қуйида айтмоқчи бўлганларимиз – нурга тўлган буюк инсонлардирки, улар ўзларининг ўта камтар дунёвий насибаларига рози бўлиб ўтдилар.

Ўз замонасининг буюк олими бўлган Ато ибн Рабоҳ жингалак соч, пучуқ бурун, қорача, фалаж дардига мубтало бўлган, озод қилинган қул эди.

Аҳнаф ибн Қайс барча арабнинг ҳалим кишиси, жисми ориқ, бели ва оёғи букилган, заифқомат киши эдилар.

Аъмаш муҳаддис олим, озод қилинган қул, кўзи хира, йиртиқ тўн, фақирона ҳаёт кечирар эдилар.

Буюк пайғамбарлар, Оллоҳнинг уларга салоту саломини бўлсин, уларнинг деярли барчаси чўпон бўлишган. Довуд темирчи, Закариё дурадгор, Идрис тикувчи бўлиб, барчалари башарият орасидан танлаб олинган инсонлар эдилар.

Демак, сенинг ҳақиқий қийматинг зеҳну заковатингдир, солиҳ амалларингдир, еткизган фойданг ва чиройли хулқингдир. Бас, сен чиройли, бой-бадавлат бўлмасанг ҳам, ғамгин бўлма, Оллоҳ берган қисматга рози бўл.

Ўзингга эни осмонлар ва Ерга баробар бўлган жаннатни эслатгин.

Оч-наҳор қолиб, маҳзун бўлсанг, дард чексанг, жабр тортсанг, зулм кўрсанг – нафсингга Оллоҳнинг неъматларини эслатгин, агар сен мана шу ақидага амал қилсанг, зиёнларинг фойдага, бало-офатлар – ҳадяларга айланади.

Ақлли инсонлар Охират учун амал қиладилар, чунки Охират диёри яхшироқ ва боқийроқдир. Аҳмоқлар эса бу дунёни мангу қароргоҳлари, орзуларининг чўққиси, деб биладилар, шунинг учун ҳам улар мусибатлар келса дод-вой қиладилар, ҳодисалар пайтида надомат чекурлар. Улар фақат ўзларининг арзимас ва аҳамиятсиз бўлган ҳаётларини ўйлайдилар, фақат фоний дунёни кўзлайдилар. Охират ҳақида тафаккур қилмайдилар, унинг учун амал қилмайдилар. Демак, улар хурсандчиликлари тугаб, фараҳбахш онлари ниҳоя топишини истамайдилар. Агар уларнинг қалбларидан қоплаб олган занг, кўзларидан жаҳолат пардаси очилса эди, ўзларига мангу диёр, унинг неъматлари, ҳовли ва қасрлари ҳақида сўзлаган ва у жаннатни васф этгувчи ваҳий хитобларини эшитган бўлар эдилар. Зеро, Оллоҳ ҳаққи, Охират диёри эътибор ҳаракат ва интилишга лойиқ бўлган боқий ҳовлидир.

Ақли жаннатларнинг сифатлари ҳақида узоқроқ мулоҳаза юритиб кўрганмизми? Улар у ерда касал, ғамгин бўлмайдилар, ўлмайдилар, ёшликлари тугамайди, кийимлари эскирмайди, улар таши ичкаридан, ичи эса ташқаридан кўринадиган хоналарда бўладилар. У жойда кўз кўрмаган ва қулоқ эшитмаган ноз-неъматлар бордир, у жойда бирон инсон учун кўркув-хатар йўқ, унинг бир дарахтининг сояси остидан отлиқ одам юз йилда кесиб ўтолмайди, ундаги чодирларнинг баландлиги олтмиш милга (120 километрга) баробар,



анҳорлари доимий оқувчи, қасрлари баланд, мевалари яқин, унинг оқар булоқлари, баланд сўрилари, (булоқ бўйига) қуйиб қўйилган қадаҳлар, тизиб қўйилган ёстиқлар, тўшалган гиламлари бордир. Шодлик, қувонч, завқлари бир олам, бўйлари таралган, уни сифатлашга тиллар ожизлик қилади. Барча орзулар ўша жойда рўёбга чиқар. Бас, нега биз шулар ҳақида фикр қилмаяпмиз, зикр қилмаяпмиз?!

Ана ўша диёрга боришни ўйлаган, унинг учун амал қилган одамга мусибат оғир келмайди, қайғу эгаларининг кўзлари порлайди, фақир қалблар шодланади.

Бас, эй фақирлик, муҳтожлик, мусибат эгалари, Оллоҳга қўшни бўлиб, Унинг жаннатида яшашни истасангиз, солиҳ амал қилингиз: «(Оллоҳ Йўлида меҳнат-машаққатларга) **сабр-тоқат қилиб ўтганларингиз сабабли** (энди бу жаннатларда) **сизларга тинчлик-осойишталик бўлгай. Охират диёри нақадар яхши!**». (Раъд сураси, 24-оят)

Шунингдек, (яъни, Тўғри Йўлга ҳидоят қилганимиз каби), **сизларни одамлар устида гувоҳ бўлишингиз ва Пайғамбар сизларнинг устингизда гувоҳ бўлиши учун бошқа ўрта** (адолатли) **бир миллат қилдик.**

Адолат ҳам ақлий ҳам шаръий матлабдир, ҳаддан ошиш, жафокашлик, сусткашлик адолат эмасдир.

Ким саодатни истаса, ўз ҳиссиёт ва туйғуларини жиловлаб, розилик ё ғазаб ҳолатида ҳам, шодлик ё қайғу вақтида ҳам адолатли бўлмоғи керак. Чунки воқеа-ҳодисалар билан муомала қилишда хатога йўл қўйиш ва ҳаддан ошиш ўз-ўзига зулм қилиш демақдир. Ўрта адолатли бўлиш нақадар яхши. Чунки шариат тарози билан тушган, ҳаёт адолат устига қурилган. Ҳаво-нафсига эргашган, ҳиссиётларига таслим бўлган одам машаққат

чекур ва ана шу пайтда ҳодисалар унга катта кўринур, кўз ўнгини зулмат қоплаб олур ҳамда унинг қалбида бошқаларга нисбатан гина-кудурат ва нафратдан иборат даҳшатли жанг юзага келади, чунки у ваҳм ва хаёл билан яшайди, ҳаммани ўзига қарши деб ўйлайди. Гўё ҳамма уни йўқ қилишга тил бириктириб олгандай. Шунинг учун ҳам бундай кимсалар доим хавф, ғам-қайғудан иборат қора булут остида ҳаёт кечиради.

Ёлғон-яшиқ миш-мишлар тарқатиш ҳам шаръан ман қилинган, ҳам инсоний табиат ҳазар қиладиган кусурлардандир. Маънавият ва Раббоний эътиқоддан маҳрум кимсаларгина бундай тубан ишларга бериладилар. **«Улар (юраксизликлари сабабли) ҳар бир қичқириқ-овозни устларига (тушаётган бирон бало-офат, деб) гумон қиладилар. Улар душмандирлар!».** (Мунофиқун сураси, 4-оят)

Сен қалбингни ўз ўрнига ўткизгин, чунки қалбинг кўрқаётган кўп нарса бўлмайдиган ишдир, ўзинг эса бошламоқчи бўлган ишингда рўй бериш мумкин бўлган энг ёмон эҳтимолларни ўрганиб, унинг келишига тайёр бўлиб тур, ана шунда ўша эҳтимоллар бошга тушмай туриб, қалбни кемирувчи ҳар турли нотўғри фол очишлардан қутуласан.

Эй ақли расо, огоҳ инсон! Ҳар нарсага ўз ҳажмини бергин. Ҳодиса, ҳолат ва муомалаларни катталаштирма, балки ҳар ишда ўртача, адолатли бўлгин, сохта хаёл, алдовчи саробга эргашмагин, ҳадисдаги яхши кўриш ва ёмон кўриш мезонини тингла: **«Дўстингни ўртача яхши кўр, эҳтимол у бир сен ёмон кўрган кимсага айланар, душманингни ҳам ўртача ёмон кўр, эҳтимол у бир кун дўстингга айланар».** **«Эҳтимол, Оллоҳ сизлар билан (Макка кофирлари орасидаги) сизлар душман-**

лашиб юрган кимсалар ўртасида – (уларни ҳам иймон ва Исломга муваффақ қилиш билан) – **бир дўстликни пайдо қилиб кўяр. Оллоҳ (барча ишга) Қодирдир. Оллоҳ Мағфиратли, Меҳрибондир**». (Мумтахана сураси, 7-оят)

Шариат ғам-қайғу чекишга буюрмайди

Ояти каримада қайғудан қайтарилган: «(Эй мўминлар, куфрга қарши курашда) султлашмангиз ва (Ухуд жангидаги мағлубият сабабли) устида ғамгин бўлманг!». (Оли Имрон сураси, 139-оят). «Уларнинг (иймонсизликлари) устида ғамгин ҳам бўлманг!». (Ҳижр сураси, 88-оят). «Ғамгин бўлма, албатта, Оллоҳ биз билан биргадир». (Тавба сураси, 40-оят). «...Ҳеч қандай хавфу хатар йўқдир ва улар ғамгин бўлмаслар». (Аҳқоф сураси, 13-оят)

Зотан қайғу истак оловини ўчираб, ғайрат руҳини сўндирар ва кўнгилни совутар, у ҳаёт жисмини фалаж қилгувчи дарддир.

Чунки қайғу фаолиятдан тўхтаб, ҳаракатдан тўсар, қайғудан қалбга фойда йўқдир. Банда ғам остида юрган йўлидан тўхташи шайтон суйган ишдир. Оллоҳ таоло айтади: «(Яхудий ва мунофиқларнинг) ўзаро шивир-шивирлари фақат шайтон томонидан бўлиб, иймон келтирган зотлар (у сабабли) ғамгин бўлишлари учундир». (Мужодаला сураси, 10-оят). Расулulloҳ соллаллоҳу алайҳи васаллам уч кишидан иккитаси шивир-шивир қилишиб, учинчилари четда қолдирилишидан қайтарганлар, чунки бу ўша учинчи кишини ранжитади.

Мўминнинг ғам чекиши матлуб иш эмасдир, чунки қайғу нафсга озор етказар. Мусулмондан ғам-қайғуга

таслим бўлмаслик, балки шаръий воситалар орқали у билан курашиш талаб қилинади.

Қайғунинг фойдаси йўқдир. Расулуллоҳ соллаллоҳу алайҳи васаллам қайғудан паноҳ сўраб дуо қилганлар: **«Оллоҳим, мен сендан ғамдан ва қайғудан паноҳ сўрайман»**. Чунки қайғуриш-хафалик ғамнинг яқинидир. У иккисининг ўртасидаги фарқ шуки, киши истамаган-суймаган бирон нарса кўнглига келиши, агар келажак ҳақида бўлса ғам-ташвишга сабаб бўлади, агар у ўтмиш ҳақида бўлса қайғу-хафаликка сабаб бўлади. Уларнинг ҳар иккиси қалб ҳаракатини сустлаштиради, мақсадга путур етказди.

Қайғу ҳаётни кир қилиб, турмушни ташвишга айлантиради. У руҳ учун захарли зардобдир. У руҳга бемаддорлик, бахтсизлик ва саросимани мерос қилиб беради ва уни гўзаллик-жамол олдида бемажол қилиб кўяди. Шундан сўнг у Оллоҳ таоло яратган чиройни ҳис қила олмайди ҳаёт қувончларидан баҳра олмай, машъумлик, ҳасрат, алам шаробини қултумлаб ичади.

Тоат қила олмай, гуноҳга ботиб, хатога йўл қўйганида, қайғурмоқлик унинг ҳаётига ҳидоят кириб келаетганидан далолатдир ва бу мақтовга сазовор бўлган қайғудир.

Расулуллоҳ соллаллоҳу алайҳи васалламнинг саҳиҳ ҳадисларининг далолат қилишича, Оллоҳ таоло бандасига мусибат берар экан, уни гуноҳларига каффорат қилади. Аммо бу ишак керак бўлган мақом эмасдир, яъни шариат унга ундаб, буюрган бўлса ҳам, банда қайғу чекмоқ ибодат, деб тушуниб қолмаслиги керак. Агар у ибодат бўлганида Расулуллоҳ соллаллоҳу алайҳи васаллам ҳаётларини қайғу билан боғлар, вақтларини қайғу учун сарфлар эдилар, лекин у зот юзлари табас-

сум қилувчи, қалби рози, доимий шодон ҳаёт кечирганлар.

У зот қандай ҳам маҳзун бўлсинлар, ахир Оллоҳ таоло у зотни дунё учун ғам чекишдан сақлаган, кофирларнинг қилаётган ишларидан қайғуга ботишдан қайтарган, аввалу охир гуноҳларини кечирган, у зот қандай ғам чексинлар. Ғам-қайғу у зотнинг қалбларига қандай йўл олсин, ваҳоланки, у зотнинг қалблари зикр билан банд, ҳалоллик билан ўралган, Раббоний Ҳидоят билан тўлиб-тошган, Оллоҳнинг ҳақ ваъдасига хотиржам, Унинг ҳукмлари, ишларига рози бўлса. У зот табассум қилганларида тишлари ярқирар эди. У зот «кулиб ўлдирувчи», деб сифатланганлар. У зотга Оллоҳнинг салоту саломи бўлсин!

Ким Расулуллоҳ соллаллоҳу алайҳи васалламнинг тарихига назар ташласа, ҳаётларини ўрганса, у зотнинг изтироб, ғам-ташвишни рад этувчи, ноҳақликни йўқотиш, нафсларни шак-шубҳа, гумон, ширк, ҳайронликдан озод этиш ва у нафсни ҳалокат жарлигидан қутқариш учун келган зот эканлигини билади. Оллоҳ таоло бандаларига қанчалар карамли зот.

«Оллоҳ таоло ҳар бир ғамгин қалбни севади», ҳадисининг, ровийси ҳам саҳиҳлиги ҳам маълум эмас. Исломи дини, шариат бунга қаршидир. Бу ҳадисдан агар у саҳиҳ бўлса, мақсад шуки, қайғу – Оллоҳ таоло бандасига имтиҳон учун берган мусибатлардан бири, мана шу мусибатга сабр қилган, имтиҳонга бардош қилган бандани У Зот суяр.

Қайғу ҳақида шеърлар ёзиб, шариат ҳам шунга буюрган, деб айтгувчилар хато қилишади, шариат бундан қайтарган, бунга қарши турган, балки шариат Оллоҳ таолонинг раҳмати ва фазл-марҳаматига эришишлик-

ка, Расулуллоҳ соллаллоҳу алайҳи васалламга туширилган Қуръонга амал қилишга, Оллоҳ таолонинг ҳидоятига хурсанд бўлишга ҳамда осмондан авлиёларнинг қалбига туширган мана бундай муборак яхшиликларидан қалби шод бўлишига буюрган.

«Оллоҳ таоло бир бандасини яхши кўрса, унинг қалбига мунг-қайғу солиб қўяди, агар бирор бандасини ёмон кўрса, унинг қалбини ўйин-кулгу билан банд қилиб қўяди», деган иборани баъзилар Тавротда айтилган дейишади. Бунинг ўз маъноси бор – мўмин банда гуноҳларига ғам чекади, фосиқ эса парвойи фалак, ўйнаб-кулиб юраверади. Солиҳ зотларнинг қалблари яхшиликларга эриша олмай, олий даражаларга ета олмаётганларидан, гуноҳга ботаётганларидан ғамга ботса, осийларнинг қайғуси дунёга, унинг шаҳватлари, лаззатларига эриша олмаётганлари учун бўлади. У осийларнинг ғам-ташвишлари фақат дунё учундир.

Оллоҳ таолонинг пайғамбари Исроил (Яъқуб) алайҳиссалом ҳақида туширган оятда: «...**Ғам-алам ютавериб, у зотнинг кўзлари оқарди** (ожиз бўлиб қолди)». (Юсуф сураси, 84-оят) дейилади. Бу оятда ўз боласи, ҳабибини йўқотган отанинг аҳволидан хабар берилган. Оллоҳ таоло Яъқуб билан ўғли Юсуфни ажратиб имтиҳон қилганидек, яна бир ўғли Биняминни йўқотишлик билан яна бир бор имтиҳон қилди. Бу, инсон ҳасрат чекиши керак дегани эмас, унга ундаб, буюриш ҳам эмас, балки бизларга қайғудан паноҳ сўраш буюрилди, чунки ғам-қайғу қора булут, зулматли кечадир ва эзгу ишлар сари интилган одамнинг йўлидаги тўсиқ-ғовдир.

Хурсанд бўл, қалбинг очиқ бўлсин, Оллоҳдан У Зотнинг Ўзи рози бўладиган яхши ҳаётни, соф зеҳн-

фаросатни сўра, чунки булар нақд бўлган неъматлардир.

Машойихлар дерлар: «Дунёда ҳам жаннат бордир, унга кирмаганлар Охират жаннатига ҳам кира олмайдилар».

Ёлғиз сўрагувчимиз бўлган Оллоҳ таоло қалбларимизни иймон нури билан мунаввар қилсин, дилларимизни Ўзининг тўғри Йўлига йўлласин ва бизларни торлик ва хорлик дунёсидан қутқарсин!

Хулоса

Кел, Оллоҳ таоло барчамизнинг қалбларимиздан ғам-қайғуни йироқ қилиши учун биргаликда У Зотга дуо қилайлик:

Буюк ва Ҳалим, Улуғ Арш, осмон ва Ернинг Парвардигори бўлган Зотдан ўзга илоҳ йўқдир. Эй Тирик ва Барҳаёт бўлган Зот, Сендан Ўзга илоҳ йўқдир, Сенинг Раҳматинг-ла, Сендан ёрдам сўраймиз.

Оллоҳим! Сенинг Раҳматингдан умидвормиз, бизларни бир лаҳза ҳам ўз ҳолимизга ташлаб қўймагин, барча ишларимизни Ўзинг ўнглагин. Сендан Ўзга илоҳ йўқдир.

Тирик ва Барҳаёт бўлган, Ёлғиз Оллоҳга истиффор айтаман ва унга тавба қиламан.

«Ҳеч илоҳ йўқ, магар Ўзинг бордирсан, эй Пок Парвардигор, дарҳақиқат, мен (ўз жонимга) жабр қилгувчилардан бўлиб қолдим».

Оллоҳим! Мен қулингман, қулингни, чўрингни фарзандиман, ҳаётим Сенинг Қўлингдадир, ҳукминг ўтгувчидир, тақдиринг адолатлидир. Ўзингни номлаган барча исмларинг билан, Китобингда

нозил қилганларинг билан, бандаларингдан бирортасига ўргатганларинг билан, Ўз ҳузурингда ғайб илмига битганларинг билан Қуръонни қалбимнинг баҳори, дилимнинг сурури қилишингни, ғамимни кетказиб, қайғудан халос этишингни сўрайман.

Оллоҳим! Сендан ғам-қайғудан, ожизлик, дангасалиқдан, бахиллик, кўрқоқликдан, қарзга ботишдан, кишиларга мағлуб бўлиб қолишдан паноҳ сўрайман.

«Бизга ёлғиз Оллоҳнинг Ўзи кифоя. У Зот энг яхши ва Ишончли Вакилдир!».

Табассум қил

Табассум – мўътадил кулгу, ғамлар шифоси, қайғулар малҳамидир. Рухни шод, қалбнинг қувончга тўлишида кулгининг ажиб бир қуввати бор. Абу Дардо розияллоҳу анху айтадилар: «Мен қалбим тўлгунича куламан».

Расулуллоҳ соллаллоҳу алайҳи васаллам аҳён-аҳёнда кулганларида озиқ тишлари кўринар эди. Бу нафс дардини тушунувчи оқилларнинг кулгусидир ва ўша дарднинг давосидир.

Кулгу – шодлик, роҳат, хушқайфият чўққиси.

Кулгуни кўпайтирилмайди: «**Кўп кулмагин, чунки бу қалбни ўлдираар**». Кулгуда ўртача бўлиш афзал: «**Биродарингга табассум қилмоқлигинг ҳам садақадир**». «(Сулаймон) унинг сўзидан кулиб-табассум қилди». (Намл сураси, 19-оят). Истеҳзо, масхара кулгуси эмас: «**Энди қачонки у Бизнинг оят мўъжизаларимизни уларга келтиргач, баногоҳ улар у (мўъжиза)лар устидан кула бошладилар**». (Зухруф

сураси, 47-оят) Аҳли жаннатнинг неъматларидан бири – кулгу: **«Энди бу (Қиёмат) кунда иймон келтирган зотлар кофирлардан кулурлар»**. (Мутаффифин сураси, 34-оят). Араблар тишлар оқи кўрингудек кулгини мақташган ва буни инсоннинг қалби кенглигидан, табиати саховатлилигидан, деб санашган. Хулқининг гўзаллиги ва зеҳни комиллигига далил қилишган.

Дарҳақиқат, Ислом – ақидалар, ибодатлар, ахлоқларнинг барчасида ўртачалик, мўътадиллик устига қурилган.

Маъюслик ва тунд аҳвол – нафс ноласининг, ақл галаёнининг, хулқ-атвор хиралашганининг аломати.

Аҳмад Амин ўзининг «Файзул Хотир» китобида айтади: «Ҳаётга табассум билан боқадиганлар бахтиёр бўлибгина қолмай, балки бирор бир иш қилишга, масъулиятни кўтара олишга, қийин аҳволларни енгиб ўтишга ва ўзлари учун ҳам, одамлар учун ҳам фойдали бўлган ишларни амалга оширишга ўзларида бир куч топадилар.

Агар менга кўп мол-давлат, катта мансаб ёки табассум қилувчи нафс, шулардан бирини танлаш ихтиёри берилганида, ҳеч иккиланмай иккинчисини – табассум қилувчи нафсни танлар эдим. Тунд одамга мол-давлат ярашмайди, маъюслик билан катта мансаб тўғри келмайди. Қалби тор ва танг ҳолда худди дўстининг жанозасидан келаётгандек турган тунд қиёфадаги инсонга ҳаётнинг ҳеч қандай қизиғи йўқдир. Уйи жаҳаннамга айланган маъюс аёлнинг жамолидан кўра, гўзал бўлмаса ҳам уйи жаннат бўлган аёл минг марта афзалдир.

Гул табассум қилур, боғлар табассум қилур, денгиз, анҳорлар, осмон, юлдузлар, қушлар буларнинг барчаси табассум қилур.

Инсон, агар унга бирор бир тама, ёмонлик ё худ-бинлик рўпара келмаса, унинг асли табиати табас-сумдан иборатдир. Аксинча бўлган инсон хушоҳанг табиатнинг оҳангини бузади, гўзалликни кўра олмайди, ҳақиқатни билмайди. Ҳар бир инсон дунёга ўз иш-амали, фикрлашининг ўлчами билан баҳо беради, агар иш яхши бўлиб, фикр тўғри келса, унинг учун дунё манзаралари тоза, покиза, дунёнинг ўзи ҳам асли яратилгандек гўзал бўлиб кўринади. Агар акси бўлса-чи, у ҳолда, гўё унинг манзаралари хиралашиб, ойналари қорая бошлайди ва ҳар бир нарсани ана шундай қоралиқдан иборат деб билади.

Баъзи бир инсонлар ҳар бир нарсадан бахтсизликни келтириб чиқаришса, баъзилар барча нарсадан саодатни барпо қиладилар.

Бу аёл фақат хато ишни кўради, бу кун қора кун бўлди, чунки бугун лаган синди, ошпаз таомни шўр қилиб қўйди.

Бу киши эшитган ҳар бир гапдан, арзимас бир ишдан (у ишни ўзи қиладими ёки бошқаси), олинган фойдадан, ёки ўзи кутаётгандек фойда бўлмаслигидан, барчасидан ёмон таъвил ясайди, унинг назарида барча нарса қорадек ва уни атрофидагиларга ҳам қора қилиб кўрсатади. Улар ёмонликни кўпиртиришга ўзларида куч топган одамлардир, улар оддий уруғдан дарахт ясайдилар, уларда яхшилик учун куч йўқ, ўзларига берилган неъматга, гарчи кўп бўлса ҳам хурсанд бўлмайдилар, ўзларига етган бу неъматдан бошқаларга инфоқ-эҳсон қилмайдилар.

Ҳаёт – ўрганадиган фан. Инсон уйига мол-дунё тўплашидан кўра ҳаётига гул, райҳон, муҳаббат кўчатини ўтказмоқлиги яхшироқдир.

Раҳмат, муҳаббат, гўзалликни тараққий эттириш ўрнига бутун куч-ҳаракат мол-дунё тўплашга қаратилган ҳаёт қанақа ҳаёт бўлди?

Аксар инсонлар ҳаёт гўзалликларини кўриш учун кўзларини каттароқ очмайдилар, улар кўзларини динор, дирҳамлар учун очадилар. Сердарахт боғлар, гўзал гулзорлар, булоқлар, сайроқи қушлар олдидан ўтадилар-у, уларга эътибор бермайдилар, улар у ерларга пул учун кириб, пул учун чиқадилар. Улар пулни бахтли ҳаёт кечириш воситаси деб биладилар ва содатли ҳаётларини ўша пул учун сотадилар, бизларга кўзлар гўзалликни кўриш учун берилган, бизлар эса уларни мол-дунёга қарашга одатлантирдик.

Умидсизлик нафсни ҳам юзни ҳам тунд қиёфага киргизади. Агар табассум қилишни истасанг – умидсизликка қарши курашгин. Бу дамлар барчамиз учун қулай фурсатдир, бизлар учун нажот эшиги очилгандир, бас ақлингни орзулар эшигини очишликка, келажакдан фақат яхшиликни кутишга одатлантир.

Агар сен ўзингни кичик ишлар учун яратилганман, деб эътиқод қилсанг, ҳаётингда фақат кичик нарсаларга эришасан. Агар сен ўзингни буюк ишлар учун яратилганман, деб билсанг – ўзингда барча тўсиқ-ғовларни енгиб ўтиб, кенг майдонга, олий мақсадларга эриштирадиган бир кучни топасан. Бу гапимизнинг тасдиқи моддий ҳаётимизда ҳам яққол кўринади: юз метрга югуриш мусобақасига қатнашган одам ўша маррага етгандан сўнг чарчоқни ҳис қилади, тўрт юз метрга югуришни қасд қилса, юз, икки юз метрга етганида ҳам чарчоқни билмайди. Руҳинг ҳам сенга мақсадингга яраша ҳимматни беради.

Нафсни зулмат исканжасида қолдириб, уни тунд қиёфага айлантирадиган нарса – умидсизлик, орзу қила олмаслик, фақат ёмонликни кўриб яшашлик, одамлар айбини ишаш ва фақат бу оламнинг ёмонликлари ҳақида жаврайвериш.

Инсон ўзининг табиий иқтидорини ўстириш, уни билимдон қилиш, уни қўли очиқлик, бағрикенгликка одатлантириб, у ҳаракат қилаётган эзгу мақсадлари имкони борича инсонларга яхшилик қилишининг омили эканлигини ва нафси нурни, муҳаббат ва эзгуликни таратадиган қуёш бўлишини, қалби меҳрга, яхшилик ва инсонийликка ҳамда у билан алоқадор барчага ёрдам бериш учун хайрихоҳликка тўла бўлишини ўргатгани каби муваффақиятни бошқа бирор нарсада топмайди.

Табассум қилувчи нафс қийинчиликни кўрганида, унга ғолиб бўлишдан лаззат топади, унга қараб ҳам, у билан курашаётганида ҳам, унга ғолиб бўлганида ҳам табассум қилади. Тунд қиёфа нафс эса қийинчиликни кўрганида, ортига қараб қочади, ҳимматини паст санайди ва «агар, кошки» каби сўзларни қўллай бошлайди. Уни бу аҳволга солган замон эмас, балки унинг хулқатвори, тарбиясидир. У ҳаётда нажот топишни иштайди, у ҳар йўлда пойлаб турувчи шерларни кутади, осмон олтин ёғдиришини, ердан хазиналар ёрилиб чиқишини кутади.

Ҳаётдаги қийинчиликлар мутаносиб ишлардир. Кичик бўлган нафс олдида ҳар нарса жудаям қийин, буюк нафс олдида эса бирор нарса қийинчилик туғдирмайди. Буюк нафс қийинчилик қанча кўп бўлмасин буюклиги ошиб бораверади. Заиф нафс эса ундан қочишга уринади. Қийинчилик худди қопағон ит кабидир, агар у сени ундан қўрқаётганингни, ортингга қайтмоқчи эканли-

гингни сезиб қолса, ҳуриб, ортингдан чопади. Аммо сени унга истехзо билан қараб, унга эътибор ҳам бермаётганигни билса, йўлни сенга бўшатиб беради ва сендан кўрқиб, ўралиб олади.

Нафсни паст, шаъни кичик, қиймати оз, деб билиш, у нафсни ҳалок қилади. Ундай ҳалок бўлган нафсдан катта ишлар содир бўлмайди, ундан яхшиликлар кутилмайди. Мана шундай нафсини арзимас санаган инсон ўзига бўлган ишончини, иймонининг қувватини йўқотади, бирор ишга киришмоқчи бўлса, ўз қобилиятига, ишни охирига етказишига шубҳа билан қарайди ва охир-оқибат сусткашлик қилиб мақсад қилган иши амалга ошмайди.

Нафсга ишонмоқ катта фазилатдирки, ундай нафс ҳаётнинг нажот устунидир.

Нафс билан разил саналган ғурурнинг орасида катта фарқ бордир. Ғурур нафснинг хаёлга, қалбаки бўлган шуҳратга интилишидир.

Ўзига юклатилган масъулиятни кўтаришликда қобилиятига суяниб, ўз иқтидор ва истеъдодларини намоён этмоқлиги ўша инсоннинг ўз нафсига бўлган ишончининг белгисидир.

Бизлар табассум, хушчақчақлик, қалби кенглик, саховат, руҳ мулойимлиги, гапга кўнадиган, ройиш, муқобил бўлишга нақадар муҳтожмиз.

Хулоса

Маҳзун бўлма! Чунки сен кеча ғам чекишни тажриба қилиб кўрдинг, бирор фойда бергани йўқ. Ўғлинг сувга ғарқ бўлди, қайғурдинг, ўғлинг нажот топдими? Отанг ўлди, қайғурдинг, тирилдими? Тижоратингда

зиён кўрганингда қайғурдинг, ўша зиёнларинг фойдага айландими?

Маҳзун бўлма! Чунки сен бир мусибатга қайғурганингда мусибатлар кўпайди. Фақирликдан нолиб, муваффақиятсизликка учрадинг, душманларингни сен ҳақингда айтган гапларидан хафа бўлиб, уларга ёрдам бердинг, ёмон иш бўлишидан хавотирда эдинг, у иш содир бўлмади.

Маҳзун бўлма! Чунки сен бу билан кенг ҳовлига, гўзал аёлга, мол-давлатга, катта лавозимга, аслзода фарзандларга эришмайсан.

Маҳзун бўлма! Чунки у сенга зилол сувни аччиқ, атиргулни заққум, боғларни қақраган сахрога ва ҳаётни тоқат қилиб бўлмас зиндонга айлантиради.

Маҳзун бўлма! Чунки сени икки кўзинг, икки қулоғинг, икки лаб ва икки оёқ-қўлинг, тилинг, дов-юрагинг бор, тинчлик, омонлик бор, бутун баданинг соғ-саломатдир. «Бас, (эй инсонлар ва жинлар) **Парвардигорингизнинг қайси неъматларини ёлғон дея олурсизлар?!**» (Раҳмон сураси, 13-оят).

Маҳзун бўлма! Чунки сенинг ўз эътиқод қилган дининг, яшайдиган уйинг, ейдиган нонинг, ичадиган сувинг, киядиган кийиминг, турмуш ўртоғинг бор. Бас, ғам-аламдан не фойда?!

Алам неъмат

Озор-алам ҳар доим ҳам таъна, зулм, истибдод остида қолмай, баъзан инсонга яхшиликни ҳам олиб келади.

Албатта, жўшқин дуо алам билан бирга келади, сидқидилдан айтилган тасбеҳ алам ёнида келади, то-

либи илмга таҳсил вақтида етган озорлар, талаби илм машаққатларини кўтариши унинг билимдон олим бўлишида ўз самарасини беради. Чунки у илм бошида куйиб, унинг ниҳоясида ёришади.

Шоир ўзининг айтмоқчи бўлган гапларини ифода қилиш вақтидаги қийналиши мақтовга лойиқ таъсирли бўлган адабиётни натижа қилиб беради, чунки унинг қалби, асаблари олов бўлиб ёнди ва шунинг натижасида туйғуларни титратди, дилларни жунбушга келтирди.

Агар толиби илм роҳат-фароғатда яшаб, танглик азобини, алам доғини тотмас экан у дангаса, сўлғин ва мадорсиз бўлади.

Агар шоир аччиқ алам тотмас экан, ғусса чекмас экан, унинг қасидалари сифатсиз гаплар, кўпик сўзлар уюмига айланади. Чунки унинг шеърлари дилидан эмас тилидан чиқади, сўзларни талаффуз қилар экан, қалби у билан бирга яшамайди.

Рисолат тонгида, Ислом бағрида, пайғамбарлик бошида яшаган мўминларнинг иймонлари буюк, қалблари пок, лаҳжаси соф, илми дарё эди. Улар очлик, фақирлик, ҳайдалиш, озор, қувғин ва сургун аламларида, дўстлардан, кўнгил яқинлардан ажралиш озорларида, жароҳат, зулм азобларида яшадилар, улар ҳақиқий соф, танланган, поклик белгиси, улуғлик нишонаси, фидокорлик рамзи бўлган инсонлардир. **«Зеро Оллоҳ йўлида уларга бирон ташналик, машаққат, очлик етса ва кофирларни ғазаблантирадиган бирон қадам боссалар, душманга бирон зиён етказсалар, албатта, улар учун бу ишлари сабабли яхши амал ёзилур. Зотан, Оллоҳ яхшилик қилгувчиларнинг амалларини зое қилмас».** (Тавба сураси, 120-оят)

Бас, аламдан жазавага тушмагин, машаққатдан кўрқма, чунки баъзан улар сенга қувват ва матонат бўлади. Чунки сен қалбинг порлаб, ғам-андухдан йироқ бўлиб яшамоғинг – туйғуларинг кучсиз-маъносиз, ғайратинг сўнган ҳолда яшашдан яхшироқдир. **«...Лекин Оллоҳ чиқишларини истамай, уларни дангаса қилиб қўйди ва уларга (ўзларидан бўлган кимсалар тарафидан): «Қолганлар (яъни аёллар, ёш болалар, ожиз-нотавон кишилар) билан бирга ўтираверинглар», дейилди».** (Тавба сураси, 46-оят)

Ёниб сўзлаётган воизнинг сўзлари қалб тубига етиб боради, руҳ қаърига шўнғийди, чунки у алам билан яшади. **«...Бас, У Зот уларнинг дилларидаги нарса (садоқат ва вафо)ни билиб, уларга сакинат-ором туширди ва уларни (Хайбар жангида эришиладиган) яқин ғалаба ва ўзлари(гина) оладиган кўпдан-кўп ўлжалар билан мукофотлади».** (Фатҳ сураси, 18–19-оятлар)

Мен кўп шоирларнинг девонларини ўқидим, аммо уларда на бир ҳаёт ва на бир руҳни кўрдим, чунки улар ўз сўзларини машаққат чекмай айтдилар, сўзларни қийналмай тартибга солдилар ва бу сўзлар худди қор парчаси, тупроқ уюмига ўхшаб қолди.

Кўп асарларни эшитгувчининг бир тукини ҳам титрата олмаслигини, қалбини ларзага келтиролмаслигини кўрдим, бунга сабаб улар ўз сўзларини шиддат, изтироб, алам ва қийинчиликсиз айтганликларидир: **«...Улар оғизларида кўнгилларида бўлмаган нарсани гапирмоқдалар...»** (Оли Имрон сураси, 167-оят)

Агар сўзларинг бошқаларга таъсирли бўлишини истасанг, аввал унинг чўғида ўзинг ёниб кўр, таъсир-

ланиб кўр. «...Энди қачонки Биз унинг устидан сув-ёмғир ёғдирсак, у ҳаракатга келиб кўпчир ва турлитуман гўзал (наботот) жуфтларини ундирур». (Ҳаж сураси, 5-оят)

Маърифат неъмат

«Ва билмаган нарсаларингизни билдири. Оллоҳнинг сизга қилган фазлу марҳамати улуғ бўлди». (Нисо сураси, 113-оят)

Жаҳолат – қалбни ўлдирар, ҳаётни қурбон қилар, умрни ўчирар. **«Албатта, Мен сенга жоҳил-нодонлардан бўлмасликни буюраман».** (Ҳуд сураси, 46-оят)

Илм – кўзнинг нури, руҳнинг ҳаёти. **«Ахир аввал ўлик (кофир) бўлган, сўнгра Биз уни (Ҳақ йўлга ҳидоят қилиш билан) тирилтириб, унга одамлар орасига ўзи билан бирга олиб юрадиган нурни (иймонни) бериб қўйганимиз бир киши – зулматларда қолиб кетган ва ундан ҳеч чиқувчи бўлмаган кимсага ўхшайдими?!».** (Анъом сураси, 122-оят)

Илм ортидан шодлик, хурсандчилик келади, чунки илм зулматни ёритади, орзуга етказди, беркилган пардани очади.

Нафс янгиликка интилади. Жаҳолат эса зерикиш ва қайғудан иборатдир, у ажибликдан йироқ, ёқимли бўлмаган ҳаётдир – кеча бугундек, бугун – эртадек.

Саодатни истасанг, илм изла, маърифат изла, фойда ҳосил қил, ғам-андух, қайғулардан нажот топасан. **«...ва айтинг: «Парвардигорим, илмимни янада зиёда қилгин».** (Тоҳа сураси, 114-оят). **«(Эй Муҳаммад алайҳиссалом, Сиз ўзингизга нозил бўладиган Қуръонни барча мавжудотни) яратган Зот бўлмиш Парвар-**

дигорингиз номи билан (бошлаб) ўқинг!». (Алақ сура-
раси, 1-оят). «Оллоҳ таоло қайси бандасига яхши-
ликни истаса, уни динда фақиҳ – англовчи қилиб
кўяди».

Маърифатдан йироқ кимса мол-дунёси, обрў-эъти-
бори билан фахрланмасин, бундай одамнинг ҳаёти тў-
кис эмас, ўтаётган умри комил эмасдир. «(Эй Муҳам-
мад алайҳиссалом), **ахир Сизга Парвардигорингиз**
томонидан нозил қилинган нарса аниқ ҳақиқат
эканини биладиган – иймон келтирадиган киши
(кўнгил кўзи) **кўр кимсага ўхшайдими?».** (Раъд сура-
си, 19-оят)

Маърифат шарафдир, маърифат-ла нафс шодон,
қалб тоза, ақл заковатлидир. «**Ахир Парвардигори то-**
монидан аниқ-равшан Хужжатга (яъни, Куръонга)
эга бўлган киши (яъни Расулуллоҳ алайҳиссалом
ва мўминлар), қилган ёмон амали ўзига чиройли
кўрсатиб қўйилган ва ҳавойи нафсига эргашган (ко-
фир) **кимсалар каби бўлурми?!».** (Муҳаммад сура-
си, 14-оят)

Сурур фани

Қалб сурури, унинг тинч-осойишталиги улуғ неъматдир. Чунки бунда зеҳн барқарорлиги, юксак самарадорлик ва руҳ шодлиги бордир.

Дерларким, сурур – ўрганиладиган фан, уни кўлга киритган, ундан фойдаланган одам ҳаёт гўзаллиги, яшаш суруридан ва туганмас неъматдан баҳра олган бўлади. Бунинг учун ўша инсондан сабр-тоқат, ҳеч қандай довул-бўронга эътибор бермаслик, воқеа-ҳодисотлардан ҳаяжонга тушмаслик, арзимас ишларга безовта бўлмаслик талаб қилинади.

Қалб қанча кучли ва соф бўлса, нафс ҳам шунча ёришиб боради.

Руҳий тушкунлик, қарши курашишдан ожизлик ва безовта нафс ғам-қайғу, ташвишларнинг қўним жойидир, нафсини сабр-тоқатга ўргатган инсондан безовталик кетади, танглик енгиллашади.

Савиянинг пастлиги, билимнинг саёзлиги, нафсга бўлган ғамхўрлик, бутун олам ва ундаги бор нарсаларни унутиш хурсандчиликнинг рақибларидир. Оллоҳ таоло душманларини мана бундай: «**...жонларининг ғамига тушиб қолдилар...**», деб сифатлайди». (Оли Имрон сураси, 154-оят)

Ана у ақли қосирлар коинотни ўзини кўрадилар, бошқа нарсалар ҳақида фикр юритмайдилар, бошқаларга эътибор бермайдилар.

Мен, сен, барчамиз жароҳатларни унутиш, ғам-андуҳлардан йироқ бўлиш учун нафсимизга бўлган эътиборни камайтиришимиз мақсадга мувофиқ ишдир, шунда икки нарсага – ўзимиз ва ўзгаларни бахтиёр бўлишига ҳисса қўшган бўламиз.

Ҳар ёнга алангламаслик учун ўз мафқурангни эҳтиётлаб, уни жиловлашинг сурур фанининг қоидаларидандир. Агар сен ўз мафқурангни ўз ҳолига ташлаб қўйсанг, ҳаддан ошади, сенга қайғу бўғчасини тутқизади ва сенга туғилганингдан бошлаб юпанч китобини ўқийди.

Мафқура қўлдан чиқса – мажруҳ мозийни қайтаради, хавотирли келажакни олиб келиб, таянчларингни ларзага солиб, вужудингни титратади, туйғуларингни куйдиради. Бас, ўз мафқурангни фойдали амалларни тўпловчи таважжуҳ жилов билан жиловла. «**Ва**

ўлмайдиган Тирик Зотга таваккул қилинг...». (Фурқон сураси, 58-оят)

Ҳаётга ўз баҳосини бериб, уни ўз ўрнига қўймоқлик ҳам сурур фанининг қоидаларидандир. Ҳаёт дилхушлиқдир, у фақат ундан юз ўгиришликка лойиқдир, чунки у ҳижрон онаси, фожиалар доясидир, у бахтсизликни олиб келур. Бас, шундай экан, бундай сифат эгасига эътибор бериш, унинг мусибатларига ғам чекишдан не наф?

Унинг софлиги кирлиқдир, у ёмғирсиз чақмоқдир, унинг ваъдалари саҳродаги сароб кабидир, унинг мавлуди мафқуддир, саййиди ҳасадлидир, унинг мулойимлигидан қўрқилур, унинг ошиғи хиёнат қиличи билан ўлдирилур.

Бу ҳаёти дунё ҳасрату нола, ғам-ташвишга арзимас.

Ҳақиқат шуки, сен ўз ҳаётингдан қайғу-ҳасратни олиб ташлолмайсан, чунки ҳаёт шундай яратилган: **«Дарҳақиқат, Биз инсонни меҳнат-машаққатга яратдик»**. (Балад сураси, 4-оят). **«Дарҳақиқат, Биз инсонни (вояга етганидан сўнг Шариат таклифлари билан) имтиҳон қилгувчи бўлган ҳолимизда (дастлаб яралишида оталик ва оналик сувларидан) аралаш бўлган нутфадан яратдик»**. (Инсон сураси, 2-оят). **«(Эй инсонлар, У) сизларнинг қайсиларингиз чиройлироқ-яхшироқ амал қилгувчи эканлигингизни имтиҳон қилиш учун ўлим ва ҳаётни яратган Зотдир»**. (Мулк сураси, 2-оят). Бу айтганларимиздан мақсад – ғам-андухдан имкон қадар йироқ бўлишдир, ундан бутунлай узилиш эса фақат жаннати наъийм эгаларигагина хосдир, улар айтадилар: **«Бизлардан ғам-қайғуни кетказган Зот – Оллоҳга ҳамду сано бўлсин»**. (Фотир сураси, 34-оят). Демак, ғилли-ғаш каби ғам-ҳасратдан

ҳам фақат жаннат эгаларигина халос бўлишлари мумкин экан: «...кўнгилларидан (бир-бирларига нисбатан бўлган) **ғиллу ғашликларни тортиб олурмиз...**». (Аъроф сураси, 43-оят)

Дунёнинг аҳволини, унинг сифатларини таниган одам у дунёнинг тўсиқлари, жафокашлиги, хиёнаткорлигини кечиради ва булар унинг табиати, хулқ-атворига хос эканлигини англайди.

Бас, шундай экан, фаросатли инсон дунёнинг ғамташвишларига таслим бўлиб, унга ёрдам бермаслиги ва имкон қадар мана бундай нохушликларнинг олдини олмоғи керак. «(Эй мўминлар), **улар**(га қарши жанг қилиш) **учун имконингиз борича куч ва эгарланган отларни тайёрлаб қўйингизки, бу билан сизлар Оллоҳнинг ва ўзларингизнинг душманларингизни ҳамда улардан ташқари сизлар билмайдиган – Оллоҳ биладиган бошқа бировларни ҳам кўрқувга солурсизлар**». (Анфол сураси, 60-оят). «**Ҳамда Оллоҳ Йўлида ўзларига етган машаққатлар сабабли сусткашлик – заифлик қилмаганлар ва (кофирларга) бўйин эгмаганлар. Оллоҳ мана шундай сабр қилгувчиларни севади**». (Оли Имрон сураси, 146-оят)

Хулоса

Қайғурма! Агар сен фақир бўлсанг, бошқалар қарздордир, агар сен бирор уловга эга бўлмасанг, бошқалар оёқлари чўлоқ ҳолдадирлар, агар сен бир фарзандингни йўқотган бўлсанг, бошқалар бир вақтнинг ўзида бир неча фарзандларини йўқотганлар.

Қайғурма! Чунки сен мусулмонсан, Оллоҳга, Расулига, фаришталарига, Қиёмат кунига, қазойи-қадарнинг яхшию ёмонига иймон келтиргансан. Улар эса Парвар-

дигорга кофир бўлдилар, элчиларни ёлғончи қилдилар, Китобларга тескари чиқдилар, Қиёмат кунини инкор этдилар, қазойи-қадарга ишонмадилар.

Қайғурма! Гуноҳ қилсанг – тавба қил, гуноҳинг учун истиғфор айт, хато қилсанг – тўғрила. Раҳмат – кенг, эшик – очик, мағфират – сероб, тавба мақбулдир.

Қайғурма! Акс ҳолда асабларинг осойишталигини бузиб, вужудингни, қалбингни қийнайсан, ўрнингни безовта, тунингни бедор қиласан.

Ҳиссиётларни жиловлаш

Икки сабаб – ўта шодлик ва чексиз алам пайтида ҳиссиётлар авж олиб, туйғулар бўрон отади. Ҳадисда: **«Мен икки аҳмоқона, нотўғри овоз қилишдан қайтарилдим, бири – неъмат келганда, иккинчиси – мусибат пайтида»**, дейилган. **«Токи сизлар қўлларингиздан кетган нарсага қайғурмагайсизлар ва (Оллоҳ) сизларга ато этган нарса билан шодланиб (ҳаволаниб) кетмагайсизлар»**. (Ҳадид сураси, 23-оят)

Улкан мусибатлар ва шод-хуррамлик онларида ўз туйғуларига эрк бермаган инсон сабр-сабот мартабасига, барқарорлик манзилатига ҳақлидир, улар роҳат саодатига етадилар, нафсга ғолиблик лаззатини тотадилар. Оллоҳ жалла ва аъло инсонни **мағрур ва мақтанчоқ**, деб сифатлади, **қачон унга ёмонлик (камбағаллик-кулфат) етиб қолса, у ўта бесабрлик қилгувчидир. Қачон унга яхшилик (бойлик, саломатлик) етса, у ўта ман қилгувчи-бахилдир. Фақат намоз ўқигувчи зотлар** улар кулфат ва шодликда ўртамиёнадирлар, фаровонликда шукр қилурлар, бало вақтида сабр қилурлар.

Туйғулари ҳаяжонга берилган инсон машаққатга йўлиқур, ҳолдан тояр, алам ютиб, бедор ўтар, ғазабланса туйғулари зўраяр, ғазабдан кўпирар, кўрқиб, кўрқитар, яширин нарсалар юзага чиқар, олов аланга олар, ҳаддидан ошар. Шод пайтида ҳаяжонланар, енгилтак бўлиб, шодлик гирдобиди ўзини унутар, қадрини туширар. Ўзи ёмон кўрган одамни бошқаларга ҳам ёмонлайди, унинг яхшиликларини унутади, фазилатларини ўчиради. Бировни яхши кўрса, унга ҳурмат нишонини тортиқ қилади, уни камолот чўққисига олиб чиқади.

Салафи солиҳлар шундай деганлар: «Яхши кўрган инсонингни ўта қаттиқ суймагин, эҳтимол бир кун ёмон кўриб қоларсан. Ёмон кўрганингдан ҳам қаттиқ ғазабнок бўлма, эҳтимол бир кун ҳабибингга айланар».

Ҳиссиётларига, ақлига эга бўлган, ҳар нарсаларни тарозуга солиб, ҳар нарса учун ўлчов қилган инсон ҳақни кўради, тўғри йўлни билади, ҳақиқат устида бўлади: **«Дарҳақиқат, Биз Ўз пайғамбарларимизни аниқ ҳужжат-мўжизалар билан юбордик ва улар билан бирга Китоб, (шунингдек) одамлар адолатни барпо қилишлари учун мезон – тарози туширдик».** (Ҳадид сураси, 25-оят)

Ислом – Тўғри Йўл, адолатли шариат ва муқаддас дин каби фазилат, ахлоқ ва одоб мезони билан ҳам келгандир: **«Шунингдек, (яъни Тўғри Йўлга ҳидоят қилганимиз каби), сизларни бошқа одамлар устида гувоҳ бўлишингиз ва Пайғамбар сизларнинг устингизда гувоҳ бўлиши учун ўрта (адолатли) бир миллат қилдик».** (Бақара сураси, 143-оят). Ислом адолат аҳкомлардаги каби ўрнатилган намунада ҳам матлабдир. Чунки дин оятларни тўғри айтиш, ҳукмларда, сўзларда,

иш-ҳаракат, ахлоқларда адолат устига қурилгандир: «Парвардигорингизнинг Сўзлари сидқу адолатда комил бўлди». (Анъом сураси, 115-оят)

Муҳаммад соллаллоҳу алайҳи васаллам билан бахтли саҳобалар

Дарҳақиқат, Пайғамбаримиз соллаллоҳу алайҳи васаллам инсонларга Раббоний даъват билан келди. У зотнинг катта мол-дунёси, хазинаю дафинаси, боғу бўстонлари ёки ҳашаматли қасрлари йўқ эди. Саҳобалар Ерда (яъни Маккада) озчилик ва заиф бечора бўлган ҳолларида, одамлар (яъни, Макка мушриклари) уларни талаб кетишларидан қўрқиб турган пайтларида қашшоқликда ҳаёт кечираётганларига, оғир машаққатда эканликларига қарамай, у Зотга байъат қилиш учун кела бошладилар. Шу билан бирга уларнинг Расулуллоҳ соллаллоҳу алайҳи васалламга бўлган муҳаббатлари ортиб борарди.

Маҳалла ичида қамал қилиндилар, ризқлари танг бўлди, шаънлари топталди, қариндошларидан душманликлар кўрдилар, одамлар томонидан озор кўрдилар, лекин шунга қарамай, Расулуллоҳ соллаллоҳу алайҳи васалламга бўлган муҳаббатлари камаймади.

Айримларини қайноқ қумларда судрадилар, бошқалари саҳроларга ташланди, баъзиларини азоблашда, қийноқларга солишда кофирлар турли-туман услубларни ўйлаб топишди, лекин улар У Зотни бор вужудлари билан севавердилар.

Ватанлари, аҳли оилалари, мол-давлатлари тортиб олинди, ёшлик йигитлик даврлари, умрнинг беғубор дамлари ўтган манзилларидан қувилдилар, лекин улар

Расулуллоҳ соллаллоҳу алайҳи васалламни бор вужудлари билан севавердилар.

Улар Расулуллоҳ соллаллоҳу алайҳи васалламнинг даъватлари сабабли турли балоларга дучор қилиндилар, қаттиқ зилзила – ларзаларга гирифтор қилиндилар, кўзлар тиниб, юраклар бўғизларга тиқилиб қолган вақтларида Оллоҳ ҳақида (турли ёмон) гумонларга ҳам бордилар. Лекин улар ҳамон Расулуллоҳ соллаллоҳу алайҳи васалламни бор вужудлари билан севавердилар.

Уларнинг беғубор ёшлик чоғлари ялтираган қиличларга кўндаланг қилинди. Бошлари узра яланғочланган қиличлар худди дарахтнинг куюқ шохларини эслатарди.

Улар жангга кетар эканлар, ўлимга худди сайрсаёҳатга, байрамга кетаётгандек кетар эдилар.

Бирлари бирор вазифа билан юборилар эканлар, ўз уйига қайтиб келмасликларини билган ҳолларида ўз вазифаларини адо этар эдилар. Бирлари муҳим топшириқ билан кетар эканлар, бу умрининг сўнгги онлари эканлигини билар ва розилик билан кетар эдилар. Чунки улар Расулуллоҳ соллаллоҳу алайҳи васалламни бор вужудлари билан севар эдилар.

Лекин, нега улар У Зотни бунчалик севар, у Зотнинг рисолати билан бахтиёр, у Зотнинг йўллари билан хотиржам, у Зотнинг келишидан хурсанд эдилар, нега у Зотга эргашиш бахтига муяссар бўлганлари учун ҳар қандай ғам-алам, машаққатни унутдилар?

Чунки улар Расулуллоҳ соллаллоҳу алайҳи васалламда барча эзгулик, шодлик маъноларини, барча ҳақиқат аломатларини кўрдилар. Расулуллоҳ соллаллоҳу алайҳи васаллам уларнинг қалб ташналигини ўз меҳри



билан қондирди. Дилларининг оловини ўз ҳадислари билан совутди, руҳларини ўз рисолати билан кўтарди.

Уларнинг қалбларига ризолик сувини сочди, бас, улар у Зотнинг даъвати йўлида аламларни ҳисобга олмадилар. Уларнинг нафсларига ишончни солди ва бу уларга ҳар қандай жароҳат, ғам-ташвишни унуттирди.

Уларнинг қалбларига ўз ҳидояти билан сайқал берди, дилларини ўз йўли билан нурга тўлдирди, елкаларидан жоҳилиятнинг оғир юкини, аввал ўтган бутпарастлик гуноҳларини, ширк, залолат қолдиқларини олиб ташлади.

Руҳларидаги гина-адоват ўтини ўчирди, туйғуларига ишонч сувини қўйди, бас, уларнинг нафслари ором олди, қалблари хотиржам бўлди, асаблари тинчланди.

Улар У Зот билан бирга ҳаёт лаззатини, У Зот яқинлигида дўстликни, У Зот дарғоҳида розиликни, У Зотга эргашишда тинчликни, У Зотнинг амрига бўйинсунишда нажотни, У Зотга эргашишда бойликни топишди.

«(Эй Муҳаммад алайҳиссалом), дарҳақиқат, Биз Сизни барча оламларга фақат раҳмат (яъни Оллоҳнинг раҳмати-жаннатига етаклагувчи) қилиб юбордик». (Анбиё сураси, 107-оят). «Албатта, Сиз (ўзингизга тушган ваҳий ёрдамида) Тўғри Йўлга етаклайсиз». (Шўро сураси, 52-оят). «...ва Ўз изну иродаси билан уларни зулматлардан нурга чиқарур». (Моид сураси, 16-оят). «У (Оллоҳ) омийлар (яъни аҳли Китоб бўлмаган илмсиз кишилар) орасига ўзларидан бўлган, уларга (Қуръон) оятларини тиловат қиладиган, уларни (ширк ва жаҳолатдан) по-

клайдиган ҳамда уларга Китоб – Қуръон ва ҳикмат – ҳадисни ўргатадиган бир Пайғамбарни (яъни, Муҳаммад алайҳиссаломни) юборган Зотдир. Шакшубҳасиз, улар (ўзларига Пайғамбар келишидан) илгари очиқ залолатда эдилар». (Жумъа сураси, 2-оят). «...ҳамда улардан юкларини ва устларидаги кишанларини олиб ташлайди (яъни Ислом динидан аввалги динларда бўлган оғир, машаққатли ибодатларни олиб ташлаб, уларнинг ўрнига осон ва енгилларини келтиради)». (Аъроф сураси, 157-оят). «Эй мўминлар, Оллоҳ ва Унинг Пайғамбари сизларни абадий ҳаёт берадиган нарсага (яъни Ҳақ Динга) даъват қилар экан, уни қабул қилинглр...». (Анфол сураси, 24-оят). «Ва дўзах чоҳининг ёқасида турган (пайт)ларингизда, У Зот сизларни ундан халос қилади». (Оли Имрон сураси, 103-оят)

Улар ўз Имомлари ва ўзлари яхши кўрган инсон билан ҳақиқий бахтиёр эдилар ва бахтли бўлишга ҳақли эдилар.

Оллоҳим, ақлларни йўлдан оғиш кишанидан озод этган, нафсларни адашиш бахтсизлигидан қутқарган зотга салоту саломинг бўлсин! Саҳобалардан, улуғлардан уларнинг қилган меҳнатлари ва эзгу ишларининг мукофоти учун рози бўлгин!

Ҳаётингдан зерикишни олиб ташла

Умрини ёлғиз сўқмоқларда ўтказаётган инсон машаққатга лойиқдир, чунки нафс бетоқатдир. Инсоннинг табиати бир хилликдан зерикади, шунинг учун Оллоҳ субҳонаҳу ва таоло замон билан макон, таом билан ичимлик ва барча махлуқотларни турли хил яратган; кеча ва кундуз, текислик ва тоғ, оқ ва қора, иссиқ

ва совуқ, илиқ ва салқин, ширин ва аччиқ. Оллоҳ таоло буларни Ўз китобида ҳам айтган: **«Унинг қорнидан алвон рангли ичимлик – асал чиқур. Унда одамлар учун шифо бордир».** (Наҳл сураси, 69-оят). **«...ва шохлаб кетган-шохламаган хурмолар бўлиб...».** (Раъд сураси, 4-оят). **«...(барглари) бир-бирига ўхшаган ва (мевалари эса) ўхшамаган ...».** (Анъом сураси, 141-оят). **«...Яна тоғлар орасида ҳам оқ, қизил – ранго-ранг йўл(ли тоғлар) ҳам, тим қора (тоғлар) ҳам бордир...».** (Фотир сураси, 27-оят). **«...ва Оллоҳ ҳақиқий иймон келтирган кишиларни билиши ҳамда ораларингдан шаҳидларни саралаб олиши учун бу кунларни (яъни ғалаба ва мағлубият кунларини) одамлар орасида айлантириб турамиз...».** (Оли Имрон сураси, 140-оят)

Бану Исроил бир хил таомдан зерикдилар: **«...Биз бир хил таомга ҳеч қаноат қила олмаяпмиз...».** (Бақара сураси, 61-оят). Расулulloҳ соллаллоҳу алайҳи ва саллам Қуръонни бир гал ўтириб, бир гал туриб ва яна бир гал юриб ўқиди ва **«нафс – зерикувчидир»**, деди. **«...Улар турганда ҳам, ўтирганда ҳам, ётганда ҳам Оллоҳни эслайдилар...».** (Оли Имрон сураси, 191-оят)

Ибодатларда ҳам навланиш бордир; қалбий, қовлий, амалий, молиявий ибодатлар; намоз, закот, рўза, ҳаж, жиҳод. Намоз қиём, рукуъ, сажда, қаъдадан иборатдир.

Безовталиқни тарқ қил

Қайғурма! Парвардигор айтар: **«(Эй Муҳаммад алайҳиссалом), Биз Сизнинг қалбингизни (иймон ва Қуръон нури билан) кенг, мунаввар қилиб қўймадикми?».** (Шарҳ сураси, 1-оят). Бу оят ҳақни кўтарган, нурни кўрган, ҳидоятни йўл тутганларнинг

барчасига оmdir. «Ахир Оллоҳ кўксини Ислom учун кенг қилиб кўйган, бас, ўзи Парвардигори томонидан бир Нур – Хидоят устида бўлган киши (куфр зулматларида адашиб-улоқиб юрган кимса билан баробар бўлурми)?! Бас, диллари Оллоҳни эслашдан қотиб қолган (яъни, Оллоҳни эслашни тарк қилган) кимсаларга ҳалокат бўлғай!...». (Зумар сураси, 22-оят). Демак, ҳақ – қалбларни ёритар, ноҳақлик эса уни тошбағир қилади. Бу дин – ғоядир, унга фақат тўғри йўлни танлаган инсон ета олади. «Ғамгин бўлма, албатта, Оллоҳ биз билан биргадир». (Тавба сураси, 40-оят). Бу сўзни Оллоҳнинг риоятига, лутфу-иноятига ишонган ҳар бир инсон айтади. «У кимсалар: «Албатта, Оллоҳ бизга бирон пайғамбар то бир қурбонлик атаб, уни (осмондан тушган) олов еб (яъни, ёндириб) кетмагунча унга иймон келтирмаслигимизни буюрган», дедилар. (Эй Муҳаммад алайҳиссалом) айтинг: «Муҳаққақки, мендан илгари сизларга кўп пайғамбарлар очиқ хужжатларни ва сизлар айтган нарсани (яъни, қурбонликларни) келтирганлар. Энди, агар шу айтган гапларингиз рост бўлса, нима унун уларни ўлдирган эдинглар?!». (Оли Имрон сураси, 183-оят). Унинг кифояти сенга етар, унинг бошқаришлиги сени ҳимоя қилар. «Эй Пайғамбар, Сизга ва Сизга эргашган мўминларга Оллоҳнинг Ўзи кифоядир». (Анфол сураси, 64-оят)

Шу йўлни ушлаган ҳар кимса зафар топади. «Ва ўлмайдиган Тирик Зотга таваккул қилинг...». (Фурқон сураси, 58-оят)

У Зотдан ўзгаси ҳаёт бўлмаган ўликдир, боқий бўлмаган кетгувчи, азиз бўлмаган хордир. «(Эй Муҳаммад алайҳиссалом, бу даъват йўлида Сизга ет-

ган озор-азиятларга) сабр-тоқат қилинг! Ёлғиз Оллоҳ (ёрдами) билангина сабр қила олурсиз. Уларнинг (яъни, мушрикларнинг динга кирмаганликлари) устида маҳзун бўлманг! Уларнинг макру ҳийлаларидан сиқилманг ҳам! Зотан, Оллоҳ тақводор бўлган ва чиройли амаллар қилгувчи зотлар билан биргадир». (Наҳл сураси, 127–128-оятлар). «(Эй мўминлар), куфрга қарши курашда (сустлашмангиз) ва (Ухуд жангидаги мағлубият сабабли) ғамгин бўлмангиз! Агар (ҳақиқий) иймон эгалари бўлсангиз – сизлар устун бўлгувчидирсизлар». (Оли Имрон сураси, 139-оят). «Улар сизларга озор беришдан бошқа ҳеч қандай зарар етказа олмайдилар. Агар сизлар билан урушсалар, кетларига қараб қочадилар. Сўнгра уларга (ҳеч ким томонидан) ёрдам берилмайди». (Оли Имрон сураси, 111-оят). «Оллоҳ (Лавҳул-Маҳфузга): «Шак-шубҳасиз, Мен Ўз пайғамбарларим билан бирга ғолиб бўлурман», деб ёзиб қўйгандир. Албатта, Оллоҳ – Кучли, Қудратлидир». (Мужодала сураси, 21-оят). «Албатта, Биз пайғамбарларимизга ва иймон келтирган зотларга ҳаёти дунёда ҳам, гувоҳлар (ҳозир бўлиб) турадиган Кунда (Қиёматда) ҳам ёрдам берурмиз». (Ғофир сураси, 51-оят)

Бу аҳдга хилоф қилинмас, бу ваъда асло кечикмас.

«Мен ўз ишимни Оллоҳга топширурман. Зеро, Оллоҳ бандаларини Кўриб тургувчидир. Бас, Оллоҳ у (иймон келтирган киши)ни уларнинг ёмон макру ҳийлаларидан сақлади...». (Ғофир сураси, 44–45-оятлар). «Мўминлар Ёлғиз Оллоҳнинг Ўзигагина таваккул қилсинлар – суянсинлар!». (Оли Имрон сураси, 160-оят)



Қайғурма! Ҳаётинг бу кундир, бас, нега бир кунлик ҳаётингда ғам чекиб, ғазаб отига миғансан?

Машойихлар дерлар: «Тонгга кирсанг, тунни кутма, тунга етсанг – тонгни кутма».

Яъни, бугунинг ҳудудида яша, мозийни унут, келажакка шошилма. Шоир айтганидек:

Ўтган ўтди, келажак ғойибдир, билгин.

Шу соатлар фойдадир, кулоққа илгин.

Ўтмиш билан ўралашиб, уни эслаб, ҳозир ва ўтган мусибатларни чайнаш – аҳмоқликнинг бир навидир.

Хитой мақолида айтилади: Кўприқдан унга етмай туриб ўтмагин!

Яъни ҳодисаларнинг ғам-ташвишларини бошдан ўтказмай туриб, унга шошилмагин.

Салафлардан бири айтади: «Эй одам боласи, Сенинг ихтиёрингда уч кун бордир; кечаги кун ўтди, эрта ҳали келгани йўқ, бугун эса Оллоҳдан кўрққин.

Ўтмиш ва келажак ташвишларини елкасига кўтарган одам қандай ҳаёт кечиради, ўтган ишларни ўйлашдан роҳат йўқдир, аксинча, ўтмиш воқеасини хотирлаш инсонга азоб беради, бундай аламдан фойда йўқдир.

Тонгга кирсанг, тунни кутма, тунга етсанг – тонгни кутма. Яъни ҳаёлотни қисқартир, ажални кут, яхши амал қил. Бугунги ташвишни эртанги кун учун қолдирма, хулқингни чиройли тутиб, соғлиқ учун эътибор қаратиб, ўзгалар билан муомалангни ислоҳ қилган ҳолда барча ҳаракатингни бугунинг учун қил.

Хулоса

Қайғурма! Қазо қайғудан фориғдир, Қадар воқийдир, қаламлар қуриган, саҳифалар ёпилган, барча иш

мангу барқарордир. Қайғу воқедаги нарсани олдинга ҳам ортга ҳам силжита олмас, унга на қўшимча қилар ва на камайтирар.

Қайғурма! Бу билан сен замон тўхташини, қуёш тутилиб, соат миллари ортга қайтишини, ортга юришликни, ҳатто анҳор тескари оқишини истамоқдасан.

Қайғурма! Қайғу ҳавони бузувчи, сувни ағдариб, осмонни ўзгартирган, ям-яшил бўстон ичидаги зилол чашмаларни лойқа қилган бўрон шамоли кабидир гўё.

Қайғурма! Маҳзунлик тентак анҳор кабидир, бир денгиздан тушиб, иккинчи денгизга қуйилур. Қайғу худди ўзи тўқиган нарсасини пишиқ-пухта бўлганидан сўнг парча-парча қилиб бузиб-чуватиб ташлаган хотинга ўхшайди. У тешик халтани пуфловчи кабидир, у бармоқлари билан сувга ёзган котиб кабидир.

Қайғурма! Зеро роҳат ва саодатинг сенинг ҳақиқий умрингдир, бас, бу кунингни қайғуга берма, тунларингни ғамга улашма, соатларингни ташвиш учун тақсимлаб берма, бу соатларни ҳаётингни зое қилиш учун исроф қилма, чунки Оллоҳ исрофгарларни хушламас.

Тавбанг қабулидан хушнуд бўл

Буюк Парвардигорингнинг Сўзи дилингни шод, ғам-андуҳлардан фориғ қилмайдими, сенга саодат бахш этмайдими: «(Эй Муҳаммад алайҳиссалом), **Менинг** (турли гуноҳ-маъсиятлар қилиш билан) **ўз жонларига жиноят қилган бандаларимга айтинг:** «Оллоҳнинг раҳмат-марҳаматидан ноумид бўлманг! Албатта, Оллоҳ (Ўзи хоҳлаган бандаларининг) барча гуноҳларини мағфират қилур. Албатта, Унинг **Ўзигина Мағфиратли, Меҳрибондир**». (Зумар сураси,

53-оят). У Зот, хусусан, хато ва маъсиятларда чекдан чиққан кимсаларнинг қалбларига умид бахш этиб, уларнинг руҳларини Ўзига яқин олиб «**Эй бандаларим!**», деб хитоб қилди. Уларни Оллоҳнинг мағфиратидан ноумид бўлишдан қайтарди ҳамда уларга Оллоҳ тавба қилган ҳар бир бандасининг каттаю кичик барча гуноҳлари кечиришлигининг хушxabарини берди.

Ахир Оллоҳ таолонинг қуйидаги сўзидан хурсанд бўлмайсанми?: «(У тақводор зотлар) **қачон бирон-бир фаҳш-гуноҳ қилиб қўйсалар ёки** (қандайдир нолойиқ иш қилиш билан) **ўзларига зулм қилсалар, дарҳол Оллоҳни эслаб, гуноҳлари учун мағфират – кечирим сўрайдиган – ҳар қандай гуноҳни Ёлғиз Оллоҳгина мағфират қилур – билган ҳолларида қилган гуноҳларида давом этмайдиган кишилардир**». (Оли Имрон сураси, 135-оят). «**Ким бирон бир ёмон иш қилса ёки** (Оллоҳнинг буйруқларига итоат этмасдан) **ўз жонига жабр қилса, сўнгра Оллоҳдан мағфират сўраса, Оллоҳни Мағфират қилгувчи ва Меҳрибон эканини топар – кўрар**». (Нисо сураси, 110-оят). «**Агар сизлар манъ этилган гуноҳларнинг** (Оллоҳга ширк келтириш, ота-онага оқ бўлиш, бировни ноҳақ ўлдириш каби) **катталаридан сақлансангиз, қилган (кичик) гуноҳларингизни ўчирурмиз ва сизларни улуғ манзил – жаннатга киритурмиз**». (Нисо сураси, 31-оят). «**Агар улар (шайтондан ҳукм сўраб боришлари билан) жонларига жабр қилган пайтларида дарҳол сизнинг олдингизга келиб, Оллоҳдан мағфират сўраганларида ва Пайғамбар ҳам улар учун мағфират сўраганида эди, Оллоҳнинг тавбаларни Қабул қилгувчи, Меҳрибон эканлигини топган бўлур эдилар**». (Нисо сураси, 64-оят). «**Ва Мен**

тавба қилган ҳамда иймон келтириб, яхши амаллар қилган, сўнгра Тўғри Йўлга юрган кишиларни Мағфират қилгувчидирман». (Тоҳа сураси, 82-оят)

Мусо бир жонни ўлдирганида, У Зот деди: «Парвардигорим, дарҳақиқат, мен ўз жонимга жабр қилиб қўйдим. Энди Ўзинг мени мағфират қилгин. Бас, (Оллоҳ) уни мағфират қилди». (Қасос сураси, 16-оят)

Довуд алайҳиссалом тавба қилганидан сўнг деди: «Бас, Биз унинг ўша (хатоси)ни мағфират қилдик. Шак-шубҳасиз, унинг учун Бизнинг ҳузуримизда яқинлик ва гўзал оқибат (яъни, жаннат) бордир». (Сод сураси, 25-оят)

Оллоҳ қанчалар Раҳмлидир ва Буюқдир, ҳатто У Зот Оллоҳ учта дегувчиларга ҳам Ўз раҳмат ва мағфиратини дариғ тутмади: «Оллоҳ – Учтанинг (яъни Оллоҳ, Марям, Ийсонинг) биридир, деган кимсалар ҳам аниқ кофир бўлдилар. Чунки Ягона Илоҳдан (Оллоҳдан) бошқа бирон илоҳ йўқдир. Агар улар айтаётган гапларидан тўхтамасалар, албатта, улардан кофир бўлган кимсаларни аламли азоб ушлайди. Ахир улар Оллоҳга тавба қилиб, У Зотдан мағфират қилишини сўрамайдиларми?! Оллоҳ Мағфиратли, Меҳрибон-ку!». (Моида сураси, 73–74-оятлар)

Расулуллоҳ соллаллоҳу алайҳи васаллам дедилар: «Оллоҳ таборака ва таоло айтар: «Эй одам боласи, модомики сен Менга дуо қилиб, Мендан умидвор бўлар экансан, ҳеч бир парвосиз барча гуноҳларингни кечираман. Эй одам боласи, агар гуноҳларинг осмон булутлари қадар етиб, сўнгра Мендан мағфират сўрасанг, ҳеч бир парвосиз мағфират қиламан. Эй одам боласи, агар бутун заминни хатоларга кўмиб ташлаб, сўнгра Менинг

хузуримда Менга ширк келтирмай рўбарў бўлсанг, ҳеч бир парвосиз ўша замин узра гуноҳларингни кечираман».

«Саҳихул-Бухорий»да ривоят қилинади, Расулуллоҳ соллаллоҳу алайҳи васаллам дедилар: **«Албатта, Оллоҳ таоло кундузда гуноҳ қилганлар тавба қилишлари учун тун пайтида, тунда гуноҳ қилганлар тавба қилишлари учун кундуз пайтида қўлини чўзар, то қуёш мағрибдан чиққунга қадар шу ҳол давом этади».**

Ҳадиси Кудсийда айтилади: **«Эй бандам, сизлар кечаю кундуз гуноҳ қиласизлар, Мен эса барча гуноҳларни кечирурман, бас, Мендан мағфират сўранглар – мағфират қилурман».**

Саҳиҳ ҳадисда айтилади: **«Жоним қўлида бўлган зотга қасамки, агар сизлар гуноҳ қилмасангизлар, Оллоҳ таоло сизларни кеткизиб, бошқа гуноҳ қиладиган қавмни келтирур, улар гуноҳ қилиб, Оллоҳдан мағфират сўрашар, У Зот уларни мағфират қилар».**

Саҳиҳ ҳадисда айтилади: **«Жоним қўлида бўлган зотга қасамки, агар сизлар гуноҳ қилмаганларингизда, сизларнинг устингизда гуноҳдан ҳам қаттиқроқ нарса – ўздан фахрланиш балосидан кўрққан бўлар эдим».**

Саҳиҳ ҳадисда айтилади: **«Барчангиз хато қилурсизлар, хатокорларнинг яхшиси эса тавба қилгувчиларидир».**

«Устида таому ичимлиги ортилган туясини саҳрода йўқотиб, ортидан истаб, топа олмай нумид бўлиб ухлаб қолган, сўнгра уйқудан уйғониб туяси олдида турганини кўриб, қаттиқ хурсанд

бўлганидан Оллоҳим Сен бандамсан, мен Парвардигорингман, деб хато айтиб юборган одамнинг шодлиги қай даражада бўлса, Оллоҳ таоло ҳам Ўз бандаси тавба қилганда ундан ҳам кўпроқ хурсанд бўлади».

Яна бир саҳиҳ ҳадисда айтилади: «**Гуноҳ қилган банда айтади: «Оллоҳим, гуноҳимни кечир, зеро, гуноҳларни Сендан ўзгаси кечмас». Сўнгра иккинчи бор гуноҳ қилиб дер: «Оллоҳим, гуноҳимни кечир, зеро, гуноҳларни Сендан ўзгаси кечирмас». Сўнгра учинчи бор гуноҳ қилиб айтади: «Оллоҳим, гуноҳимни кечир, зеро Ёлғиз Ўзинг гуноҳларни кечирурсан». Шунда Оллоҳ азза ва жалла айтади: «Бандам гуноҳлар билан жазолайдиган, шу билан бирга гуноҳларни кечиргувчи Парвардигори борлигини билди, бандам истаганини қилсин».** Яъни, модомики Менга тавба қилиб, истиғфор айтар, афсусланар экан – Мен уни кечирурман.

Ҳар бир нарса Қазо ва Қадар биландир

Ҳар бир нарса Қазо ва Қадар биландир, бу ҳар бир мусулмоннинг, ҳидоят Элчиси издошларининг эътиқодидир. Коинотдаги ҳар бир нарса фақат Оллоҳнинг илми, изни ва тақдири билан бўлур.

«На Ерга ва ўзларингизга бирон мусибат етмас, магар (етса), Биз уни пайдо қилишимиздан илгари Китобда (Лавҳул-Маҳфузда битилган) бўлар. Албатта, бу Оллоҳга осондир». (Ҳадид сураси, 22-оят)

«Албатта, Биз ҳар бир нарсани (аниқ) ўлчов билан яратдик». (Қамар сураси, 49-оят)

«Албатта, Биз сизларни хавфу хатар, очлик, молу жон ва мева-чеваларни камайтириш каби нарса-

лар билан имтиҳон қиламиз. (Эй Муҳаммад алайҳис-салом), бирор мусибат келганда: «Албатта, биз Оллоҳнинг (бандаларимиз) ва албатта, биз У Зотга қайтгув-чилармиз», дейдиган сабрли кишиларга хушxabар беринг!». (Бақара сураси, 155–156-оятлар)

Ҳадисда айтилади: «*Мўминнинг иши ажойиб, барча нарса унга яхшиликдир – хурсанд бўлганда шукр қилса ўзига яхши, қийинчиликда сабр қилса, бу ҳам унга фойда, бундай имконият фақат мўминда бордир*».

Саҳиҳ ҳадисда айтилади: «*Сўрасанг, Оллоҳдан сўра, У Зотдан ёрдам тила ва билгинки, агар бутун уммат жамланиб сенга фойда бермоқчи бўлсалар, бунинг уддасидан чиқа олмаслар, фақат Оллоҳ сенга ёзган нарсагина бўлур. Агар бутун уммат сенга зарар етказмоқчи бўлсалар – етказа олмаслар, фақат Оллоҳнинг ёзгани бўлур. Қаламлар кўтарилди, саҳифалар қуриди*».

Яна бир саҳиҳ ҳадисда айтилади: «*Сенга етгани хато кетмас, хато кетгани сенга етмас*».

Ҳадисда айтилади: «*Эй Абу Ҳурайра, қалам сен йўлиқадиган нарсаларни ёзиб, қуриб ҳам бўлди*».

Бошқа бир ҳадисда айтилади: «*Сенга фойдали бўлган нарсаларга интилгин, Оллоҳдан ёрдам сўра, ожиз қолма, агар шундай қилганимда бундай бўлар эди, дема. Балки, Оллоҳнинг тақдири, У Зот ўзи хоҳлаган ишни қилади, деб айтгин*».

Саҳиҳ ҳадисда айтилади: «*Оллоҳ бандасига қазо қилган нарса у банда учун яхшиликдир*».

Шайхул Ислом Ибн Таймийядан гуноҳнинг бандага фойдаси борми, деб сўралди, шунда у зот: «Фойдаси бор, яъни ўша гуноҳи учун надомат чекиб, тавба қилиш,

мағфират сўраш ва хокисор бўлиш инсон учун фойда-
дир», деб жавоб бердилар.

**«(Зотан,) сизлар ўзингиз учун яхши бўлган нар-
сани ёқтирмаслигингиз ва сизлар учун ёмон бўлган
нарсани яхши кўришингиз мумкин. Оллоҳ билур,
сизлар билмасиз».** (Бақара сураси, 216-оят)

Кенглик кутгин

Термизий ривоят қилган ҳадисда айтилади: **«Кенг-
ликни кутиш ибодатларнинг афзалидир».**

Ғамгинларнинг тонги отур, бас, тонгни кутгин, кенг-
ликларни очгувчининг очиб юборишига кўз тутгин.

Араблар айтади: «Арқон таранглашса – узилади».
Бунинг маъноси, ишлар қийинлашса, унинг чорасини
кутгин.

«Ким Оллоҳдан кўрқса (яъни юқорида мазкур
бўлган талоқ қилиш қонун-қоидаларига Оллоҳдан
кўрққани учун риоя этса), **У Зот унинг учун** (барча ғам-
кулфатлардан) **чиқар йўлни** (пайдо) **қилур».** (Талоқ
сураси, 2-оят) **«Ким Оллоҳдан кўрқса, (Оллоҳ) унинг
ишини осон қилур».** (Талоқ сураси, 4-оят)

Саҳиҳ ҳадисда айтилади: **«Мен банданинг хаёлида-
ман, бандам Мен ҳақимда истагандек гумон қилсин».**
**«Ким Оллоҳдан кўрқса, (Оллоҳ) унинг ёмонлик-
гуноҳларини ўчирур ва унинг ажр-мукофотини улуғ
қилур».** (Талоқ сураси, 5-оят)

**«Албатта, Мен бандамнинг гумонидадирман,
бас, бандам Менга хоҳлаган гумонини қилсин».**

**«Ҳар қачон ўша пайғамбарларимиз ноумид бў-
либ: «Бизлар ёлғончи қилиндик – пайғамбар экан-
лигимизга ишонмадилар», деб ўйлай бошлаганла-
рида, уларга Бизнинг мададимиз – ғалабамиз ке-**

либ, Биз хоҳлаган кишиларга нажот берилар эди». (Юсуф сураси, 110-оят)

«Бас, албатта, ҳар бир оғирлик-машаққат билан бирга бир енгиллик ҳам бордир. Албатта, ҳар бир оғирлик-машаққат билан бирга бир енгиллик ҳам бордир». (Шарҳ сураси, 5–6-оятлар). Баъзи муфассирлар айтадилар, баъзилар бу гапни ҳадис ҳам дейишади: **«Бир қийинчилик икки енгилликни енга олмайди».**

«...эҳтимол Оллоҳ бундан кейин бирон ишни пайдо қилар». (Талоқ сураси, 1-оят)

«...Огоҳ бўлингизким, Оллоҳнинг ёрдами яқиндир». (Бақара сураси, 214-оят)

Саҳиҳ ҳадисда айтилади: **«Билгинки, ғалаба сабр билан, кенглик танглик билан биргадир».**

Хулоса

Маҳзун бўлма! Хазинангдаги мол-давлат, баланд қасрлар, гулзор бўстонлар агар сенда хафалик, ноумидлик бўлса, ғам-андуҳингни оширса оширадики, камай-тирмайди.

Маҳзун бўлма! У ҳолда табобат гиёҳи, дорихона дорилари, табиб кўрсатмаси сени бахтли қила олмайди. Чунки сен қайғуни қалбингга жойлаштирдинг, уни кўзингга тўшадинг, қалбингга ёйдинг, жисмингни у билан ёпдинг.

Маҳзун бўлма! Чунки сен дуо қилишга, ўзингни Парвардигорнинг остонасига ташлашга қодирсан, подшоҳлар Подшоҳининг эшиги олдида маскан тута оласан, сенинг ихтиёрингда кечанинг охирги қисми бор, сенинг олдингда пешонангни саждага қўйиш соатлари бордир.



Маҳзун бўлма! Чунки Оллоҳ таоло сен учун Ерни ва ундаги бор нарсани яратди, сен учун **гўзал боғларни ўстирди, у боғларда (ўсимлик, мевалардан) ҳар турли гўзал жуфтларни, тизилган (мевали) новдалари бўлган баланд хурмоларни ундириб-ўстиради, ялтироқ юлдузларни, анҳору булоқларни сен учун яратиб қўйди-ку, нега ғамгин бўласан?!**

Маҳзун бўлма! Чунки сен зилол сувларни ичяпсан, ҳаводан эркин нафас оляпсан, оёқларинг саломат ҳолда юриб, кечалари тинч-ором оляпсан.

Истиғфорни кўп айт

«Мен дедимки: «Парвардигорингиз (Оллоҳ)дан мағфират сўранглар, албатта, У ўта Мағфиратли бўлган Зотдир. (Шунда) У Зот устларингизга осмондан ёмғир қуйдирур. Ва сизларга мол-дунё, бола-чақа билан мадад берур ҳамда сизларга боғу бўстонлар (ато) қилур ва сизларга оқар дарёлар (ато) қилур». (Нух сураси, 10–11–12-оятлар)

Истиғфорни кўп айт, шунда кенглик, хотиржамлик, ҳалол ризқ, солиҳ фарзанд ва мўл-кўл баракотни топасан.

«(Оллоҳ сизларга амр қилурки), Парвардигорингиздан мағфират сўранглар, сўнгра Унинг Ўзига тавба қилинглари, шунда (У) сизларни маълум муддатгача (ажалларингиз етгунича) чиройли мато – фойдаланиш билан фойдалантирур ва ҳар бир яхшилик соҳибига яхшилик (яъни ажр-мукофот) берур». (Худ сураси, 3-оят)

Ҳадисда айтилади: **«Ким истиғфорни кўп айтса, Оллоҳ таоло унинг учун ҳар қандай ғамдан қуту-**

лиш, ҳар қандай сиқилишдан чиқиш йўлини кўрсатур».

Саййидул истиғфори тилингдан қўйма: «Оллоҳим, Сен Парвардигоримсан, Сендан ўзга илоҳ йўқдир, Сен мени яратгансан, Мен Сенинг қулингман. Им-коним борича аҳду ваъдамда тураман. Қилган ишларимнинг ёмонлигидан Сендан паноҳ сўрайман, неъматларингга қуллуқ қиламан, гуноҳларимга тавба қиламан, мени кечир, чунки фақат Сенгина гуноҳларни кечирурсан».

Оллоҳни доим зикр қил

«...Огоҳ бўлингизким, Оллоҳни зикр қилиш билан қалблар ором олур». (Раъд сураси, 28-оят)

«...Бас, Мени эслангиз, Мен ҳам сизларни эсламан...». (Бақара сураси, 52-оят)

«...Оллоҳни кўп зикр қилгувчи эркаклар ва (Оллоҳни кўп) зикр қилгувчи аёллар...». (Аҳзоб сураси, 35-оят)

«...Эй мўминлар, Оллоҳни кўп зикр қилинглар! Ва эртаю кеч У Зотни поклаб, тасбеҳ айтинглар!». (Аҳзоб сураси, 41–42-оятлар)

«Эй мўминлар, на мол-дунёларингиз ва на бола-чақаларингиз сизларни Оллоҳнинг зикридан (яъни, Оллоҳга ибодат қилишдан) юз ўгиртириб қўймасин!...». (Мунофиқун сураси, 9-оят)

«Ва бирон нарса ҳақида: «Мен, албатта, бу ишни эртага қилгувчиман», дея кўрманг, магар «иншооллоҳ – Оллоҳ хоҳласа», (денг! Бу сўзни айтишни унутиб қолдирган вақтингизда (ёдингизга тушиши билан) Парвардигорингизни зикр қилинг (яъни, «иншооллоҳ», денг) ...». (Каҳф сураси, 23–24-оятлар)

«...Ва (тонгда уйқудан) турган пайтингизда Парвардигорингизда ҳамду сано айтиш билан (У Зотни барча айб-нуқсондан) покланг! Шунингдек, кечадан (бўлган соатларда) ҳам у Зотга тасбеҳ айтинг!». (Ваттур сураси, 48–49-оятлар)

«Эй мўминлар, (сизлар билан жанг қилаётган кофир) жамоатга рўбарў бўлганингизда саботли бўлингиз ва доимо Оллоҳни ёд этинг, шояд нажот топурсизлар». (Анфол сураси, 45-оят)

Саҳиҳ ҳадисда айтилади: **«Парвардигорини зикр қилгувчи билан бунинг аксининг мисоли худди тирик билан ўлик кабидир».**

Расулуллоҳ соллаллоҳу алайҳи васаллам: **«Ёлғиз ҳолда қолганлар ўзиб кетдилар»**, деди. Саҳобалар: **«Улар кимлар, ё Расулуллоҳ? – деб сўрашди. Шунда у зот: «Улар Оллоҳни кўп зикр қилгувчи эркак ва аёллардир», – деб жавоб берди.**

Яна бир саҳиҳ ҳадисда айтилади, Расулуллоҳ соллаллоҳу алайҳи васаллам саҳобаларига қарата: **«Сизларга энг афзал, Подшоҳинглар олдида энг пок, сизлар учун олтин-кумушни инфоқ қилишдан ҳам яхшироқ, душманга йўлиқиб, ғазот қилишдан ҳам афзалроқ бўлган амални айтайми? – дедилар, саҳобалар: «Ҳа, ё Расулуллоҳ», – дейишди. У зот: «Бу Оллоҳни зикр қилишдир», – деб жавоб берди.**

Яна бир ҳадисда: **«Бир киши Расулуллоҳ соллаллоҳу алайҳи васалламнинг ҳузурига келиб: «Эй Расулуллоҳ, Ислом буюрган амаллар менга кўплик қияпти, ёшим ҳам катта, шунинг учун мен маҳкам ушлашим керак бўлган ишни айтинг», – деди. Шунда у зот: «Тилинг доим Оллоҳнинг зикри билан нам бўлсин», – деди.**

Оллоҳнинг раҳматидан ноумид бўлма

«Эй ўғилларим, боринглар, Юсуф ва унинг биродарини изланглар ва Оллоҳнинг раҳматидан ноумид бўлманглар. Зеро, Оллоҳнинг раҳматидан фақат кофир қавмгина ноумид бўлур». (Юсуф сура-си, 87-оят)

«Ҳар қачон ўша пайғамбарларимиз ноумид бўлиб: «Бизлар ёлғончи қилиндик – пайғамбар эканлигимизга ишонмадилар», деб ўйлай бошлаганларида, уларга Бизнинг мададимиз – ғалабамиз келиб, Биз хоҳлаган кишиларга нажот берилар эди. (Аmmo) жиноятчи бўлган қавмдан бизнинг азобимиз қайтарилмас!» (Юсуф сура-си, 110-оят)

«Бас, Биз унинг (дуосини) мустажоб қилдик ва уни ғам-ғуссадан қутқардик. Биз мўминларга мана шундай нажот берурмиз». (Анбиё сура-си, 88-оят)

«...ва сизлар Оллоҳ ҳақида (турли ёмон) гумонлар қила бошлаган эдинглар . Ана ўша жойда мўминлар (яна бир бор) имтиҳон қилиндилар ва (бу даҳшатдан) қаттиқ ларзага тушдилар». (Аҳзоб сура-си, 10–11-оятлар)

Сенга ёмонлик қилганни кечир

Одамларга адоват билан қарайдиган, улардан қасос – ўч олиш ўтида ўртанадиган кимса ўта қиймат тўлов тўлайди. У ғазаб ўтида ёнар экан, жисми-жони қовурилади, қалби ўртанади, асаблари қақшайди, роҳат-фароғатидан айрилади. Демак, у шак-шубҳасиз зиён кўргувчидир. Бунинг давосини эса бизга Оллоҳ таоло ушбу оятларида хабар берган:

«...ғазабларини ичларига ютадиган, одамларнинг (хато-камчиликларини) афв этадиган кишилардир...». (Оли Имрон сураси, 134-оят).

«(Эй Муҳаммад алайҳиссалом), афв – марҳаматли бўлинг, яхшиликка буюринг ва жоҳиллардан юз ўгиринг!». (Аъроф сураси, 199-оят)

«...Сиз (ҳар қандай ёмонликни) энг гўзал сўзлар билан даф қилинг! (Шунда) баногоҳ сиз билан ўрталарингизда адоват бўлган кимса қайноқ-содиқ дўст каби бўлиб қолур». (Фуссилат сураси, 34-оят)

Сенга кўп неъматлар берилди

Оллоҳнинг улуғ неъматлари, буюк яхшиликлари ҳақида ўйлаб, бу неъматларга шукр қил ҳамда сенга Оллоҳнинг жуда кўп яхшиликлари берилган эканлигини билгин.

«Агар сизлар Оллоҳнинг неъматларини санасангиз, саноғига ета олмайсизлар...». (Наҳл сураси, 18-оят)

«...ва сизларга барча зоҳирий ва ботиний (яъни моддий, маънавий) неъматларини комил қилиб берганини кўрмадингларми?!». (Луқмон сураси, 20-оят)

«Сизларга берилган барча ноз-неъматлар Ёлғиз Оллоҳдандир». (Наҳл сураси, 53-оят)

«Ахир Биз унга икки кўз, тил ва икки лаб (ато) қилмадикми?! Ва Биз уни икки баландликка (яъни яхшилик ёки ёмонлик довларини ошиб ўтишга) йўллаб қўйдик-ку!». (Балад сураси, 8–9–10-оятлар)

Оллоҳнинг неъматлари пайдар-пай эканлигини кўргин: ҳаёт, соғлиқ, кўз, қулоқ, қўл ва оёқ неъматлари,

сув, ҳаво, озиқ-овқат неъматлари, булардан ҳам энг буюги Раббоний Ҳидоят бўлмиш Ислом неъматидир.

Дедилар: «Миллиард доллар учун икки кўзинг, кулоғинг, оёқ-қўлинг, юрагингдан кеча оласанми? Сенинг шукрини адо қила олмаётган қанчалар кўп давлатинг бор!».

Дунё ғам чекишга арзимас

Арзимас ишларга эътиборсиз бўлиш саодатнинг давомли бўлишига асосдир. Зеро, олийҳиммат инсон Охират учун ғам чекар.

Салафлардан бири биродарига насиҳат қилди: «Ғаминг фақат Оллоҳ азза ва жаллага йўлиқиш, Охират ва Оллоҳнинг ҳузурида туриш бўлсин: **«Ўша Кунда сизлар (ҳисоб-китоб учун Оллоҳга) кўндаланг қилинурсизлар – сизларнинг бирон сирингиз махфий қолмас».** (Ал-Ҳааққа сураси, 18-оят)

Дунё ғамлари Охират ғамидан пастдир, чунки ҳаётнинг ғами, мансаб, лавозим, олтин-кумуш, фарзанд, мол-давлат, обрў-эътибор, қасрлардан иборатдир.

Оллоҳ азза ва жалла мунофиқ душманларини сифатлаб айтади: **«Бошқа бир тоифа (яъни мунофиқлар) эса Оллоҳ ҳақида нотўғри, динсизларча бадгумон қилиб, ўз жонларининг ғамига тушиб қолдилар».** (Оли Имрон сураси, 154-оят)

Расулуллоҳ соллаллоҳу алайҳи васаллам дарахт тагида одамларнинг байъатларини қабул қилар эканлар, мунофиқлардан бири ўзининг қизил туясини қидириб, шерикларининг орасидан чиқиб кетди ва шерикларига: «Туямни топишим сизларнинг байъатингиздан яхшироқдир», деди. Бу ҳақда ҳадисда айтилади:

«Қизил туя эгасидан бошқа барчангиз мағфират қилинурсизлар».

Мунофиқларни ўз нафси қизиқтирди. Улар дўстларига: **«Бу иссиқда урушга чиқманглар», дедилар».** Оллоҳ субҳонаҳу ва таоло айтди: **«Агар улар англай олсалар, жаҳаннам оташи янада иссиқроқдир».** (Тавба сураси, 81-оят)

Қайғурма, ғамни тарк қил

Мўмин учун роҳатпарастлик – ғофиллик, бўш ўтириш – кушанда, бекорчилик – танбаллик. Бекорчи ва ишёқмаслар энг кўп ғам-ташвиш чекурлар. Ҳар хил висир-висирлар, турли-туман миш-мишлар тарқатиш эса жиддий, фойдали амаллардан қуруқ қолган кимсаларнинг насибаларидир.

Бас, шундай экан ҳаракатда бардавом бўл, излан, вақтингдан фойдалан, бир дақиқа вақтингни ҳам бекор ўткизма, чунки бекор ўтган кун сенга ғам-қайғу, ҳаяжон ва васвасаларни олиб келади ва сен шайтон ўйинлари учун майдонга айланасан.

Парвардигорингдан савоб умид қил

Амални холис Оллоҳ учун қилгин, бировдан раҳмат кутма, бировга эҳсон қилиб, эвазига ундан пасткашлик кўрсанг – ғам чекма, қилган яхшилигингни кўп санама, ажр-мукофотни Ёлғиз Оллоҳдан кутгин.

«...ҳамда Парвардигорларидан фазлу марҳамат ва ризолик тилаб Байтул-Ҳаромни (Каъбани) мақсад қилиб кетаётган кишиларга (қарши жанг қилишни ҳалол қилиб олмангиз!)...». (Моида сураси, 2-оят)

«Мен сизлардан бу (даъватим) учун ажр-мукофот сўрамайман...». (Шуаро сураси, 109-оят)

«Айтинг: «Мен сизлардан сўраган бор ажру мукофот ўзларингизга бўлсин (яъни, мен сизлардан бирон ажр-мукофот сўрамасман)...». (Сабаъ сураси, 47-оят)

«У (тақводор зот) ҳузурида – зиммасида бирон кимсага қайтариладиган неъмат йўқдир. (Яъни, у бирон кимсанинг ўзига ўтказиб қўйган яхшилигини қайтариш учун хайр-саховат кўрсатмайди)». (Валлайл сураси, 19-оят)

«(Улар айтурлар): «Биз сизларни Ёлғиз Оллоҳнинг Юзидан таомлантирурмиз. Сизлардан (бу ишимиз учун) бирон мукофот ва миннатдорчилик истамасмиз – кутмасмиз». (Инсон сураси, 9-оят)

Яккаю Ёлғиз Зот учун амал қил, барча яхшиликларни, жазо ва мукофотни У Зотнинг Ўзи берур, ғазабланувчи ҳам рози бўлгувчи ҳам Оллоҳ субҳонаҳу ва таолонинг Ўзидир.

Кандаҳорда қатл қилинган шаҳидлар ҳақида Умар саҳобалардан: «Улар кимлар?, – деб сўраганида бир қанча номларни зикр қилдилар ва: «Бошқа сиз танимайдиган кишилар», – дедилар. Шунда Умарнинг кўзлари ёшланди ва деди: «Лекин Оллоҳ уларни танийди!»

Солиҳлардан бири кўзи ожиз, еб тўймас бир кимсага таом берганида, унинг аҳли: «Бу аъмо нимани еганини ҳам билмайди», – дедилар. Шунда ҳалиги солиҳ зот айтди: «Лекин Оллоҳ билур», – деди. Бас, модомики Оллоҳ устингда хабардор экан, қилган эзгу-яхшиликларингни билиб турар экан, одамлардан раҳмат кутиб нима қиласан?

**Маломатчининг маломати,
қораловчининг дашноми**

«Улар сизларга озор беришдан бошқа ҳеч қандай зарар етказа олмайдилар...». (Оли-Имрон сураси, 111-оят)

«...Уларнинг (яъни, мушрикларнинг динга кирмаганликлари) устида маҳзун бўлманг! Уларнинг макру ҳийлаларидан сиқилманг ҳам!...». (Наҳл сураси, 127-оят)

«Сиз кофирлар ва мунофиқларга бўйинсунманг ва уларнинг озор-азиятларига парво қилманг, ҳамда Оллоҳга таваккул қилинг! Оллоҳнинг Ўзи етарли Вакил – Ҳомий». (Аҳзоб сураси, 48-оят)

«...Бас, Оллоҳ (Мусони) улар айтган айблардан поклади...». (Аҳзоб сураси, 69-оят)

Байт:

Тўлиб-тошган чуқур дарёга бола отган тош кор қилмас.

Ҳасан ривоят қилади: «Расулуллоҳ соллаллоҳу алайҳи васаллам дедилар: **«Менга асҳобларим ҳақида ёмон сўз айтманглар, чунки мен сизларнинг олдингизга соғлом қалб билан чиқишни истайман».**

**«Кўлинг калта» эканлигидан ғам чекма,
чунки бунда саломатлик бордир**

Инсон жисмонан хузур-ҳаловат кўрган сари руҳияти хасталашади. Бунинг аксида эса саломатлик бордир, дунёдан юз ўгириш Оллоҳ таоло Ўзи истаган бандаларига берган нақд роҳатдир: **«Шак-шубҳасиз, Биз Ўзимиз бу Ерга ва ундаги бор жонзотга меросхўр**

бўлурмиз (яъни, барча жонзот ўтар, Ёлғиз Бизгина қолурмиз)...». (Марям сураси, 40-оят)

Дунё – совуқ сув, иссиқ нон ва бошингдаги соябондан иборат.

Дунё собит эътиқодли, даъватларида содиқ, зиммасидаги вазифаларининг ухдасидан чиқувчи кишиларни азиз қилур.

Келажакдаги нарсалардан маҳзун бўлма

Тавротда мана бу сўзлар ёзилган: «Содир бўлишидан кўрқиб турилган нарсаларнинг кўпи амалга ошмайди».

Яъни, Одамлар хавотирланадиган кўп нарса асли бўлмайдиган нарсалардир. Зеро, хаёлдаги ваҳм кўз кўрган ҳодисалардан кўпроқдир.

Агар келажак бирон ҳодиса ё мусибат ҳақида эшитиб қолсанг, шошма, ўзингни бос, қайғурма, чунки кўп хабар, миш-мишлар аслида йўқ бўлиб чиқади. Агар Қадарни ўзгартиргувчи биров бўлганида ҳамма уни излаган бўлар эди, лекин қани у?

«...Мен ўз ишимни Оллоҳга топширурман. Зеро, Оллоҳ бандаларини Кўриб тургувчидир. Бас, Оллоҳ у (иймон келтирган киши)ни уларнинг ёмон макр-ҳийлаларидан сақлади...». (Ғофир сураси, 44–45-оятлар)

Ҳасадгўйлар танқиди

Сен уларнинг ҳасад ва танқидларига сабр қилсанг – ажр оласан. Қолаверса, уларнинг танқиди сенинг қийматингни оширади. Зеро, қадрсиз одамга ҳасад қилмайдилар.

Мусо алайҳиссалом одамлар мени ёмонлашдан тилларини тийсинлар, деб Парвардигорига илтижо қилганида Оллоҳ таоло айтди: «Эй Мусо, сен сўраган нарсани ҳатто Мен Ўзим учун ҳам қилмаганман. Улар Мени сўкиб, ҳақорат қилсалар ҳам уларни йўқ қилмайман, ризқларини ҳам беравераман».

Саҳиҳ ҳадисда Расулуллоҳ соллаллоҳу алайҳи ва саллам айтдилар: *Оллоҳ таоло деди*: «Одам боласи Мени сўкиб, ҳақоратлар қилди. Ваҳоланки, унинг бунга ҳаққи йўқ эди. Мени сўкиб, маломат қилишига келсак, у замонни сўкади, замон эса – Менман. Кеча-кундузни ўзим истагандек айлантириб тураман. Мени ҳақорат қилганига келсак, у худонинг хотини ва боласи бор, деди. Менинг эса хотиним ҳам, болам ҳам йўқдир».

Албатта, сен одамларнинг тилларини сенинг обрўйингни тўкишдан тийишга қодир эмассан, лекин сен яхшилик қилишга, уларнинг сўзларидан, танқидларидан юз ўгиришга қодирсан-ку!

Ғарб адибларидан бирининг айтгани бор: «Сен тўғри ишни қилгин-да, сўнгра ҳар қандай пасткаш танқиддан юз ўгир».

Фойдали тажрибалардан: «Сени жароҳатлайдиган сўзга, ё мақола, ё шеърга жавоб қилма! Чунки танқидни кўтара олиш – айбларни яшириш, ҳалимлик – азизлик, сукут душманларни енгар, кечириш – савоб ва шараф. Сен ҳақингда танқидни ўқиганларнинг ярми уни унутдилар, қолган ярми уни ўқигани ҳам йўқ. Бошқалар эса сен ёзадиган раддиянинг сабабини ҳам, масала нима ҳақида эканини ҳам билмайдилар»... Бас, раддия бериш билан ўзинг уни кўзғаб, чуқурлаштиришининг нима кераги бор!

Ҳукамолардан бири шундай дейди: «Одамлар ўзларининг бир бурда нонларини ишташ билан шу қадар машғулларки, дунёда сен билан мен борлигимиздан ҳам беҳабарлар, шак-шубҳа йўқки, энди улар ташналикларини қондириш учун бир қултум сув топиш билан овора бўлиб, сен билан мени дунёдан ўтиб кетганимизни ҳам билмай қолаверадилар».

Арпа унидан бўлган нон ва хотиржамлиги бор уй турли-туман ноз-неъматлар билан тўла, лекин беҳаловат, бесаранжом уйдан яхшироқдир.

Хулоса

Қайғурма! Касал тузалади, мусибат кетади, гуноҳ кечирилади, қарз тўланади, маҳбус озод бўлади, келажак келади, осий тавба қилади, фақир бой бўлади.

Қайғурма! Ахир қора булут қандай тарқалганини, қоронғу тун ниҳоясига етганини, кучли шамол қандай тин олганини, бўрон қандай тўхтаганини кўрмадингми? Демак, оғир кунларнинг ортидан фаровонлик, кенглик ва яхши ҳаёт бордир.

Қайғурма! Чунки қуюқ соя қуёш алангасини ўчиради, тоза сув иссиқдаги ташналикни совутади, иссиқ нон қаттиқ очликни тўйдиради, бедор ҳолда изтироб чекиш ортида лаззатли ором бордир, дард аламларини соғлик лаззати кеткизур, бунинг учун сен бир оз сабр қилмоғинг ва бир лаҳза кутишинг даркор.

Қайғурма! Буюк қудрат нуфузи, қазонинг, албатта, воқе бўлиши, қадарнинг узил-кесиллиги олдида табиблар ҳайрон, ҳақимлар, уламолар ожиз, ҳийлалар мағлубдир.

Ўзинг учун Оллоҳ сен учун ихтиёр қилган нарсани ихтиёр қил

Оллоҳ сени тик турадиган қилиб қўйган бўлса – тур, ўтқазиб қўйган бўлса – ўтир, муҳтожликда сабр қил, беҳожатликда шукр қил. Бу «**Оллоҳни Парвардигор, Исломни дин, Муҳаммад соллаллоҳу алайҳи васалламни пайғамбар, деб билдим**», калималарининг лозимотларидандир.

«Ўзинг учун ҳар турли тадбирларни қилаверма, қанча тадбиркорлар ҳалок бўлиб кетдилар. Биз (яъни Оллоҳ таоло) қилган ҳукмга рози бўлавер, чунки Биз сенга ўзингдан ҳам яқинроқмиз».

Одамларнинг ишларига кўз тутма

Улар на зарар ва на фойда, на мамот ва на ҳаёт – қайта тирилиш, на савоб ва на жазо беришга эгадирлар.

Иброҳим ибн Адҳам айтади: «Бизларнинг айшу машитимизни ўтган подшоҳлар кўрсалар эди, албатта, бизлар билан талашган бўлар эдилар.

Ибн Таймия айтади: «Қалбдан, агар аҳли жаннат бизнинг ҳолатимизда бўлсалар, албатта, гўзал ҳаёт кечирурлар», деган сўзлар ўтади.

Яна у зот айтади: «Қалбда Оллоҳ субҳонаҳу ва таолони зикр қилиш, у Зотга яқин бўлишидан суюнган ҳолда куйлаб рақс тушгувчи ҳолатлар бўлади».

Ибн Таймия қамоққа кириб, соқчи қамоқ эшигини қулфлаган пайтида ушбу оятни ўқиди: «...**Сўнг улар (билан мўминларнинг) ўртасига дарвозали бир девор урилурки, унинг ичида раҳмат – жаннат, ташқарисида – олдида эса азоб – дўзах бўлур**». (Ҳадид сураси, 13-оят)

Яна у киши қамоқда эканлар, айтдилар: «Душманларим менга нима ҳам қила олар эдилар. Қалбимда жаннат орзуси, қаерда бўлсам у ҳам ўзим билан бирга, ўлдирилсам шаҳид бўлурман, юртимдан сургун мен учун саёҳат, қамоқ эса мен учун хилват жойдир».

Дерлар: «Оллоҳни йўқотган кимса нимани топиши, Оллоҳни топган эса нимани йўқотиши мумкин? Бу икки иш ҳеч қачон баробар бўлмас! Ким Оллоҳни топса – барча нарсани топибди, ким Оллоҳни йўқотса – барча нарсани йўқотибди».

Расулуллоҳ соллаллоҳу алайҳи васаллам дедилар: **«Оллоҳни поклайман, Оллоҳга ҳамд бўлсин, Оллоҳдан ўзга илоҳ йўқ, «Оллоҳ Буюк» каби сўзларни айтишим мен учун қуёши порлаган дунёдан яхшироқдир».**

Салафлардан бири бадавлат одамлар, уларнинг қасрлари, мол-давлатлари ҳақида гапириб айтади: «Биз ҳам еяпмиз улар ҳам емоқдалар, ичяпмиз – ичмоқдалар, кўряпмиз – кўрмоқдалар, аммо биз ҳисоб бермаймиз, улар ҳисоб беришар. **«Мана, бизнинг хузуримизга сизларни аввал-бошда қандай яратган бўлеак, шундай ёлғиз ҳолда келдингиз...».** (Анъом сураси. 94-оят)

«Албатта, Оллоҳ Ўз Пайғамбарига (у киши кўрган) тушни ҳақрост қилди...». (Фатҳ сураси, 27-оят).

«...Оллоҳ ва Унинг Пайғамбари бизларга фақат ёлғон ваъда қилган эканлар», дея бошладилар». (Аҳзоб сураси, 12-оят)

Ҳаётинг фикру ўйингга қараб қурилади. Агар фикру ниятинг яхши бўлса – бахтли ҳаёт, ёмон бўлса – бахтсиз ҳаёт.

Дерлар: «Агар ялангоёқ бўлсанг, оёғи кесилганларга қара, шунда Оллоҳ таолога сенга оёқ неъматини бергани учун ҳамдлар айтасан».

Одамларга яхшилик қил

Инсонларга яхшилик қилиш саодатнинг равон йўларидандир.

Саҳиҳ ҳадисда айтилади: **«Оллоҳ таоло Қиёмат кунда бандасини ҳисоб-китоб қилар экан айтади: «Эй одам боласи, оч қолган эдим, Менга таом бермадинг». Банда сўрайди: «Сенга қандай таом берман, ахир Сен бутун оламларнинг Парвардигори бўлсанг?» Оллоҳ айтади: «Эсингдан чиқдим, фалон бандам оч-наҳор қолган эди, агар уни таомлантиргангингда, бунинг савобини бугун – Менинг ҳузуримда олар эдинг. Эй одам боласи, чанқаган эдим, сув бермадинг». Банда айтади: «Бундай қила олмас эдим, ахир Сен бутун оламлар Парвардигори бўлсанг». Оллоҳ таоло айтади: «Ёдингдан чиқдим, фалон бандам чанқаган эди, агар унга сув берганингда, бунинг савобини бугун – Менинг ҳузуримда олар эдинг. Эй одам боласи, касал эдим, йўқламадинг». Банда айтади: «Қандай йўқлайин? Ваҳоланки, Сен бутун оламларнинг Парвардигори бўлсанг! «Эсингдами, фалон бандам бетоб эди, ундан ҳол-аҳвол сўраб бормадинг, агар шундай қилганингда – Мени унинг ҳузуринда топар эдинг».**

Эътибор қилинг, Оллоҳ таоло охирги жумлада аввалги иккитасидан фарқли равишда **Мени унинг ҳузуринда топар эдинг**, деди. Чунки Оллоҳ таоло синиқ қалб эгалари билан биргадир. Бир ҳадисда: **«Ҳар бир тирик жонда ажр бордир»**, дейилган. Оллоҳ таоло бир

бузук аёлни чанқаган итга сув бергани учун жаннатга киргизди. Энди инсонга таом, сув бериб, ундан тангликни кеткизиб, хафалигини аритган одам, албатта, мукофотланмай қолмас.

Ҳадис **«Ортиқча зоди-роҳиласи мол-давлати бор одам йўқларга берсин, кимни ортиқча улови бўлса, улови йўқларга берсин».**

Ибнул Муборакнинг яҳудий қўшниси бор эди. У зот ўз фарзандларидан ҳам аввал мана шу қўшнисига таом берар, унга янги кийимлар олиб берар эди. Одамлар яҳудийга уйини сотишини сўрашди. Яҳудий уйнинг нархи икки минг динор эканлигини айтди ва бунга изох бериб деди: «Минг динор уйим учун, қолган минги Ибн Муборакка қўшни бўлганинг учун». Бу гапни Ибн Муборак эшитиб, Оллоҳим, Ўзинг уни Исломга ҳидоят қилгин, деб дуо қилди ва у Оллоҳнинг иродаси билан Исломга кирди.

Ибн Муборак карвон билан ҳаж қилиш учун йўлга чиқдилар, йўлда ахлатхонадан бир ўлик қарғани олиб кетаётган аёлни кўриб, ортидан ҳолатни билиш учун одам юборди. Аёл: «Уч кундан бери энди мана шу қарғани топдик», – деди. Бу гапни эшитган Ибнул Муборак кўзига ёш олди ва карвондаги бор мол-мулкни ўша қишлоққа тарқатиб юборди ва шу йили ҳаж қилмай уйига қайтди. Ва тушида: «Ҳажинг қабул бўлиши, саъйинг мукофотланиши, гуноҳинг мағфират қилиниши муборак», деяётган кишини кўрди. **«...ҳамда, гарчи ўзларида эҳтиёж бўлса-да, ўзларини кўйиб (ўзгаларни) ийсор-ихтиёр қилурлар...».** (Ҳашр сураси, 9-оят)

Яхши ишни қанча кўп қилинмасин, унга афсус чекилмайди, аммо хатолар қанча кам бўлса ҳам, унга афсус чекилур.

Агар қулоғингга ножўя сўз чалинса...

Асримиз уламоларидан бири айтади: «Танқиддан ўта таъсирланадиган ҳиссиётли кишилар ноҳақ, ноўрин танқид олдида қулоқларига кўрғошин қуйиб олишлари керак».

Дедилар: «Ҳасаднинг мукофотини Оллоҳнинг Ўзи берсин, нақадар адолатли у! Бошлаб ҳасадгўйнинг ўзини ўлдиради-я!»

Али розияллоху анху айтади: «Ажал – мустаҳкам қалъадир».

Ҳукамолардан бири айтади: «Кўрқоқ бир неча бор ўлади, ботир бир марта ўлади».

Агар Оллоҳ таоло бирор бандасига танглик пайтида яхшиликни истаса, унга худди Уҳуд жангида Толҳа розияллоху анҳуга берганидек ором уйқусини беради, ўшанда ором ва роҳатда бўлган Толҳанинг қўлидан қиличи бир неча бор тушиб кетган эди. «(Эй Муҳаммад алайҳиссалом), **айтинг, «Сизлар биз учун фақат икки яхшилик** (яъни ё шаҳид бўлишимиз ёки ғалаба қилишимиз)дан бирини кутмоқдасиз. Биз эса сизлар учун Оллоҳ сизларга Ўз даргоҳидан ёки бизнинг қўлимиз билан бир азоб етказишни кутмоқдамиз. Бас, сизлар ҳам кутаверинглар, биз ҳам сизлар билан бирга кутгувчимиз». (Тавба сураси, 52-оят)

«Ҳар бир жон фақат Оллоҳнинг изни билан аниқ белгилаб ёзилган муддатда ўлади».

Изоҳ: Ушбу сўзни шундай тушунмоқ лозим: кўрқоқлик умрни узайтрмайди, шижоат эса уни қисқартрмайди. Ҳар қандай тадбир-эҳтиёткорлик Оллоҳнинг қазо ва қадарини ўзгартрмайди. Бас, нима сабабдан Ҳақ Йўлдаги курашдан қочмоқчи бўласиз?!

«Ҳар бир жон фақат Оллоҳнинг изни билан аниқ белгилаб-ёзиб қўйилган муддатда ўлади. Ким дунё савобини истаса, унга-да, истаган нарсасини берурмиз. Ким Охират савобини истаса, унга-да, истаган нарсасини берурмиз. Ва шукр қилғувчиларни муносиб мукофотлаймиз». (Оли Имрон сураси, 145-оят)

Абу Бакр розияллоху анху айтади: «Ўлимни сўрай-верганларинг сари – сизларга ҳаёт берилаверади.

Хулоса

Маҳзун бўлма! Оллоҳ сени ҳимоя қилур, фаришталар сенинг учун Оллоҳдан мағфират сўрашар, мўминлар ҳар намозларида – дуоларида сени эслашар, Пайғамбар соллоллоху алайҳи ва саллам шафоат қилар, Қуръон сенга яхши ваъдаларни берар, булардан ҳам энг буюги – Энг Меҳрибон Зотнинг раҳмати бордир.

Маҳзун бўлма! Чунки яхшиликнинг савоби ўн баробардан етти юз баробаргача ва ундан ҳам кўпдир. Ёмонликнинг жазоси, агар Оллоҳ гуноҳдан ўтиб, уни кечмаса – бир баробардир, зеро, Оллоҳнинг карами мисли йўқдир, Унинг Олижаноблигига ҳеч бир нарса тенг эмас.

Маҳзун бўлма! Чунки сен Тавҳид толиби ва Қибла аҳлидансан, сенда Оллоҳга, Унинг Расули соллоллоху алайҳи ва салламга асл муҳаббат бордир, сен гуноҳ қилсанг – афсус чекасан, чиройли амал қилсанг – севи-насан, сенда ўзинг билмайдиган кўп яхшиликлар бордир.

Маҳзун бўлма! Чунки сен кенг ва танг, бойлик ва фақирлик вақтида ҳам яхшилик устидадирсан.

«Мўминнинг иши қизиқ – унинг барча иши ўзи учун яхшилик. Бу фақат мўминга берилган неъматдир, агар унга хурсандлик етса ва унга шукр қилса – ўзи учун яхшилик бўлур, агар унга хафалик етса ва унга сабр қилса, хафалик ҳам унинг учун яхшиликдир».

Мусибатга сабр қилиш, машаққатни кўтариш нажот ва саодатнинг йўлидир.

«(Эй Муҳаммад алайҳиссалом, бу даъват йўлида Сизга етган озор-азиятларга) сабр-тоқат қилинг! Ёлғиз Оллоҳ (ёрдами) билангина сабр қила олурсиз...». (Наҳл сураси, 127-оят)

«...Энди (менинг ишим) чиройли сабр қилмоқдир. Сизлар сўзлаётган бу нарса (айрилиқ-мусибат) устида мадад сўраладиган Зот Ёлғиз Оллоҳдир». (Юсуф сураси 18-оят)

«Бас, (эй Муҳаммад алайҳиссалом, кофирларнинг озор-азиятларига) чиройли сабр билан сабр-тоқат қилинг!». (Маориж сураси, 5-оят)

«(Оллоҳ йўлида меҳнат-машаққатларга) сабр-тоқат қилиб ўтганларингиз сабабли (энди бу жаннатларда) сизларга тинчлик-осойишталик бўлгай...». (Раъд сураси, 24-оят)

«...ҳамда ўзингга етган (балоларга) сабр қил!...». (Луқмон сураси, 17-оят)

«Эй мўминлар, сабр қилингиз ва сабру тоқат қилишда (кофирлардан) устун бўлингиз ҳамда доимо (кураш – жиҳод учун) белингиз боғлиқ (ҳолда ҳозир) бўлиб турингиз!...». (Оли-Имрон сураси, 200-оят)

Умар розияллоху анху айтади: **«Сабр билан гўзал ҳаётга етдик».**

Мусибат пайтида аҳли суннат учун уч йўл бор: сабр, дуо ва кенгликни кутиш.

Ҳадис: **«Оллоҳдан ҳам сабрлироқ биров йўқдир, кофирлар Оллоҳнинг аёли, боласи бор, дейишди, Оллоҳ эса уларни кечириб, уларга ризқ бераверди».**

Улуғликка орзу билан, уйқудаги туш билан эмас қатъият ва матонат билан етилади.

Одамларнинг муомаласидан қайғурма, уларнинг Холиққа бўлган муомаласига қара!

Аҳмад ўзининг «Зухд» номли китобида Оллоҳ таолонинг қуйидаги сўзларини келтиради: **«Эй одам боласи, ишларинг қизиқ – Сени Мен яратдим, Мендан бошқага ибодат қилдинг, сенга Мен ризқ бердим, ўзгага шукр қилдинг, Мен сендан беҳожат ҳолимда сени севинтирмоқчи бўламан, сен эса Менга муҳтож ҳолингда Менга ёмон кўриниш ҳаракатидасан. Яхшиликларим сенга тушган сари сен томондан Менга ёмонликлар кўтарилур!».**

Исо алайҳиссаломнинг сийратларида зикр қилинишича, у зот ўттиз нафар беморни, жуда кўп кўзи ожизларни даволади, сўнгра... улар Исога душманга айланишди.

Ризқ танглигидан қайғурма!

Чунки Раззоқ – Ягона, У бандаларига ризқ берар, У шунга кафилдир. **«Осмонда эса сизларнинг ризқу рўзларингиз (яъни Ерда мўл ҳосил бўлишига сабаб бўлгувчи ёмғир) ва сизларга ваъда қилинаётган нарса (яъни жаннат) бордир».** (Ваз-зариёт сураси, 22-оят)

«Ерда ўрмалаган нарса борки, барчасининг ризқи Оллоҳнинг зиммасидадир...». (Худ сураси, 6-оят)

Бас, Раззоқ Оллоҳнинг Ўзи экан, нима учун башар тилёғламалик қилади, нега ризқни деб ўзи каби бир одамга нафсини хор қилади? **«Оллоҳ одамлар учун не бир раҳмат-марҳаматни очиб қўйса, бас, уни ушлаб-тўсиб қолгувчи бўлмас ва нени ушлаб қолса, бас, У Зот (ушлаб қолгани)дан сўнг у (нарсани бандаларга) бирон юборгувчи бўлмас. У қудрат ва ҳикмат Эгасидир».** (Фотир сураси, 2-оят)

Мусибатларни енгувчи сабаблар:

1. Ажр-савобни Ёлғиз Оллоҳдан кутмоқлик. «(Эй Муҳаммад алайҳиссалом), **Менинг иймон келтирган бандаларимга айтинг: «Парвардигорингиздан кўр-қингиз! Бу дунёда чиройли амал қилган зотлар учун (Охиратда) чиройли (оқибат – жаннат) бордир. Оллоҳнинг Ери кенгдир. Ҳеч шак-шубҳа йўқки, сабр-тоқат қилгувчиларга ажр-мукофотлари ҳисоб-китобсиз тўла-тўкис қилиб берилур».** (Зумар сураси, 10-оят)

2. Ўзи каби мусибат эгаларига назар ташламоқ.

Ўнг ва сўл томонингга қарасанг, фақат мусибатланган, имтиҳон қилинганларни топасан.

Ҳар водийда бану Саъдлар бордир.

3. Бу бошқа мусибатлардан энгилроқ эканини билиш.

4. Бу мусибат ўша банданинг динида эмас, дунёсида бўлганлиги.

5. Кенглик пайтларидан кўра танг ҳолатларда Оллоҳга таслим бўлиб, Унга бандалик қилиш.

6. Мусибатга ҳийла йўқдир. Мусибатларни кетказиш учун ҳийла қилишга уринма! Агар билсанг, мусибатларни кетказишнинг ҳийласи – ҳийла қилмаслик.

7. Ихтиёр – Оламларнинг Роббиси бўлмиш Оллоҳ учундир. «...(Зотан,) сизлар ўзингиз учун яхши бўлган нарсани ёқтирмаслигингиз ва сизлар учун ёмон бўлган нарсани яхши кўришингиз мумкин...». (Бақара сураси, 216-оят)

Ўзганинг шахсиятига айланма!

«Ҳар кимнинг ўз юзланадиган тарафи бор. Бас, яхши ишларга шошилинг!..» (Бақара сураси, 148-оят)

«У сизларни Ерда (ўтиб кетган ота-боболарингиздан кейин) халифа – ўринбосарлар қилиб қўйган ва Ўзи ато этган неъматлар билан сизларни имтиҳон қилиш учун айримларингизни айримларингиздан (ризку рўз ва куч-қувватда) юқорироқ даражаларга кўтариб қўйган Зотдир». (Анъом сураси, 165-оят)

«...ҳамма одамлар ўз сувларини билдилар...». (Аъроф сураси, 160-оят)

Одамлар турли лаёқат, иқтидор, куч-ғайрат ва ҳунар соҳибларидир. Расулуллоҳ соллаллоҳу алайҳи ва саллам ўз асҳобларига уларнинг тоқат ва лаёқатларига мос вазифаларни тайинлашлари ҳам у Зотнинг буюклигининг намунасидир. Али қозиликни, Муоз илмни, Убай Қуръонни, Зайд фароиз илмини, Холид жиҳодни, Ҳассон шеърни, Қайс ибн Собит эса нотикликни эгаллади.

Ўзгага сингиб кетиш ўзликни йўқотишдир, ўзгалар сифатларини ўзлаштириб олиш ўзни ўлдиришдир.

Инсонларнинг сифатлари, иқтидорлари, тили, рангининг хилма-хиллиги ҳам Оллоҳ аzza ва жалланинг мўъжизларидандир. Абу Бакр ўзининг меҳрибонлиги, кўнгли юмшоқлиги билан умматга, миллатга манфаат етказди. Умар ўзининг салобати билан Исломга ва Ислом аҳлига ёрдам берди. Сенга берилган неъматга рози бўлишлик ҳам бир неъматдир, бас бу неъматни ундириб-ўстир, ундан фойдалан. **«Оллоҳ ҳеч бир жонни тоқатидан ташқари нарсага таклиф қилмайди...».** (Бақара сураси, 286-оят)

Бировларга кўр-кўрона тақлид қилиш – ўздаги қобилиятни тириклай кўмиш, иродани синдириш, заковатни йўқотишдир.

Узлат улуғворлиги

Узлат, деб ёмонликдан узоқлашишни айтмоқчиман. Зеро, бунда хотиржамлик ва ғам-қайғудан узоқлашиш бордир.

Ибн Таймия айтади: «Банда ибодат қилиши, Оллоҳни зикр қилиши, Қуръон тиловат қилиши, ўз-ўзига ҳисоб бериши, дуо ва истиғфор айтиши ҳамда ёмонликлардан узоқ бўлиши учун узлат қилмоғи даркор».

Ибн Жавзий ўзининг «Сойдул хотир» китобида айтади: «Узлатдан яхшироқ роҳатни, азизликни, шарафни кўрмадим, ёмонликдан узоқ бўлишдан, обрўни, вақтни ғанимат билишдан, умрни ҳимоя қилишдан, ярамас, ичиқора, ҳасадгўйлардан йироқ юришдан, Охират ҳақида фикр қилиб, Оллоҳ аzza ва жаллага йўлиқиш учун тайёргарлик кўришдан, тоатни ғанимат билиб, фойдали ишлар ҳақида тафаккур қилишдан яхшироғини кўрмадим», дейди.

Узлатнинг нақадар улуғворлигини Ёлғиз Оллоҳ билур. Узлат ақлни унумдор қилади, фикр ҳосилини йиғади, у билан қалб роҳатда, обрў саломат, ажр комилдир. Узлат қилган одам ёмонликдан қайтади, тоат-ибодатни ғанимат билади. Меҳрибон Зотни эслайди, дилхушлик машғулотларидан юз ўгиради, фитналардан қочади, душман билан муроса қилишдан, ёвузнинг кўролмаслигидан, ҳасадгўйнинг ҳасаидан, зерикарли ишларга чидашдан, бировлар билан таънабозлик қилиб, кейин узр айтишдан, ҳақ талашишдан, аҳмоққа сабр қилишдан қутулади.

Узлат – авратларни, уят сўзни, турли тойилишларни, хато ўйларни, бефаросатлик айбларини ёпмоқлик.

Узлат – яхшиликлар юзидаги парда, фазилат дурига садаф, улуғлик нишонасини яширгувчи гулкоса. Узлат китоб билан бўлса нақадар гўзал – умр узайиши, муддат кенгайиши, хилватдаги фаровонлик, ибодатга сарфар, тафаккурга саёҳатдир!

Узлат қилган одам мушоҳада, кузатиш, тафаккур ва тадаббурни топади.

Узлатга чекинган одам маъноларга интилади, нозик нукталарни эгаллайди, мақсадлар ҳақида тафаккур қилади, фикр қасрини қуради, ақлини шакллантиради.

Узлат чеккан одамнинг руҳи шодон, қалби осойишта бўлади, зеҳни фойдали илмларни овлайди – эгаллайди.

Узлатда ҳолингда сени Ёлғиз Оллоҳдан ўзгаси кўрмайди, сўзингни фақат Эшитгувчи ва Кўргувчи Зотгина эшитади.

Нур таратган, барча ярақлаб турган, ўзгаларга манфаат еткизувчи иқтидор эгалари, буюк билимдонлар, замон устунлари, тарихшунослар, фазилат эгалари, давр сарчашмалари, мажлисларнинг юлдузлари бу-

ларнинг барчаси ўзларининг улуғлик кўчатини узлат суви билан суғорганлар, ҳатто у кўчатлар ўз новдасида тик турар ҳолатга етиб, (уларнинг) буюклик дарахти униб-ўсиб, ҳар вақт Парвардигорларининг изни билан мева берди.

Дедилар: «Узлат узлатни истаган киши учун иззатдир.

Бало-офатларга ғам чекма

Чунки бало-офатлар қалбни тетиклантиради, гуноҳларни ўчиради, кибрни синдиради, ғафлатни йўқ қилиб, огоҳликка сабаб бўлади, махлуқларни меҳрибон қилиб қўяди, солиҳ зотларнинг дуосига сабаб бўлади. Буюк Зотга бўйсундиради, Танҳо Қаҳҳорга таслим қилади.

Мусибатлар инсон учун нақд танқид ва огоҳлантирувчи, эслатгувчидир, сабр билан тавба-тазарру қилишдир, балолардан савоб умид қилишдир, Хожа хузурига бориш учун тайёргарликдир. Дунёга суянишдан, ундан рози бўлишдан, ундан ором олишдан кутилишдир. Мусибат сабабли етадиган махфий лутфу карамлар янада улуғ, гуноҳ ва хатолар кечиб юборилиши янада буюк.

Хулоса

Қайғурма! Чунки қайғу ибодатингни заифлаштиради, жиҳоддан тўсади, омадсизликни мерос қилиб қолдиради, сени ёмон гумонга чақиради, сени бадбинликка ташлаб қўяди.

Қайғурма! Қайғу – безовталиқ руҳий касалликларнинг асоси, асаб касалининг, емирилиш, васваса, изтиробнинг омилидир.

Қайғурма! Сенинг Куръонинг бор, сенда зикр, дуо, намоз, садақа, яхшилик қилиш, фойдали ишни амалга ошириш имкони бор.

Қайғурма! Бекорчи ҳолатда қайғу учун таслим бўлмагин! Намоз ўқи, тасбеҳ айт, Куръон тиловат қил, ёзгин, иш қил, қиблага юзлан, улуғларни зиёрат қил, мулоҳаза юрит.

«(Эй инсонлар), **Парвардигорларингиз: «Менга дуо-илтижо қилинглар! Мен сизларга (қилган дуоларингизни) мустажоб қилурман...».** (Ғофир сураси, 60-оят).

«(Эй мўминлар), **сизлар Парвардигорингизга та-зарру билан ичингизда (махфий) дуо-илтижо қилинг! Зотан, у ҳаддан ошувчи кимсаларни (яъни, эл кўзига кўрсатиш учун риёкорлик қилувчиларни) севмас».** (Аъроф сураси, 55-оят)

«**Бас, (эй мўминлар) гарчи кофирлар ёмон кўрсалар-да, Оллоҳга – У Зот учун Динни холис қилган ҳолингизда дуо-илтижо қилингиз!**». (Ғофир сураси, 14-оят)

«(Эй Муҳаммад алайҳиссалом), **айтинг: «Оллоҳ, деб чорлангиз ёки Раҳмон – Мехрибон, деб чорлангиз. Қандай чорласангиз-да (жоиздир). Зеро, У Зотнинг гўзал исмлари бордир».** (Ал-Исро сураси, 110-оят)

Қайғурма ва саодатнинг мана бу қоидаларини ўрган:

1. Агар сен бугунинг чегарасида яшамасанг, зеҳнинг сочилади, ҳар ишда изтиробга тушасан, ғам-қайғуларинг кўпаяди. Тонгга кирсанг тунни кутма, тунга кирсанг тонгни кутма.

2. Мозийни унут, ўтмиш учун қайғурмоқ аҳмоқлик ва мажнунликдир.

3. Келажак ҳақида бош қотирма, чунки у ғайб оламидир, келажак келгунга қадар у ҳақида ўйлашни тарк қил.

4. Танқидга эътибор қилма, собитқадам бўл. Билгинки, танқид сенинг қийматингни баҳолайди.

5. Оллоҳга иймон келтириш солиҳ амал, гўзал, бахтли ҳаёт демакдир.

6. Ором, хотиржамлик, роҳатни истаган инсон Оллоҳни зикр қилсин.

7. Ҳар банда барча иш Қазо ва Қадар билан эканлигини билмоғи даркор.

8. Бировдан раҳмат кутма.

9. Нафсингни энг ёмон эҳтимолларни ҳам кўтара олишга ўргатгин.

10. Эҳтимол, ҳосил бўлган ишда сенга яхшилик бордир.

11. Қазонинг барчаси мукулмон учун яхшиликдир.

12. Неъматлар ҳақида фикр қил ва шукр қил.

13. Сен ўзингдаги нарса билан одамларнинг кўпидан устундирсан.

14. Ҳар икки соат оралиғида фаровон ҳаёт бордир.

15. Бало – дуога ундайди.

16. Мусибатлар ақл ва қалбнинг малҳамидир.

17. Албатта, қийинчилик билан енгиллик бордир.

18. Арзимас нарсалар сени синдириб қўймасин.

19. Парвардигорингнинг мағфирати кенгдир.

20. Ғазабланма... ғазабланма... ғазабланма.

21. Ҳаёт – нон, сув, соядан иборатдир, булардан бошқасига эътибор берма.

22. **«Осмонда эса сизларнинг ризқу рўзларингиз (яъни Ерда мўл ҳосил бўлишига сабаб бўлгувчи ёмғир) ва сизларга ваъда қилинаётган нарса (яъни жаннат) бордир».** (Ваз-зариёт сураси, 22-оят)

23. Кўрқилган ишларни кўпи бўлмайди.

24. Сен учун мусибат эгаларида ўрناк бордир.

25. Оллоҳ таоло бир қавмни суйса уларни имтиҳон қилади.

26. Қайғу дуоларини кўп айт.

27. Жиддий, фойдали ишни қил, бекорчиликни ташла.

28. Миш-мишлардан юз ўгир, уларга ишонма.

29. Душманлик, ўч олишга бўлган ташналигинг душманингдан кўра ўзингга – соғлигингга зарар.

30. Сенга етган барча мусибатлар гуноҳларинг учун каффоратдир.

Сенинг ихтиёрингда олти иш бор, бас, қайғуга не ҳожат?

«Тангликдан кейинги кенглик» китобида айтилади: «Донишмандлардан бирининг бошига мусибат тушгач, уни кўргани келган дўстларига деди:

– Бетоблигимда олти нарса менга даво бўлди.

– Улар нима экан? – сўрашди.

– Оллоҳга ишондим, ҳар бир тақдир қилинган иш бўлиши муқаррар эканини билдим, имтиҳон қилингувчилар учун энг яхши нарса – сабр эканини англадим, ахир сабрдан бошқа нима ҳам қилолардим, бесабрлик менга фойда бермас, бундан ҳам ёмон аҳволга тушим мумкин эди, ҳар икки соат орасида топилган фаровонлик қадрини билдим.

Бошингга мусибат келиб, мушкуллар тушса, йўлингни тўсиқлар тўсса – сабр қил

Сабр бесабрликдан, тушкунликка тушишдан яхшироқдир. Зеро, ихтиёрий равишда сабр қилмаслик – мажбуран сабр қилишга олиб келади.

Албатта, обрўсини сақлаган, номусли, ориятли инсонга қарашли ёғоч кулба ва кигиз ўтов, арпа нон, обрўсиз нопок кимсанинг гўзал қасридан, булбуллар сайраб турган боғ-бўстонидан азизроқ ва шарафлироқдир.

Бало-офат касаллик кабидир, у бир кун тугайди, унинг ниҳоя топгунигача шошилишлик, бало кўпайиб, жиддийлашишига сабаб бўлади. Мусибатнинг ҳам бало-офатнинг ҳам бир кун тугаши бордир, мусибат эгаси сабр қилмоғи, кенгликни кутиши, доимий дуода бўлмоғи даркор.

Хулоса

«Эй ўғилларим, боринглар, Юсуф ва унинг биродарини изланглар ва Оллоҳнинг раҳматидан ноумид бўлманглар. Зеро, Оллоҳнинг раҳматидан фақат кофир қавмгина ноумид бўлур». (Юсуф сураси, 87-оят)

«У деди: «Парвардигорининг фазлу раҳматидан фақат адашган кимсаларгина ноумид бўлурлар». (Ҳижр сураси, 56-оят)

«...Сиз билмассиз, эҳтимол, Оллоҳ бундан кейин бирон ишни пайдо қилар». (Талоқ сураси, 1-оят)

«(Эй мўминлар, гарчи) сизларга ёқмаса-да, (кофирларга қарши) жанг қилишингиз фарз қилинди. (Зотан,) сизлар ўзингиз учун яхши бўлган нарсани

ёқтирмаслигингиз ва сизлар учун ёмон бўлган нарсани яхши кўришингиз мумкин. Оллоҳ билур, сизлар билмассиз». (Бақара сураси, 216-оят)

«Оллоҳ бандаларига Меҳрибондир...». (Шўро сураси, 19-оят)

«...Раҳматим – меҳрибонлигим эса ҳамма нарсдан кенгдир...». (Аъроф сураси, 156–157-оятлар)

«...Ғамгин бўлма, албатта, Оллоҳ биз билан биргадир». (Тавба сураси, 40-оят)

«Ўшанда сизлар Парвардигорингиздан мадад тилаганингизда, У сизларга ижобат қилиб: «Мен сизларга кетма-кет келадиган минг фаришта билан мадад берурман», деди». (Анфол сураси, 9-оят)

«У (одамлар ёғин-сочиндан) умидсизликка тушганларидан кейин ёмғир ёғдирадиган ва Ўз раҳмат-баракотини кенг ёядиган Зотдир...». (Шўро сураси, 28-оят)

«...Дарҳақиқат, улар (яъни, мазкур пайғамбарлар) яхши ишларни қилишга шошар ва Бизга рағбат ва кўрқув билан дуо-илтижо қилар эдилар. Улар Бизга таъзим-итоат қилгувчи эдилар». (Анбиё сураси, 90-оят)

Китоб – энг яхши ҳамсуҳбат

Китоб мутолаасига киришиш, ўқишга берилиш, ақлни фойдали ишлар билан ўстириш банд қилиш саодат калитидир.

Жоҳиз сенга қайғудан йироқ бўлишинг учун китоб мутолаа қилишни тавсия қилиб, айтади:

«Китоб – холис ҳамсуҳбат, алдамайдиган дўст, малол олмайдиган ҳамроҳ. Мол-дунёнинг уни қизиқтирмайдиган, ичингдаги нарсани хушомадгўйлик би-

лан чиқариб олмайдиган, макр билан муомала қилмайдиган, мунофиқларча алдамайдиган, ёлғон сўзлаб ҳийла қилмайдиган дўстдир.

Китобга қараганинг сари – фойдаланасан, роҳатинг кўпаяди, зеҳнингни ўткирлайди, тилингни равон, ифодангни кўркем, руҳингни тетик, қалбингни обод қилади, сенга халқ ҳурматини, подшоҳлар садоқатини инъом этади.

Сен бирон зиён кўрмасдан, машаққат чекмасдан, ўргатувчилар эшиги олдида музтар бўлиб турмасдан, хулқда ҳам насл-насабда ҳам сенинг тенгинг бўлмаган кимсалар билан кўнгилсиз суҳбатлар қурмасдан, аҳли дунёлар билан ҳамтовоқ бўлмасдан туриб, китоб ёрдамида одамлар оғзидан бир умр ўргана олмайдиган нарсани бир ойда ўргана билурсан.

Китоб сенга куну тун, уйда ҳам, сафарда ҳам итоат қилади, унда уйқу касали йўқдир, у бедорликдан толмас, у агар муҳтож бўлсанг сени ҳайдамайдиган муаллимдир, агар ундан узилсанг, сендан ўз фойдаларини узмас, ундан четлансанг ҳам сенга итоатда бардавом бўлур, агар душманларингнинг ишлари юришиб қолса улар томонга оғиб кетмас, қачон сен у билан бирга бирон нарвонга ёки қандайдир арқонга осилсанг, яъни ҳар қандай машаққат билан етиладиган ишга киришсанг сен учун унинг ўзи етарли ёрдамчидир, у билан бўлсанг сенга ёлғизлик ваҳшати зиён қила олмас.

Айтайлик, китоб сени ҳеч бўлмаганда эшигинг олдида ўтган-кетганларга қараб ўтиришдан тўсса ҳам (аслида бундай ўтириш бемаъни гапларни гаплашувчи, беҳуда ишларга машғул бўлгувчи жоҳил, бекорчи кимсаларнинг одатидир) жуда катта фойда ва ўлжага эга бўлган ҳисобланасан.

Ибн Жухайм шундай деган: мени бевақт мудроқ тутса (керагидан ортиқча ухлаш нақадар ёмон иш) ҳикмат китобларидан бирини қўлимга оламан шундан сўнг қалбимдан сергак тортаман ва йўқотган нарсамни топиб олгандай ҳузурланаман».

Китобларнинг энг улуғи, шарафлиси, юксаги эса: «(Эй Муҳаммад алайҳиссалом, бу Қуръон) **Сизга унинг ёрдамида кофирларни (Оллоҳнинг азобидан) огоҳлантиришингиз учун ва мўминлар учун бир Эслатма бўлиб нозил қилинган Китобдир – бас, кўнглингизда у сабабли танглик (шубҳаланиш) бўлмасин!**» (Аъроф сураси, 2-оят)

Ўқиш, мутолаанинг фойдалари

1. Васваса, ғам-аундуҳларни ҳайдайди.
2. Ноҳақликка тушишдан узоқ бўлади.
3. Бекорчилардан йироқ бўлади.
4. Тили бурро бўлади, калом машқини олади, оҳанг қилиб сўзламайди, балоғат, фасоҳатга зеб бермайди.
5. Ақл ривожланади, зеҳн янгиланади, хотира кучаяди.
6. Билимга бой бўлиб, ёдлаш, тушунчаси кўп бўлади.
7. Инсонлар тажрибаларини, улуғлар ҳикматларини, уламолар кашфиётларини ўзлаштиради.
8. Илмий малакасини оширади, ҳаёт ҳақидаги маданий онггини оширади.
9. Иймони зиёда бўлади, хусусан Ислом дини ҳақидаги китобларни ўқиганда. Зеро, китоб – энг буюк насихатчи, ёмонликлардан қайтаргувчи ва яхши ишларга буюргувчидир.
10. Зеҳн паришонлигидан, қалб бўлинишидан, вақт зое бўлишидан паноҳ топади.

11. Сўзни пухта тушунади, ифода услубини, иборанинг мақсадини, жумла тушунчасини, ҳикмат сирларини англайди.

Хулоса

Бетоб бўлган Абу Бакр (розияллоҳу анху)нинг хузурига келган кишилар: «Табиб чақиртирайликми?» – деб сўрашди. Абу Бакр: «Табиб мени кўрди», – деди. Улар: «Хўш, табиб нима деди?» – деб сўрашди. Шунда у зот жавоб берди: «Табиб айтдики: **«Албатта, мен хоҳлаган нарсамни қилурман».**

Умар ибн Хаттоб (розияллоҳу анху) айтди: «Бизлар гўзал ҳаётга сабр билан эришдик».

Али ибн Абу Толиб (розияллоҳу анху) айтди: «Сабр иймондандир, у худди жасаддаги бош кабидир, бош кесилса жисм ҳам қулайди». Сўнгра овозини баландлатиб: «Сабри йўқ одамнинг иймони йўқдир, сабр қоқилмайдиган чорпойдир», – деди.

Ҳасан айтади: «Сабр яхшилик хазиналаридан биридир, Оллоҳ таоло уни фақат ўзи яхши кўрган бандалари учунгина беради».

Умар ибн Абдул Азиз айтади: «Агар Оллоҳ таоло бандасига бир неъмат берса сўнг уни олиб ўрнига сабр неъматини берса, мана шу неъмат аввалгисидан яхшироқдир».

Сулаймон ибн ал-Қосим айтади: «Барча амалнинг савоби маълумдир, сабрнинг савоби эса беҳисобдир».

«...Ҳеч шак-шубҳа йўқки, сабр-тоқат қилгувчиларга ажр-мукофотлари ҳисоб-китобсиз тўла-тўқис қилиб берилур». (Зумар сураси, 10-оят)

Қайғурма, чунки олдинда иккинчи бор тўпланиш, иккинчи ҳаёт, иккинчи Кун бордир

Оллоҳ таоло у Кунда аввалу охирни тўплайди, бу сўз қалбингни Оллоҳнинг адолатига хотиржам қилиб кўяди. Кимни бу дунёда мол-мулки тортиб олинса, у дунёда қайтариб олиб берилади, бу дунёда зулм қилинганга, у дунёда адолат қилинади, ким зулм қилса, у дунёда жазоланади.

Олмон файласуфи айтган эди: «Бу дунёнинг ҳаёт драмаси ҳеч қачон тўкис бўлмайди, иккинчи бор тўпланиш ҳаёт бўлмоғи зарур, чунки бизлар бу дунёда золимни ҳам, мазлумни ҳам кўряпмиз лекин адолатни кўрмаяпмиз, ғолибни ҳам мағлубни ҳам кўряпмиз лекин интиқомни кўрмаяпмиз, демак, адолат қарор топадиган иккинчи бир олам бор».

Шайх Али Тантовий қўшимча қилиб айтади: «Бу ажнабий мана шу гапи билан Охират куни, Қиёмат борлигини эътироф этипти».

«...Бу Кунда (ҳеч кимга) зулм қилинмас. Албатта, Оллоҳ тез ҳисоб-китоб қилгувчи Зотдир». (Ғофир сураси, 17-оят)

Роберт Луис Стефансон ёзади: «Ҳар бир инсон кун давомида қанчалар машаққат чекмасин ўз вазифасини қилишга қодирдир, ҳар бир инсон тонгдан то қуёш ботгунига қадар бахтли ҳаёт кечиришга қодирдир. Ҳаётнинг маъноси шудир».

Дерлар: «Ҳаётингда фақат бугунги кун бор, кеча ўтди, эрта эса ҳали келгани йўқ».

Франсуз файласуфи Мунтин айтган эди: «Менинг ҳаётим абадий раҳм қилинмас ёмон насибалар билан тўлиб тошди».

Мен айтаман: «Ана у олимлар қанчалар заковат ва маърифатга эга бўлмасинлар ўзларининг яратилиш ҳикматини билмайдилар, Оллоҳ таоло элчиси Муҳаммад соллаллоҳу алайҳи васалламни юборган ҳидоят билан ҳидоятланмадилар. «(Эй Муҳаммад алайҳиссалом), уларни қўяверинг, еб-ичиб, фойдаланиб қолсинлар, орзу-ҳавасларига машғул бўлаверсинлар. Бас, яқинда (бу қилмишларининг оқибати нима бўлишини) билиб олурлар». (Ҳижр сураси, 3-оят)

Денсий айтади: «Тафаккур қил, бу кун қайтиб келмас».

Яшаётган бу кун охириги куни эканлигини ўйлаган инсон тавба, яхши амаллар қилади, Парвардигорига итоат қилиш, элчисига эргашишда бор кучини сарфлайди.

Ўзингдан мана буларни сўра

Ўтмиш ва келажакнинг темир эшикларини ёп, бугунинг дақиқалари билан яша!

1. Уфқ ортидаги сеҳрланган бўстон иштиёқида, келажакни деб бесаранжом бўлиб ҳозирги ҳаётимни ортга суряпманми?

2. Ўтмишда ўтган ва замон ўтиши билан эскирган нарсаларга бетоқатлик қилиш билан ҳозирги ҳаётимни аччиқ қияпманми?

3. Тонгда уйғониб, олдиндаги йигирма тўрт соатдан унумли фойдаланиш режасини тузаяпманми?

4. Бу ҳаётдан, яшаётган кунимнинг ҳар дақиқасидан манфаатланыпманми?

5. Бундай қилишни қачон бошлайман, бугунми, эртагами, ёки кейинги ҳафтадами?



6. Ўзингдан энг ёмон иш нима, деб сўра, сўнгра руҳингни ўша ёмонликка рўпара келиш ва уни кўтаришликка тайёрлагин.

Хулоса

«...Ким Оллоҳдан кўрқса (яъни, юқорида мазкур бўлган талоқ қилиш қонун-қоидаларига Оллоҳдан кўрққани учун риоя этса), У Зот унинг учун (барча ғам-кулфатлардан) чиқар йўлни (пайдо) қилур. Ва уни ўзи ўйламаган томондан ризқлантирур. Ким Оллоҳга таваккул қилса, бас, (Оллоҳнинг) Ўзи унга етарлидир...». (Талоқ сураси, 2–3-оятлар)

«...Оллоҳ танглик-камбағалликдан кейин енгиллик-бойликни ҳам (пайдо) қилур». (Талоқ сураси, 7-оят).

«Билгинки, сабр билан ғалаба, танглик билан кенглик ва албатта қийинчилик билан енгиллик бордир».

«Мен бандамнинг гумонидаман, бас, бандам хоҳлаганидек гумон қилсин».

«...Улар(нинг ёмонлиги)дан Сизга (эй Муҳаммад алайҳиссалом), Оллоҳнинг Ўзи етарлидир. У Эшитгувчи, Билгувчидир». (Бақара сураси, 137-оят)

«Ва ўлмайдиган Тирик Зотга таваккул қилинг...». (Фурқон сураси, 58-оят)

«...Шояд Оллоҳ (мусулмонларга) ғалаба берса ёки Ўз ҳузуридан (бу мунофиқ кимсаларни шарманда қиладиган) бирон ишни келтириб, улар ичларида яширган нарсаларига надомат қилувчиларга айланиб қолсалар». (Моида сураси, 52-оят)

«Яқин бўлгувчи (Қиёмат) яқин қолди. Унинг учун Оллоҳдан ўзга бирон очгувчи (қачон бўли-

шини билдиргувчи) **йўқдир**». (Ван-Нажм сураси, 57–58-оятлар)

Қайғу қувватни парчалайди, жисмни вайрон қилади

Тиббиёт бўйича Нобель мукофотининг совриндори доктор Кисес Карл айтади: «Безовталиikka тўқнаш келмаган кишилар эрта ўладилар».

Мен айтаман: «Ҳар бир нарса қазо ва қадар биландир. Лекин буларнинг барчасидан келиб чиқадиган маъно шуки, жисмни вайрон қилувчи, вужудни кемирувчи нарсаларнинг асосий сабаби безовталиқдир ва бу тўғри гапдир».

«Қайғу ҳам йирингни қўзғатади».

Сендаги яра сен еган таом сабабли эмас, балки сени егувчи нарса сабабдир.

Сенга қайғу асоратлари ҳақида айтаман:

Эдвер Будулский таълиф қилган «Безовталиқни қўй, афзал ишлар томон юр» номли китобидан бир бўлаги менга таржима қилиб берилди. Сенга ўшандан баъзи сарлавҳаларни келтираман: «Безовталиқнинг қалбга таъсири, қон босимига таъсири, ревматизм касаллигига сабаб бўлишидир».

Ишларни хотиржамлик билан қабул қил

Қора танлилар, хитойликлар юрак дардига камданкам чалинадилар. Чунки улар барча ишларни хотиржамлик билан қабул қиладилар.

Насихатни чиройли қабул қил

Андрей Мурув айтади: «Бизларга шахсий қизиқишларимизга мувофиқ келган нарса, гўё ҳақиқатдек кўринади, ўзгаси эса ғазабимизни кўзғатади».

Мен айтаман: «Насихат, танқидлар ҳам шундай, кўпинча, бизлар мақтовни яхши кўрамиз, гарчи мақтовга ҳақли бўлмасак-да, бундан завқланамиз, танқидни эса гарчи бунга лойиқ бўлсак-да, хушламаймиз. Бу катта айб ва буюк хатодир».

«Қачон улар Оллоҳ ва Унинг Пайғамбарига ўрталарида ҳукм чиқариш учун чорлансалар, баноғоҳ улардан бир гуруҳи (Пайғамбар алайҳиссалом ҳузурига келишдан) юз ўгиргувчидир. Агар ҳақиқат улар (тараф)да бўлса (Пайғамбар алайҳиссалом олдиларига) бўйин эгиб келурлар». (Нур сураси, 48-оят)

Қарорни шижоат билан ушлаш – изтироб, безовталиқдан халос этади. «...Энди иш – жанг муқаррар бўлган вақтда эса, агар улар Оллоҳга (иймон келтириш ва Унинг жанг қилиш ҳақидаги амрига итоат этишда) содиқ-ростгўй бўлганларида, албатта, ўздари учун яхшироқ бўлур эди». (Муҳаммад сураси, 20–21-оятлар)

**Ўйлаб, тараддудланиб қолма – амал қил,
ишла, бекорчиликдан воз кеч!**

Дедилар: «Ҳаёт арзимас бўлганлиги сабабли жуда ҳам қисқадир».

Араб ҳукамоларидан бири айтади: «Ҳаёт бизлар уни нафрат билан ўтказишимиздан ҳам қисқадир. «**Ерда қанча йил турдинглар?»** – деди (Оллоҳ). Улар айтди-

лар: «Бир кун ё ярим кун. Санаб тургувчи (фаришталардан) сўрагин». (Оллоҳ) деди: «Агар сизлар биладиган бўлсангиз (дунёда) жуда оз турдингиз (яъни, сизлар абадий, деб ўйлаган дунё, аслида жуда оз муддатдир). (Мўъминун сураси, 112–113–114-оятлар).

Колумбия мадрасасининг мударриси Ҳекс айтади, у ўз шиорларидан бирини ўзи учун нашида қилиб олган эди: «Қуёш остидаги ҳар бир иллатнинг давоси бордир, ёки умуман давоси топилмас. Агар унинг давоси бўлса, уни изла, агар топилмаса – унга эътибор берма!»

Саҳиҳ ҳадисда шундай дейилган: **«Оллоҳ таоло қандай дард берса унинг давосини ҳам берган. Буни билган билади, билмаган билмайди».**

Мулоимлик тойилишдан сақлайди

Япониялик бир устоз шогирдларига айтди: «Мулоим одам мажнунтол кабидир. Қўпол, қаттиқ одам дуб ёғочи кабидир».

Ҳадисда айтилади: **«Мўмин гиёҳ кабидир. Шамол уни ўнгу сўлга эга олади».**

Доно одам сув кабидир. У харсангга тўқнашмайди, балки унинг ўнг, сўл, уст ва остидан айланиб ўтади.

Ўтмиш қайтмайди

Улуғлардан бири сут тўла идишни ерга ташлаб айтди: «Тўкилган сутга куйинма».

Машойихлар дерлар: «Қийин иш сенга ёзилмайди».

Одам Мусо айлайҳиссаломга айтди: «Оллоҳ таоло мени яратишдан қирқ йил аввал тақдир қилиб ёзган нарса учун мени маломат қиляпсанми? Расулulloҳ соллalloҳу алайҳи васаллам айтдилар: «Одам Му-

сога ғолиб бўлди, Одам Мусога ғолиб бўлди, Одам Мусога ғолиб бўлди».

Саодатни ўзингдан изла, теварак-атрофдан эмас

Инглиз шоири айтади: «Ақл ўз жойида туриб, ўзи ёлғиз жаннатни жаҳаннамга, жаҳаннамни эса жаннатга айлантира олади».

Ҳаёт қайғуга арзимас

Наполеон айтади: «Мен ўз ҳаётимда бир ҳафта бўлса ҳам бахтли яшаганимни эслай олмайман».

Халифа Ҳишом ибн Абдул Малик айтади: «Мен саодатли кунларимни санаб, ўн уч кун эканлигини билдим».

Ҳишомнинг отаси «уф» тортиб шундай дер эди: «Эҳ, кошки эди халифа бўлмаганимда».

Ибн Саммок ал-Воиз Ҳорун ар-Рашидни ҳузурига кирди. Ҳорун чанқаб, ичимлик беришларини сўради. Ибн Саммок:

– Эй амирул муъминин, агар мана шу сувни ичишга қодир бўла олмасангиз, шунга эришиш учун салтанатингизни ярмидан кеча олармидингиз? – деди. Ҳорун:

– Ҳа, – деб жавоб берди. Сувни ичиб бўлгач, яна Ибн Саммок:

– Агар мана шу ичган сувингизни чиқаролмасангиз салтанатингизни ярмидан кеча олармидингиз? – деди. Ҳорун:

– Ҳа, – деб жавоб берди. Ибн Саммок:

– Бир пиёла сувга арзимаган подшоҳликни нима कराги бор? – деди.

Иймондан холи бўлган дунёнинг на қиймати, на вазни ва на маъноси бор.

Файласуф айтади: «Жисмимиздан касалликларни йўқотишга бўлган эътибордан кўра мафкурамиздан бузуқ хаёлларни олиб ташлашга кўпроқ эътибор бермоқ лозим».

Ажиб, Қуръонда жисмоний иллатлардан кўра фикрий иллатлардан кўп қайтарилган. **«Уларнинг дилларида мараз – иймонсизлик бор эди, бас, Оллоҳ маразларини янада зиёда қилди. Улар учун қилган ёлғонлари сабаб аламли азоб бордир».** (Бақара сураси, 10-оят)

Ҳадисда айтилади: **«Оллоҳим, мени Ўзингни тақдирингга рози қилдиргин, токи менга етгани хато кетмаслиги ва хато кетгани менга етмаслигига амин бўлай».**

Хулоса

Маҳзун бўлма! Чунки қайғу сенга ўтмиш ташвишини олиб келади, келажакдан хавфлантиради, бугунги кунингни баракасини кетказади.

Маҳзун бўлма! Чунки уни деб қалб сиқилади, юз тундлашади, руҳинг сўнади, орзулар ҳалок бўлади.

Мазҳун бўлма! Чунки қайғу душманни хурсанд, дўстни хафа қилади.

Маҳзун бўлма! Чунки қайғу қазо билан мунозара қилади, муқаррар ишларни таҳликага солади, дўстга қарши чиқади, неъматга нонкўр бўлади.

Маҳзун бўлма! Чунки қайғу-ҳасрат кетган нарсани қайтара олмайди, ўликни тирилтира олмайди, Қадарга қарши тура олмайди ва бирон фойда етказа олмайди.

Маҳзун бўлма! Чунки қайғу шайтондандир.

Қаноат қил, тинчлан

Статистик маълумотларга кўра, Америкада хафақонлик касали биринчи рақамли қотил ҳисобланар экан. Иккинчи жаҳон уруши йиллари мобайнида уч юз минг америкалик аскарлар ўлдирилган бўлса, шу пайтнинг ўзида икки миллион инсон юрак касаллиги сабабли ҳаётдан кўз юмган. Шулардан бир миллиони хафақонлик ва асаб таранглигидан қазо топган.

Бир олимнинг айтгани бор: «Хафақонлик билан курашишни билмаган инсон бу дунёни эрта тарк этади».

Лекин ўлимнинг сабаби маълум – ажал белгилаб қўйилган.

«Ҳар бир жон фақат Оллоҳнинг изни билан, аниқ белгилаб ёзиб қўйилган муддатда ўлади». (Оли Имрон сураси, 145-оят)

Хитойликлар ёки қора танлиларнинг юрак дарди билан касалланиши кам учрайди, чунки улар ҳаётни энгил тарзда ўтказадилар.

Дехқонларга қараганда табибларнинг юрак хуружидан вафот этишлари йигирма баробар кўп учрайди, чунки табиблар асаблари таранг ҳолда ҳаёт кечирадилар. **«Касалларни даволовчи табибнинг ўзи касал».**

Борига шуқр қилиш ғамни кетказади

Ҳадис: **«Бизлар фақат Парвардигоримизни рози қиладиган сўзни сўзлаймиз».**

Оқибат, натижа сенинг фойданга бўлиши учун тақдир сенга ҳужум қилганида унга таслим бўлиб, бўйинсунишинг вожиб ва муқаддас амалдир. Чунки сен

шундагина нақд бўлган бахтсизлик офати, хонавайронликдан нажот топасан.

Демак, қадарга ишонишдан бошқа чора йўқ, агар сен ўз терингдан ажралиб, кийим бошингни тарк этсанг ҳам қадар ўз ҳукмини ўтказади.

Ҳар қандай қийинчилик, мусибатлардан холи бўлган хотиржам, барқарор, фаровон ҳаётгина буюк инсонларни дунёга келтиради, деб айтадиганлар адашадилар, аслида иш бунинг аксидир.

Тарих шоҳид, буюклик, саодат ўз тизгинини покликго нопоклик аралаш бўлган жамиятга топширганлар ва ана шу жамиятда ўз елкаларига масъулиятни кўтарган шахслар бунёд бўлган.

Муҳаммадий даъватнинг дастлабки кунларида Илоҳий Ҳидоят байроғини кўтарганлар қуллар, фақирлар, ожизлардан иборат эди. Бу Муқаддас даъватга қарши курашганларнинг кўпчилиги эса эътибор талаб, тантиқ, аслзода шахслардан ташкил топган эди. **«Қачон уларга (яъни, инсонларга) очиқ-равшан бўлган оятларимиз тиловат қилинса, кофир бўлган кимсалар иймон келтирган зотларга: «Қайси гуруҳ яхшироқ мартаба жиҳатидан ва гўзалроқ мажлисда?» – дейдилар.** (Яъни, бой-бадавлат мушриклар фақир ва мискин мўминларнинг устидан куладилар)». (Марям сураси, 73-оят). **«Яна улар: «Бизларнинг мол-дунё ва болаларимиз – иймон келтирганлардан кўра кўпроқ, (бинобарин бизлар Оллоҳ наздида улардан обрўлироқмиз ва) бизлар азоблангувчи эмасдирмиз», дедилар.** (Сабаъ сураси, 35-оят). **«Бизларнинг орамизда ана ўшаларга Оллоҳ инъом қилган эмишми?» – дейишлари учун уларнинг баъзиларини баъзилари билан ана шундай имтиҳон**

қилдик. Ахир шукр қилгувчиларни Оллоҳ яхшироқ билгувчи эмасми?!» (Анъом сураси, 53-оят). «Мутакаббир кимсалар эса: «Биз сизлар иймон келтирган динга кофирмиз», дейишди-да...». (Аъроф, 76-оят). «Яна улар: «Бу Куръон икки қишлоқ(нинг бири)дан бўлган улуғ одамга нозил қилинганида эди», – дедилар».

Изоҳ: Икки қишлоқдан мурод – Макка ва Тоиф шаҳарлари. Мушриклар назарида, Макканинг улуғи ўша жойлик боёнлардан Валид ибн ал-Муғйра бўлса, Тоифнинг улуғи Урва ибн Масъуд ас-Сақафий номли бир бой эди. У мушриклар ҳам барча замонлардаги дунёга қул бўлган кимсалар каби улуғликни мол-давлат ва салтанат билан ўлчар эдилар. Шунинг учун улар: «Агар бу Куръон ҳақ китоб бўлганида, Муҳаммадга ўхшаган бир етим ва камбағалга эмас, балки Валид ва Урва каби улуғ зотларга тушган бўлар эди», дедилар.

«(Эй Муҳаммад алайҳиссалом), **Парвардигорингизнинг раҳмати** (бўлмиш пайғамбарлик)ни ўшалар тақсимлайдиларми?! (Йўқ, асло ундоқ эмас!)». (Зуҳруф сураси, 31–32-оятлар)

Шу қаторда мен Антаранинг бир байтини эслаб ўтмоқчиман, у бу байт орқали инсоннинг қиймати унинг унсури, асл-насабида эмас, балки хулқи, жасоратида эканлигини айтган:

Қул бўлсамда карамла халқнинг подшоҳиман,
Рангим қора бўлса гар хулқнинг оппоғиман.

Кунлар ўткинчидир

Аҳмад ибн Ҳанбал бемор бўлган Бақийя ибн Мухалладнинг зиёратига борди ва унга: «Эй Абу Абдураҳмон,

Оллоҳнинг савобидан хушнуд бўл, саломат кунда дард, дардман кунда соғлик йўқдир», деди.

Бунинг маъноси – саломатлик кунларида касаллик хаёлга келмайди ва инсоннинг иродаси кучаяди, орзумидлари, интилиши кўпаяди. Қаттиқ дард тутганида эса саломатлик ёддан чиқади ва нафси умидсизлик, ҳимматсизлик қоплайди, ноумидлик ҳукмронлик қилади.

Аслида Имом Аҳмаднинг сўзи Оллоҳ таолонинг бу оятидан олингандир: **«Қасамки, агар Биз инсон зоти-га Ўз томонимиздан раҳмат-марҳаматимизни тотдириб, сўнгра Ўзимиз уни тортиб олсак, у албатта ноумид ва ношукрлик қилиши шубҳасиздир. Қасамки, агар унга бирон зиён-заҳмат етганидан кейин Биз ноз-неъматларни тотдириб қўйсак, албатта у: «Барча ёмонликлар мендан нари кетди», (энди ҳеч қачон қайтиб келмайди) дейди. Дарҳақиқат, у мағрур ва мақтанчоқдир. Магар (балолари кунларда) сабр қилиб, (сафолари кунларда шукроналик билан) яхши амаллар қиладиган зотлар борки, ана ўшалар учун мағфират ва катта ажр-мукофот бўлур».** (Худ сураси, 9–10–11-оятлар)

Ҳофиз ибн Касир айтади: «Оллоҳ таоло мана бу ояти орқали инсоннинг мазмун сифатлари ҳақида хабар беради (Оллоҳ таолонинг мўмин бандалари бундай сифатлардан мустаснодир). Яъни, инсонга неъматдан сўнг мусибат келса, гўё илгари яхшилик кўрмагандек, кенглик кутмагандек уни умидсизлик, келажакка бўлган ишончсизлик қуршаб олади, ўтмишни инкор этади.

Бало-офатдан кейинги неъмат ҳам уни шу кўйга солади ва дейди: **«Барча ёмонликлар мендан нари кетди...».** (Худ сураси, 10-оят)

Саъд ибн Рабийъ Ухуд жангида қонга бўялган ҳолида охирги нафасида ҳам Расулуллоҳ соллаллоҳу алайҳи васалламнинг аҳволи ҳақида сўради. Бу дил собитлиги, қалб ободлигидир.

Иброҳим ибн Жарроҳ айтади: «Абу Юсуф касал пайтида уни кўргани бордим ва уни ҳушсиз ҳолатда топдим, ҳушига келгач, мендан:

- Бу масала ҳақида нима дейсан? – деб сўради. Мен:

- Мана бундай ҳушидан кетган одам масаласими? – деб сўрадим. Сўнгра мендан сўради:

- Эй Иброҳим, шайтонга юриб тош отиш керакми ёки отда турибми?

- Отда туриб, – дедим.

- Нотўғри, – деди.

- Юриб отилади, – дедим.

- Буниси ҳам нотўғри, – деди.

- У ҳолда қайси бири афзал? – деб сўрадим.

- Модомики, Ақаба олдида тура олса, юрган ҳолда, тура олмаса, отда туриб отгани афзал, – деб жавоб берди. Унинг ҳузуридан чиқар эканман ҳовли эшигига етмай қичқириқни эшитдим. У вафот қилган эди. Оллоҳ уни Ўз раҳматига олсин».

Асримиз адибларидан бири айтади: «Ана шундай, ўлим уларнинг бошларига ўз қайғу-ғуссалари билан кўнган, нафаси хириллаб, дили сиқилган, беҳушлик уни ўраб олган бир пайтда, ҳушига келган биринчи лаҳзадаёқ, ўлим ундан сўнгги нафасларини олаётган вақтда ёнидагилардан ўрганиш ва ўзгаларга ҳам ўргатиш учун билмаган нарсалари ҳақида сўрайдилар».

Эй, Оллоҳ! Бунча ҳам илмни уларнинг қалбларига азиз қилмасанг, уларнинг ақл-ҳушларини илмга машғул қилмасанг, ҳатто улар ўлим билан тортишаётган

бир пайтда жондан азиз фарзандларини эмас илмни эслашди. Улар шунинг учун илм ва динда пешқадам бўлдилар. Оллоҳнинг уларга раҳмати бўлсин!

Ҳақир дунё

Машҳур олим Ибн Муборак айтади: «Мен учун амир Тоҳир ибн Хусайннинг қасридан Адий ибн Зайднинг ушбу қасидаси афзалдир:

Эй, замонни айблаётган кимса, сен ўзинг покмисан – комилмисан?!

Ёки қўлингда кунлар васиқаси борми ё мағрур-жоҳилмисан?»

Яъни, эй мусибат эгалари устидан кулгувчи инсон, сенга улар каби мусибат келмаслигига аминмисан ёки кунлар сенга меҳнат-машаққатлардан саломат бўлишинг ҳақида қўлингга ишонч қоғозини тутқаздими?

Саҳиҳ ҳадисда айтилади: **«Агар Оллоҳ таолонинг наздида, дунёнинг пашша қанотича қадри бўлганида, кофир бу дунёдан бир хўплам сув ҳам ичмаган бўлар эди»**. Яъни дунё, Оллоҳнинг наздида, пашшанинг қанотидан ҳам ҳақирроқдир ва бу тўғридир. Бас, уни деб безовта бўлишдан не наф?

Сокинлик, ором билан ҳаёт кечириш келажагинг, аҳли оиланг тинчлиги ва саодати гаровидир. Бинобарин, саодат Оллоҳ таолога иймон келтириш, У Зотнинг қазойи қадарига рози бўлиб, қаноат, сабр қилишда жамланур.

Иймон қиймати

«Улар Сизга мусулмон бўлганларини миннат қилурлар. Айтинг: «Сизлар менга мусулмон бўл-

ганларингизни миннат қилманглар. Балки агар (иймонингларда) содиқ бўлсангиз, (яъни, агар ростдан ҳам иймон келтирган бўлсангиз) Оллоҳ сизларни иймонга ҳидоят қилганини миннат қилур». (Хужурот сураси, 17-оят)

Фаросатли одамларгина англайдиган бир неъмат бордир – мусулмон инсон кофирга қараб, ўзидаги дини Исломда бўлишдек Оллоҳнинг неъматини эслаб, кофирни Парвардигорига осий бўлиб, унга исён қилиши, У Зотнинг оятларига кофир бўлиб, сифатларини инкор этиши. Холиқи, ризқ бергувчиси бўлмиш Зотга қарши бўлиб, элчию китобларини ёлғончи қилиши, буйруқларига бош эгмаслигини кўриб, ўша кофир каби эмаслигига Яратганга шукр қилади.

Эй инсон, билгинки, сен Парвардигорни Ёлғиз билган мусулмонсан. Оллоҳга, элчисига, Қиёмат Кунига ишонасан, фарз ибодатларни баҳоли қудрат адо қиласан, булар бебаҳо бўлган, ҳеч нарса билан сотиб олиб бўлмайдиган неъматдир. **«Ахир мўмин бўлган киши фосиқ-итоатсиз бўлган кимса каби бўлурми? (Йўқ), баробар бўлмаслар!»** (Сажда сураси, 18-оят)

Баъзи муфассирларнинг таъкидлашларича, жаннат аҳлларининг неъматларидан бири дўзах аҳлларига қарашлари ва Парвардигорларига берган неъматини учун шукр айтишларидир. **«Зеро, ҳар бир нарсанинг қадри ўз зиддининг олдида билинур».**

Хулоса

Ҳеч бир илоҳ йўқ Ёлғиз Оллоҳ бор. Комиллик сифатлари бўлмиш Илоҳиёт сифатлари билан танҳо бўлган Зот Ёлғиз Оллоҳ субҳонаху ва таоло маъбудиди барҳақдир.

Юқоридаги калималарнинг руҳи ва сирри ушбулардир: саноси улуғ, исмлари муқаддас, номи баракотли, Буюкликда тенги йўқ, ёлғиз Ўзи илоҳ бўлган Зот – Парвардигорни муҳаббат, улуғлаш, таъзим қилиш, қўрқув ва умид билан, таваккал, инобат, рағбат ва раҳбат ила ёлғиз, деб биламан. Ундан ўзгаси севилмас, Ундан ўзгасидан қўрқилмас, Ундан ўзгасидан умид ҳам қилинмас, ёлғиз Унга таваккул қилингай, Унга рағбат қилингай, Ундан қўрқилгай, Ёлғиз Унинг исми билан қасам ичилгай, Унга назр, Унга тавба қилингай, Унинг амрига итоат қилинур, Унга ҳисоб берилур, мусибат пайти Ундан ёрдам сўралур, илтижолар, саждалар Унга қилинур, Унинг учун ва Унинг исми ила қурбон қилинур. Буларнинг бари бир калимада жамланур: ибодатнинг барча нави билан ёлғиз Унга ибодат қилинур.

Модомики Исломни танир экансан, ғамгин бўлма

Исломни танимаган, унга эргашмаган инсон бебахт инсондир. Ислом ўз аҳли томонидан ташвиқот ва тарғибот ишларига муҳтождир. Ташвиқот ҳикматли ва юксак маданиятли бўлмоғи даркор. Чунки Ислом буюк воқеадир. Бинобарин; башарият саодати мана шу абадий ва барҳақ динга боғлиқдир. **«Кимда-ким Исломдан ўзга дин истаса, бас, (унинг «дини» Оллоҳ ҳузурида) ҳаргиз қабул қилинмайди...».** (Оли Имрон сураси, 85-оят)

Олмонияда бир машхур мусулмон даъватчи яшар эди. Шаҳарга кираверишда жуда катта эълон тахтаси бўлиб, унга олмон тилида: «Сиз фалон ва фалон нарса-ни билмайсиз ҳали», деб ёзилган эди. Мазкур даъват-

чи тахтанинг ёнига худди ўша катталиқда бир лавҳа (тахта) тиклаб, унга: «Сиз Исломни билмайсиз ҳали. Агар ўрганмоқчи бўлсангиз, фалон рақамлар орқали бизга боғланинг», деб ёзиб қўйди. Қарабсизки, унга Олмониянинг барча шаҳару қишлоқларидан кўнғироқлар дарё бўлиб оқиб кела бошлади. Натижада, ўша даъватчининг таъсирида бир йил ичида юз мингга яқин олмониялик эркагу аёл Исломни қабул қилди. Кейин у ерда масжид, мадраса ва Ислом маркази қурди.

Айни пайтда, башарият ҳайрону хастадир. У ўз тинчлиги, хотиржамлигига қайта эга бўлиши учун мана бу буюк динга катта эҳтиёжи бордир. «...Сизларга Оллоҳ тарафидан Нур ва Очиқ Китоб келдики, Оллоҳ у сабабли Ўзининг ризолигига эргашган зотларни нажот – омонлик йўллариغا ҳидоят қилур ва Ўз изну иродаси билан уларни зулматлардан нурга чиқарур ва уларни Тўғри Йўлга ҳидоят қилур». (Моида сураси, 16-оят)

Улуғлардан бири айтади: Мен бу оламда Оллоҳдан ўзгага ибодат қиладиган бирон зот қолмаса керак, деб ўйлар эдим. Лекин: «...Бандаларим орасида шукр қилгувчи (зотлар жуда) оздир». (Сабаъ сураси, 13-оят). «(Эй Муҳаммад алайҳиссалом), агар Сиз Ер юзидаги кимсаларнинг жуда кўпларига итоат қиладиган бўлсангиз, улар Сизни Оллоҳнинг Йўлидан оздирурлар. (Зотан) улар фақат (ўзларини ҳақ, деб ўйлаган) гумонларигагина эргашурлар ва улар фақат (ўзларини ҳам, ўзгаларни ҳам) алдайдилар, холос». (Анъом сураси, 116-оят). «Гарчи Сиз (барча одамларнинг иймон келтиришларини) жуда истасангиз-да, одамларнинг кўплари мўмин бўлмайдилар». (Юсуф сураси, 103-оят)

Инсон умри қисқадир, тезда ўз ниҳоясига етар, бас, мана шу қисқа умрни гуноҳ, ғам-андуҳлар билан ўтказма. «Улар у (Қиёмат соати)ни кўрадиган Кунда (бу дунёда) гўё биргина пешиндан сўнг ёки чошгоҳ пайтида тургандек (яъни, бир кун ҳам яшамагандек) бўлиб қолурлар!». (Ан-Назиат сураси, 46-оят). «Улар айтдилар: «Бир кун ё ярим кун. Санаб тургувчи (фаришталардан) сўрагин». (Мўминун сураси, 113-оят)

Саодат сабаблари

1. Солиҳ амал. «Эркакми ё аёлми – кимда-ким мўмин бўлган ҳолида бирон яхши амал қилса, бас, Биз унга покиза ҳаёт ато этурмиз...». (Наҳл сураси, 97-оят)

2. Яхши аёл. «...«Парвардигоро, Ўзинг бизларга жуфти ҳалолларимиздан ва зурриётларимиздан шод-хуррамлик ҳадя этгин...». (Фурқон сураси, 74-оят)

3. Кенг уй. Ҳадис: «Оллоҳим мен учун ҳовлимни кенг қилгин».

4. Ҳалол, покиза касб. Ҳадис: «Оллоҳ покдомондир, покизаларни севар».

5. Ҳусни хулқ ва инсонлар меҳрини қозониш. «Яна мени қаерда бўлсам хайру баракотли қилди...». (Марям сураси, 31-оят)

6. Қарздор бўлмаслик ва эҳсонни исроф қилмаслик. «Улар инфоқ-эҳсон қилган вақтларида исроф ҳам, хасислик ҳам қилмаслар, (балки эҳсонлари) ана ўша (хасислик билан исрофнинг) ўртасида – мўътадил бўлур». (Фурқон сураси, 67-оят). «(Бахиллик билан) қўлингизни бўйнингизга боғлаб ҳам олманг! (Исрофгарчилик қилиш билан) уни бутунлай ёзиб ҳам юборманг!...». (Ал-Исро сураси, 29-оят)

Саодатнинг баҳоси – шокир бўлган қалб, зокир тил, собир жисмдир.

Шукр, зикр ва сабр – бунда бордир кўп ажр

Ўз сир-асрори, иш тадбирларини яширган бунда саодатлидир. Айтишларича, бир аъробийга сир айтиб, уни ошкор қилмаслиги эвазига ўн динор беришди. Бунинг уддасидан чиқа олмаган аъробий динор берган одамнинг олдига бориб, у айтган сирни ошкор қилмоқчилигини эвазига динорларини қайтариб беришини айтди. Чунки сир яширмоқлик катта куч ва сабр талаб қилур. «... «Эй ўғилчам, бу тушингни оғаниларингга ҳаргиз айта кўрма...». (Юсуф сураси, 5-оят)

Инсоннинг заиф нуқталаридан бири одамларга ўзининг сирлар саҳифасини очмоқлигидир. Бу эски дарддир, башарият қонига сингиб кетган касалликдир. Нафс эса сирни ошкор қилишни, гап тарқатишни суяр. Зеро, ўз сирларини ошкор қилган инсон надомат, ғам-ғуссага ботмоғи айни ҳақиқатдир.

Ажалингдан аввал ҳаргиз ўлолмайсан

«...Бас, қачон уларнинг ажаллари етиб келганида эса уни бирон соат кетга ҳам сура олмайдилар, илгари ҳам қила олмайдилар...». (Наҳл сураси, 61-оят)

Бу оят ажалидан аввал бир неча бор ўладиган кўрқоқларга қаноат беради. Бу оятни ўқиган ҳар бир инсон ортга ҳам, олдинга ҳам сурилмайдиган белгиланган бир ажал борлигини, бутун дунё аҳли тўпланганда ҳам уни тезлаштира олмаслигини ёки ортга сура олмаслигини англайди. Бу, ўз навбатида, инсонга хотир-

жамликни, сакинат, сабр ва саботни беради. **«Ва ҳар бир жон ўзи билан бирга (уни маҳшаргоҳда) ҳайдагувчи (бир фаришта) ва (унинг қилиб ўтган амалларига) гувоҳлик бергувчи (бир фаришта) бўлган ҳолда келади».** (Қоф сураси, 21-оят)

Билгинки, Оллоҳдан ўзгага боғланмоқ бахтсизликдир. **«...Сўнг унинг учун Оллоҳдан ўзга ёрдам берадиган бирон жамоат бўлмади ва унинг ўзи ҳам голиблардан бўлмади».** (Қасас сураси, 81-оят)

Заҳабийнинг йигирма уч жилддан иборат «Сияру аъламин нубало» номли китобида бир қанча машҳур уламолар, халифалар, подшоҳлар, амирлар, вазирлар, зодагон ва шоирларнинг таржимаи ҳоллари зикр қилинган бўлиб, бу китобни ўқиган ҳар бир инсон икки муҳим ҳақиқатни тушуниб етади:

1. Оллоҳни қўйиб бутун умрини мол-давлат, болачақа, мансаб, касб-ҳунарга сарфлаган кимсани бахшида этган инсонни Оллоҳ таоло ўша нарсаларга топшириб қўяди. Бу унинг бахтсиз бўлишига, азоб тортишига, ҳасрат чекмоғига сабаб бўлади. **«Шак-шубҳасиз, (шайтонлар, Қуръондан юз ўгирган кимсаларни Тўғри) Йўлдан тўсурлар, (аммо ўша шайтонларнинг етовидаги адашганлар эса) ўзларини ҳидоят топгувчилар, деб ҳисоблайдилар».** (Зухруф сураси, 37-оят). **«...ҳамда кофир бўлган кимсаларнинг сўзларини тубан қилиб қўйди. Оллоҳнинг Сўзигина энг юксак Сўздир».** (Тавба сураси, 40-оят)

«Эй Буюклик ва Карам соҳиби»

Ҳадисда айтилади: **«Эй Буюклик ва Карам соҳиби калимасини, айтиш билан завқ олинглар».** Яъни уни доим айтинглар. **«Эй Абадий, Барҳаёт Зот»**, калимаси

ҳам шунингдекдир. Юқоридаги калималар Оллоҳ таолонинг исмлари бўлиб, агар У Зотга шу исмлар орқали дуо қилинса, дуоларни ижобат қилади, сўраганга беради. Демак, банда кенглик, зафар ва нажот топмоқ учун шу исмлар орқали Парвардигорга хитоб қилмоғи, У Зотга нидо айламоғи даркордир.

Мусулмон инсоннинг ҳаётида уч кун бордир, у кунлар байрамдир гўё:

1. Фарз ибодатларни жамоат билан адо қилиб, гуноҳлардан саломат бўлган кун. **«Эй мўминлар, Оллоҳ ва Унинг Пайғамбари сизларни абадий ҳаёт берадиган нарсага (яъни, Ҳақ Динга) даъват қилар экан, уни қабул қилинглр...»**. (Анфол сураси, 24-оят)

2. Гуноҳига тавба қилиб, маъсиятдан қутулиб, Парвардигорга қайтган кун.

3. Ва ниҳоят, Парвардигорига гўзал хотима ва мақбул амал билан йўлиққан кун. **«...Сўнгра (Оллоҳ) тавба қилишлари учун уларга тавба йўлини очди...»**. (Тавба сураси, 118-оят)

Саҳобалар ҳақида ўқир эканман, уларнинг ҳаётида бошқалардан ажралиб турувчи беш фазилатни тушуниб етдим:

1. Уларнинг ҳаётида енгиллик, осонлик бор, такаллуф йўқ, ишларни оддий ҳолда олиб борар, ўта талабчанлик, чуқур кетмоқ ва қаттиқлик уларга ёт эди.

2. Уларнинг илм дарёси амалга муттасил, баракотли, мўл бўлиб, кам ҳам ортиқча ҳам эмас. Унда на бир ортиқча калом ва на мураккаблик бор эди. **«...Албатта, Оллоҳдан бандалари орасидаги олим-билимдонлар кўркур...»**. (Фотир сураси, 28-оят)

3. Улар учун қалб амаллари бадан амалларидан улуғроқ эди. Баъзи тобеъинлар зоҳирий нафл ибодат-

лар бобида улардан кўра анчайин ижтиҳодли бўлиб, саҳобалар нафл намоз, нафл рўза ибодатларини енгил тарзда ўтказсалар-да уларда ихлос, инобат, таваккул, муҳаббат, рағбат ва раҳбат, хушув бор эди.

4. Улар роҳат, саодат, хотиржамлик топганлари сабаб, дунё матоларидан оз насибага эга бўлиб, унинг чиройи зийнатларидан юз ўгирган эдилар.

5. Улар жиҳодни муҳим санашар ҳатто уни ўзлари учун мақсад, нишон ва шиор қилиб олган эдилар. Улар жиҳод билан ўз ғам-андуҳларини унутар эдилар. Чунки унда зикр, амал, ва ҳаракат бордир.

Оллоҳ Йўлида жиҳод қилган инсон энг бахтли, қалби очик, дили равшан инсондир. **«Бизнинг (Йўлимиз)да жиҳод қилган – курашган зотларни, албатта, Ўз Йўлларимизга ҳидоят қилурмиз...».** (Анкабут сураси, 69-оят)

Қуръони каримда бир қанча ҳақиқатлар зикр қилинган бўлиб, улардан инсон саодатига боғлиқ баъзи бирларини келтириб ўтмоқчиман:

Оллоҳ ёрдам сўраган бандасига ёрдам беради. **«Эй мўминлар, агар сизлар Оллоҳга ёрдам берсанглар (яъни Унинг Йўлида жиҳод қилсанглар), У Зот ҳам сизларга ёрдам берур...».** (Муҳаммад сураси, 7-оят)

Сўраганга – беради. **«Менга дуо-илтижо қилинглар! Мен сизларга (қилган дуоларингизни) мустажоб қилурман...».** (Ғофир сураси, 60-оят)

Мағфират сўраганни – мағфират қилади. **«Парвардигорим, дарҳақиқат, мен ўз жонимга жабр қилиб кўйдим. Энди Ўзинг мени мағфират қилгин».** Бас, (Оллоҳ) уни мағфират қилди...». (Қасас сураси, 16-оят)

Тавбаларни қабул қилади. **«У бандаларидан тавба-тазарруни қабул қиладиган, ёмонликларни афв**

этадиган ва қиладиган ишларингизни биладиган Зотдир». (Шўро сураси, 25-оят)

Ким Оллоҳга ўзини топширса, У Зот унга етарлидир. **«Ким Оллоҳга таваккул қилса, бас, (Оллоҳнинг) Ўзи унга етарлидир...».** (Талоқ сураси, 3-оят)

Уч қилмишнинг эгаларига Оллоҳ таоло жазони тезлаштиради, улар: Зулм. **«...Эй одамлар, бу тажовузингиз фақат ўзингизнинг зиёнингизгадир...».** (Юнус сураси, 23-оят)

Ваъдани бузиш. **«...Энди ким (ўз қасамёдини) бузса, бас, у фақат ўз зиёнига бузур...».** (Фатҳ сураси, 10-оят) Макр. **«...Ёмон макр-ҳийла эса фақат ўз эгаларини ўраб ҳалок қилур...».** (Фотир сураси, 43-оят)

Албатта, золим инсон Оллоҳнинг дастидан қочиб кутула олмайди. **«Мана, улар золим бўлганликлари сабабли уйлари ҳувиллаб қолди!...».** (Намл сураси, 52-оят)

Солиҳ амалнинг самараси ҳам нақд, ҳам насиядир (яъни, дунёда ҳам Охиратда ҳам кўринур). Шубҳасиз, Оллоҳ таоло мағфиратли ва миннатдор бўлгувчи зотдир. **«Бас, Оллоҳ уларга ҳам бу дунё савобини (ғалаба ва мол-давлатни) ва ҳам Охиратдаги гўзал ажри (жўннат)ни ато қилди...».** (Оли Имрон сураси, 148-оят)

Ким унга итоат этса – Оллоҳ уни суяр. **«(Эй Муҳаммад алайҳиссалом), айтинг: «Агар сизлар Оллоҳни севсангиз, менга эргашинглар. (Шунда) Оллоҳ сизларни севади ва гуноҳларингизни мағфират қилади...».** (Оли Имрон сураси, 31-оят) Агар банда буни билса – бахтиёр ва хурсанд бўлар. Чунки у ризқ: **«Зеро, Оллоҳнинг Ўзигина (барча халойиққа) Ризқу рўз бергувчи, куч-қувват Соҳиби ва Қудратлидир».** (Ваззориёт сураси, 58-оят). Ва ёрдам

бергувчи: «Аслида ғалаба фақат қудрат ва ҳикмат Эгаси бўлган Оллоҳ ҳузуридан келур...». (Оли Имрон сураси, 126-оят). Мағфират қилгувчи: «**Ва Мен тавба қилган ҳамда иймон келтириб яхши амаллар қилган, сўнгра Тўғри Йўлга юрган кишиларни Мағфират қилгувчидирман**». (Тоҳа сураси, 82-оят). Тавбаларни қабул этгувчи: «**...Албатта, У Кечиримли, Меҳрибондир...**». (Бақара сураси, 54-оят). Дўстлари учун душманларидан ўч олгувчи: «**...Зеро, Биз Интиқом олгувчидирмиз**». (Духон сураси, 16-оят). Парвардигор билан муомала қилмоқда. Бас, У Зот Энг Улуғ Зотдир: «**...Унинг учун бирон «тенг»ни билурмисиз?! (Йўқ, билмассиз!)**». (Марям сураси, 65-оят)

Шайх Абдурраҳмон ибн Саъдийнинг (Оллоҳ у зотни Ўз раҳматига олган бўлсин) «Бахтиёр ҳаёт кечирмоқ учун фойдали воситалар» номли китобида айтилади: «Банда Оллоҳ берган неъматларни кўра олиши ва ўша неъматларга сазовор бўлмаганлардан устун эканлигини билиши саодат сабабларидан биридир. Шунда у банда Оллоҳ унга қандай фазл кўрғазганини ҳис қилади.

Хулоса

Асмо бинти Умайдан ривоят қилинади: «Расулulloҳ соллаллоҳу алайҳи васаллам дедилар: **«Огоҳ бўл, мен сенга қайғу пайтида айтиладиган сўзларни ўргатаман. У: «Оллоҳ Парвардигоримдир, У Зотга бирор нарсани шерик қилмасман», калимасидир**».

Бошқа бир ҳадисда: **«Кимнинг бошига ғам-андуҳ, касаллик, қийинчилик тушса: Оллоҳ Парвардигор**



римдир, Унинг шериги йўқдир, деб айтсин, шунда ундан ғамлар тарқайди».

Қалбга қоп-қора, тўп-тўп булутларни келтирган бир қанча ишлар борки, агар шу ҳолга тушган инсон Парвардигори томон қочиб, ишини Унга топширса, Унга халқидан бирортасини шерик қилмай, ўзини Унинг оёғи остига ташласа, ғам-андуҳлари тарқайди. Аммо ким бунга бепарво қараса ҳайҳот, ҳайҳот!

Шоир айтганидек:

Йўқотсак-да мол-давлат, бойликларимиз,

Руҳимиз соғ бўлса – шудир кифоя.

Мол топилар, обрў ҳам қайтар,

Оллоҳ ҳалокатдан қилса ҳимоя!

Ҳасадгўйдан кўрқсанг:

1. Зикр, дуолар билан бирга икки «қул аъзузу»ни ўқи.
2. Ишларингни ундан яшир.
3. Ундан узоқ бўл.
4. Унинг озорини тийиш учун унга чиройли муомала қил. «...Сиз (ҳар қандай ёмонликни) энг гўзал сўзлар билан даф қилинг!...». (Фуссилат сураси, 34-оят)

Хулқингни чиройли қил

Чиройли хулқ бахт ва саодатдир. Ёмон хулқ фалокат ва бахтсизликдир.

Ҳадис: «**Киши гўзал хулқи билан рўзадор ва кечалари ибодат қилгувчининг даражасига етур».**

Ҳадис: «**Қиёмат кунда сизлардан менга яқин жойда турадиган ва энг суюкли бўлган кишини айтайми? У гўзал хулқ эгасидир».** «Албатта, Сиз улуғ хулқ

устидадирсиз». (Қалам сураси, 4-оят). «Агар кўпол, қаттиқдил бўлганингизда эди, албатта улар атрофингиздан тарқалиб кетган бўлар эдилар...». (Оли Имрон сураси, 159-оят). «...Кишиларга чиройли сўзлар сўзлангиз...». (Бақара сураси, 83-оят)

Мўминлар онаси Оиша розияллоҳу анҳо Расулуллоҳ соллаллоҳу алайҳи васалламни сифатлаб айтади: «**Расулуллоҳнинг хулқи Қуръон эди.**

Кенг хулқ ва зукколик – Оллоҳ яхшилиқни истаган киши учун нақд неъмат ва ҳузур-ҳаловатдир. Тезлик, қизиққонлик, жаҳл узоқ давом этувчи бахтсизлик ва абадий азобдир.

Уйқусизлик давоси

Уйқусизлик дардига чалинган инсон нима қилиши керак?

1. Шариат белгилаган зикрларни айтсин. «...**Огоҳ бўлингизким, Оллоҳни зикр қилиш билан қалблар ором олур.**» (Раъд сураси, 28-оят)

2. Кундузги уйқуни тарк қилиб, фақат зарур пайтадагина ухласин.

3. Уйқу келгунича ёзиб, ўқисин.

4. Кундузи жисмни қийнайдиган фойдали ишни қилсин.

5. Қаҳва, чой каби ичимликларни кам истеъмол қилсин.

Гуноҳларнинг давом этавериши – тоат ҳаловатини, иймон самимиятини, саодат завқини кетказади.

Ибн Таймийя айтади: «Гуноҳлар қалбни тавҳид фазосида кезиб юришдан тўсади».

Маъсиятлар оқибати

1. Банда билан Парвардигори ўртасида парда тортилади. **«Ҳеч шак-шубҳа йўқки, улар ўша (Қиёмат) Кунда Парвардигорларидан тўсилгувчидирлар.** (Яъни, Парвардигорнинг дийдорига етиш уларга ҳеч насиб қилмагай)!» (Мутаффифин сураси, 156-оят)

2. Махлуқни Холиқдан узоқлаштиради. Кишининг феъли ёмон бўлса, гумонлари ҳам ёмонлашади.

3. Доимий қайғу.

4. Қалбда хавф ва изтироб бўлади.

5. Бахтсиз ҳаёт кечиради.

6. Қалбда зулм ва қўполлик томир уради.

7. Юзда тундлик ва қоралик пайдо бўлади.

8. Халқнинг қалбида унга қарши нафрат бўлади.

9. Ризқи тор бўлади.

10. Раҳмон ғазабланади, иймон камаяди, ғам-андуҳлар тушади.

Ризқ изла, очкўз бўлма

Оллоҳ лой ичидаги қуртга ҳам ризқ беради. **«Ерда ўрмалаган нарса борки, барчасининг ризқи Оллоҳнинг зиммасидадир...»** (Худ сураси, 6-оят)

Ўз инидаги қушларга ҳам У Зот ризқ беради.

Сувдаги балиқни ҳам У Зот ризқлантиради.

Сен эса қуртдан, қушдан ёки балиқдан ақллироқсанку, бас, ўз ризқингга қайғурма.

Кўп одамларни Оллоҳ таолодан узоқлашганликлари сабаб уларга фақирлик, ғам-алам етганини кўрдим. Улар бой, ризқи кенг, саломат ҳолда эдилар, сўнгра улар Оллоҳнинг тоатидан юз ўғирдилар, намозга бепарво бўлдилар, гуноҳи кабираларни қила бошлади-

лар. Бас, Оллоҳ улардан саломатликни, кенг ризқни тортиб олди ва уларни фақирлик, қайғу билан балога йўлиқтирди, улар бало – омадсизлик билан кун кечира бошладилар.

«Бизларни Тўғри Йўлга йўллагин...»

Ҳидоят сири

Муҳаммад соллаллоҳу алайҳи васаллам бизларга бир томонини қолдирган – Тўғри Йўлга эргашган кишиларгина саодатни топурақлар. Тўғри Йўлнинг иккинчи тарафи – жаннати-наъимдадир.

Тўғри Йўлни ушлаган инсон гўзал оқибатдан хотиржам бўлур, Парвардигорининг ваъдасидан кўнгли жойига тушиб, Мавлосининг қазосига рози бўлур, уни Тўғри Йўлга етакловчиси борлигини билур. У етакловчи бегуноҳ бир Зотки, **ўз ҳавойи-хоҳиши билан сўзламас**, йўлдан озган кимсага эргашмас, унинг сўзлари халқ учун ҳужжатдир, унга шайтон васвасидан паноҳ берилгандир. **«Унинг (яъни, ҳар инсоннинг) олдида ҳам, ортида ҳам таъқиб қилгувчи (фаришталар) бўлиб, улар Оллоҳнинг амри билан уни сақлаб-муҳофаза қилиб турурақлар...»**. (Раъд сураси, 11-оят)

Банда ушбу Тўғри Йўлни тутгандагина саодат топади, чунки у ўзининг Оллоҳи борлигини, гўзал намуна (Расулulloҳ соллаллоҳу алайҳи васаллам), қўлида китоб, қалбида нур, кўнглида бир воиз борлигини билади, у жаннати наим томон боради, тоат учун амал қилади, яхшиликка юради. **«Бу – Оллоҳнинг ҳидояти бўлиб, у билан бандаларидан Ўзи хоҳлаган кишиларни ҳидоят қилур...»**. (Анъом сураси, 88-оят)



Покиза ҳаётни истаганлар қуйидаги ўн чечакни ўзлари учун узиб олсинлар

1. Саҳарда истиғфор айтиб ўтирмақ.
2. Тафаккур учун холи қолмақ.
3. Яхшилар билан ҳаммажлис бўлмақ.
4. Зикр қилмақ.
5. Ҳушуъ билан икки ракат намоз ўқимақ.

6. Тадаббур билан тиловат қилмақ.

7. Қаттиқ иссиқ кунларида нафл рўзалар тутмақ.

Ҳадис: *«(Оллоҳ айтади: бандам) Ўз таом, шароб, шаҳватини Мен учун тарк қилди».*

8. Садақани махфий қилиб бермақ. Ҳадис: *«Ўнз қўл бергани чап қўл билмасин».*

9. Мусулмондан ғамни кетказмақ. Ҳадис: *«Мусулмондан ғамни кетказган инсонни Оллоҳ ҳам Қиёмат кунинда ғамини кетказади».*

10. Бу фоний дунёдан зуҳдлик билан (дунёдан юз ўгириб) ўтмақ. **«Ҳолбуки, Охират яхшироқ ва боқийроқдир».** (Аъло сураси, 17-оят)

Нуҳ ўғлининг мана бу сўзи унинг бахтсиз бўлишига сабаб бўлди. **«У (ўғли) деди: «Мен ўзимни сувдан сақлайдиган бирон тоғнинг устига чиқиб кетажакман»...».** (Худ сураси, 43-оят). Агар у Еру осмон Парвардигори бўлмиш Оллоҳга таянганида, бахтли ва азиз бўлар эди.

Намруднинг бахтсизлиги, мен ҳам тирилтира ва ўлдира оламан, деб айтган сўзи эди. У ўзи учун лойиқ бўлмаган кийимни кийди, унга тўғри келмас сифатга эга бўлмақчи бўлди **бас, бу кофир довираб қолди** ва зиён тортувчилардан бўлди. **«Бас, Оллоҳ уни ҳам Охират, ҳам дунё азоби билан ушлади** (яъни, дунёда

у денгизга ғарқ қилиб юборилди, Охиратда эса дўзах азобига дучор бўлур)». (Ан-Назиат сураси, 25-оят).

Саодат калити бир калимадир, миллат мероси – бир иборадир, нажот байроғи бир жумладир, у калима, у ибора, у жумла: **ЛА ИЛАҲА ИЛЛАЛЛОҲ МУҲАММАДУР РАСУЛУЛЛОҲ – ҲЕЧ БИР ИЛОҲ ЙЎҚ ЁЛҒИЗ ОЛЛОҲ БОР, МУҲАММАД – ОЛЛОҲНИНГ ЭЛЧИСИДИР.**

Ерда ушбу калималарни айтган инсоннинг саодати – осмонда унга «Рост сўзладинг» деб жавоб қилинишидир.

Ўша Сўзга амал қилган кишининг саодати эса ҳалокат, шармандалик, дўзахдан омонлигидир.

Бошқаларни ҳам ўша Сўзни айтишга даъват қилганларнинг саодати эса унга мадад берилмоғи ва унга шукр айтилмоғидир.

Ўша Сўзни севганнинг бахти эса азиз ва мукаррам бўлмоғидир.

Қул бўлган Билол ўша Сўзни айтиб, ҳурга айланди.

У сўзни тутилиб айта олмаган Абу Лаҳаб хору зор қул ҳолида ўлди. **«...Кимни Оллоҳ хор қилиб қўйса, бас, уни (ҳеч ким) азиз қилгувчи бўлмас. Албатта, Оллоҳ Ўзи хоҳлаган нарсани қилур».**

У Сўз шундай бир малҳамки, бутун башариятни пок, Раббоний иймон чўққисига олиб чиқади.

Агар Охиратдан юз ўгирсанг – дунё учун севинма, чунки доимий азоб сенинг йўлингдасан, қуллик, бахтсизлик сени кутмоқда.

Ёлғиз Мангу Зотдан юз буриб, фарзандинг учун севинма, чунки Ундан юз бурмоқ тўла мағлубият, чексиз зиён ва бениҳоя хорлик демакдир.

Ёмон амаллар қилиб мол-давлатинг билан хурсанд бўлма. Зеро, ёмон амалнинг охири вой бўлар, оқибат завол топура, Охиратда эса унга лаънат бўлғай.



Бошга тушгувчи иш билан муомала ўрнат – кўниккин

Бир киши туйнукдан сакради, баногоҳ унинг чап кўлидаги узук туйнукдаги қозикқа қадалиб қолди ва ўша қозик унинг бир бармоғини узиб олди. Ўша одам айтади: «Мен ўша воқеани эслаганимдагина кўлимда тўрт бармоқ борлиги, бир бармоқдан ажраб қолганим ёдимга тушади. Ўзим бундан норози эмасман». **«Оллоҳ тақдир қилди, У Зот хоҳлаган нарса бўлади».**

Мен бир одамни биламан, касаллиги сабабли чап кўли елкасидан кесиб ташланган. Лекин у шунга қарамасдан узоқ яшади, оила қурди, фарзандлар кўрди. Гўё Оллоҳ унга фақат бир кўл бергандек машинасини ҳам, ишларини ҳам бемалол бошқаради. **«Оллоҳнинг сенга ёзган қисматига рози бўл, одамларнинг энг бойи бўласан».**

Воқеликка кўникиб, иқлимга мослашишимиз бунча ҳам тез ва ажиб бўлмаса. Бундан эллик йил аввал ерга гилам сифатида хурмо бўйраси солинар, уй ичидаги бор висотимиз бир меш сув, озгина сопол идиш, ёғоч товоқ, косалардан иборат бўлиб, шулар билан ҳам ҳаёт давом этаверар эди. Чунки бизлар шунга рози ва таслим бўлган эдик.

Куфадаги жоме масжидда икки қабила орасида фитна чиқди, ҳар икки томон қиличларни яланғочлашди, найзаларини кўлга олишди. Теварак-атроф ҳаяжонга тушди, шунда масжиддан бир киши ҳалим, ислоҳчи инсон деб танилган Аҳнаф ибн Қайсни излаб чиқиб кетди. Уни ўз уйида кўйларини соғаетган ҳолда топди, устидаги кийим ўн дирҳамлик ҳам эмас, жисми

(Тавба сураси, 55-оят). «(Эй Муҳаммад алайҳис-салом), **айтинг: «Оллоҳнинг фазлу марҳамати (яъни Ислом) ва У Зотнинг раҳмат-меҳрибонлиги (яъни Қуръон) билан – мана шу (неъмат) билан шод-хуррам бўлсинлар. (Зеро), бу улар тўплайдиган молдунёларидан яхшироқдир».** (Юнус сураси, 58-оят)

Мутахассис табиб менга акам Муҳаммаднинг қўли елкасидан узиб ташланиши лозимлиги ҳақида айтган кун, ҳаётимдаги энг хунук кунга айланиб қолди. Бу хабар қулоғимга худди замбарак ўқидек эшитилди. Лекин мен нафсимга мағлуб бўлмадим, руҳан Парвардигоримнинг мана бу Сўзига қайтдим: «(Бирон кимсага) **бирон мусибат етмас, магар Оллоҳнинг изни-иродаси билангина (етур). Ким Оллоҳга иймон келтирса, У Зот унинг қалбини (Тўғри Йўлга) ҳидоят қилур...».** (Тағобун сураси, 11-оят). «...**(Эй Муҳаммад алайҳиссалом), бирор мусибат келганда: «Албатта, биз Оллоҳнинг (бандаларимиз) ва албатта, биз У Зотга қайтгувчилармиз», дейдиган сабрли кишиларга хушxabар беринг!».** (Бақара сураси, 155–156-оятлар)

Бирор бир ҳийла қўлимиздан келмас, ҳийла фақат иймон ва таслим бўлмоқликдир.

Хансо Наҳавийяга Қодисийя жангида Оллоҳ йўлида бирданига тўрт ўғли ҳалок бўлгани хабари етганида, у саодатманд она нима қилди. У Оллоҳга ҳамд айтди, Парвардигорнинг қазосига, берган гўзал оқибатига, лутфу иноятига шукрлар айтди! Бу – иймоннинг қуримас чашмасидир. Ишончининг туганмас жилвасидир. У каби шукр қилгувчилар ажрларга эришгай, дунё ва Охират саодатига етишгай. Агар шундай қилмаганида қўлидан нима ҳам келар эди. Ғазабланар,

асабийлашар, қаршилиқ кўрсатар ортидан дунё-ю, Охиратнинг зиёнига эришар эди.

Шак-шубҳасиз, мусибатларнинг малҳами, машаққатларнинг давоси ушбу сўздир: **«Албатта, биз Оллоҳникимиз ва бизлар Унга қайтарилурмиз».**

Бунинг маъноси – Барчамиз Оллоҳникимиз, бизлар Унинг халқи ва мулкимиз, Унга қайтурмиз, Иш Унинг қўлидадир, бирор нарса бизнинг қўлимиздан келмас.

«...Барча нарса ҳалок бўлгувчидир, магар Унинг Юзи – Ўзигина (мангудир)...». (Қасос сураси, 88-оят). **«(Ер) юзидаги барча жонзот фониийдир».** (Ар-Раҳмон сураси, 26-оят)

Агар фаразан сенга, уйингга ўт кетгани ё ўғлинг ўлгани, ёки молинг йўқолгани ҳақидаги даҳшатли хабар етса нима қиласан? Ҳозирданоқ ўзингни кўниктиргинки, тақдирдан қочмоқ фойда бермас, қазодан қутулмоқ имконсиз ишдир. Бас, қазойи Қадарга таслим бўл, мусибатни кўтар, ажр касб эт, чунки сенинг олдинда бундан бошқа чора йўқдир. Ҳа, айтганча, бошқа чора ҳам бор, лекин мен сени ундан қайтарурман, у эса ушбулардир: бўлган ишдан норози бўлиб сиқилиш, асабийлашиш, ғазаб, дод-вой қилиш, лекин булар билан нимага эришмоқчисан? У ҳолда Парвардигорнинг ғазабига, инсонлар нафратига дучор бўлурсан, балки бунда ажр кетар, гуноҳ эзар, йўқотган нарсанг сенга қайтмас, мусибат сендан кўтарилмас, қатъий амр сендан кетмас.

Сен қайғурган нарса тез орада барҳам топар

Ўлим барчанинг – золимнинг ҳам мазлумнинг ҳам, кучсизу кучлининг ҳам, бойу камбағалнинг ҳам бошида бордир. Демак, сенинг ўлишинг ҳам одамлар учун ян-

гилик эмас, сендан аввал ҳам қанча умматлар ўтдилар, сендан кейин ҳам ўтурлар.

Ибн Батувтанинг зикр қилишича, шимолда бир мақбара бор экан. У ерга минглаган подшоҳлар дафн этилган бўлиб, ўша жойдаги бир лавҳга шу сўзлар ёзиб қўйилган экан:

«Қанча-қанча султонлар суякларга айланди,
Буюк бошлар тупроққа тупроқ бўлиб жойланди».

Лекин ишнинг даҳшати инсоннинг ғафлатидир. У эртаю кеч ўзининг атрофида пайт пойлаб турган ўлим шарпасидан беҳабар, мангу ва бахтиёр яшайман деб ўйлайди. Ҳар бир бошланган ишни муқаррар ниҳояси ҳам бўлишидан ғофил. **«Эй инсонлар, Парвардигорингиздан қўрқингиз! Зеро, (Қиёмат) соати (олдидаги) зилзила улуғ – даҳшатли нарса».** (Ҳаж сураси, 1-оят). **«Одамларга ҳисоб-китоблари (яъни, Қиёмат соати) яқинлашиб қолди. Улар эса ғафлатда, (иймон келтириб, яхши амаллар қилишдан) юз ўғиргувчидирлар».** (Анбиё сураси, 1-оят)

• Тушкунлик бахтсизликнинг йўлидир

Тушкунлик Ғарбни Шарқдан, бойни камбағалдан ажратмайди, балки бутун оламни ҳалок қилади. У барчага теккан дарддир. Кўпинча, унинг ниҳояси ўз жонига қасд қилиш билан тугайди. Ўз жонига қасд қилиш ҳеч қандай давлатни, мансабни, номни тан олмайди, у фақат мўминлардан қўрқади. Баъзи рақамлар бу дарднинг қурбонларининг саноғи оламнинг ҳар тарафида икки юз миллионга етганлигини кўрсатса, статистик маълумотлар ер юзида ҳар ўн инсондан бири

мана шу хатарли касалликка чалинганлигини маълум қилади.

Надоматлар бўлсинки, бу дард нафақат катталарга балки она қорнидаги ҳомилага ҳам қасд қилишгача етиб келгандир.

Тушкунлик – ҳалокат эшиги

Кўпгина машҳурлар, жумладан, фан соҳасида машҳур бўлган кимсаларни ҳам бу дард четлаб ўтмаган. Масалан, шоир Салоҳ Жоҳиннинг ўлимига агар ягона бўлмаса биринчи сабаб тушкунлик бўлган. Наполеон қувғин қилинганида мана шу дард сабабли вафот этганлиги тарихдан маълумдир.

Бундан бир неча йил аввал ахборот марказларининг тарқатган хабарлари бутун дунё матбуотининг биринчи саҳифаларини эгаллади. Олмониялик бир аёл ўзининг уч нафар гўдаklarини ўз қўли билан ўлдирди, бунга сабаб унинг тушкунлик дардига мубтало бўлганидир. Фарзандларини қаттиқ яхши кўрганлигидан уларга азоб, қийинчилик келишидан кўрқиб, уларга бундай азоблардан «роҳат» бериш мақсадида ўз жигарбандларини кейин эса ўзини ўлдирган.

Бекорчилар яхши ишлар қилиб, одамларга фойда келтириб, касал ҳолидан хабар олиб, қабрларни зиёрат қилиб, масжидлар барпо қилиб, хайру саховат ишларида ҳамжиҳат бўлиб, дўстлар билан дийдорлашиб, уй-ҳовлиларни тартибга келтириб, фақир-ожизларга ёрдам бериб, ўзларининг бекорчилик «касбларини» мана шундай ишлар учун бўшатиб беришлари айни муддаодир.

Умар розияллоху анху айтадилар: «Ҳаётимдаги бор матлабим – қазо ва қадарга кўнишдан иборат».



Айтдиларки, икки чорпойдан қайси бирининг устида кетаётганимнинг фарқи йўқ. Камбағаллик устида бўлсам сабр қиламан, бойлик устида бўлсам – шукр.

Абу Зуайб ал-Ҳазлийнинг бир йилда саккиз ўғли вабо касали билан вафот этди. Шунда у Парвардигорининг қазосига таслим бўлди ва шуларни айтди:

Замон ишидан кўнглим бузилмас,
Сабрим қалбим учун таскин берар.
Тақдир ўз тирноғин санчганида,
Тақиб олган қайси тумор вафо қилар.

Ибн Аббос кўзи ожиз бўлганида ўзига ўзи тасалли бериб деди:

Гарчи Оллоҳ кўзларимнинг нурин олса-да,
Қалбимдадир ўша нурлар, ўша кўзлар.
Қалбим ҳушёр, ақлим менинг расодир,
Оғзимдадир қилич каби кескир сўзлар.

Бу гарчи озгинаси кетса-да, инсонга берилган кўп неъматлар билан қаноат қилиш демакдир.

Урва ибн Зубайрнинг оёғи синган кунда ўғли вафот этди. Шунда Урва: Оллоҳим Сенга ҳамд бўлсин, олсанг бергувчи Ўзингсан, имтиҳон қилсанг саломат қилгувчи ҳам Ўзингдирсан. Менга тўрт аъзо бериб эдинг, биттасини қайтариб олдинг, тўрт фарзанд берган эдинг бирини олдинг. **«Сўнг уларнинг ҳузурларига ҳар эшикдан фаришталар кириб (дерлар): «(Оллоҳ Йўлида меҳнат-машаққатларга) сабр-тоқат қилиб ўтганларингиз сабабли (энди бу жаннатларда) сизларга тинчлик-осойишталик бўлғай. Охират диёри нақадар яхши!».** (Раъд сураси, 23–24-оятлар)

Дурайднинг укаси Абдуллоҳ ибн Симма жангда ўлдирилди. Дурайд ўз укасини қўлидан келганича ҳимоя қилганини эслаб, ўзини ўзи овутди. Тақдир учун ҳийла қилиб бўлмаслигини англади.

Неча марта ўлимдан қўрқдик, лекин ўлмадик.
 Неча марта шу ниҳоя деб ўйладик,
 Кейин эса у янгитдан тикланиш,
 Қувват, давомийлик эканлигин англадик.

Неча марта йўлимиз тор бўлди, арқонимиз узилди, юзимизда уфқлар зулмат босди, кейин билсак, у ғалаба ва яхшилик бўлиб чиқди.

Неча марта йўлимиз қоронғулашди, кенг Ер бизга торлик қилиб қолди, кейин билсак, у эзгулик, фаровонлик экан.

Имом ибн Таймийя айтади: «Ла ҳавла ва ла қуввата»ни айтиш билан юклар енгиллашади, даҳшатлар тин олади, улуғликка етилади.

Эй банда, сен ҳам шу сўзларни айтгин! Зеро, у жаннат хазиначаридан бир хазиначар, роҳат йўлидир, қалб шодлигидир.

Истиғфор – қулфларни очар

Ибн Таймийя айтади: «Менга бирор масала қийин бўлиб қолса, Оллоҳга минг марта ёки ундан кўпроқ ёки озроқ истиғфор айтаман, шунда Оллоҳ ўша қийин масала ечилишини осон қилади.

Ҳадисда айтилишича: **«Оллоҳ бандасига ёзган ҳар бир қазо бандаси учун яхшиликдир»**. Ибн Таймийядан сўралди: «Ҳатто маъсият ҳам яхшилик бўладими? У: «Ҳа, агар ундан кейин тавба, надомат, истиғфор ва хокисорлик – синиқлик бўлса», – деб жавоб берди.

Тарих гувоҳ бўлган улуғларга лолман. Улар мусибатларни, гўё раҳмат ёмғирларининг томчиларидек, хуш насим сасидек қабул қилганлар. Халқлар саййиди бўлган зот – Расулуллоҳ соллаллоҳу алаҳи васаллам ҳижрат йўлида юртидан қувилган, ҳайдалган ҳолда одамлар кўзидан беркиниб кетар экан, ортларидан қувиб келган Суроқага (етиб олгач, отининг оёқлари ерга ботиб қолган. Ўшанда Суроқа Оллоҳнинг қудратига тан бериб, ёмон ниятидан қайтиб, Исломга кирган) Кисро билагузугига эга бўлишини башорат берган.

Уҳуд жангида қатл ва жароҳатлардан кейин саҳобаларига: **«Парвардигоримга сано айтиш учун ортимда саф тортинглар»**, деди. Бу, Сурайё юлдузини бўйсиндирувчи Набавий шижоат, тоғларни титратувчи Набавий қатъийликдир.

Арабнинг ҳалим кишиларидан бўлмиш Қайс ибн Осим ал-Минқарий қавмига бир қиссани сўзлаб берар вақтида ёнига бир киши келиб: «Фалончининг фарзанди ўғлингни ўлдирди», – деди. Шунда у қиссасини давом эттираверди, ниҳоялагандан сўнг ҳалиги одамга: «Ўғлимни ювиб, кафанланглар, кейин менга ижозат берсанглар, жанозасини ўқиб келаман», – деди.

Саодатни яратувчилар

Термизий ривоят қилган ҳадисда айтилади: **«Ким ўз уйида хотиржам, тани саломат ҳолда тунни ўтказса, ўзининг бир кунлик емиши ҳам бўлса дунё тўлалигича уники бўлибди»**.

Маъноси: озиқ-овқати, ётадиган тинч жойи бор одам – энг гўзал саодатга, катта яхшиликларга ва кўп

инсонлар мана шундай саодатга эгадирлар, лекин улар буни билмайдилар, ҳис этмайдилар.

Оллоҳ субҳонаҳу ва таоло Ўз Расулига айтади: **«Бугун Мен сизлар учун динингизни комил қилдим».** (Моида сураси, 3-оят). Қайси неъмат Расулуллоҳ соллаллоҳу алайҳи васалламга комил бўлган эди? Озиқ-овқатми, қасрларми ёки олтин-кумуш неъматими? Ахир Расулуллоҳ соллаллоҳу алайҳи васаллам буларнинг ҳеч қайсисига эга эмас эдилар-ку? У зот шифтлари хурмо дарахтининг шохларидан қилинган, лойдан қурилган биргина хонада ҳаёт кечирар эдилар. Очликни даф қилар, деб икки тошни қорнига боғлаб олар, хурмо дарахтининг барглари тўлдирилган ёстиққа суяниб ўтирар эдилар. У зот ўзларининг совутларини бир яхудийга ўттиз соъ арпа учун гаровга бердилар.

Мансаб кулфати

Мансаб – ҳаёт машаққатларидан бири.

Мансаб солиғи жуда қимматдир. У обрўни, соғлиқни, роҳатни кетказар.

Хўп, дунё барча нарсалар билан сенга келди, дейлик, сен қаерга кетмоқчисан, фонийликками? **«Буюклик ва карам Соҳиби бўлган Парвардигорингизнинг Юзи – Ўзигина боқий мангу қолур».** (Ар-Роҳман сураси, 27-оят)

Улуғлардан бири ўз ўғлига насиҳат қилиб деди: «Ўғлим, ҳеч қачон бош бўлишга интилма, чунки бош кўп оғриқ азобини чекур».

Яъни, ҳар доим энг бошида, марказда бўлишликка муҳаббат қўймагин, чунки зарба ва ҳақоратларнинг барчаси ана ўша пешқадамларга тегур.

Намозга келинглар!

«Эй мўминлар, сабр қилиш ва намоз ўқиш билан (Мендан) мадад сўранглар!». (Бақара сураси, 153-оят).

Расулуллоҳ соллаллоҳу алайҳи васалламни бирор бир иш ташвишга солса, дарҳол намозга шошилар эдилар.

У зот муаззинлари Билолга: «Бизларни намоз билан роҳатлантир», дер эдилар.

Яна у зот: **«Намоз мен учун кўзим шодлиги қилди»**, дедилар.

Қалб сиқилса, иш қийинлашса, макр кўпайса, масжидга шошил, намоз ўқи. Кунларни зулмат қопласа, кечалар ихтилофга ботса, дўстлар бегоналашса ўзингга намозни лозим тут.

Расулуллоҳ соллаллоҳу алайҳи васаллам Бадр, Аҳзоб жанглари каби муҳим, буюк ишларда қалбларини намоз билан ёзар эдилар.

Ибн Асокир ва Иб Қоййим айтадилар: «Солиҳ кишилардан бири Шом шаҳрининг йўлларидан бирида қароқчига йўлиқди, қароқчи уни ўлдиришга шай бўлганини кўрган солиҳ банда ундан икки ракаъат намоз ўқиб олиш учун изн сўради. Изн берилгач, туриб намоз бошлади ва Оллоҳ таолонинг: **«Ёки музтар-ночор одам дуо-илтижо қилган вақтида (дуосини) ижобат қиладиган ва (унинг) мушқулини осон қиладиган ҳамда сизларни Ернинг халифа-эгалари қиладиган Зотми?!»**. (Намл сураси, 62-оят), оятини уч бор такрорлаб ўқиди. Шунда осмондан бир фаришта қуроли билан тушиб, ҳалиги қароқчини ўлдирди ва: «Мен мана бу оятнинг вакилиман», – деб айтди. **«Аҳли-умматингизни намоз ўқишга буюринг ва ўзингиз**

ҳам (намоз ўқишда) **чидамли бўлинг!..**». (Тоҳа сураси, 132-оят). **«...Албатта, намоз бузуқлик ва ёмонликдан тўсур...»**. (Анкабут сураси, 45-оят). **«...Албатта, намоз мўминларга (вақти) тайинланган фарз бўлди»**. (Нисо сураси, 103-оят)

Қуръон – Муборак Китоб

Оллоҳнинг Китобини диққат-эътибор ва тафаккур билан ўқимоқ, саодат ва қалб шодлигининг сабабларидандир. Оллоҳ таоло Ўз Китобини қалбларга ҳидоят, нур ва шифо, деб сифатлаган ҳамда унга раҳмат деб таъриф берган: **«Эй инсонлар, сизларга Парвардигорингиз томонидан панд-насиҳат, дилларингиздаги (бузуқ эътиқодлардан иборат) нарсаларга шифо ва мўминларга ҳидоят ва раҳмат (яъни, Қуръон) келди»**. (Юнус сураси, 57-оят). **«Ахир улар Қуръон ҳақида фикр юритмайдиларми?! Балки дилларида қулфлари бордир, (шунинг учун у дилларга Қуръон нури етмаётгандир)!»**. (Муҳаммад сураси, 24-оят). **«Ахир улар Қуръон ҳақида фикр юритмайдиларми?! Агар у Оллоҳдан бошқа биров томонидан бўлса эди, унда кўп қарама-қаршиликларни топган бўлар эдилар-ку?!»** (Нисо сураси, 82-оят). **«(Эй Муҳаммад алайҳиссалом, ушбу Қуръон барча одамлар) оятларини тафаккур қилишлари ва ақл эгалари эслатма – ибрат олишлари учун Биз Сизга нозил қилган бир муборак Китобдир»**. (Сод сураси, 29-оят)

Улуғлардан бири айтди: «Руҳимда Оллоҳдан ўзга ҳеч ким билмайдиган бир ғамни ҳис қилдим ва Қуръонни олиб ўқий бошладим, шунда, баногоҳ мен ҳис қилган ғам аста мендан йироқлаша бошлади, Оллоҳ менга

ўша ғам ўрнига сурур ва шодликни алмаштирди. «**Ал-батта, бу Қуръон энг Тўғри Йўлга ҳидоят қилур...**». (Ал-Исро сураси, 9-оят). «(Эй Муҳаммад алайҳиссалом), **шундай қилиб** (худди аввалги пайғамбарларга ваҳий қилганимиздек) **Биз Ўз амримиз билан Сизга Руҳни – Қуръонни ваҳий қилдик**».

Из оҳ: Бу ўринда Оллоҳ таоло томонидан Қуръони карим «Руҳ» деб аталишига сабаб, жасад жон билан тирик бўлгани каби Диннинг руҳи жони Қуръондир. (Зухруф сураси, 52-оят)

Амирликдан дурадгорликкача

Халифанинг ўғли амир Али ибн ал-Маъмун ал-Аббосий ҳашаматли қасрда ҳаёт кечирар, мол-дунёси ҳам етарлича эди. У кунларнинг бирида қасрининг айвонига чиқиб, атрофни томоша қилар экан, баногоҳ, кун бўйи меҳнат қилаётган бир ишчига кўзи тушиб қолди. У чошгоҳ вақтида Дажла дарёсининг соҳилида икки ракат намоз ўқир, қуёш ботгач, ўз аҳли-оиласига қайтар эди. Бир кун амир уни чақиртириб, шу ҳақда сўраганида, у қарамоғида онаси, икки синглиси ва аёли бөрлигини, шуларни деб кун бўйи меҳнат қилишини, ишлаб топгани кунлик емишига етишини, ўзи эса ҳар куни рўза тутишини айтди. Амир ундан: «Бирор нарсадан етишмовчилигинг борми?» – деб сўради. Шунда у: «Оллоҳга шукр, ҳеч қандай камчилигим йўқ», деб жавоб берди. Амир шу кундан эътиборан қасрни, амирликни тарк этди, Оллоҳга муҳаббат қўйди ва боши оққан тарафга кетди. Бир неча йилдан сўнг Хуросон томонда дурадгорчилик қилаётгани, кейин эса ўша жойда вафот этгани маълум бўлди. Чунки у амирликда топмаган бахтни мана шу оддий бир касбда топган

эди. «**Ҳидоят топган – Тўғри Йўлга юрган зотларга эса (Оллоҳ) яна ҳидоятни зиёда қилур ва тақво ато этур,** (яъни, уларга ҳаромдан парҳез қилиш йўлларини кўрсатур)». (Муҳаммад сураси, 17-оят)

Бу ҳолат менга асҳоби Каҳф қиссасини эслатади. Улар ҳам подшоҳ билан қасрда яшар эдилар, лекин улар у ерда торлик, тарқоқлик, изтироб борлигини сездилар. Зеро, куфр қасрларни маскан тутар. Улар қасрдан кетар чоғларида бир-бирларига дедилар: «(Йигитлар!) **Модомики, сизлар улардан (мушриклардан) ва Оллоҳдан ўзга – улар сиғинаётган нарсалардан четланган – юз ўгирган экансизлар, энди (Ёлғиз Парвардигорингиз – Оллоҳнинг Ўзига ибодат қилиш учун) ғорга паноҳ топиб борингиз. Парвардигорингиз сизларга Ўз раҳмат-марҳаматини кенг – сероб қилур ва сизларнинг ишларингизни ўнглар**». (Каҳф сураси, 16-оят)

Аҳмоқлар билан лаҳзалар

«Рисола» номли мажаллада Зайётнинг коммунистлар ҳақида айтган ажиб сўзлари – гўзал мақоласи чоп этилган. Воқеа бундай бўлган: Коммунистлар ўз фазо кемаларини ойга чиқаради, ортга қайтгач, кемадаги тадқиқотчилардан бири Россиянинг «Правда» номли газетасида бир мақола чоп этади, унда шундай дейилади: «Бизлар осмонга кўтарилар эканмиз, у ерда ҳеч қандай илоҳни, жаннат, дўзах ёки фаришталарни кўрмадик». Буларни ўқиган Зайёт бир мақола ёзиб, ўша мақолада шу сўзларни айтади: «Сизлар қип-қизил аҳмоқ экансизлар-ку, сизлар осмонда Парвардигорни «Ўз Аршида ўтирганини кўрамиз», деб ўйлаганминдинглар ёки жаннатда оху кўз хурларни ипак матоларга бурканган ҳолда юришини кўрмоқчимидинг-

лар, балки Кавсар булоғини шилдираган овозини эшитмоқчи, дўзахда азобланаётганларнинг бўйини хидламоқчимидингиз. Агар шундай ўйлаган бўлсанглар, бу ҳаётингизда қаттиқ зиён тортурсизлар. Мен сизларнинг бундай залолат ва ҳамоқатда эканингларга бошингларга қўниб олган дахрийлик, худосизлик касалидан ўзгасини сабаб қилиб кўрсата олмайман. Албатта, худосизлик келажаги йўқ бир кундир, осмонни йўқ ердир, хотимаси йўқ амалдир, натижаси йўқ саъй-ҳаракатдир». **«Ёки Сиз уларнинг кўпларини (ҳақ сўзни) тинглай оладилар ё англай оладилар, деб ўйлайсизми?! (Ундоқ эмас, зеро), улар (Ҳақни англамасликларида) ҳеч нарса эмаслар, магар чорва ҳайвонлари кабидирлар. Йўқ, улар янада йўлдан озганроқ кимсалардир!».** (Фурқон сураси, 44-оят). **«Уларнинг диллари бору – англай олмайдилар, кўзлари бору – кўра олмайдилар, қулоқлари бору – эшитмайдилар. Улар чорвалар кабидирлар, йўқ, улар (беақл, бефаҳмликда чорвалардан ҳам) адашганроқдирлар. Ана ўшалар ғафлатда қолган кимсалардир».** (Аъроф сураси, 179-оят). **«... Кимни Оллоҳ хор қилиб қўйса, бас, уни (ҳеч ким) азиз қилгувчи бўлмас...».** (Ҳаж сураси, 18-оят). **«Кофир бўлган кимсаларнинг қилган амаллари эса саҳродаги саробга ўхшайди. Ташна одам уни сув деб ўйлар, то қачон унинг олдига келгач, ҳеч нарса эмаслигини кўрур ва Оллоҳни унинг (яъни, қилган амалининг) олдида топур. Бас, У Зот унинг ҳисобкитобини комил қилур. Оллоҳ жуда тез ҳисобкитоб қилгувчидир».** (Нур сураси, 39-оят). **«Парвардигорларига кофир бўлган кимсалар қилган амалларининг мисоли худди бўронли кунда қаттиқ ша-**

мол учириб кетган кулга ўхшайди – улар қилган амалларидан бирон фойдага эга бўлолмайдилар. Бу узоқ – қаттиқ йўлдан озишдир». (Иброҳим сураси, 18-оят)

Худосизлик – мафкурага берилган қақшатқич зарбадир. Уларнинг қилиқлари гўё ақлсиз гўдаклар олами-ни эслатади. Бу эса бутун тарих гувоҳ бўлган энг буюк хатодир. Оллоҳ таоло айтади: «...**Осмонлар ва Ернинг Яратувчиси бўлмиш Оллоҳ**(нинг борлиги ва бирлиги) **хусусида шак-шубҳа бўлиши мумкинми?!**» (Иброҳим сураси, 10-оят)

Яъни бу ишда шак-шубҳа йўқдир. Бу зоҳирдир. Ибн Таймийя айтади: «Яратувчи бўлган Оллоҳни фақат Фиръавнгина инкор қилган эди. Ваҳоланки, у ичидан Оллоҳнинг Ёлғиз Худо эканлигини тан олар эди. Мусо Фиръавнга деди: «(Мусо) деди: «(Эй Фиръавн), сен анави очиқ-равшан (мўъжизаларни) **фақат осмонлар ва Ернинг Парвардигоригина хужжат қилиб нозил қилганини аниқ билурсан. Ҳеч шубҳа йўқки, эй Фиръавн, мен сени ҳалок қилингувчи, деб ўйламоқдаман**». (Ал-Исро сураси, 102-оят). Фиръавн иш охирида қалбидаги нарсани ташқарига чиқарди: «**Энди унга (Фиръавнга денгизда) ғарқ бўлиш (пайти) етганида эса, у деди: «Ҳеч қандай илоҳ йўқ, магар бани Исроил келтирган Зот – Оллоҳгина борлигига иймон келтирдим. Мен мусулмонлардандирман – Оллоҳга бўйинсунувчилардандирман**». (Юнус сураси, 90-оят)

Метин ирода

Бир мусулмон талаба Ғарб шаҳарларидан бири – Лондонда таҳсил олар, Британиядаги кофир оилада

ижарада турар эди. Талаба диндор бўлиб, эрта тонгда уйғониб, сув жўмрагининг олдига бориб, сув совуқ бўлишига қарамай, таҳорат олар, сўнгра ўз хонасига кириб, Парвардигорига рукуъ, саждалар қилиб, ҳамд, тасбеҳлар айтиб, намоз ўқир эди. Ўша хонадон эгаларидан бўлган бир кампир талабанинг хатти-ҳаракатларини кўп таъқиб қилди ва ниҳоят ундан нима қилаётгани ҳақида сўради.

– Диним менга шундай қилишни буюрган, – деди талаба. Шунда кампир:

– Ширин уйқунгни бузмай, шу ишингни кейинроққа сурсанг бўлмайдими? – деди. Талаба бунга жавобан:

– Агар намозимни ўз вақтидан кечиктирсам, бу ибодатимни Парвардигорим мендан қабул қилмайди, – деди. Бунни эшитган кампир бошини силкитиб:

– Ирода темирни ҳам синдираар экан, – деди.

Ҳа, у – иймон иродаси эди, ишонч қуввати эди, тавҳид ҳукмронлиги эди. Бу шундай иродаки, Фиръавнинг сеҳргарларига илҳом берди. Улар Фиръав билан Мусо ўртасида жаҳон уруши кетаётган бир пайтда бутун оламлар Парвардигори бўлмиш Оллоҳга иймон келтирдилар ва Фиръавнга шундай дедилар: **«Улар дедилар: «Бизлар ҳаргиз ўзимизга келган очиқ ҳужжат-мўъжизаларни ва бизларни яратган Зотни қўйиб, сени танламаймиз. Бас, қиладиган ҳукмингни қилавер. Сен фақат мана шу ҳаёти дунёдагина ҳукм қилурсан».** (Тоҳа сураси, 72-оят).

Ҳабиб ибн Зайд Мусайлама каззобни тавҳидга даъват қилди. Мусайлама уни қилич билан чавақлай бошлади. Ҳабиб инграмади, фарёд ҳам урмади, тебранмади ҳам ва Парвардигорига шаҳид ҳолда йўлиқди.

«Оллоҳга ва Унинг пайғамбарларига иймон келтирган зотлар – ана ўшалар Парвардигорлари ҳузурида сиддиқлар (яъни жуда ростгўй зотлар) ва шаҳидлар (мақомида)дир. Улар учун (Охиратда) ажр-мукофотлари ва (Қиёмат кунида уларнинг йўлларини ёритиб борадиган) нурлари (бўлур)». (Ҳадид сураси, 19-оят)

Кечалари қиёмда бўлмоқ нафсни саодатли қилади, дилни ёритади.

Саҳиҳ ҳадисда айтилади: **«Тунда туриб, Оллоҳни эслаб, таҳорат олиб, намоз ўқиган банда руҳи пок, ғайратли инсонга айланади».** «Улар кечадан озгина (фурсатгина) кўз юмар эдилар». (Ваз-Зориёт сураси, 17-оят). **«Кечанинг (бир қисмида) уйғониб, ўзингиз учун нафл (ибодат) бўлган намозни ўқинг!..».** (Ал-Исро сураси, 79-оят)

Тунги намоз тандаги дардни кеткизади, Абу Довуддан шу тўғрида саҳиҳ ҳадис ривоят қилинган: **«Эй Оллоҳнинг бандаси, сен тунда турса ҳам намоз ўқимайдиган кимсага ўхшама».** **«Тунда туриб намоз ўқиган банда яхши бандадир».**

Ўтган нарсаларга афсус чекма, бу ҳаётдаги ҳар бир нарса фонийдир, фақат Оллоҳнинг Юзигина абадийдир. **«Барча нарса ҳалок бўлгувчидир, магар Унинг Юзи – Ўзигина (мангудир)».** (Қасас сураси, 88-оят). **«(Ер) юзидаги барча жонзот фонийдир. Буюклик ва карам Соҳиби бўлган Парвардигорингизнинг Юзи – Ўзигина боқий мангу қолур».** (Ар-Роҳман сураси, 26–27-оятлар)

Йўқотган дунёсига афсус чеккан инсон, худди ўйинчоғини йўқотгани учун йиғлаётган гўдакка ўхшар.

Ҳақиқий муҳаббат

Бахтли бўлмоқ учун Оллоҳнинг яқини, ҳабиби бўлгин. Албатта, Оллоҳга бўлган муҳаббатни ўзларининг буюк мақсад ва ғоясига айлантирган кишилар саодатлидирлар.

Дерларким: «Инсонлар Оллоҳни севурлар, деган сўздан эмас, балки Оллоҳ бандаларини севур, сўздан ажабланиш лозимдир. Оллоҳ бандаларини яратиб, уларга ризқ бериб, иноят қилиб, яна уларни яхши ҳам кўрар. «(Эй Муҳаммад алайҳиссалом), **айтинг: «Агар сизлар Оллоҳни севсангиз, менга эргашинглар. (Шунда) Оллоҳ сизларни севади ва гуноҳларингизни мағфират қилади. Оллоҳ (гуноҳларни) мағфират қилгувчи, Меҳрибондир».** (Оли Имрон сураси, 31-оят)

Саҳобалардан бири «Ихлос» сурасини севиб ўқир, намозининг ҳар ракатида уни қайтарар, тили доим шу сура билан банд бўлар, у билан қалбини таъсирлантирар, ўз ҳиссиётларини шу сурани тиловат қилиш билан уйғотар эди. Ана шу саҳобага Расулуллоҳ соллаллоху алайҳи васаллам деди: **«Бу ишинг сени жаннатга олиб киради».**

Мажнунни Лайлога бўлган муҳаббати ўлдирган бўлса, Қорунни мол-дунёга, Фиръавнни мансабга бўлган муҳаббат ўлдирди. Ҳамза, Жаъфар, Ҳанзала эса Оллоҳга, Унинг Расулига бўлган муҳаббатлари сабаб ўлдирилдилар. Бу икки томон орасидаги масофа нақадар узоқ.

Ошиқликдан эҳтиёт бўл

Тасаввурга ошиқ бўлишдан ўзингни асра. Чунки у нақд қайғу, доимий аламдир. Шоирларнинг оҳ-воҳ

ларидан, уларнинг ошиқликлари, ақлсизликларидан, ҳижрон азобларию васл ва фироқ шикоятларидан узоқ бўлиш – мусулмон кишининг саодатидир. Бундай мажнунларнинг қалби бўш бўлур. «(Эй Муҳаммад алайҳиссалом), **ҳавойи нафсини ўзига «илоҳ» қилиб олган ва Оллоҳ уни билган ҳолида йўлдан оздириб, қулоқ ва кўнглини муҳрлаб, кўз олдига парда тортиб қўйган кимсани кўрганмисиз?».** (Жосия сураси, 23-оят)

Ишқ сабаблари:

1. Қалбнинг Оллоҳ субҳонаҳу ва таолога бўлган муҳаббатдан, зикрдан, шукр ва ибодатдан холилиги.

2. Кўзга эрк бермоқ. Зеро, кўз қалбга ғам-андуҳларни тортувчи даракчидир. **«Қарамоқ шайтон ўқларидан бир ўқдир».**

3. Оллоҳга дуо-илтижо қилишда ва нафл ибодатларда сусткашлик қилмоқ. **«Албатта, намоз бузуқлик ва ёмонликдан тўсур».** (Анкабут сураси, 45-оят)

Ишқнинг давоси эса ушбулардир:

1. Ибодат остонасига бош урмоқ.

2. Кўзни тийиш, авратни сақламоқ. «(Эй Муҳаммад алайҳиссалом), **мўминларга айтинг, кўзларини (номаҳрам аёлларга тикишдан) тўссинлар ва авратларини (ҳаромдан) сақласинлар!».** (Нур сураси, 30-оят).

3. Қалби унга боғланган кимсанинг диёридан бош олиб кетмоқ.

4. Яхши амаллар билан машғул бўлмоқ.

5. Шаръий никоҳ; **«Унинг оятларидан (яна бири) – У Зот сизлар ҳамдам бўлишларингиз учун ўзларингиздан жуфтлар яратиши ва ўрталарингизда ошнолик ва меҳр-муҳаббат пайдо қилишидир. Ал-**

батта, бунда тафаккур қиладиган қавм учун оят-ибратлар бордир». (Рум сураси, 21-оят)

Тўрт нарсадан сақлангин:

Тўрт нарса қашшоқ турмушни, заиф хотирани, тор қалбни мерос қолдиради:

1. Оллоҳнинг қазойи қадарига норозилик билдириш.

2. Гуноҳ қилиб, тавба қилмаслик.

3. Инсонларга гина сақлаш, улардан ўч олишга интилмоқ ҳамда Оллоҳ бошқаларга берган фазл-марҳаматга ҳасад қилмоқ. Ҳадис: **«Ҳасадчининг роҳати йўқдир».**

4. Оллоҳнинг зикридан юз ўгирмоқ. **«Ким Менинг Эслатмамдан юз ўгирса, бас, албатта, унинг учун танг – бахтсиз ҳаёт бўлур ва Биз уни Қиёмат куни кўр ҳолда тирилтирурмиз».** (Тоҳа сураси, 124-оят)

Тарихингни ўз қўлинг билан ёзгин

Шиддатли иссиқ пайтида, пешин намозидан бир соатча аввал Ҳарамда ўтирар эканман, ёши улуғ бир киши туриб, қўлларида икки идишни ушлаб, одамларга совуқ замзам сувини улаша бошлади, идиши бўшагач, яна тўлдириб келиб қолганларга берар эди, шундай қилиб бир жамоа одамларни замзам суви билан меҳмон қилгунча терга ботди. Одамлар эса ана шу мўйсафиднинг қўлидан замзамни ичишлик учун ўз навбатларини кутиб ўтирар эдилар. Мен бу ҳолатни кузатар эканман, бу ёши улуғ инсоннинг сабр-бардошига, одамларга яхшилиқ қилишни яхши кўришига, уларга

сув улашар чоғида юзидаги табассумдан ҳайратландим ва билдимки, яхшилик қилиш – Оллоҳ осон қилган кишиларга осон экан. Яна Оллоҳ Ўзининг эҳсондан иборат хазинасидан хоҳлаган бандаларига беришини, оз бўлса-да Оллоҳнинг бандаларига яхшиликни истаб, уларга ёмонликни раво кўрмайдиган, танлаб олинган инсонларнинг қўлларида Ўз фазилатларини жорий қилиб қўйишини англадим.

Абу Бакр ҳижрат пайтида Расулуллоҳ соллаллоҳу алайҳи васалламни ҳимоя қилиш учун жонини хатарга қўйди.

Умар одамлар ширин уйкудалик пайтида шаҳар айланиб, халқининг ҳолидан хабар олди. Қаттиқ қаҳатчилик йилида одамларни тўйдириш учун очликдан эгилиб-букилди.

Ҳотам меҳмонларни тўйдириш учун ўзи оч ҳолда тонг оттирди.

Абу Убайда мусулмон аскарларнинг роҳати учун тунни бедор ўтказди.

Абу Толҳа Расулуллоҳ соллаллоҳу алайҳи васалламни ҳимоя қилиш учун ўзини ўққа тутди.

Ибнул Муборак рўзадор ҳолида одамларга таом улашди.

Улар юлдуз, балки ундан-да аъло,
Ёришган тонг каби гўзал бир маъно.

Гўзал ҳаёт тушунчаси

Инглиз адибларидан бири айтади: «Сен турмада – темир панжара ортида туриб, уфққа тикилиб, чўнтагиндан бир гул олиб, ҳидлаб, табассум қилишга

қодирсан. Шу билан бирга сен қасрда – кимхоб, ипак матоларга ўралган ҳолда жаҳл қилиб, ғазабланиб, уй-ингдан, аҳли-оилангдан зарда қилиб чиқиб кетишга ҳам қодирдирсан».

Демак саодат замон ёки маконга эмас, балки иймонга, қалбга, ҳисоб-китоб Эгасига тоат қилишга боғлиқ экан.

Қалб – Парвардигор назар қиладиган жой. Агар ўша жойга иймон ўрнашса – саодат қайта жонланади. Рух нафсларни қувонч-шодликка тўлдиради.

Аҳмад ибн Ҳанбал саодатли ҳаёт кечирди. Унинг ўз қўли билан тиккан, оқ рангли, ямалган кийими бўлиб, унинг оёқ кийими ўн етти йил давомида йиртилиб ямалган эди. Лойдан қурилган уч хонали уйида яшар, ейиш учун топгани ёғ билан бир бўлак нон эди. Бир ойда бир марта гўшт ер, аксар кунларда рўза тутар эди. Бир ҳадисни ўрганиш учун дунёни айланиб чиқар эди. Лекин у зот роҳат, тинчлик, сакинат ва хотиржамликни топган эди. Чунки у собитқадам, олийҳиммат, натижадан бохабар, савоб истовчи, ажр изловчи, Охират учун ишлаган, жаннат талабгори бўлган зот эди.

Аммо унинг замонидаги «дунёга ҳоким бўлган» халифалар – Маъмун, Восиқ, Муътасим, Мутаваккиларнинг қасрлари, олтин-кумушлари, аскар, туғ-байроқлари, нишонлари, ер-мулклари, истаган нарсалари муҳайё бўлишига қарамасдан улар ғам-ташвишда, алам билан, хавотирликда, кўзғолон, шовқин-сурон, ғала-ғовурда ҳаёт кечирдилар. Ҳатто уларнинг баъзилари ўлим мастликларида Оллоҳ берган имкониятлардан фойдаланмай, ўтказган кунларини эслаб оқ урдилар.

**«Парвардигорингиз (аҳли-эгалари) золим
бўлган шаҳарларни ушлаганида, мана
шундай ушлар. Унинг ушлаши –
азоби аламли ва қаттиқ»**

Банданинг бахтсизлиги, оёғи тойилиши, обрўси тушишига сабаб, унинг Оллоҳ бандаларига қилган зулми, уларнинг ҳақларини ейиши, бечораҳолларга зуғум қилмоқлигидир.

Хукамолардан бири деди: «Сенга қарши Оллоҳдан ўзга ёрдамчи топа олмаган кимсадан қўрққин».

Дарҳақиқат, тарих бизларга зулмнинг оқибатлари қандай кечиши ҳақида тирик мисолларни қолдирган:

Омир ибн Туфайл Расулуллоҳ соллаллоҳу алайҳи васалламга ҳийла қилиб, у зотга нисбатан хоинликни режалаштирган бир пайтда, Расулуллоҳ соллаллоҳу алайҳи васаллам уни дуоибад қилди ва Оллоҳ унга томоқ бези дардини берди, у ўша дарди билан аламдан кичқирганча ўлди.

Урайд ибн Қайс Расулуллоҳ соллаллоҳу алайҳи васалламга озор бериб, у зотга суиқасд қилиш тадбирида қатнашди. Расулуллоҳ соллаллоҳу алайҳи васаллам уни қарғади ва Оллоҳ чақмоқ юбориб, уни туяси билан ёндириб юборди.

Ҳажжож Саид ибн Жубайрни ўлдиришидан бир оз аввал Саид уни шундай деб дуоибад қилди: «Оллоҳим, Ҳажжожни мендан кейин бирортасига ҳукмрон қилмагин». Шундан сўнг унинг қўлида чипқон яраси пайдо бўлди, кейин у бутун баданига тарқади ва ҳўкиз каби ўкириб, ачинарли ҳолда ўлди.

Суфёни Саврий Абу Жаъфар ал-Мансурдан кўрқиб, ундан беркинди. Абу Жаъфар Маккани – Ҳарамни кўзлаб йўлга чиқди. Ҳарам ичкарисида турган Суфён Каъба пўшти ортига беркиниб, Оллоҳ аzza ва жалладан Абу Жаъфар унинг уйига кирмаслигини сўраб дуо қилди. Абу Жаъфар Маккага кираверишдаги Маймун қудуғи олдида жон берди.

Аҳмад ибн абу Довуд ал-Қозий ал-Муътазилий Аҳмад ибн Ҳанбалга озор беришда иштирок этганлиги сабаб Аҳмад ибн Ҳанбал уни дуоибад қилди ва Оллоҳ унга фалаж дардини берди. У золим айтади: Агар танамнинг бир томонига пашша қўнғудек бўлса, Қиёмат қойим бўлгандек туйилади менга, агар қолган ярмини қайчи билан қийиб ташласалар ҳам ҳеч нарсани сезмайман.

Ерда энг кўп зулм, бузғунчилик қилганлардан бири Абдунносир кўмондонларидан Салоҳ Наср бўлиб, ўндан ортиқ узоқ давом этадиган, аламли дардга мубтало бўлди ва ҳаётининг бир неча йилини бахтсизликда ўтказди. Табиблар унга ҳеч қандай даво топа олишмади, ҳатто у ўзи хизматини қилган доҳийларининг қамоқхоналарида маҳбус ҳолатда вафот этди.

«Улар юртларида ҳадларидан ошиб, у жойларда бузғунчиликни кўпайтириб юборган эдилар. Бас, Парвардигорингиз уларнинг устига турли азоб-офатни ёғдирди!». (Фажр сураси, 11–12–13-оятлар)

Хуросоннинг солиҳ кишиларидан бирининг пули ўғирланди. Солиҳ кишини йиғлаётганини кўрган Фузайл, йиғлама, деб уни овутди. Шунда ҳалиги солиҳ банди: «Оллоҳ мана бу ўғри билан иккимизни Қиёмат куни

жамлайди. Ўша Кунда ана у ўғрига раҳмат бўлсин, деб йиғлаяпман», деди.

Йўқ бўлувчи шуҳрат

Ҳақиқий саодат доимий ва комил бўлгандир. Унинг давомийлиги дунёда ҳам Охиратда ҳам, ғайбу шаҳодатда, бугун ва эртанги кунда бўлса, комиллиги эса уни ҳеч қандай омадсизлик заҳарлай олмаслиги, унинг яхшилиқдан иборат юзи бирор бир норозилик сабаб тимдаланмаслигидир.

Ироқ подшоҳи Нўъмон ибн Мунзир дарахт остида хордиқ чиқарганча шароб ичиб ўтирар экан, ўша ерда турган ҳакимлардан бўлган Адий ибн Зайд унга бир сўз билан насихат қилмоқчи бўлиб деди: «Шоҳим, мана бу дарахт нима деяётганини биласизми?». Подшоҳ: «Нима деяпти?» – деб сўради. Адий шундай жавоб берибди: У:

«Қанча карвон олдимизда бир муддат тўхтаб,
Зилол сувга шароб қўшиб ичдилар.
Ҳолати ўзгарувчан, бевафо замон
Ўйинларин кўриб, қочиб кетдилар».

Буларни эшитган Нўъмоннинг тинчи бузилди, ароқни тарк этди ва ўлгунича қайғу-ҳасратда ўтди.

Руминия президенти йигирма икки йил ҳукмронлик қилди. Унинг хос соқчиларининг сони етмиш мингта эди. Охир-оқибат халқ унинг қасрини ўраб олди ва уни, аскарларини майда-майда қилиб парчалаб ташладилар. Дунёси ҳам, Охирати ҳам кетди.

Ҳукмдорлардан яна бири салтанатга ҳам, молдавлатга ҳам эга бўлди, аммо халқининг бошига турфа хил азобларни солди, уларга хорлик косасини тут-

ди. Сўнгра Оллоҳ таоло унга бахтсизлик аламини тотдирди. У ўз шаҳаридан, аҳли-оиласидан, салтанатидан қувилди, бирор бир бошпана ҳам топа олмай бахтсиз ҳолда ўлди, ҳатто унинг халқи уни ўз шаҳрига дафн эттирмадилар.

«Касал бўлган вақтимда Унинг ўзи менга шифо берур»

Бир олим айтади: «Зарарларни камайтирмоқ фойдаларни кўпайтиришдан яхшироқдир». Яна айтади: «Қийин ишдан дангасалик қилишни ва тўйиб ебичишликни тарк этиш билан саломатчилик давом этур».

Ҳукамолардан бири айтади: «Соғлиқни истаган кимса яхшилаб нонушта қилсин, покиза таом есин, сувни ташна бўлганда ва кам ичсин, кечки овқатдан сўнг юрсин, ҳожатга бормай туриб ухлашга ётмасин, овқатлангандан сўнг ҳаммомга кирмасин, ёзда бир марта ҳаммом қилиш қишдагидан ўн мартаба яхшидир.

Ҳорис айтади: «Боқийликни истаган киши – асли инсонга боқийлик йўқдир – эрта туриб, кеч ухласин, енгил кийинсин, аёллар билан яқинлашишни камайтирсин».

Тўрт нарсаси жисми касал қилади: «Кўп гап, кўп уйқу, кўп ейиш, кўп аёлларга яқин бўлмоқ». Кўп гап мия илигини камайтиради ва уни заифлаштиради, қаришни тезлаштиради. Кўп уйқу юзни сарғайтиради, қалбни кўр қилади, кўзни қуритади. Кўп ейиш дангаса қилади, кўполликни, оғир дардни келтириб чиқаради. Аёлларга кўп яқинлик қилиш танани кучдан қолдиради, заифлаштиради, бадан намлигини қуритади, асабларни бўшаштиради.

Тўрт нарса баданни вайрон қилади – ғам, қайғу, очлик, бедорлик.

Тўрт нарса кўзни қувонтиради – майсаларга, оқар сувга, маҳбубага ва меваларга қарамоқ.

Тўрт нарсада кўзни зулмат босади – ялангоёқ юришлик, югуриш, кўп йиғлаш, нозик чизилган чизиққа қараш.

Тўрт нарса жисмни кучли қилади – юмшоқ кийим кийиш, иссиқ-совуқлиги ўртача бўлган ҳаммом қабул қилиш, ширин ва ёғли таом ейиш, ширин ҳидни ҳидлаш.

Тўрт нарса юзни қуритади ва унинг сувини, шўхшодонлигини кеткизади – ёлғон сўзлаш, сурбетлик, кераксиз нарсани сўрайвериш, бузуқлик қилиш.

Тўрт нарса юзнинг гўзаллигини оширади – муруват, вафо, карам, тақво.

Тўрт нарса нафрат, ғазабни келтиради – кибр, ҳасад, ёлғон, чақимчилик.

Тўрт нарса ризқни кўпайтиради – кечалари туриш, саҳарларда истиғфorni кўп айтмоқ, садақа бериш, куннинг аввалида ҳам, охирида ҳам Оллоҳни зикр қилмоқ.

Тўрт нарса ризқни камайтиради – тонгда ухлаш, кам нафл намоз ўқимоқ, дангасалик, хиёнат.

Тўрт нарса фаҳм ва зеҳнга зарар қилади – ҳўл меваларни кўп ейишлик, чалқанча ётиб ухлаш, ғам ва қайғу.

Тўрт нарса фаҳмни зиёда қилади – қалбнинг кераксиз нарсалардан холилиги, емак-ичмақдан роҳат олишни камайтириш, ширин, ёғли таомларни тановул қилиш, бадандаги оғир, ошиқча нарсаларни чиқариб ташлаш.

Уч лавҳа

Заковатли инсонлардан бири ўз ишхонасининг деворига уч лавҳа осиб қўйди. Улардан бирига: **«Кун бугунингдир»**, деб ёзилган. Яъни бугунинг ҳудудида ҳаёт кечир. Иккинчисига: **«Фикр қил, шукр қил»**, деб ёзилган. Яъни Оллоҳнинг сенга берган неъматлари ҳақида фикр қил ва Унга шукр қил. Учинчисига эса: **«Ғазабланма»**, деб ёзилган эди.

Бу уч насиҳат саодатнинг энг яқин ва осон йўлини кўрсатур. Сен ҳам ҳар куни унга кўзинг тушиши учун буларни кундалигингга ёзиб қўйгин.

Сенинг қийматинг – иймон ва гўзал хулқинг

Бу киши фақир, камбағал эди. Устида увадаси чиққан эски кийим, қорни оч, ялангоёқ, насл-насаби ҳам номаълум, унинг на обрўси, на мол-давлати, на аҳли-оиласи бор. Бошпана учун уйи ҳам, жиҳоз-анжоми ҳам йўқ. Подалар билан бирга умумий бўлган ҳовуздан ҳовучлаб сув олиб ичар, масжидда тонг оттирар эди. Ёстиғи, билаклари, тўшаги чўлу биёбон эди. Лекин у Парвардигорини зикр қилар, У Зотнинг Китобини тиловат қилар, намоз ва жиҳодларда биринчи сафдан қолмас эди. Кунларнинг бирида у Расулуллоҳ соллаллоҳу алайҳи васалламнинг ёнидан ўтиб қолди. Расулуллоҳ соллаллоҳу алайҳи васаллам уни ўз исмини айтиб чақириб, деди: «Эй Жулайб, уйланмайсанми?» У: «Ё Расулуллоҳ, менга ким ҳам тегади, мол-давлатим, обрўйим бўлмаса», – деди. Сўнгра иккинчи марта Расулуллоҳ соллаллоҳу алайҳи васаллам билан

рўбарў келди. Расулуллоҳ соллаллоҳу алайҳи васаллам юқоридаги саволни берди, у ҳам аввалги жавобни қайтарди. Учинчи марта ҳам шу ҳол такрор бўлди. Шунда Расулуллоҳ соллаллоҳу алайҳи васаллам: «Эй Жулайб, фалончи Ансорийнинг олдига бориб, Расулуллоҳ соллаллоҳу алайҳи васаллам сизга салом айтди, менга қизингизни беришингизни сўради, деб айтгин», – деди. Бу Ансорий улуғ, ҳурматга сазовор оиладан эди. Жулайб ана шу Ансорийнинг уйига бориб, дарвозасини тақиллатди ва уй эгасига Расулуллоҳ соллаллоҳу алайҳи васаллам айтган сўзларни айтди. Ансорий унга: «Мендан ҳам Расулуллоҳ соллаллоҳу алайҳи васалламга салом айтгин», – деди. Ва: «Сенинг ҳеч нарсанг бўлмаса, қандай қилиб сенга қизимни бераман?» – деди. Ансорийнинг аёли ҳам эрини гапини маъқуллади. Аммо уларнинг қизи Жулайбнинг гапини, Расулуллоҳ соллаллоҳу алайҳи васалламнинг топшириғини эшитиб, отасига деди: «Расулуллоҳ соллаллоҳу алайҳи васалламнинг истакларини қайтармоқчимисизлар?! Йўқ, жоним кўлида бўлган зотга қасам (мен розиман)».

Муборак никоҳ, муборак зурриёт, Оллоҳдан кўрқиш ва Унинг ризолиги асосига қурилган обод хонадон ҳосил бўлди. Нидо қилувчи жиҳодга чақирганида Жулайб жангга ҳозир бўлди, ўз кўли билан етмиш кофирни ўлдирди, сўнгра ўзи ҳам Оллоҳнинг йўлида шаҳид бўлди. Парвардигоридан, Унинг элчиси Муҳаммад соллоллоҳу алайҳи ва салламдан ҳамда ўзи ушлаган йўлидан рози бўлган ҳолда тупроққа бош қўйди. Расулуллоҳ соллаллоҳу алайҳи васаллам жангда ўлган қурбонларни йўқотганида саҳобалар у зотга уларнинг исмларини айтишди ва гап орасида Жулайбнинг номи-

ни айтишни унутишди, чунки у таниқли, машхур эмас эди. Лекин Расулуллоҳ соллаллоҳу алайҳи васаллам Жулайбни унутмаган эди. У зот: «Лекин мен Жулайбни йўқотдим», деди.

Расулуллоҳ соллаллоҳу алайҳи васаллам уни тупроққа беланган ҳолда топиб, юзидан чанг-тупроқни қоқиб: «Етмиш кофирни ўлдириб, ўзинг ҳам ўлдирилдинг. Сен – менадирсан, мен эса сендан. Сен – менадирсан, мен эса сендан. Сен – менадирсан, мен эса сендан», деди. Мана бу Пайғамбар нишони Жулайб учун энг яхши туҳфа ва мукофот эди.

Жулайбнинг қиймати – унинг иймони, Расулуллоҳ соллаллоҳу алайҳи васалламнинг унга бўлган муҳаббати ва ўзининг тутган йўли эди.

Унинг йўқчилиги, камбағаллиги буюк шарафдан, улкан ажрдан қолдира олмади. Дарҳақиқат, у шаҳодат, ризо, икки дунё саодатига эга бўлган эди.

Оллоҳ бандаларига Меҳрибондир

Риёз шаҳрида яшовчилардан бири мана бу воқеани айтиб берди:

Бу воқеа ҳижрий 1376 йили бўлиб ўтган. Жубайл аҳлидан бўлган денгизчилар денгиздан балиқ овламоқчи бўлиб, уч кеча-кундуз туриб бирорта ҳам балиқ овлай олмадилар. Ваҳоланки, улар беш вақт намозни қилишмас эди. Уларнинг ёнида яна бир жамоа бўлиб, улар намоз ўқишмас, пешоналари сажда кўрмаган эди, лекин улар денгиздан истаганча балиқни овлашар эди. Бу ҳолатни кўрган намозхон жамоа: «Субҳоналлоҳ, бизлар намозни вақтида адо қилсак ҳам бирорта балиқ овлай олмадик, анавилар эса намоз ўқимасалар ҳам овлари бароридан келяпти»,

дейишди ва шайтон уларга намозни ўқимасликни вас-
васа қилди. Бас, улар бомдодни ўқимадилар, сўнгра
пешинни, кейин асрни. Аср намозидан сўнг денгиз-
га келиб, балиқ овладилар. Қорнини ёришиб, ичидан
қимматбаҳо дурни топдилар. Улардан бири дурни
олиб, у ёқ-бу ёғини айлантириб кўриб: «Субҳоналлоҳ,
Оллоҳга итоат қилиб топмаган нарсани Унга осий
бўлиб топдик, мана бундай бебаҳо нарсага эга бўлдик.
Бу ерда бир сир борга ўхшайди», деди ва дурни денгиз-
га отиб юбориб ҳамроҳларига деди: «Оллоҳ бунинг эва-
зига бошқа нарса берар. Оллоҳ номига қасамки, буни
олмаймиз, чунки бизлар унга намозни тарк этгани-
миздан сўнг эришдик. Юринглар, бу жойдан кетамиз».
Улар уч милча юриб тўхтадилар ва ўша жойга чодир
тикиб, денгизга иккинчи марта тўр ташладилар ва
тўрга илинган балиқни олиб қорнини ёришганида,
унинг ичидан ҳалиги дур чиқди. Шунда барчалари:
«Бизларга ҳалол ризқ берган Оллоҳга ҳамд бўлсин!»,
дедилар. Улар бунга намоз бошлаб, Оллоҳни зикр
қилиб, Унга истиғфор айтганларидан сўнг эришдилар.
Улар дурни ўзлари билан олиб қолдилар.

Қаранг, бир оз аввал – гуноҳкор пайтларида топган-
лари ҳаром ризқ эди. Оллоҳга итоат қилган пайтларида
эса топганлари ҳалол ризққа айланди.

Бу Оллоҳнинг лутфидир. Ким бирор нарсани Оллоҳ
учун тарк этса, Оллоҳ унга ундан ҳам яхшироғини эваз
қилиб беради.

**«У (одамлар ёғин-сочиндан) умидсизликка туш-
ганларидан кейин ёмғир ёғдирадиган ва Ўз раҳмат-
баракотини кенг ёядиган Зотдир».**

Обид бандалардан бири бошидан ўтган бир воқеани
ҳикоя қилади:

У ўз аҳли-оиласи билан саҳрода яшар, доимо Оллоҳни зикр қилиб, Унга қайтгувчи – обид банда эди. У айтади: «Идишларимиздаги сувимиз тугаб қолди. Яна сув захира қилиб қўяй, деб борсам, кўл ҳам қуриб қолган экан. Шундан сўнг ўнгу сўлдан сув излай бошладим, лекин бир томчи ҳам топа олмадим. Ташна эдик, фарзандларимиз ҳам сувга муҳтож эдилар. Шунда мен бандаларига яқин, дуоларини ижобат қилгувчи бўлган қудратли Парвардигоримни зикр қилдим. Туриб таяммум қилдим, қиблага юзланиб, икки ракат намоз ўқидим, сўнгра кўлимни дуога очиб йиғладим, кўз ёшларим ёноқларимдан оқиб тушар эди. Ишонч ва умид билан Оллоҳдан сўрадим ва У Зотнинг ушбу оятини ўқидим: **«У (одамлар ёғин-сочиндан) умидсизликка тушганларидан кейин ёмғир ёғдирадиган ва Ўз раҳмат-баракотини кенг ёядиган Зотдир. У ҳамду сано Эгаси бўлган Дўстдир».** (Шўро сураси, 28-оят).

Ўрнимдан турар пайтимда осмонда бирорта булут йўқ эди. Шунда, баногоҳ бир булут саҳродаги мен турган жойнинг рўпарасига келиб турди, сўнг ёмғир ёғди. Атрофимизда, ўнгу сўлимизда кўлмак ҳосил бўлди. Ичдик, ювиниб, таҳорат олдик ва Оллоҳ субҳонаху ва таолога ҳамдлар ўқидик. Сўнгра мен турган жойнинг орқа томонига ўтиб, у ернинг қурғоқ ҳолда эканлигини кўрдим. Шунда Оллоҳ таоло у сувни менинг дуойим сабабли мен учун ёғдирганлигини англадим. У Зотга ҳамду сано айтдим.

Оллоҳ унга яхшироғини эваз қилиб берди

Ибн Ражаб ва ундан бошқалар ҳам мана бу воқеани ҳикоя қилишади:

Обид бандалардан бўлган бир киши Маккада экан чоғида ҳеч вақоси қолмагани сабабли оч-наҳор қолиб, ўлар ҳолатга етди. Макка кўчаларидан бирида айланиб юрар экан ногаҳон ерда ётган қимматбаҳо маржонни босиб олиб, оёғи тойилиб кетди. Уни чўнтагига солиб, ҳарамга кирди. Ҳарамда бир киши ана шу маржон ҳақида гапирар эди. Маржонни топиб олган киши айтади: «У одам маржоннинг тузилишларини тўғри айтди, менга бирор бир суюнчи берар, деган ниятда унга маржонни бердим. У эса ҳеч нарсага қарамай, бир дирҳам ҳам бермасдан маржонни олиб кетди. Шунда мен: «Оллоҳим, мен топиб олган нарса – маржонни Сен учун тарк қилдим, менга бундан ҳам яхшироғини бергин», деб дуо қилдим.

Шундан сўнг денгизга бориб қайиққа ўтирдим. Кучли шамол эсиб қайиқ ағдарилди, мен эса бир ёғочга миниб, оролга етиб келдим, у ерда масжид бор экан. Одамлар у ерда намоз ўқишаётганини кўриб мен ҳам улар билан бирга намоз ўқидим. Кейин ўша ерда Куръон саҳифаларидан бир нечтасини топиб ўқий бошладим. Орол аҳли мендан: «Сен Куръон ўқишни биласанми?», – деб сўрашди. Мен: «Ҳа», – деб жавоб бердим. Улар: «Бизнинг фарзандларимизга ҳам Куръон ўргатмайсанми?», – дейишди. Шундан сўнг мен уларнинг фарзандларига маош эвазига Куръон ўқита бошладим. Хаттотлигимни кўришгач, фарзандларига хаттотликни ўргатишимни сўрашди, маош эвазига уларга хаттотликни ҳам ўргата бошладим.

Орол аҳли менга: «Бу ерда яхши бир кишининг қизи борлигини, ота-онасидан эрта ажраганлигини ва уни ўз никоҳимга олишимни сўрашди. Мен розилик билдириб, унга уйландим. Тўй куни унинг олди-



га кирар эканман, бўйнида мен билган маржоннинг айна ўзини кўриб, ундан бу маржон ҳақида сўрадим. У кунларнинг бирида унинг отаси маржонни йўқотиб қўйганини, уни бир киши топиб олиб, унга топширганини, отаси ўша инсонни эслаб, намозда – сажда ҳолатида қизига ана шундай жуфти ҳалол беришини дуо қилиб сўраганини, айтиб берди. Унинг отаси айтган киши мен эдим».

Шундай қилиб маржон унга ҳалол ҳолда етиб келди, чунки у маржонни Оллоҳ учун тарк қилган эди, Оллоҳ унга ундан ҳам яхшироғини эваз қилиб берди.

Қимматли дақиқалар

Танувхий айтади: «Бағдод шаҳрининг вазирларидан бири бир кампир аёлнинг мулкига тажовуз қилди, унинг нарсаларини тортиб олиб, мол-мулкини мусодара қилиб юборди. Кампир унинг жабр-зулмидан шикоят қилиб, вазир олдига йиғлаб борди. Вазирнинг пинагини ҳам бузмаганини кўрган кампирнинг жаҳли чиқиб: «Мен сени дуоибад қиламан!», деди. Вазир истеҳзо билан кулиб деди: «Тун охирида ҳам дуоибад қилиш эсингдан чиқмасин!». У бу сўзларни жоҳиллиги ва мутакаббирлиги сабаб истеҳзо билан айтди. Кампир кетди, вазир айтганидек тун охирида ҳам уни дуоибад қилди. Ҳеч қанча вақт ўтмай вазир ишидан четлатилди, мол-давлати тортиб олинди, ер-мулклари олиб қўйилди. Кейин одамларга қилган зулмлари сабаб таъзирини бериш мақсадида бозор ўртасида қамчиланди. Кампир собиқ вазирнинг ёнидан ўтиб кетар экан, унга қараб: «Тўғри айтган экансан, сен айтган туннинг охириги қисми энг яхши пайт экан», деди.

Туннинг охирги вақти бизнинг ҳаётимизда энг қимматли, вақтларимизнинг энг нафисидир. Парвардигор айтади: **«Сўровчи борми – ижобат қиламан, истиғфор айтгани мағфират қиламан, дуоларни қабул қиламан».**

Бир нечтамиз Абҳо шаҳридан Риёз шаҳрига учиш учун тайёрага ўтирдик. Ҳавога кўтарилганимиздан сўнг тайёрамизда техник носозлик юзага келганлиги сабаб, Абҳо тайёрагоҳига қайта қўнишимиз кераклиги хабар қилинди. Қайтдик. Имкон борича тайёрани тузатганларидан сўнг яна ҳавога кўтарилдик. Риёзга яқинлашганимизда тайёрамиз яна ўша носозлик сабаб ерга қўнишдан бош тортди ва бизларни Риёз осмонида тўла бир соат айлантди. Неча марталаб ерга қўнишга ҳаракат қилиб, имкон қила олмади. Яна ҳавога кўтарилдик. Бу пайтда бизларни хавотир ўраб олган, аёллар йиғиси кўпая бошлаган, кўзёшлар ёноқларга тушган эди. Бизлар ер билан осмон ўртасида кўз очиб юмишдан ҳам яқин турган ўлимни кутар эдик. Шунда мен барча нарсани эслаб, солиҳ амал каби эслашга арзигулик нарсани топмадим. Қалб Оллоҳ азза ва жаллага, Охират томонга отланар эди. Дунё кўзимизга арзон, бемаза бўлиб кўрина бошлаган эди. Бизлар дунёдан юз ўгирган эдик. Барчамиз шу сўзларни тилу дилимизда содиқ овоз билан такрорлар эдик: **«Шериғи бўлмаган Ёлғиз Зотдан ўзга илоҳ йўқдир. Мулк ҳам, ҳамд ҳам Уникидир. У барча нарсага Қодирдир».**

Ёши улуғ бир оқсоқол ўрнидан туриб Оллоҳга илтижо қилинлар, Унга дуо қилинлар, Ундан мағфират сўранлар, деб барчамизга хитоб қилди. Оллоҳ таоло

бундай инсонлар ҳақида Ўз оятида айтади: **«Қачон улар кемага минсалар, (ғарқ бўлишдан кўрқиб) Оллоҳга, У Зот учун динни холис қилган ҳолларида (яъни, чин ихлос билан) дуо-илтижо қилурлар».** (Анкабут сураси, 65-оят)

Музтар-ночор одам дуо-илтижо қилган вақтида (дуосини) ижобат қиладиган Зотга дуолар қилдик, ҳеч қанча ўтмай ўн бир ё ўн иккинчи уринишда саломат ерга қўндик. Ерга қўнар эканмиз гўё қабрлардан қайтиб чиққандек эдик. Кўнгиллар ўз жойига келган, кўзёшлар қуриган, юзларда табассум кўрина бошлаган эди. Оллоҳнинг лутфи қанчалар буюк».

«Қасийм» жаридаси мана бу воқеани ҳикоя қилади:

Бир ёш йигит сафар қилмоқчи бўлиб, онасига тайёра фалон соатда жўнашини, ўша вақтда уни уйғотиб қўйишини айтиб, ухлашга ётди. Онаизор эса об-ҳаво маълумотларидан бугун шамол туришини, ҳаво булутли эканлигини эшитган сабаб (у ерларда қумли бўронлар бўлар эди) ўғлини бундай ҳавода сафарга чиқишини истамаган, ёлғиз фарзандига раҳми келган она ўғлини уйғотмади, фавқулудда ҳодиса бўлишдан кўрқди, чунки бундай ҳавода сафар қилиб бўлмас эди. Сафар вақти ўтиб, тайёра учиб кетганига ишонч ҳосил қилгач, ўғлини уйғотиш учун ёнига борди ва уни ўз тўшагида ўлган ҳолатда топди. **«Айтинг: «Сизлар қочаётган бу ўлим, албатта, сизларга йўлиққувчидир. Сўнгра сизлар ғайбу шаҳодатни (яъни, барча яширин ва ошкора нарса-амалларни) Билгувчи (Оллоҳ)га қайтарилурсизлар. Бас, У Зот сизларга қилиб ўтган амалларингизнинг хабарини берур!».** (Жумъа сураси, 8-оят)

Баъзида жисм бир дард сабабли бошқа бир дарддан фориғ бўлади

Бир киши фалаж дардига мубтало бўлиб, тўшакка михланиб қолди. Бир неча йилни зерикиш, умидсизлик, муваффақиятсизлик билан ўтказди. Табиблар уни даволашдан ожиз эканликларини унинг аҳли-оиласига ҳам тушунтирдилар.

Кунларнинг бирида унинг шифтидан бир чаён тушиб кела бошлади. Бемор эса жойидан силжий олмас эди. Чаён беморнинг тепасига келиб, унинг бошига бир қанча зарба берди, бир неча бор ниш урди. Шу онда фавқулодда ҳолат рўй берди – беморнинг оёқ учидан бошлаб бошигача бўлган танаси жонланди, унинг аъзоларида ҳаёт бошланаётган эди. Унинг жисмининг ҳар тарафида шифо, соғайишлик сайр қилиб юрар эди. Бемор бир сесканиб, ғайратга кирди, аввал икки оёғида турди, кейин хонасида юра бошлади, кейин ўзи эшикни очиб, аҳли-оиласининг олдига келди. Улар кўзларига ишонмадилар, чақмоқ урган каби эсанкираб қолишди. Кейин бўлган воқеадан хабар топишди.

Табибларга шу ҳақида айтганимда, улар буни тасдиқлашди ва чаён вужудида заҳарли зардоб мавжуд бўлиб, кимёвий суюқлик вазифасини ўташини ва ўша суюқлик билан фалаж дарди муолажа қилинишини айтдилар.

Бу беморни мана шу алфозда даволаган Зот нақадар Покдир.

Ҳар бир дардни ўз давоси билан туширган, бандаларига Меҳрибон бўлган Зот нақадар Улуғдир.

Авлиёлар каромати

Тобеинлардан саналмиш, обид, зоҳид инсон – Сила ибн Ашим Оллоҳнинг йўлида жиҳод қилмоқ учун шимол тарафга йўлга чиқди. Кеч тушгач, намоз ўқиш учун бир ўрмонга кирди, дарахт ораларига юриб таҳорат олиб, намоз ўқий бошлади. Бу пайтда уни ваҳший бир шер таъқиб қилар, намозда турган Силага тобора яқинлашиб келар, унинг атрофини айланар эди. Сила ибодатни давом эттирар, намозини бузмас эди. Икки ракатдан сўнг салом бериб, шерга қараб: «Агар мени ўлдиришга буюрилган бўлсанг – мени егин, агар ундай бўлмаса – мени холи қолдир. Парвардигоримга муножот қилмоқчиман», деди. Шундан сўнг шер думини ликиллаганча у жойни тарк этди.

Имом Бухорий ўзининг саҳиҳ ҳадислар тўпламида мана бу воқеани ҳикоя қилади: «Бани Исроилдан бўлган киши бир одамдан минг динор қарз беришини сўради.

- Гувоҳинг борми?» – деб сўради у.
- Гувоҳим – Оллоҳ», – деди.
- Тўғри айтдинг, Оллоҳ гувоҳликка кифоя қилур.
- Вакилинг борми?
- Вакилим Оллоҳ, – деб жавоб берди.

– Оллоҳ вакилликка кифоя қилур», – деди ва унга минг динорни берди. Бир муддатни белгилаб, ваъдалашишгач, қарзни олган одам қайтиб кетди. Бу икки – қарз берувчи ва қарз олувчининг ўртасида бир дарё бор эди. Ваъдалашилган вақт етиб келгач, қарз олган одам қарзларини эгасига қайтариш учун ҳақдорнинг олдига бормоқчи бўлиб, дарёнинг у томонига ўтиш учун қирғоқда қайиқ келишини кутиб турди, лекин кеч ту-

шиб, анча вақт ўтишига қарамасдан дарёда ҳеч қандай қайиқ кўринмади. Шунда у Парвардигорига муножот қилиб: «Оллоҳим, қўлимдаги пулларнинг эгаси гувоҳ сўраганида ҳам, вакил сўраганида ҳам Сени кўрсатган эдим. Оллоҳим, бу мактубимни унга етказгин», деди ва бир ёғочни олиб, уни ўйиб, ичига пулларни жойлаштирди, ёнига ёзган мактубини ҳам қўйиб қўйди, сўнгра ёғочни дарёга отиб юборди. Бу ёғоч Оллоҳнинг изни ва лутфи-инояти билан сувда сузиб кетди. Худди ана шу пайтда ўша пулларнинг эгаси ҳам ваъдага биноан дарё ёқасида – қарздорни кутиб турган эди. У ерда ҳеч ким йўқлигини кўргач ортига қайтмоқчи бўлиб, ўзича: «Ҳеч бўлмаса уйимга ўтин оламан, деб турган пайтда олдига бир ёғоч сузиб келди, у ёғочни уйига олиб кетди. Уйга келиб, ёғочни ёргач, ичидан унинг пуллари ва бир парча мактуб чиқди.

Чунки гувоҳ бўлган Оллоҳ қарздорга ёрдам берган, вакил бўлган Оллоҳ ўз ваколатини адо қилган эди. У Зот нақадар Буюқдир. **«...Бас, мўминлар Ёлғиз Оллоҳга таваккул қилсинлар – суянсинлар!»**. (Тағобун сураси, 13-оят).

Чўғ устида ҳам Оллоҳдан рози бўлмоқ

Бани Абсдан бўлган киши адашган туясини излаб чиқиб, уч кун йўқ бўлиб кетди. У бадавлат кишилардан бўлиб, Оллоҳ унга бола-чақа, чорванинг ҳар туридан етарлича ато этган эди. Унинг аҳли-оиласи ҳам, молдавлати ҳам Бани Абс диёридаги анҳор ёқасидаги кенг-бепоёнликда жойлашган бўлиб, тўкин-сочинликда, тинч-хотиржам ҳаёт кечирар эдилар. Уларнинг ҳеч қайсиси бошларига мусибатлар тушишини, ҳодисалар

уларни ҳам четлаб ўтмаслигини хаёлларига ҳам келтиришмас эди.

Тун. Барча бойликлар ерда уюлиб ётар. Оила бошлиғи туя излаб кетгани бўйича қайтиб келмаган, каттаю кичик ширин уйқуда эди. Тун охирлаб қолган пайтда Оллоҳ таоло уларнинг устига тоғу тошни тупроқ каби оқизувчи селни юбориб, уларнинг барчасини ҳалок қилди, уйларни ичидаги мол-дунёлари билан вайрон қилди. Уларнинг руҳлари сув оқимида таналарини тарк этди, улар гўё аввал бўлмаган каби эдилар, улар тилларда айтилувчи дostonларга айланган эдилар, холос.

Уч кундан кейин водийга қайтган ота у ерда ҳеч кимни, на бир жилғани, на бир тирик жонни топа олмади. Гўё у жой теп-текис бўлиб қолган эди. Ё, Оллоҳ! Бу қандай фалокат! На аёли, фарзандлари, на мол-давлати, на кийим-кечаги бор! Бу қандай мусибат!

Бундан ҳам ёмони кейин рўй берди, унинг туяларидан бири қочиб кетди, уни тутишга муваффақ бўлиб, думидан ушлаганида туя оёғи билан унинг юзига тепди ва кўзларини кўр қилиб қўйди. У бирор бир киши уни бирор бошпанага етаклаб олиб бориб қўйишини сўраб, саҳрода бир ўзи қичқирар эди. Бир оз вақтдан сўнг бир йўловчи овозини эшитиб, унинг олдига келди ва уни Дамашқ халифаси Валид ибн Абдул Маликнинг ҳузурига олиб бориб, унга бўлган воқеани айтиб берди. Халифа ундан: «Аҳволинг қандай», – деб сўради. Шунда у: «Оллоҳдан розиман», – деб жавоб берди.

Қалбида тавҳид ўрнашган бу мусулмон инсон айтган сўз буюк сўз эди. Бу воқеа келажак учун насиҳат ва ибрат бўлиб қолди.

Не кўргизсанг – ўшани кўрурсан

Бизларнинг ҳолимиз қизиқ! Ўзгаларни ҳалим бўлишларини талаб қиламиз, ўзимиз эса ғазабланаверамиз. Уларни сахий бўлишларини истаймиз, ўзимиз бахиллик қилаверамиз. Уларни биродарлик ҳақларига вафо қилишларини хоҳлаймиз, ўзимиз эса буни адо қилмаймиз.

Бизнинг саодатимиз Холиқимиз ва Унинг махлуқотининг ҳақларини бажариш билан комил бўлади. Ҳа, аввал Оллоҳни кейин инсонларнинг ҳақларини. Сўзни айтиш, унга жило бериш, унга нақш солиш осон, аммо мақтовга лойиқ сифатлар, чиройли амаллар билан гўзал намуна сифатида уни адо қилиш ўта мушкулдир. **«Одамларни яхшиликка чорлаб, ўзларингизни унутасизларми? Холбуки, ўзларингиз Китоб (Таврот) тиловат қиласизлар. Ақлингизни юргизмайсизларми?».** (Бақара сураси, 44-оят)

Яхшиликка буюриб, ўзи унга амал қилмаган, ёмонликдан қайтариб, ўзи қайтмаган кимса (саҳиҳ ҳадисда айтилганидек) Қиёмат куни дўзахга ташланади, худди эшак ўз қозиги атрофида арқонини тортиб айланганидек, бу кимса ҳам дўзахда ичаклари чувалган ҳолда айланади. Дўзах аҳли ундан бу ҳақда сўрашганида, у: «Мен сизларни яхшиликка буюриб, ўзим унга амал қилмас эдим. Сизларни ёмонликдан қайтариб, ўзим ундан қайтмас эдим», деб жавоб беради.

Тақвосиз ўзгага тақвони айтар У қандай табибдир ўзи-ку касал

Салафлардан бири одамларга садақа қилишни буюрмоқчи бўлса, аввал ўзи шу амални қилиб, сўнгра

бошқаларга ҳам шундай қилишни буюрар, улар ҳам бунга ўз хоҳишлари билан бўйсунитар эди.

Роҳат жаннатдадир

Аҳмад ибн Ҳанбалдан қачон роҳат бўлиши ҳақида сўралганида у: «Жаннатга оёғингни қўйишингнинг ўзи роҳатдир», деб жавоб берди.

Жаннатдан аввал роҳат йўқдир. Бу дунёдаги нарсалар ташвиш-безовталиқ, фитна, турли ҳодисалар, мушибатлар, бахтсизликлар, касаллик, ғам-андуҳ, алам ва умидсизликдан иборатдир.

Салаф уламоларидан бири бўлган Масруқ намозда сажда қилган ҳолатда ухлаб қолди. Шунда унинг дўстлари: «Озгина дам олгин», – дейишди. Масруқ: «Шундай дам олишни истадим», – деб жавоб берди.

Тарки вожиб эвазига нақд роҳатни истовчилар, нақд азобни истабдилар.

Албатта, роҳат солиқ амал, керакли фойда, Оллоҳга яқинлаштирувчи нарса ҳамда вақтнинг самарасидадир.

Албатта, кофирлар ўз насиба ва роҳатларига шу дунёда эришишни истайдилар, шунинг учун улар айтадилар: **«Парвардигоро, бизларга (ваъда қилинган азобдан иборат) насибамизни ҳисоб-китоб Кунидан илгариёқ (яъни, шу ҳаёти дунёдаёқ) тезроқ келтира қолгин».** (Сод сураси, 16-оят)

Баъзи муфассирлар бу оятни шундай тафсир қиладилар, яъни, кофирлар яхшилик ва ризқдан иборат насибаларини Қиёмат кунидан аввал берилишини хоҳлайдилар.

«Албатта, ана у (кофир)лар нақд (дунё)ни суюрлар...». (Инсон сураси, 27-оят). Улар эрта, келажак ҳақида фикр юритмайдилар, шунинг учун ҳам улар бу-

гун, эрта, амал, натижа, бошланиш ва ниҳоя борасида зиён топурлар.

Ҳаёт шундай яратилган, унинг хотимаси фанодир, у кир ичимликдир, тинмаган лойқа аралашмадир, неъмат ва нафратдир, кенглик ва торликдир, бойлик ва фақирликдир.

Уларнинг ниҳояси будир: **«Сўнгра (бандалар) ҳақиқий Хожалари – Оллоҳга қайтурлар. Огоҳ бўлингизким, ҳукм қилиш Унинг Ўзигагина хосдир ва У жуда тез ҳисоб-китоб қилгувчидир».** (Анъом сураси, 62-оят)

Кийимини мулойимлик билан ечган одам уни саломат ҳолда бўлишини кафолатлаган бўлади, аксинча, уни куч билан тортиб, улоқтирган кимса кейин унинг тугмаси узилганидан, йиртилганидан шикоят қилади.

Ҳаётимиз мурувватга муҳтождир.

Турклар анҳор устига бино қилинган ёғоч кўприк олдиға: «Аста-аста», деган сўзни ёзиб қўйишди. Демак, секин ўтган одам кўприкдан тушиб кетмайди, шошилган эса анҳор тубиға тушиб кетмоққа лойиқдир.

Чумчуқ асалари каби мулойим эмасдир. Ҳадисда айтилади: **«Мўмин асаларига ўхшайди, хушбўй нарсани ейди, хушбўй маҳсулот беради, бирор бир дарахт шохига қўнса уни синдирмайди».**

Гул асаларини ўзига қўнганини сезмайди. У гул моддаларига асталик билан қўниб, ўз мақсадига осонлик билан эришади. Чумчуқ асаларига қараганда бе-сўнақайроқ бўлганлиги сабабли сунбулаларға қўнаётганини бошқаларға билдириб қўяди. Қаттиқ тушади, қалтис сакрайди.

Бир воқеа ҳеч ёдимдан кетмайди. Ҳинд рассомларидан бири лавҳа гўзал санъат асарини чизди, унинг

қисқача баёни: чумчуқ буғдой бошоғига қўнган, бу бошоқ донга тўлган бўлиб, айни яшнаган, қад кўтарган пайти эди. Подшоҳ бу суратни сарой деворига илиб қўйди. Одамлар подшоҳни бу сурат билан табриклашар, рассомнинг санъатига таҳсинлар айтишар эди. Шу пайт одамлар орасига номаълум, фақирона бир киши келиб қўшилди, сурат олдига туриб, унинг хато чизилганини айтди. Одамлар унинг гапидан сўнг шовқин кўтаришди. Чунки у бир ўзи бошқаларга хилоф чиқаётган эди. Подшоҳ уни мулойимлик билан ҳузурига чорлаб, деди: «Нима демоқчисан?» У: «Бу суратнинг чизилишида хатолик, намойишида янглишлик бор», – деди. Подшоҳ: «Нима учун?» – деб сўради. У: «Рассом чумчуқни бошоқ устида турганлигини тасвирлаб, бошоқнинг ўзини тўғри – чўзилган ҳолатда турганча қолдирган, камчилик шу ерда. Буғдой бошоғига қўнган чумчуқ бошоқни эгиб, тебрантиради, чунки чумчуқ оғирдир, у мулойимликни билмайди», – деди. Подшоҳ: «Тўғри айтдинг», – деди. Одамлар ҳам подшоҳнинг сўзини маъқуллашди. Подшоҳ суратни девордан олди, рассомга берилган совға-саломлар ҳам тортиб олинди.

Табиблар беморни даволаётганда, амалиёт бажаришда мулойим бўлишни тавсия этадилар.

Мана бу ўз қўли билан тирноғини юлиб олса, мана буниси тишини синдирган, бошқасининг оғзидаги луқмаси томоғига тикилиб қолган.

Салафлардан бирининг мана бу гапларини ўқидим: «Кишининг билимдонлиги унинг ўз уйига кириб-чиқишлиги, кийимларини кийиш-ечишлиги, уловига мишишлигидаги мулойимлигидадир».

Ишлардаги шошқалоқлик, енгилтаклик, нодонлик зарарли ҳосил олиб, манфаатдан қуруқ қолиш учун

етарлидир. Зеро, эзгулик мулойимлик устига бино қилинур. **«Мулойимлик қайси нарсада бўлса, уни зийнатлайди, йўқ бўлса уни айбдор қилади».**

Муомаладаги мулойимлик сабаб руҳлар бўйинсинур, қалблар эргашур, нафслар итоатгўй бўлур.

Инсоннинг мулойимлиги барча яхшиликнинг кали-тидир, ундай кишига осий нафслар таслим бўлур, ёвуз қалблар унга бўйинсинур.

Хулоса

Тоҳа Хусайн учинчи шахс тилидан ўзи ҳақида шу сўзларни айтади: «У ўзини инсон деб атар, инсонлар каби туғилиб, улар каби яшаяпман, улардек вақт, ҳаракатимни тақсимлаяпман, деб ўйлар эди. Лекин у бирортаси билан дўстона муносабатда бўлмаган, бирор нарсадан хотиржамлик топмаган эди. У билан инсонлар ўртасида парда бор эди, гўё у парданинг таши мамнуният, тинчлик бўлса, ичи норозилик, хавф-хатар, изтиробдан иборат эди. У на чек-чегараси, на белги аломати бўлмаган кимсасиз саҳрода яшар, у ерда юриш учун йўл йўқ, ғоя-мақсади эса ниҳоясиз эди».

Бахтли бўлишинг учун

Иймон ғам-қайғуларни кетказар, иймон Оллоҳни Ёлғиз дегувчиларнинг шодлиги, обидларнинг тасаллисидир.

Ўтган нарса ўтиб кетди, ўтмиш ўз ниҳоясига етди. Бас, у ҳақида ўйлама.

Битилган қазойи қадарга, тақсимланган ризқу рўзга рози бўлгин, хавотирни тарк қил.

шини ҳамда ёмонлик – гуноҳларни яхшилик, савобларга ўзгартиришини эслагин.

Парвардигоринга, У Зотнинг дин, ақл-идрок, куч-қудрат, кўз-қулоқ, ризқу рўз, ўғил-қиз каби сенга ато қилган саноқсиз неъматларига шукур қилгин.

Чунки, бу дунёда ўз ақлини, соғлиғини йўқотган, маҳбусликда кун кечириётган ёки фалаж дардига мубтало бўлган инсонлар ҳам бордир.

Қуръон билан яшагин, уни ёд олгин, тиловат қилгин, тинглагин, тадаббур-тафаккур қилгин. Чунки Қуръон ғам-қайғуларнинг энг яхши давосидир.

Оллоҳ таолога таваккул қилгин, ишларни Унга топширгин, Унинг ҳукмига рози бўлгин, У Зотга мурожаат қилгин, ишонгин Унга. У Зот Ўзи сенга кифоя қилур.

Сенга зулм қилганни кечиргин, алоқа узган билан алоқа ўрнатгин, эҳсон қилгин, золимларга ҳалим бўлгин, шунда осуда ҳаёт кечирасан.

«Куч-қудрат ёлғиз Оллоҳга хосдир», сўзини такрор айтгин, бу сўзлар билан аҳвол ўнганур, юклар енгиллаб, Зул-Жалол рози бўлур.

Келажакка ишонч билан қарагин, ноумид бўлмагин, Парвардигоринг ҳақида чиройли тафаккур қил ва У Зотдан барча яхшиликларни кутгин.

Сен Оллоҳ таолонинг ихтиёрида эканлигиндан хурсанд бўлгин, чунки сен ғам-алам ёки шод-хуррамликнинг қайси бири сенга фойдали эканлигини билмайсан.

Бало-офат сени Оллоҳ таолога яқин қилади, дуони ўргатади, сендан кибр, манманлик ва фахр туйғуларини кетказади.

Гумон-шубҳалардан, бузуқ фикр-хаёллардан узоқ бўлгин.

Дунё ғам-андух, ташвиш ва хавотирлик ҳовлисидир.

Оллоҳ таоло сенга етган ғам-андуҳ, очлик, фақирлик, касаллик, барча мусибатларнинг бадалига ажр-мукофот беради.

Мусибат кўзларни очиб, қалбни уйғотади, нафсни тияди, қулликни эслатиб, савобни оширади. Фалокатни кутмагин, миш-мишларга ишонмагин, уйдирмаларга таслим бўлмагин.

Кўп содир бўлишидан қўрқилган нарсалар содир бўлмас, кўп эшитилган ёқимсиз нарсалар воқе бўлмас, Оллоҳнинг Ўзи кифоя қилгувчи, бошқариб тургувчи ва мадад бергувчидир.

Кўпол, гиначи ва ҳасадгўйлар билан мажлис қурма, чунки улар руҳ безгаги ва ғам-қайғу элчиларидир.

Намозни жамоат билан ўқишга қаттиқ эътибор бер, масжидда кўпроқ туришга ҳаракат қил, сурурга эришмоқ учун нафсингни намозга шошилишга одатлантир.

Гуноҳлардан сақлан, чунки гуноҳлар ғам-андуҳлар манбаи, фалокатлар сабабчиси, мусибат ва тангликлар эшигидир.

Ушбу: **«Ҳеч илоҳ йўқ, магар Ўзинг бордирсан, эй Пок Парвардигор, дарҳақиқат, мен (Ўз жонимга) жабр қилгувчилардан бўлиб қолдим»**, оятини давомли айтгин. Чунки азиятларни кашф қилишда бу оятнинг ажиб бир сири бордир ва у кулфатлар бартараф бўлиши ҳақида буюк хабардир.

Сен ҳақингда айтилган ёмон сўзлардан таъсирланма, чунки бу сўзлар сенга эмас, уни айтгувчининг ўзига озор берур.

Ҳасадгўй душманларингнинг сен ҳақингдаги қилган маломатлари сенинг қийматингни оширади холос,

чунки сен энди эшлашга арзигулик кишига, эътиборли бир шахсга айландинг.

Сени ғийбат қилганлар, сенга ўз яхшиликларини ҳадя қилиб, гуноҳларингни тўкиб, сени машхур қилурлар. Бу ҳам бир неъматдир.

Ибодатлардан ўзингни бездириб қўйма, суннатни лозим тут, тоат-ибодатда ўртача бўл, ғулув кетма.

Чин ихлос билан Парвардигорингнинг танҳо эканини тасдиқла, зеро, саодат соф тавҳид ва покиза ихлос миқдорига қараб белгиланур.

Қалби кучли, нафси собит, шижоатли бўл. Сенда ғайрат ва қатъийлик бордир. Бас, бўрон, миш-мишлар сени алдаб қўймасин.

Саҳоватпешаликни ўзингга лозим тут, зеро, сахий инсоннинг қалби шод бўлур. Бахилнинг қалбини эса торлик, зулмат қоплар, кўнглини ғулғула босур.

Ёмонликни энг гўзал сўзлар билан даф қил, инсонларга меҳрибонлик қил, адоватлар ўтини ўчир, душманинг билан мураса қил, дўстларингни кўпайтир.

Ота-она дуоси энг буюк саодатдир. Уларнинг дуолари сен учун барча ёмонликлардан мустаҳкам кўрғон бўлиши учун уларга яхшилик қилиш билан уларнинг дуоларини ол.

Инсонларни борича қабул қил, хатоларини кечир ва билгинки, албатта бу хилма-хиллик инсонлар ва ҳаёт устидаги Оллоҳ белгилаган қонундир.

Оддий ҳаёт кечир, исроф ва дабдабадан узоқ бўл, чунки фаровонлашган сари руҳ тушовланиб бораверади.

Ишларни тақсимла, уларни бир вақтга жамлама, балки уларни шундай тартибга солгинки, кунинг яхши ўтиши учун унда роҳатга ҳам вақт бўлсин.

Чидамлилик айблар учун қабрдир. Ҳалимлик хатоларнинг пардасидир. Олийжаноблик эса айбу нуқсонларни ёпувчи кенг кийимдир.

Бир нафас бўлса ҳам ёлғиз қолиб, ишларинг ҳақида мулоҳаза юрит, нафсингга боқ, Охиратингни ўйла, дунёингни тузат.

Уйингдаги кутубхонанг сенинг мевазор бўстони, яшнаган гулбоғингдир. Ўша боғингдаги уламолар, ҳукамолар, адибу шоирлар билан суҳбатлашиб руҳан поклан.

Ҳалол ризқ изла, ҳаромдан, тиланчиликдан ҳазир бўл. Тижорат қил. Ўртача бўл. Зеро, тижорат мансабдан яхшироқдир.

Хашамни ёқтирувчи, истовчилар ёки бечоралар либосини эмас ўртачалик либосини кийгин. Кийим билан машҳурликни истама оддий одам бўл. Ғазабланма, зеро, ғазаб табиатни бузади, хулқни ўзгартиради, дўстликка раҳна солади, қариндошдан алоқани уздиради.

Ҳаётингни янгилла, бошқа оламлар, янги жой ва шаҳарларни кўрмоқ учун аҳён-аҳён сафар қил. Зеро, сафар фойдадир.

Инсонларга доим биринчи бўлиб салом бер, табасум билан қарши ол. Беписанд бўлма, шунда уларнинг қалбларига яқин, суюкли бўласан.

Одамларга суянма, ўзингга ишон, фаровонликдаги «дўст»ларга алданиб қолма ва билгинки, фақат Оллоҳ сен билан биргадир.

«Кейинроқ» сўзини ишлатишдан, ишларни кечиктиришдан, вожиб амалларни ортга суришдан эҳтиёт бўл. Чунки бу муваффақиятсизлик, барбод бўлиш демақдир.

Қарор қабул қилишда тараддудга тушишни тарк эт. Ҳар қандай ҳолатларда иккиланишдан узоқ бўл. Жазм эт. Журъатли бўл. Олдинга юр.

Умрингни соҳа, вазифа, ишлар орасида кўчиб юришлик билан зое қилма. Чунки бундай қилишинг сен ҳеч нарсада муваффақият қозона олмаслигинг белгисидир.

Солиҳ амаллар, мусибатланиш, тавба қилиш, мусулмонларнинг дуоסי, Раҳмоннинг Раҳмати, Расулulloҳ соллalloҳу алайҳи васалламнинг шафоати каби гуноҳларни ўчирувчи каффоратлардан хушнуд бўл.

Оз бўлса ҳам садақа беришни ўзингга лозим тут, чунки у хатоларни ўчиради, қалбни масрур қилади, ғамни кетказади, ризқни зиёда қилади.

Йўлбошчинг – имоминг бўлган Муҳаммад соллalloҳу алайҳи васалламга тақлид қил. Чунки у зот саодатга бошлар, муваффақиятни кўрсатар, зафар-нажот томон етаклар.

Саломатлик неъматини англамоқ учун шифохоналардаги беморларни зиёрат қил. Хуррият неъматини билиш учун қамоқхоналарни бориб кўргин. Чунки сен ўзинг ҳам англаб етмайдиган неъматлар эгасидирсан.

Бағрикенг бўл, хотиржам ҳаёт кечириш учун сенга ёмонлик қилганларнинг узрини қабул эт. Интиқом олиш истагини тарк эт.

Қайғу-ғазабинг билан душманингни шод этма, чунки бу улар истаган нарсадир, бас сен уларнинг ҳаётингни лойқалатишдек тубан мақсадларини амалга оширма.

Қалбингда гина-адоват, инсонларга бўлган нафрат каби ўтти ёқма, чунки бу давомли азобдир.

Мажлисларда сипо бўл, фақат яхшилиқни сўзла ёки сукут қил, хушчақчақ бўл, ёнингдагиларни ҳурмат қил, уларни тингла, сўзларини бўлма.

Фақат жароҳатларга қўнадиган пашша каби бўлма, одамларнинг обрўсини тўкишдан сақлан, уларнинг хатоларидан шод бўлиб, қоқилишларидан қувонма.

Мўмин одам дунёнинг ўткинчи нарсаларига ғам чекиб, унга эътибор бермайди, унинг ҳалокатларидан кўрқмайди. Чунки дунё йўқ бўлувчи, арзимас, ҳақир ва фоний нарсадир.

Севги-муҳаббатдан юз ўгир, чунки у руҳни қийнар, қалбни дардга чалинтирар, сен Оллоҳга, Уни зикр қилишга, Унга итоат этишга шошилгин.

Ҳаромга қарамоқ ғам-андуҳни, қалбда жароҳатни мерос қолдиради. Кўзини ҳаром нарсалардан тийиб, Парвардигоридан кўрққан банда бахтлидир.

Таомланиш тартибига амал қил, фойдали ва етарлисини тановул қил, ортиқча тўйишдан узоқ бўл, тўйган ҳолда уйқуга ётма.

Ҳодисалардан хавфсираган пайтда ёмон эҳтимолларни ҳисобга ол. Сўнгра буни кўтаришга ўзингни тайёрла. Шундагина сен роҳат-фароғатни топурсан.

Насронийларни тавбага чорлаган, тавба қилгувчиларга қўлини чўзган, юз жонни ўлдирган жиноятчини ҳам кечирган, ташна итни суғорган бузуқ аёлни мағфират қилган Раҳмоннинг Раҳмати ҳақида тафаккур қил.

Очликдан сўнг тўқлик, ташналик ортидан қониш, дарддан кейин шифо, фақирликдан сўнг бойлик, қайғу кетидан шодлик алмашур. Бу ўз исботини топган қонундир.

«Шарҳ» сураси ҳақида тадаббур қил, мусибат пайтида ушбу сурани ёдга ол ва билгинки, бу сура тангликнинг энг яхши давосидир.

Қайғу дуоси ушбудир: **Буюк, Ҳалим Зот бўлмиш Оллоҳдан ўзга илоҳ йўқдир. Буюк Арш Парвардигори бўлмиш Оллоҳдан ўзга илоҳ йўқдир. Буюк Арш, осмон ва Ернинг Парвардигори бўлган Оллоҳдан ўзга илоҳ йўқдир.**

Ғазабланма, ғазаб пайтида сукут сақла, шайтондан паноҳ сўра, турган жойингни ўзгартир, агар турган ҳолатда бўлсанг ўтир ва таҳорат ол, зикрни кўпайтир.

Ўтмиш ҳақида қайғурмоқ аҳмоқлик ва мажнунликдир. У тегирмон уни, ёғоч тўпони кабидир, у гўё ўликларни қабрлардан чиқармоқликдир.

Мусибат етган пайтида унинг ажрини ўйла ва бу мусибат бошқаларникидан енгилроқ эканлигини билгин ҳамда балоланганларга ҳамдардлик билдир.

Сенга ёқимсиз бўлган нарсалардаги яхшилик сенга ёқимли бўлган нарсалардаги яхшиликдан кўпроқдир. Сен оқибатларни билмассан. Бало ортида қанча неъматлар, ёвузлик ортида қанча эзгуликлар бордир.

Сени қайғу водийсига ташламай туриб, тасаввурингни жиловла, сўнгра сенга берилган ютуқлар, иқтидор ва неъматлар ҳақида ўйлашга ўтгин.

Намоз мусибатларни енгишда энг яхши кўмакчидир. У нафсни юксак чўққиларга олиб чиқур, руҳни нур ва нажот фазосида сайр қилдирур.

Мева бергувчи яхши амал нафсни ёвуз инжиқликдан, гуноҳга олиб борувчи ғоялардан, ҳаромга интилишдан озод қилур.

Саодат бир дарахт кабидирки, унинг суви, ўғити, ҳавоси ва зиёси Оллоҳга, Охират кунига иймон келтирмоқдир.

Комил одоб, соғлом дид, улуғ хулқ соҳиби бўлган инсон ўзини ҳам, атрофидаги инсонларни ҳам бахтиёр қилади.

Қалбингга роҳат бер, чунки қалб ҳам чарчайди, малол олади. Унга турли услубларни қўлла, ҳикмат фанлари, маърифат навларини изла.

Илм – дилни ёритар, тасаввур онгингни кенгайтирар, нафс олдидаги уфқларни очиб, унинг ғам-андухлари, қайғуларини кетказар.

Тўсиқларни енгиб, қийинчиликлар устидан ғалаба қозонмоқ саодатдир. Зеро, ҳеч қандай лаззат зафар лаззатига, ҳеч қандай шодлик ғалаба шодлигига тенг кела олмайди.

Агар одамлар билан бирга бахтли бўлишни истасанг, сенга қандай муомала қилишларини хоҳласанг, уларга ҳам ўшандай муомала қилгин. Олди-сотдида уларнинг нарсаларидан уриб қолма, уларнинг қадр-қимматларини поймол қилма.

Маърифат, тажриба ва билим мол-давлат сармосидан буюкроқдир. Зеро мол-дунё учун шодланмоқ ҳайвонийлик, маърифатдан шодланиш эса инсонийликдир.

Эр-хотиндан бири ғазабланса иккинчиси сукут сақласин ва бир-бирларидан ўтганни кечирсин, зеро, ҳеч бир кимса айбдан холи эмасдир.

Келажакка яхши кўз билан қаровчи яхши улфат сенинг машаққатларингни енгиллаштиради, сенга умид эшигини очади. Бадбин кимса эса дунёни сенинг кўзингга қора қилиб кўрсатади.

Оиласи, бошпанаси, соғлиги ва етарли моли бўлган инсон бахтли ҳаётга эгадир, бас, у Оллоҳга ҳамд айтсин, неъматга қаноат қилсин, зеро булардан бошқаси қайғудан бошқаси эмасдир.

Оллоҳ сендан рози бўлиши, атрофиндагилар сендан миннатдор бўлишлари, ўзингдан кўнглинг тўқ бўлиши ҳамда фойдали ишни амалга оширмақлигинг асл муваффақиятдир.

Таом кун саодатидир. Сафар ҳафта саодатидир. Уйланиш ой саодатидир. Мол-давлат йил саодатидир. Иймон икки дунё саодатидир.

Сен уйқу, емак, ичмак, никоҳ билан эмас балки, сен амал билан – буюклар учун қуёш янглиғ ёруғ ва юксак жой тайёрлаган амал билан бахтли бўлурсан.

Билим олишга муяссар бўлган инсон бахтлидир. Чунки у олам боғларидан гул терур, дунё ажойиботларини кўрур, ҳар ҳил замон ва маконларнинг гувоҳига айланур.

Дўстлар билан дийдорлашмоқ ғамни кетказур. Беғубор кулгу роҳатдир. Шеър тингламоқ руҳга ором берур.

Сен ўз қарашларинг билан ҳаётингга ранг берурсан. Сенинг ҳаётинг – тафаккуринг маҳсули. Бас, шундай экан, кўзингга «қора кўзойнак» тақмагин.

Ўзинг яхши кўрадиган инсонлар ҳақида ўйла. Ёмон кўрадиганинг кимсаларга ҳаётингдан бир лаҳза ҳам бермагин. Чунки улар сен ва сенинг қайғуларинг ҳақида хабардор эмаслар.

Агар фойдали иш билан машғул бўлсанг, асабларинг, нафсинг тинчланади, сени хотиржамликдан иборат бир файз қуршаб олади.

Оллоҳнинг бандалари орасида энг бахтлилари яхшиликка қўл чўзадиган, дўстларга фазл кўрсатадиган ва буларнинг барчасига шукр қиладиганларидир.

Мавжуд соатдан фойдаланмай туриб, саодат сенга уфқдан боқишини ёки осмондан сенга ёмғир бўлиб ёғишини кутмагин.

Кечаги ташвишингни аритган Зот бугунги ҳамда эртанги қайғуларни аритишга қодирдир. Шундай экан ўша Зотга таваккал қил. Оллоҳ сен билан бирга бўлса,

Унга Оллоҳнинг неъматлари ёғилган инсон у неъматларни шукр айтиш билан боғлаб олмоғи, тоат-ибодат билан уни сақламоғи, давомли бўлиши учун тавозуъ билан унга риоя қилмоғи даркор.

Нафси тақво билан соф бўлган, фикри иймон билан покиза бўлган, ахлоқи эзгулик билан сайқал топган инсон Оллоҳ ва одамлар муҳаббатига сазовор бўлур.

Лоқайд, дангаса кимса ҳақиқий маҳзунлик, машаққат эгасидир. Ҳаракат қилгувчи ишчан инсон эса қандай яшаш, қандай бахтиёр бўлишни билур.

Аёл ҳар қанча мол-дунёга эга бўлиб, ҳар қандай мартабага сазовор бўлмасин, агар унинг эри – жуфти ҳалоли бўлмаса у барибир мискина, деб аталаверади.

Ёшлигингни ҳаракатга, вояга етган даврингни курашга, қарилик дамларингни тафаккурга сарфлашинг комил ҳаётдир.

Нафсингни хатокорликда айбла, ўзгани маломат қилма. Чунки ўзингинг айбларингни тузатиш учун вақт етмайди, бас, ўзгани кўявергин.

Фаҳмларга жило бериб, қалбларни шод айлаб, нафсини ошно қилиб, кўнгилни ёзгувчи, тафаккурни юксалтирувчи китоб ҳар қандай қасрлар, давру давронлардан гўзалроқдир.

Оллоҳдан афв ва саломатлик сўра, агар шу иккиси сенга берилган бўлса, демак сен барча яхшиликка эга бўлибсан, ҳар қандай ёмонликдан нажот топибсан ва барча саодатга эришибсан.

Бир дона оби нон, етти дона хурмо, бир бўйраси ва бир Қуръон китоби бор хона етарлидир. Дунёга салом айтгин.

Унга ишониб, у билан роҳат оладиган, унга ҳасрат қила оладиган, қайғу вақтида сенга ҳамдард бўлиб,

сирларингни фош қилмайдиган дўстларинг яхши дўстлардир.

Ёмонликни унутиш – неъмат, неъматларни эслаш – эзгулик, инсонлар айбидан ғафлатда қолиш фазилат.

Афв интиқомдан лаззатлидир. Амал бекорчиликдан фойдалидир. Қаноат мол-давлатдан буюкроқдир. Соғлик бойликдан яхшироқдир.

Ёлғизлик ёмон суҳбатдошдан яхшироқдир. Яхши суҳбатдош ёлғизликдан яхшироқдир. Узлат ибодатдир. Тафаккур тоатдир.

Узлат фикрлар мамлакатидир. Кўп аралашмоқ аҳмоқликдир. Ҳаммага ишонавериш ақлсизликдир.

Ёмон хулқ азобдир. Гина заҳардир. Гийбат разолатдир. Пайдар-пай тойилишлар мағлубиятдир.

Неъмат шукри интиқомни қайтарар. Гуноҳларни тарк этмоқ қалблар ҳаётидир. Нафсга ғолиб келмоқ улуғларнинг топган лаззатидир.

Хотиржамликдаги топилган қуруқ нон, хавф-хатар пайтидаги асалдан лаззатлироқдир. Пардаси бор чодир, фитна уяси бўлган қасрдан яхшироқдир.

Илм шодлиги доимийдир. Улуғворлиги абадийдир. Шуҳрати боқийдир. Мол-давлат шодлиги эса ўтиб кетур, улуғворлиги завол топур, шуҳратининг ниҳояси бордир.

Дунёга севинмоқ гўдаклар севинчидир. Иймон учун севинмоқ олийжаноб инсонлар шодлигидир. Мол-дунёга хизмат қилмоқ хорликдир. Оллоҳ учун амал қилмоқ – шарафдир.

Фаолият азоби ёқимлидир. Муваффақият олдидаги машаққат роҳатдир. Яхши амал сабабли пешонадан оққан тер мушку анбар кабидир.

Тунги намоз кундузнинг гўзаллигидир. Одамларга эзгуликни ишташлик, қалб поклигидан далолатдир. Кенгликни кутмоқ ибодатдир.

Жамоат билан намоз ўқиб, вожибни адо қилмоқ, мусулмонларни севмоқ, гуноҳларни тарк этиш ҳамда ҳалол емоқ дунё-ю Охират салоҳиятига эга бўлмоқдир.

Вақтни зое қилмоқ, тавбани кечиктирмақ, одамларни ўзига душман қилмоқ, ота-онага оқ бўлмоқ, сирни ёймоқ аҳмоқликнинг аломатидир.

Ибодатни тарк этмоқ, гуноҳга мойил бўлмоқ, ёмон номга эга бўлмоқ, Оллоҳнинг макридан хотиржам бўлмоқ билан қалбнинг ўликлиги маълум бўлади.

Ўз уйида бахтли бўлмаган бошқа жойда бахтли бўла олмайди. Ўз аҳлига суюкли бўлмаганни биров суймайди. Бугунги кунини зое қилган эртасини ҳам зое қилади.

Оламдаги энг афзал нарса содиқ иймон, ҳусни хулқ, соғлом ақл, саломат жисм, ҳалол ризқдир. Булардан бошқаси бекорчи машғулотдир.

Икки махфий бўлган неъмат бор: баданларнинг саломатлиги, ватан тинчлиги. Икки ошкора неъмат бор: чиройли мақтов ва солиҳ зурриёт.

Қувноқ қалб нафрат микробларини ўлдиради. Тақдирдан нолимайдиган нафс жирканч ҳашаротларни ҳайдайди.

Уйингга олиб борадиган йўлнинг хатари камроқдир. Баракаси кўп кун, яхши амал қилинган кундир. Энг шум замон, бировга ёмонлик қилинган замондир.

Сени ҳақорат қилган инсон Парвардигорини ҳам ҳақорат қилибди. Оллоҳ бандаларини йўқдан бор қилди, банда эса ўз борлигидан шикоят қилди. У Зот оч бандаларини тўйдирди, бандалар эса ўзгага шукр

қилдилар. Оллоҳ бандаларини хавфдан омон қилди, бандалар эса У Зотга қарши курашдилар.

Дунёдан юз ўғир – Оллоҳ сени севар. Одамларга қарам бўлишдан юз ўғир одамлар сени севарлар. Озига қаноат қил. Қуръонга амал қил. Рихлат тадоригини кўр. Улуғ Зотдан кўрқ.

Ёқимсизнинг ҳаёти йўқ. Гуноҳкорнинг тинчи йўқ. Бузғунчини севгувчи йўқ. Ёлғончини мақтовчи йўқ. Хиёнаткорга ишонч йўқ.

Табассум саодат калитидир. Муҳаббат унинг эшигидир. Сурур унинг боғидир. Иймон унинг нуридир. Тинчлик унинг кўрғонидир.

Соғлом инсон харсанг тош устида ҳам худди ипак кўрпада ётгандек дам олади. Арпа нонни ёғли патир каби ейди. Каталакдек кулбада Кисро қасрида яшагандек яшайди.

Бахил ё фақирдек ҳаёт кечиради ёки ўз фарзандларига хизматкор, мол-давлатига кўриқчи бўлган, одамларга ёқимсиз, Оллоҳдан узоқлашган ва бу оламда ёмон ном орттирган бой каби ўлади.

Фарзандлар ва соғлик мол-дунёдан яхшироқдир. Тинчлик уй-жойдан гўзалроқдир. Тажриба бойликдан қимматлироқдир.

Шодлик пайтида шукр қил. Қайғу пайтида сабр қил. Жимлик пайтида фикр қил. Кўрганингдан ибрат ол, сўзинг зикр, ҳаётинг тоат, ўлиминг ором бўлсин.

Қуш каби бўлгин. Унинг ризқи эртаю кеч келади. Эртаси учун ғам чекмайди. Бировга суянмайди. Ҳеч кимга озор бермайди. Сояси енгил. Ҳаракати мулойимдир.

Одамларга кўп аралашгани одамлар хор қилурлар. Уларга бахиллик қилгандан нафратланурлар. Ҳалим-

лик қилганни улуғлайдилар. Сахийлик қилганни се-
вурлар. Уларга муҳтож бўлганни ёқтирмаслар.

Фалак айланаверади. Кечалар ҳомиладор. Кунлар
ўзгарувчан. Бир ҳолатнинг давом этавериши амри
маҳолдир. Раҳмон ҳар кун иш-амалдадир... бас, нега ғам
чекасан?

Унга хор бўлганни азиз қилган, муҳтож бўлганни
беҳожат қилган, Ундан сўрамоқ шараф, Унга эгилмоқ
юксаклик, Унга суянмоқ етарли бўлган Зот – Оллоҳни
поклайман.

Сенга ғам етиб, ҳолинг паришон бўлса, мол-дав-
латинг, аҳли-оиланг борасида фожиага дуч келсанг,
умидсизликка тушма, Оллоҳ бундан кейин бирон ишни
пайдо қилар.

**«Бизга Ёлғиз Оллоҳнинг Ўзи кифоя. У Зот энг
яхши Ишончли Вакилдир»**ни айтишни унутма. Зеро,
у оловни ўчираар. Ғарқ бўлганни қутқарар. Йўлдан ада-
шилмас. Ишончли аҳд ундадир.

Эй қуш, сенга жаннат бўлсин: дарёдан сув ичасан,
дарахтда яшайсан, меваларни ейсан, хатарни кутмай-
сан, жаҳаннамдан ўтмайсан. Сен шу ҳолатда башар-
дан бахтлидирсан.

Сурур қарзга олинган лаҳзадир. Қайғу унинг каф-
форатидир. Ғазаб учқундир. Бекорчилик зиён-
дир. Ибодат тижоратдир.

Кечаги кун ўлди. Бугунги кун ўлиш арафасида. Эр-
танги кун ҳали туғилгани йўқ. Сен эса вақт фарзанди-
дирсан, бас, сен у вақтни тоат учун сарфла, энг катта
фойда бўлиб қайтади.

Дўстинг – қалам, ҳовузинг – сиёҳ, ҳамсуҳбатинг – ки-
тоб, мамлакатинг – уйинг, хазинанг – қувватинг. Бас,
ўтган нарсага афсус чекма!

Кўпинча ишларнинг аввали сенга ёқмай, унинг охири сени хушнуд этади. Бу худди булутга ўхшайди, аввал чақмоқ чақиб, кейин майин ёмғир ёғади.

Шифо учун етарли олти нарса: дин, илм, бойлик, одамийлик, афв ва саломатликдир.

Бефойда баҳсдан, беҳуда мажлисдан, нодон дўстан узок бўл. Чунки суҳбатдош судровчидир, табиатинг таъсирланувчидир, кўзларинг ўғридир.

Чиройли тинглаш, суҳбатдош сўзини бўлмаслик, ширин сўзлаш, беозорлик билан безанмоқ, буларнинг барчаси ҳурлар кўкрагидаги нишондир.

Сенинг икки кўзинг, икки қулоғинг, икки оёғинг, икки қўлинг, тилинг, иймонинг, Қуръонинг, хотир-жамлигинг бордир. Шукр қани, эй инсон? «Бас, (эй инсонлар ва жинлар), **Парвардигорингизнинг қайси неъматларини ёлғон дея олурсизлар?!**». (Ар-Раҳмон сураси, 30-оят)

Карлик, соқовлик, кўрликдан саломатсан, мохов, мажнун эмассан, сил, саратон дардига чалинганинг йўқ. Раҳмонга шукр қилдингми?

Бизларнинг мусибатимиз, ҳозиримиздан ожиз қолиб, ўтмишимиз билан машғул бўлмоғимиз, бугунимизга бепарво бўлиб, эртаимиз учун ғам чекмоғимиздир. Ақл қаерда қолди, ҳикмат қани?

Одамларнинг сен ҳақингдаги қилган танқидларидан билгинки, сен эшлашга арзигулик иш қилибсан, яна сен улардан илм, фаҳм, мол-давлат, мансаб ёки обрў жиҳатидан илғорсан.

Оқиллар бозорида сотиладиган энг арзон саодат беҳуда сўзни тарк этмоқдир. Олимлар олдидаги энг қиммат мато сен одамларни, одамлар сени улфат тутмоқларидир.

Ғамдан узоқ бўл, у заҳардир, ожизликдан йироқ бўл, у ўлимдир. Дангасаликдан узоқлаш, у муваффақиятсизликдир. Фикринг чигаллашмасин, у ёмон тадбирдир.

Ёмон қўшни ватансизликдан ёмонроқдир. Эзгулик қилмоқ шоҳона қасрлардан юксакроқдир. Гўзал мақтов улуғликдир.

Етакловчи дини, йўлловчи ақли, ҳимоя қилувчи насаби, зийнат берувчи ҳаёси бор инсон барча фазилатларни жамлабди.

Оллоҳ ихтилофни тарк этиб, манманликдан йироқ, ёлғондан саломат, тақдирга рози, ҳасаддан йироқ бўлган кимсага бандаларининг қалбларини буриб қўяди.

Султонни қадрламаганни – дунёси кетар. Олимни қадрламаганни – дини кетар. Дўстни қадрламаганни – одамийлиги кетар. Оллоҳни қадрламаганни – дунёю, Охирати кетар.

Инсонлар сенга муҳтож бўлишлари неъматдир. Бас, бундан малол олма, акс ҳолда, бу неъмат адоватга айланади. Билгинки, ҳаётингдаги энг яхши кун – одамлар сени сўроқлашган кундир, сен уларни сўроқлаган эмас.

Уйқуга ётишдан аввал сенга ёмонлик қилганларни кечир. Қалбингни афв билан етти маротаба ювгин.

Илм ёлғизликда дўстдир, ғурбатда ҳамроҳдир, хилватда рақибдир. Илм тўғри йўлга йўллар. У қийинчиликда ёрдамчидир, ўлимдан кейинги захирадир.

Оллоҳдан юз ўгирмоқ, дунёга юзланмоқ – ғам-андух сабабидир. У мангу қамоққа маҳкумдир. Унинг на тириклигидан нишона бор, на унинг вафоти эълон қилинган.

Ўз насибангни сукут билан изла. Зеро, камгап инсон ҳайбатли ва маҳбубдир, ҳамма бало тилдандир.

Ғамдан қочиб бир шаҳардан иккинчи шаҳарга сафар қилмоқ бефойдадир. Бир туйғудан иккинчисига кўча олишлик ҳақиқий шодликдир.

Нафси гўзал инсон тонгни софлик, кечани тантана билан кутиб олади, инсонларни азиз, тор кулбани баланд қаср деб билади.

Оллоҳ Ўзига итоат қилган бандаларининг қалбини тўқ-хотиржам қилгани У Зотнинг бандаларига қилган раҳматидир. Ўша хотиржамликнинг бир бўлагига бўлса ҳам эришган инсон ўзини дунё эгаси деб билиши мумкин.

Ўздан ўзгача бўлишни истаган, қазодан норози, ризқига қаноатсиз, хулқи ёмон бўлган кимса энг бахтсиз кимсадир.

Масжидни лозим тутган инсон мукаммал оятни англаш саодатини, содиқ дўстни, амалли илмни, кўз тутилган марҳаматни, фойдали сўзни ва самимий тавбани топади.

Рўзадорнинг таоми, тунлари бедорнинг уйқуси шириндир. Сахийнинг мақтовчиси, раҳбарнинг ҳасад-гўйи кўп бўлур.

Ёлғиз Оллоҳга банда бўлмоқ учун тасаввур, виждон, ақл ва жисмининг ҳар қандай ҳукмронлигидан озод ҳолда ҳаёт кечирмоқлигинг саодатдир.

Ислоҳ этиш учун ҳеч қандай йўл қолмаган ишни унутган, инсонларнинг яхшилигини эслаб, ёмонликларини эсдан чиқарган киши бахтлидир.

Ризқинг сенинг манзилингни сен уни жойини билгандан кўра яхшироқ билади. У ортингдан соя каби

қувиб юради. Бир сўз билан айтганда, ризқингни комил олмагунингча ўлолмайсан.

Пасткашга муҳтож бўлган инсон ҳиссиз мискиндир. Кўпни оз санаган фақирдир. Ўз айбларини кўрмаган кўрдир.

Энг севган нарсасига етган инсон энг севмаган нарсаси бўлишини кутаверсин, фақатгина Оллоҳга қилинган ибодат бундан мустаснодир, унинг ниҳояси Оллоҳ ризоси ва жаннатга кирмоқдир.

Шодлик тинчликка муҳтождир, мол-давлат садақага муҳтождир, обрў-мартаба қўлловга муҳтождир, улуғлик тавозуга муҳтождир.

Фарзандлар бойликдан муҳимроқдир, гўзал хулқ мансабдан улуғроқдир, ғайрат тажрибадан баландроқдир, тақво мартабадан юқорироқдир.

Эшитганинг ҳар нарсага интилаверма, ҳар қандай дўстга суянаверма, аёл кишига сиригнини очма, тинч деган жойга кетаверма.

Хилватсиз роҳатни, тоатсиз тинчликни, вафосиз муҳаббатни, ростгўйликсиз ишончини кўрмадим.

Кўпинча, бир луқма кўп луқмаларни тўсар, бир сўз кўп адоватга сабабчи бўлар, бир ёмонлик кўп яхшиликлар йўлини тўсар, бир боқиш кўп ҳасратларни олиб келар.

Севгинг қуллик, нафратинг зўрлик, ҳаётинг ишрат, эслашинг надомат, мақсадинг шон-шараф бўлмасин.

Ҳалимлигингни зиёда қилиб, гуноҳдан қайтарган, сенга илм, фаҳм-фаросат ато этган кун энг улуғ кундир.

Ҳаёт шундай фурсатки, унинг қадрини йўқотгандагина биласан. Саломатлик соғлом инсонларнинг бошидаги тожидирки, уни фақат дард эгаларигина кўрадилар.

Оқ бўлган ўғли, майдакаш аёли, озор берувчи кўшниси, зерикарли дўсти, гуноҳга буюрувчи нафси, эгаллаб олган ҳавойи-хоҳиши бўлган одам қандай бахтли бўлсин.

Парвардигоринг, нафсинг, кўзларинг, аёлинг ва меҳмонларингнинг сенда ҳақлари бордир, бас ҳақдорга ўз ҳаққини бергин.

Чиқаётган тонгга назар сол, чунки унда сен учун келажакка ишонч уйғотувчи, орзу-умидлар калитини тутувчи жамол, улуғлик ва ёғду бордир.

Эрта тур ва зикр, Куръон тиловати, уни ёд олиш, мутолаа, ижод ва сайрдан иборат ишларни бажар, чунки бу ишларда барака бордир.

Ўртача бўл, бир тарафда тур, Холиқни рози қил, махлуққа раҳм қил, фарз ибодатни комил бажар, нафл ибодатни кўпайтир. Шунда тўғри йўлни топган бўласан.

Гўзал хотима, тўғри сўз, солиҳ амал, зулмдан узоқ бўлмоқ ҳақиқий бахтдир.

Кўпинча, бир сўз неъматни тортиб олар, бир тойишиш хорликни келтирар, хилват лаззат берар, узлат чеккан азиз бўлар.

«Мусулмонлар унинг тили ва қўлидан саломат бўлган инсон ҳақиқий мусулмондир. Одамлар ўз қон ва моллари борасида ундан хотиржам бўлган инсон ҳақиқий мўминдир. Оллоҳ қайтарган нарсадан қайтган киши ҳақиқий муҳожирдир».

Мол-давлатингнинг яхшиси сенга фойда бергани, илмингнинг улуғи сени юксак қилгани, уйингнинг яхшиси сенга кенг бўлгани, дўстларингнинг яхшиси эса сенга холис бўлгандир.

Ҳасадгўйинг йўқми, демак сенда яхшилик йўқ, дунёинг йўқми, демак сенда гўзал хулқ йўқ, дининг йўқми, демак сенда эътиқод йўқ.

Яхши амалларингни эслаш билан ўзингни хурсанд қил, гуноҳингга тавба қилиш билан қалбингга роҳат бер, саховатларинг билан одамларни миннатдор қил.

Семизлик ғафлатдир, мечкайлик фаросатни кетказур, кўп уйқу муваффақиятсизликдир, кўп кулгу қалбни ўлдирур, васваса азобдир.

Севган инсонинг билан сафар қилишинг, ёмон кўрган нарсангдан узоқ бўлишинг, озор берадиган нарсадан саломат эканлигинг ва муваффақиятни элашинг дунё лаззатларидандир.

Яхшилик хурни кул қилар, эҳсон инсонни банди этар, ҳалимлик ёвни енгар, сабр чўғни ўчирар.

Эртанги ризқдан ташвишга тушар экансан, эртанинг келишига ким кафил бўла олади, кечаги бўлган иш сени қайғуга солар экан, ким сенга кечаги ишни қайта такрорлай олади.

Оз муваффақият кўп мол-давлатдан яхшидир, иззат билан ишдан кетиш хорлик билан бошлиқ бўлгандан яхшидир, танилмасдан тоат-ибодатда бўлиш гуноҳ билан машҳур бўлишдан яхшидир.

Қаноат қилгувчи подшоҳдир, исрофгар ақлсиздир, ғазаб қилувчи мажнундир, шошқалоқ енгилтакдир, ҳасадгўй золимдир.

Оллоҳни зикр қилмоқ Раҳмонни рози, инсонни бахтли, шайтонни ноумид қилур, ғамни кетказур, тарозуни тўлдирур.

Умри узун, амали гўзал бўлган инсон бахтлидир, мол-дунёси ҳам, хайру саховати ҳам кўп бўлган инсон омаддидир, илми зиёда бўлган сари тақвоси зиёда бўлган инсон баракотдидир.

Инсонлар ғамини еганнинг жазоси ўз ғамини унутмоғидир, мавлосига хизмат қилганнинг мукофоти

одамлар унга хизмат қилмоғидир, дунёдан кечганинг мукофоти эса ризқи фаровон бўлмоғидир.

Саломат бўла туриб ҳеч бир неъматни оз санама, тавба қилмай туриб ҳеч бир гуноҳни арзимас деб билма, ихлос қилмай туриб ҳеч бир тоатни кўп деб ўйлама.

Ростгўйлик хотиржамликдир, ёлғон шубҳа-ҳадикдир, ҳаё ҳимоядир, илм ҳужжатдир, аниқ баён қилиш жамолдир, жим туриш ҳикматдир.

Зафар ҳаловати сабр аччиқликларини ўчираар, ғалаба лаззати саъй-ҳаракат қийинчилигини кетказар, амалнинг мустаҳкамлиги унинг машаққатини йўққа чиқарар.

Дунёдаги энг яхши нарса Оллоҳнинг муҳаббатидир, жаннатдаги энг гўзал нарса Оллоҳни кўришдир, китобларнинг энг фойдалиси Оллоҳнинг Китобидир, яралганларнинг яхшиси Расулуллоҳ соллоллоху алайҳи ва салламдир.

Ўтган кунидан ибрат олиб, нафсига назар ташлаган, қабрига тайёргарлик кўриб, Оллоҳдан ҳам жаҳрий ҳам махфий кўрқиб турган инсон бахтлидир.

Очкўзлик хорликдир, тама хўрликдир, бахиллик разилликдир, нуфузга интилиш хатодир, ғафлат эса тўсиқдир.

«Оллоҳни ёдга ол, У ҳам сени ёдга олур, Оллоҳни ёдга ол, ўз олдингда топасан, Оллоҳни кенглик пайтида танигин, У сени танглик пайтида танир, сўрасанг Оллоҳдан сўра, ёрдам тиласанг Оллоҳдан тила».

Кенглик пайтида танглик учун ҳозирлик кўриб олгин, молингни ҳолингга ҳимоя қилиб олгин, умрингни Парвардигорингга тоат қилиш билан ўтказгин.

Кўпинча, лаззат ҳасратни олиб келади, тойилиш хорликни қолдиради, маъсият неъматни тортиб олади, кулгу йиғини олиб келади.

Неъматга шукр қилсанг қарор топади, ношукур бўлсанг қочиб кетади, дунёнинг севинчи ўткинчидир, яхшилиги алдовдир.

Саломатлик икки ўлжанинг биридир, таом озлиги жисм соғлиғи, гуноҳ озлиги руҳ соғлиғи, нафратдан узоқлик эса вақт соғлиғидир.

Алам дақиқаси бир кун, лаззат куни бир дақиқадир, шодлик кечаси қисқа, қайғу куни узун ва оғирдир.

Бахтсизлик сенга неъматни эслатади, очлик таомни суюкли этади, қамоқ озодлик қийматини англа-тади, дард сенда саломатлик учун шавқ уйғотади.

Уч табибни ўзингга лозим тут: шодлик, роҳат, парҳез. Уч душмандан узоқ бўл: бадбинлик, ваҳима, умидсизлик.

Саҳар пайти тиз чўкиб, қўлингни чўз, кўзларингни бўшатгин ва: **Бизлар хузурингга ўтмас матоларни олиб келдик. Аммо Сен, эй Буюк Зот, бизларга ўлчовларни тўла қилиб мукофотлар бергин, деб илтижо қил.**

Дард-алам, мадорсизликдан саломат бўлмоқ неъматлардан биридир. Ташна бўлмагунингча сув ичма, очикмагунинггача таом ема, чарчамагунча ухлама.

Пухта ўйлаган орзу қилган нарсасига етар, яхшиликни орзу қилган зафардан роҳат олар, шошқалоқлик унумсизликдир, хаёлпарастлик қашшоқликдир.

Оллоҳ сен учун қилган нарсалардан рози бўл, У сенга раво кўрган ҳолатнинг завола топишини кутма, чунки У сени сендан кўра яхши билур, у Сенга ўз онангдан ҳам меҳрибонроқдир.



Истиғфор айтишда бардавом бўл, чунки кеча ва кундузда Оллоҳни иси бордир, эҳтимол ўша исдан сенга ҳам етар ва сени Қиёмат кунига қадар бахтиёр етар.

Неъмат келганда шукр қилиб, бало келганда сабр қилган, гуноҳ ортидан истиғфор айтиб, ғазаб пайтида ҳалим бўлган ва ҳукм қилса адолат қилган инсонга жаннат бўлсин.

Тил бийронлиги, ақл унумдорлиги, зеҳн мусаффолиги, қайғу кетиши, тажрибадан фойдаланмоқ ҳамда фазилатларни касб этмоқ ўқиш фойдаларидандир.

Қалб озучаси ихлос, тавба, Оллоҳга қайтмоқ, У Зотга таваккал қилмоқ, Унинг ҳузуридаги нарсага рағбат қилмоқ, азобидан кўрқиб, Уни севмоқдир.

«Эй улуғлик ва икром Эгаси» сўзини айтишни ўзингга лозим тут. **«Эй тирик, барҳаёт Зот, Сенинг раҳматинг ила Сендан мадад сўрайман»** дуосини доим айт. Шунда кенглик, шодлик ва сакинати топасан.

Сенга биров озор берса дарҳол қазони эслагин, афвни, ҳалимлик ажрини, сабр савобини афзал билгин. У золим бўлса сен мазлумсан, демак сен насиба жиҳатидан бахтлидирсан.

Қазойи қадар ижро бўлувчи, ажал белгиланган, ризқ ўлчаб қўйилган бўлса, бас недан хафалик? Касаллик, фақирлик, мусибат ўз ажри билан бирга келса, бас ғам-қайғуга не ҳожат?

Тақдир қилиб, мағфират этгувчи, айбларни тўсиб, ризқ берувчи, кўриб, эшитгувчи бўлган, қўлида барча ишларнинг калити бўлган Павардигори бор инсонима учун ғам чекади.

Раҳмат кенгдир. Эшик очиқдир. Афв берилгандир. У Зот эрта-кеч ато қилур. Тавба мақбулдир. У Зотнинг ҳалимлиги буюқдир.

Китобдан кўра фойдали, қабрдан кўра ибратли, гуноҳдан кўра жирканчли, зоҳидликдан кўра шарафли, қаноатдан кўра беҳожатроқ нарса йўқдир.

Мубоҳ нарсаларнинг ҳам ошиқчаси худди ортиқча калом, таом, уйқу, ҳамма нарсага аралашавериш каби дилни сиқар, чунки у қайғу сабабчисидир.

«Эй Пайғамбар, Сизга ва Сизга эргашган мўминларга Оллоҳнинг Ўзи кифоядир». (Анфол сураси, 64-оят). Оллоҳ сизларга кифоя қилар. У сизларни тўғри йўлга бошлар. Сизларни ҳимоя этар. Бас, қўрқманглар.

«(Эй Муҳаммад алайҳис-салом), Биз Сизнинг қалбингизни (иймон ва Куръон нури билан) кенг-мунаввар қилиб қўймадикми?». (Шарҳ сураси, 1-оят). Ахир Оллоҳ уни бағри кенг, шодон, масрур, сокин, хотиржам ва умрбод хуррам этмадимми?

«...Уларнинг макру ҳийлаларидан сиқилманг ҳам!». (Наҳл сураси, 127-оят). Биз сизлар учун уларнинг макрларини тўсиш учун етарлидирмиз. Уларнинг озорларини қайтарурмиз.

«(Эй мўминлар), куфрга қарши курашда (сустлашмангиз) ва (Ухуд жангидаги мағлубият сабабли) ғамгин бўлмангиз». (Оли Имрон сураси, 139-оят). Сустлашманглар ва маҳзун бўлманглар. Чунки сизлар ақида, шариат, услуб, сийрат, таянч, асос, ахлоқ-одоб жиҳатдан олийдирсизлар.

«Албатта, Парвардигорингиз мағфирати кенг Зотдир». (Нажм сураси, 32-оят). У гуноҳларни афв қилар, тавбаларни қабул этар, хатоларни оз санар, тойишлишни кечирар, айбларни беркитар.

«...ва Оллоҳнинг раҳматидан ноумид бўлманглар. Зеро, Оллоҳнинг раҳматидан фақат кофир қавмгина ноумид бўлур». (Юсуф сураси, 87-оят).

Унинг шодлиги яқин, лутфи нақд, муяссар қилиши аниқ, карами кенг, фазли омдир.

«...ва У Зот меҳрибонларнинг Меҳрибонроғидир». (Юсуф сураси, 64-оят). У шифо берар, саломат қилар, бандалари орасидан элчиларини танлаб олар, бало-қазодан асрар, ҳукмронлик қилар, айбларни беркитар, гуноҳларни мағфират этар, ҳалимлик қилар, карам кўрсатар.

«...Агар мўмин бўлсанглар, Ёлғиз Оллоҳгагина суянинглар!». (Моида сураси, 23-оят). Ишни Унга топшир, аҳволдан Унга шикоят қил, берганига рози, бошқарувидан хотиржам бўл.

«...Шояд Оллоҳ (мусулмонларга) ғалаба берса...». (Моида сураси, 52-оят). У Зот қулфларни очар, оғир ғамни кетказар, узун кечаларни йўқ қилар, дилни ёзар, аҳволни ўнглаар.

«Сиз билмассиз, эҳтимол Оллоҳ бундан кейин бирон ишни пайдо қилар». (Талоқ сураси, 1-оят). Ғамни кетказар, ризқни берар, ишни осон қилар, узоқни яқинлаштирар.

«Бас, албатта, ҳар бир оғирлик, машаққат билан бирга бир енгиллик ҳам бордир». (Шарҳ сураси, 7-оят). Фақирлик олдида бойлик, дард олдида шифо, қайғу олдида шодлик, торлик олдида кенглик, маҳбусликдан сўнг эркинлик, очликдан сўнг тўймоқ бордир.

«...Оллоҳ танглик-камбағалликдан кейин енгиллик-бойликни ҳам (пайдо) қилур». (Талоқ сураси, 7-оят). Кишан ечилар, арқон узилар, эшик очилар, ёмғир ёғар, аҳвол ўнглоанар.

«...Энди чиройли сабр қилмоқдир...». (Юсуф сураси, 18-оят). Бас, шундан сўнг аҳвол ўзгарар, нафс ором

топар, кўнгил очилар, иш осонлашар, тугун ечилар, машаққат ниҳоя топар.

«Ахир Биз унга икки кўз, тил ва икки лаб (ато) қилмадикми?!». (Балад сураси, 9-оят). У икки кўзи билан коинот китобини, гўзаллик дафтарини ўқийди, гўзал манзаралардан роҳатланади, ҳаёт кўрғазмасида кўзлари яшнар.

«...тил ва икки лаб (ато) қилмадикми?!». (Балад сураси, 9-оят). Нурли баён – Қуръон қироат қилур, ҳикматли ҳадис сўзлар, чиройли сўзлар айтур, қалбидаги нарсани таржима қилур.

«Қасамки, агар сизлар (Менинг берган неъматларимга) шукр қилсанглар, албатта (уларни янада) зиёда қилурман...». (Иброҳим сураси, 7-оят). Бас, илм кўпаюр, фаҳм зиёдалашур, ризқ баракотли бўлур, ғалаба рўёбга чиқар, яхшиликлар бисёр бўлур.

«...ва сизларга барча зоҳирий ва ботиний (яъни, моддий-маънавий) неъматларини комил қилиб берганини кўрмадингларми?!...». (Луқмон сураси, 20-оят). Динда ҳам, дунёда ҳам, аҳли-оила, мол-дунёда ҳам, истеъдод ва жисмоний аъзоларда ҳам, руҳоний жиҳодда ҳам ҳаммага ва ҳар бир кишига берди.

«...Оллоҳнинг раҳмат-марҳаматидан ноумид бўлманг!...». (Зумар сураси, 53-оят). Унинг эшиги беркилмас, пардаси тортилмас, хазинаси тугамас, фазли ниҳоя топмас, арқони узилмас.

«Оллоҳнинг сизларга берган неъматини эсланг». (Иброҳим сураси, 6-оят). Ўлик эдинглар, сизларга ҳаёт берди, адашган эдинглар, Ўзи ҳидоят берди, фақир эдинглар, беҳожат қилди, оми эдинглар, илм ўргатди, заиф эдинглар, ғалаба берди.

«(Эй инсонлар), Парвардигорларингиз: **«Менга дуо-илтижо қилинглар! Мен сизларга (қилган дуо-ларингизни) мустажоб қилурман».** (Ғофир сураси, 61-оят). Дардингизни Оллоҳга айтинглар, ҳожатингизни, мақсадингизни, ризқни Ундан сўранглар, аҳволингиздан Унга шикоят қилинглар.

«**Оллоҳ** (барча ҳожатлар билан) **кўзлангувчидир** (яъни, барча ҳожатлар Ундан сўралади, аммо У ҳеч кимга муҳтож эмасдир)». (Ихлос сураси, 2-оят). Бутун коинот Унга юзланур, махлуқотлар Уни кўзлар, тиллари турли, лаҳжалари хилма-хил бўлган халқ ўз ҳожатларини сўраб Унга дуо қилурлар.

«**Бунга** (яъни, Оллоҳ мўминларга ёрдам беришига, кофирларни эса ҳалок қилишига) **сабаб, Оллоҳ иймон келтирган зотларнинг Дўсти – Ҳомийси эканлиги, кофирлар учун эса ҳеч қандай ҳомий йўқ эканлигидир».** (Мухаммад сураси, 11-оят). Уларга йўлни нурли қилиб, очиб берур, Ҳидоятни кўрсатур, залолатдан асрар, жаҳолатни кетказар.

Фитна тугунини кўтарма, ўзгаларни жосуслик билан кузатма, одамлар сен билан машғул деб ўйлама, барчалари фалақда сузиб юрур.

«**Хуш сўз – садақадир**». Чунки дилни очар, қалбни бахтиёр этар, жароҳатни битказар. Нафратни кетказар. Тинчликни эълон қилар.

«**Биродаринг юзига табассум билан боқишинг садақадир**». Чунки юз – китоб муқоваси, қалб ойнасидир. Виждон дастури, яхши аломатнинг бошидир.

«**...бу Динда сизларга бирон ҳараж-танглик қилмади...».** (Ҳаж сураси, 78-оят). Балки дин осонлик ва енгилликдир. Машаққатдан ҳимоядир. Кулфатдан узоқдир. Жабр-ситамдан омонликдир.

«...улардан юklarини ва устларидаги кишанларини олиб ташлайди (яъни, Ислом динидан аввалги динларда бўлган оғир, машаққатли ибодатларни олиб ташлаб, уларнинг ўрнига осон ва енгилларини келтиради)...». (Аъроф сураси, 157-оят). Улар бахтсизликдан сўнг яна бахтли бўлурлар. Машаққатдан сўнг роҳат олурулар. Хавфдан сўнг омон қолурулар. Қайғудан сўнг шод бўлурлар.

«Биз Сизни осон (Динга) муваффақ қилурмиз». (Аъло сураси, 8-оят). Бас, Парвардигорингга муҳаббат билан ибодат қилурсан. Хоҳиш билан итоат этурсан. Ишонч билан Унинг йўлида жиҳод қилурсан. Шунда топган азобларинг роҳатга, тотган «заҳарларинг» асалга айланади.

«Парвардигоро, агар унутган ёки хато қилган бўлсак, бизни азобингга гирифтор айлама!» Чунки бизлар гоҳо очкўзмиз, гоҳо ғофилмиз, гоҳо қайсармиз, гоҳо лоқайдмиз, афв айла ё Раб! Чунки бизлар гуноҳкор ва хатокормиз, аммо фазлу карамингдан умидвормиз, раҳматингга ташнамиз.

«Парвардигоро, бизларнинг зиммамизга биздан илгари ўтганларнинг бўйинларига қўйган юкингни юклама!». Чунки бизлар ожиз қулларингмиз, мискин бечоралармиз. Сен Ўзинг бизларга Сенга қандай дуо қилишни таълим бердинг. Энди дуоларимизни ижобат қил.

«Парвардигоро, бизларни тоқатимиз етмайдиган нарсага зўрлама!» Чунки бизлар ожиз қолиб, қалбларимиз ўтмаслашиб, нафсларимиз малолланиб қолади. Ўзинг бизларга осон қил.

«Бизларни афв эт». Чунки бизлар хатокормиз. Ёмонмиз, адашганмиз. Нуқсон-камчилик ҳаммаси бизда. Сен эса Сахий, Карим, Раҳмон, Раҳимсан.

«(Гуноҳларимизни) **мағфират қил**». Чунки гуноҳларни кечиргувчи ёлғиз Ўзингсан, айбларни яширгувчи ёлғиз Ўзингсан, айбдорга ҳалимлик қилгувчи ёлғиз Ўзингсан, гуноҳкорга марҳаматли Зот ёлғиз Ўзингсан.

«(Ҳолимизга) **раҳм айла!**». Чунки Сенинг раҳматинг ила бахтиёр бўлурмиз, орзуларимизга етурмиз, амалларимиз қабул бўлур, аҳволимиз ўнгланди.

«**Ўзинг Хожаимизсан! Бас, бу кофир қавм устига Ўзинг бизни ғолиб қил!**». (Бақара сураси, 286-оят).

«**Мен, машаққат, иложсизлик, такаллуф, зўравонлик эмас балки фитрат, суннат, енгиллик ва мўътадиллик очиқ бўлган тўғри дин билан юборилдим**».

«**Ҳаддан ошишдан ҳазир бўлинглар!**». Ҳеч нарса кўшмасдан, бидъатларга берилмасдан, осон, енгил, ўрта – адолатли бўлган суннатга эргашинглар.

«**Менинг умматим – марҳаматга лойиқ кўрилган умматдир**». Уни Парвардигорнинг Ўзи бошқарур, элчиси элчилар саййидидир, дини динларнинг яхшисидир, унинг уммати умматларнинг афзалидир, унинг шариати энг гўзал шариатдир.

«**Оллоҳни Парвардигор, Исломни дин, Муҳаммад соллаллоҳу алайҳи васалламни элчи, деб билган инсон иймон таъмини тотур**». Бу уч нарса ризолик устунлари, нажот асосларидир.

Эй фақир банда, чиройли сабр қилгин, чунки сен мол-давлат жавобгарлигидан, бойликка қулликдан, дунё тўплаш машаққатидан, уни кўриқлаб, унга хизмат қилишдан ҳамда Оллоҳнинг ҳузуридаги узун ҳисобкитобдан саломатдирсан.

Эй кўзининг нуруни йўқотган одам, кўзинг эвазига берилган жаннатдан хушнуд бўл, сенга қалбингдаги

нур эваз қилиб берилди, сен қабиҳликларни кўришдан, безовта қиладиган, банд қиладиган нарсаларга қарашдан омондирсан.

Эй дардман инсон, иншооллоҳ тузалурсан, дарҳақиқат сен гуноҳлардан тозаландинг, пок бўлдинг, қалбинг сайқал топди, нафсинг синиқ бўлди, кибр-ҳаволаринг кетди.

Нега йўқолган нарсалар ҳақида ўйлаб, бор нарсаларга шукр қилмаяпсан, бор неъматни унутиб, йўқ неъматга ҳасрат чекаяпсан, одамларга ҳасад қилиб, ўзингдаги нарсалардан ғафлатда қоляпсан?

«Сен дунёда йўловчи – мусофир каби бўлгин».

Бир бўлак нон, бир қултум сув, бир қатор кийим, қисқа кунлар, санокли кечалар... сўнгра бу олам ўз ниҳоясига етур ва... энг бой инсон билан энг фақир инсоннинг қабри баробар бўлур.

Подшоҳ ходимининг ёнига, раҳбар кўриқчисининг ёнига, машҳур шоир, номаълум бир фақир билан, бой мискин, фақир, ғамгин билан бирга дафн қилинур. Лекин у қабрларнинг ичида ишлар хилма-хил, даражалар бошқа-бошқадир.

Сени кўргани янги кун кириб келар экан, эй улуғ меҳмон, марҳабо дея қарши ол, кейин фарзни адо этиш, вожибларни бажариш, тавбаларни янгилаш билан уни яхшилаб меҳмон қилгин, гуноҳлар, ғамандухлар билан унинг дилини хира қилма, чунки у бошқа қайтиб келмайди.

Ўтмишни эслаган пайтда тарихингнинг ёруғ кунларини ёдга ол, шодмон бўласан. Бугунингни эслаганда кулиб – битказган ишингни ёдга ол, хурсанд бўласан. Эртани эслаган пайтда чиройли орзуларингни ёдга ол, кунни яхши ният билан кутаётган бўласан.

Узун умр тажрибалардан иборат бойлик, тўпланган билимлар ва маълумотлар омборидир. Ҳар кунингдан ҳаёт фанининг бир дарсини олурсан. Ақл юргизгувчи қавм учун узун умр баракотдир.

Хавф ҳам керак, чунки у сенга тинчликни эслатади, дуога чорлайди, сени талаш-тортишдан тўхтатиб, буюк хатардан огоҳ этади.

Дард ҳам керак, чунки у сенга саломатликни эслатади. У қалбинг ғофиллар уйқусидан уйғонмоғи учун кибр-ҳаво дарахтини таг-томиридан узмоғи лозимдир.

Ҳаёт ўзи қисқадир, бас уни қайсарлик билан яна ҳам қисқартирмагин. Дўст оздир, маломат билан уни ҳам йўқотма. Душманлар кўпдир, ёмон хулқинг билан уларнинг саноғини кўпайтирма.

Сен сабр-тоқатда ҳеч бўлмаса чумоли каби бўлгин, у дарахтга юз марта чиқиб, юз марта тушади сўнг яна юқорига чиқади ва чарчамайди ҳам, эринмайди ҳам.

Ит бор уйга фаришталар кирмайди, бас унда шаҳват ва шубҳалар ити жойлашиб олган қалбга сакинат қандай кирсин.

Жанжал мажлисларида қатнашма, чунки ундай мажлисларда дин арзон баҳога сотилур, мурувват ноқудай аҳволга тушар, обрў пасткашлар оёғи билан эзилар.

«(Эй инсонлар), Парвардигорингиз томонидан бўладиган мағфиратга ҳамда Оллоҳ ва Унинг пайғамбарларига иймон келтирган зотлар учун тайёрлаб қўйилган, кенглиги осмон ва Ернинг кенглиги каби бўлган жаннатга шошилинг!» (Ҳадид сураси, 21-оят). Демак, фақат мусобақа. Замон ўтиб борар, куёш юриб борар, ой сайр этар, шамол эсаверар, бас, сен ҳам тўхтама, чунки ҳаёт карвони сени кутиб турмас.

«Ва Парвардигорингиз томонидан бўлғуси мағфиратга ҳамда эни осмонлар ва Ер баробарида бўлган жаннатга шошилинг!». (Оли Имрон сура-си, 133-оят). Осилсанг, баланд дорга осилгин, чунки улуғлик талон-торождир, ғалаба ҳаргиз олтин товоқда келмайди. Унинг келиши учун кўз ёшлар, қонлар, бедорликлар, очликлар, машаққатлар керак.

Ишчининг пешонасидан оққан тер бекорчининг мушки анбаридан покроқдир, меҳнаткашнинг оҳ уриши дангасанинг ўқиган нашидасидан гўзалроқдир. Очнинг қуруқ нони тўқнинг турли хил таомларидан лаззатлироқдир.

Ишларда ўз фикрингда туриб олма, ўзгалар билан маслаҳатлаш, чунки икки кишининг фикри бир кишининг фикридан кучлироқдир, у худди бир-бирига боғланган сари кучли ва қаттиқ бўлган арқон кабидир.

Сенга қилинган ҳар қандай танқидни адоват деб қабул қилма, балки танқидчининг мақсадига парво қилмай, танқиднинг ўзидан фойда ол, чунки сен мақтовдан кўра танқидга кўпроқ муҳтождирсан.

Одамларни таниган инсон роҳат олур. Энди у уларнинг мақтовларидан ҳовлиқиб ҳам кетмас, уларнинг таъналаридан жазавага ҳам тушмас, чунки уларнинг ризолари ҳам, ғазаблари ҳам тез келур, уларни ҳавойи нафс ҳаракатга келтирур.

Касаллик – дардлар сени мақсадга етишдан тўсади деб ўйлама, чунки қанча-қанча фозил бандалар кўр, кар, шол ва букрилиқ дардига йўлиққанларига қарамасдан улуғликка етганлар. Асосий масала фаолиятдир, жисмларда эмас.

Оллоҳ субҳонаҳу ва таоло сендан тўсгани, эҳтимол, яхшиликдир. Рағбатингни сўндиргани Унинг лутфи-

дир. Мақсадингни кечиктиргани иноятидир. Чунки У сени сендан кўра яхшироқ кўра олур.

Ҳар ҳафта оиланг билан саёҳатга чиқ, ана шунда фарзандларингни кўпроқ биласан, ҳаётинг янгиладани, чарчоқларинг кетади.

Бўш қўйилган фикр фожиа томон кетади, ғам-аламларни тортади, бас уни бўш қўйма, балки уни фойдали нарсалар билан боғлаб қўйгин.

Энг улуғ йўл – масжид йўлидир, энг тинч кўча – уйга элтгувчи кўчадир, энг қийин туриш султонлар олдида туришдир, энг буюк кўриниш Парвардигорга сажда қилиш ҳолатидаги кўринишдир.

Гўзал оҳангда тиловат қилинаётган Куръонни тинглаш, ҳузури қалб билан қилинган Оллоҳнинг зикри, ҳалол молдан қилинган инфоқ-эҳсон, фасоҳатли тил билан қилинган ваъзни тинглаш жон роҳати, дил оромидир.

Гўзал хулқ, улуғ атвор қора кўздан ва кўркам юздан ҳамда гулгун чехрадан гўзалроқдир. Зеро, маънан гўзаллик шакл гўзаллигидан улуғроқдир.

Яхшилик қилиш бахтсизлик ҳалокатидан сақлар, ақл девори ҳавойи нафс жарликларидан тўсар, тажрибалар тўқмоғи мингта ваъз-насиҳатдан фойдалироқдир.

Кўр одам оламини кўришни истайди, кар одам овозларни эшитишни орзу қилади, шол эса оёғи билан юришни кўмсайди, соқов инсон сўзларни айтишни орзу қилади. Сен эса кўряпсан, эшитяпсан, юряпсан, гапиряпсан.

Ҳар бир инсоннинг ҳаёти комил деб ўйлама. Уйи борнинг улови йўқ, аёли борнинг мансаби йўқ, ишта-

ҳаси борнинг таоми йўқ, емиши бор эса ейишдан тўсилган.

Масжид Охират бозоридир, китоб умрбод дўстдир, амал қабрда ҳамроҳдир, улуғ хулқ шараф тожи, карамлилик эса гўзал кийимдир.

Ғазабнок ҳолингда қарор қабул қилма, надомат чекасан. Чунки ғазабнок одамдан тўғри йўл йўқолади, фикр кетади, мушоҳадаси камаяди.

Одамларни ҳурмат қилмай туриб улардан ҳурмат кутма, муваффақиятсизлигингда уларни эмас, ўзингни маломат қил. Инсонлар сени ҳурмат қилишларини истасанг, ўзингни ҳурмат қилгин.

Қасрлар харобага айланишини билган инсон ўз кулбасидан рози бўлмоғи, ипак мато ҳам эскиришига ишонган одам ўзининг йиртилган кийимига қаноат қилмоғи даркор.

Нафсига истаган нарсасини берган инсоннинг қалби тўзғир, иши зое кетар, қайғуси кўпаяр, чунки нафс истакларининг чегараси йўқдир, у ёмонликларга буюрувчи, сохтакордир.

Эй ўғлини йўқотган кимса, жаннатдаги ҳамд қасри сен учундир, эй дунё насибасини йўқотган одам, Адн жаннатларидаги насибанг сени кутмоқда.

Уясидан чиқмаган қушнинг ризқи келмас, инида ётган шернинг емиши келмас, уйида бўлган чумолига таоми берилмас, уларнинг ҳаммаси ўз ризқларини излар, сен ҳам улар каби изла, улар каби топурсан.

Улар ажалларидан аввал ўлурлар, ҳар офат-мусибатни кутурлар, ҳар қандай хаёл, овоз, ҳаракатдан қўрқурлар, чунки уларнинг қалблари бўм-бўш, руҳлари парчалангандир.

Сафарга кечикишинг яхшилик, жуфти ҳалолдан маҳрум бўлишинг барака, вазифадан бўшатилишинг фойда бўлса не ажаб, ахир Оллоҳ билур сен билмасан.

Харсанг дарахтдан, темир харсангдан, олов темирдан, шамол оловдан, иймон эса шамолдан кучлидир.

Сенга етган ҳар қандай офат унутилмас дарсдир, сенга етган ҳар қандай мусибат хотирангда муҳрланиб қолур. Шунинг учун ҳам улар зеҳнда боқий тургувчи ҳужжатлардир.

Омад қийинчилик, ғусса, жароҳатлар, оҳ уришлар, сиқилишлардан томган томчилардир. Қайғу эса бекорчилик, дангасалик, ожизлик, хорлик ва беқарорликдан томган томчилардир.

Вақтинчалик шуҳратни истаб, абадий гўзал мақтовга, фойдали илмга, солиҳ амалга ҳаракат қилмаган инсон аҳамиятсиз, жўн инсондир.

Модомики, Парвардигорга осий бўлмай, бировга зулм қилмаган экансан, мамнун ҳолда дам ол.

Одамлар уни дуо қилган ҳолда тунини ўтказган одамга яхшилик бўлсин. Одамлар уни дуоибад қилган ҳолда ухлаган одамга ўлим бўлсин. Қалблар уни севган инсонга жаннат хушхабари бўлсин. Тиллар уни лаънатлаган кимсага ҳалокат бўлсин.

Агар дунё маҳкамасида адолатни топа олмаган бўлсанг қайғурма, Охират маҳкамасида арзингни айт, у ердаги гувоҳлар фаришталар, даъволар далилли, Қози эса энг яхши ҳукм қилгувчидир.

«Бас, Мени эслангиз, Мен ҳам сизларни эслайман ва Менга шукр қилингиз ва Менга куфр келтирмангиз!». (Бақара сураси, 152-оят). Агар зикрнинг фойдаси фақат шундан (Оллоҳ сизни ҳам эслашидан)

иборат бўлганда ҳам, (ваҳоланки, унинг савобу фойдаси саноқсиздир) шунинг ўзи етиб ортади. Ажабо, бу зикр нақадар улуғдир, буюқдир, яқинликдир, шарафдир.

Бахт ҳақида битилган назариётлар, дарсларни ўзи етарли эмасдир, балки ҳаракат, амал, тасарруф лозимдир. Бу худди кунда, сафарда ёки сайлгоҳларга кетаётгандаги юришга ўхшар.

Чивинлар шерга кўп рўбарў бўлишади, унга озор беришмоқчи бўлишади, лекин шер бунга эътибор бермайди, унга қарамайди ҳам, чунки у ўз мақсадлари билан оворадир.

Бадбин инсондан эҳтиёт бўл, агар сен унга гулни кўрсатсанг, у сенга унинг тиконларини кўрсатади, унга сув берсанг, сенга унинг кирларини чиқариб беради, унга қуёшни мақтасанг, унинг иссиқлигидан шикоят қилади.

Ростдан ҳам саодатни истайсанми? У ҳолда уни узоқдан излама, у ёнингдадир, у ижодкор тафаккурингда, гўзал хаёлингда, яхшиликни ўйлайдиган иродангда, эзгуликни таратувчи қалбингдадир.

Саодат – атир кабидир, ундан ўзингга бир икки томчи суртмай туриб, атрофингдагиларга унинг исини тарата олмайсан.

Бор мусибат шундаки, бизлар ҳар куни юз мартадан кўпроқ Оллоҳдан ўзгалардан кўрқамиз: кечикишдан, хато қилишдан, шошилишдан, фалончи ғазабланиб қолиши, фалончи шубҳага тушишидан кўрқамиз.

Одамларнинг кўплари барча шодлик йўқ бўлувчи, барча қайғу абадий деб эътиқод қиладилар. Улар шодлик ўлимига ишониб, қайғу ўлимини инкор қиладилар.

Баъзи одамлар кўр балиққа ўхшайди, балиқ денгизда экан ўзини кичик бир косадаман деб ўйлайди. Бизлар иймон оламида яралдик сўнгра атрофимизни нафрат, хавф, адоват ва қайғу тоғлари билан ўраб олдик.

Бир ҳақимдан сўрашди: «Нега сиз султон олдига бормайсиз, ахир у жуда кўп олтинлар беради». Ҳақим деди: «Мен султон ғазабланиб, бошимни олишидан ва у узилган бошни ўша олтин халталардан бирига солиб, аёлимга ҳады қилиб жўнатиб юборишидан кўрқаман».

Нега итлар ҳуришини эшитиб, кабутарлар куйини тингламайсан? Нега тунлар қоронғусини кўриб, ой ва юлдузларнинг чиройини мушоҳада қилмайсан? Нега асаларининг чақишидан шикоят қилиб, асалнинг таъмини унутасан?

Отанг Одам қилган гуноҳи учун тавба қилди, бас Оллоҳ таоло уни бандалари орасидан танлаб, пайғамбарликка сайлаб, тўғри йўлга ҳидоят қилди. Унинг белидан пайғамбарлар, шаҳидлар, уламолар, авлиёларни чиқарди, демак у аввалги – гуноҳсиз ҳолатидан кўра, гуноҳ қилиб, тавбасига таянганидан сўнг баландроқ мақомга эришди.

Тўфон вулқон каби бўлганда Нуҳ йиғлаб, хитоб қилди: «Эй олийжаноб, меҳрибон Зот!». Бас, мана шу пайтда кўз очиб юмгунча унга ёрдам келди, бас у ғалаба қозонди, зафар қучди. Аммо кофир бўлганлар эса зиён тортди, мағлуб бўлди.

Довуд ўз гуноҳларини кўз ёшлари билан ювди, унинг тавба кийими оқ рангга айланди, чунки газлама меҳроб олдида тикилган, унинг чевари ишончли эди, унинг кийими саҳар пайтида ювилди.

Агар Оллоҳ сендан ғам-андухларни кетказишини истасанг, махлуқотнинг каттасию кичигидан тама қилишни тўхтат, Оллоҳдан ўзгасидан умид қилма, одамларнинг ҳаммасидан умидсиз бўлиб олгин.

Нафсинг худди идишни бўёвчи суюқликка ўхшайди. Агар нафсинг тақдирдан рози ва бахтиёр бўлса саодат, эзгулик, гўзалликни кўради. Агар у сиқилган, бадбин бўлса уни бахтсиз, ёмон ва қабиҳ ҳолда кўрасан.

Маъбудга итоат этиб, бориға шуқр қилиб, йўғида таскин топсанг мақсадга эришган, барча мақталган истакка етган бўласан.

Қалбида иймон ва зикрдан иборат бўстони, зеҳнида илм ва тажрибалардан иборат боғи бўлган одам дунёдан эриша олмаган нарсасига афсус чекмасин.

Саодат. У қайғу йўқ дегани, кутиш йўқ дегани, кўрқишни тарк этиш дегани.

Табассум. У ҳалол бўлган сеҳр, у дўстлик гарови, биродарлик эълонидир. У тинчлик ва муҳаббатни кўтаргувчи нақд рисолатдир. У Соҳиби тақдирдан рози, хотиржам, собитқадам эканлигини билдирувчи қабул бўлган садақадир.

Сен учун дунё истакларининг ниҳоя топгувчи чегараси бўлсин. Яшаш учун уй, ўзинг учун муносиб иш, оғирингни енгил қилувчи уловинг бўлиши яхши, аммо тама эшикларини ланг очиб қўйишинг бахтсизликдир.

Ҳаётингдаги ортиқча нарсалардан ҳатто чўнтагингдаги, ишхонангдаги ортиқча қоғоздан ҳам халос бўл! Чунки ҳар бир эҳтиёждан ортиқчаси зарарлидир.

Инсонларнинг энг бахтлиси саҳобалардир, чунки улар қалблар тубиға, нозик йўлларга, нафслар вас-

васига шўнғимадилар, балки улар аслни эътиборга олиб, асосий мақсадлар билан машғул бўлдилар.

Диққат-эътиборли бўлмоқлик ва ибодатларни адо қилиш вақтида қалблар ҳозир турмоғи лозим, зеро, амалсиз илмнинг, хушуъсиз намознинг, тадаббурсиз қироатнинг яхшилиги йўқдир.

Дунё нима ўзи? Дунё агар қимматбаҳо кийим бўлса, унга хизматкор бўласан ёки у гўзал жуфти ҳалол бўлса, ўз муҳаббати билан қалбингни азоблайди. Ёки у кўп мол-дунё бўлса, сен унга кўриқчи бўласан. Агар булар дунёнинг шодлиги бўлса, қайғуси қанақа бўлади?

Намозлар вақтлар тартибидир. Демак, ҳар бир намоздан сўнг фойдали иш қилгин.

Отамиз Одам ман қилинган дарахтдан еб, Парвардигорига осий бўлди, бас бу иши уни жаннатдан ерга туширди. Масалани зоҳири шуки, Одам тўғри, чиройли йўлни тарк этди. Лекин ишнинг оқибати яхшилик ҳамда улуғ фазилатдан иборат бўлди. Бас, Оллоҳ таоло унинг тавбасини қабул қилиб, тўғри йўлга ҳидоят қилди ва уни бандаларининг орасидан танлаб олди. Унинг белидан элчиларни, пайғамбарларни, уламоларни, шаҳидларни, авлиёларни, мужоҳидлар, обидлар, инфоқ қилувчиларни чиқарди. Ўз сўзини баён қилган Оллоҳни поклайман. Унинг аввалги ҳолати сокинлик, ейиш-ичишдан иборат бўлса, (бу ҳозирги ғамандуҳи бўлмаган кўпчилик одамларнинг ҳолатидир) аммо унинг танлаб олиниш, пайғамбарлик, ҳидоятдан кейинги ҳолати эса буюк ҳолат, улуғ манзилат, юксак шараф бўлди.

Довуд алайҳиссалом хато қилганидан сўнг надомат чекиб йиғлади. Унга энг буюк неъмат берилган эди. У Парвардигорига итоатгўй, ўзини хор тутувчи, хушуъ

қилгувчи, қалби синиқ банда эди. Бандалиқдан мақсад ҳам шудир. Зеро, Оллоҳга хор-зор бўлмоқ комил бандалиқдир.

Қавми Расулуллоҳ соллаллоху алайҳи васалламни ёлғончига чиқариб, унга қарши жанг қилишлари мусулмонларни уларга қарши урушиб савоб топишга, Оллоҳнинг тарафдори бўлишга, У Зотнинг йўлида жонни қурбон қилишга сабаб бўлди. Оллоҳ ўз элчиларига ғалаба берган, мўминларга шаҳидлик мақомини насиб этган ғазотлар сабабли, уларни Наъийм жаннатининг меросхўрлари қилди. Агар кофирлар билан мана бу тўқнашув бўлмаганида мана бундай катта яхшилик, нажот, саховат бўлмаган бўлар эди. Расулуллоҳ соллаллоху алайҳи васаллам ҳижрат сабабли Ислому давлатини барпо қилди, ансорларни топди. Иймон куфр аҳлидан ажралиб қолди. Ўз иймони, ҳижрати, жиҳодида ким содиқ, ким ёлғончи эканлиги маълум бўлди. Расулуллоҳ соллаллоху алайҳи васаллам асҳоблари билан биргаликда Ухуд жангида мағлуб бўлишларини зоҳирда қалбимиз қабул қилмаса-да, дилимизга қаттиқ ботса-да, лекин шу сабабли тавсифига тил ожиз гўзал ихтиёр ва эзгуликлар Расулуллоҳ соллаллоху алайҳи ва салламга берилди. Бадр жангида ғалабадан сўнг кўнгли тўқ бўлган саҳобаларнинг катталикларини, ўзига ишонишни, нафсига суяниб қолишни кетказди. Бу жангда Оллоҳ таоло шаҳидлар саййиди бўлмиш Ҳамза, Ислому вакили бўлмиш, Мусъабни, Оллоҳ у ҳақида сўзлаган Жобирнинг отаси – Абдуллоҳ ибн Амрни ва бошқаларни шаҳид қилди. Бу жангда мунофиқларларнинг юзи очилди, ишлари ошкора бўлди, Оллоҳ таоло уларнинг сирларини очди, ниқобларини юлиб ташлади...

Нуҳ алайҳиссалом эллик йил кам минг йил ўз даъватининг йўлида озор топди. У сабр қилди, ажр кутди, тавҳид учун бўлган даъватини ёйишда кечаю кундуз, ошкора ва махфий давом этди, ҳатто Парвардигори унга нажот берди, душманларини эса тўфон билан ҳалок қилди.

Иброҳим алайҳиссалом оловга ташланганида Оллоҳ у оловни салқинлик ва омонлик қилди, Иброҳимни Намруддан ҳимоя қилди, унга қавмининг ҳийлаларидан нажот берди, уни улар устига ғолиб қилди ҳамда унинг Динини ерда абадий қилди.

Фиръавн Мусо алайҳиссаломни чор атрофда пистирмада туриб пойлар, у учун турли фирибларни тўқир, унга озор бериб, қувиб солишда ўз маҳоратини ишга солар эди. Бас, Оллоҳ таоло Мусога ёрдам берди, унга сеҳргарларнинг «уйдирма»ларини ютадиган асо-ни берди. У учун денгизни ёриб, уни – Мусони денгиз орасидан мўъжиза билан қутқарди. Оллоҳ Мусонинг душмани бўлмиш Фиръавнни ҳалок қилиб, шарманда қилди.

Бани Исроил Ийсо алайҳиссалом билан жанг қилдилар, унга унинг обрўси, онаси, элчилиги борасида озорлар беришди ва уни ўлдирмоқчи бўлишди. Шунда Оллоҳ уни Ўзи томон кўтарди, унга улкан қувватни берди. Душманлари эса зиён кўриб қолдилар.

Пайғамбаримиз Муҳаммад соллаллоҳу алайҳи ва салламга мушриклар, яҳудлар, насронийлар қаттиқ азоб бердилар, у зотга ёлғончи қилиш, истехзо, масхаралаш, ҳақоратлаш, мажнунга, фолбинга, шоир ва сеҳргарга, ифвогарга чиқариш каби турли балоларни ёғдирдилар. Юртларидан қувилди, у зотга қарши жанг қилинди, асҳоблари ўлдирилди, атбоълари қийноқ-

қа солинди, аёлларига тухмат қилинди, турли машаққатларни тотдилар, ... оч қолдилар, фақир, мажруҳ бўлдилар, тишлари синди, бошлари ёрилди, ёрдамчилари бўлмиш Абу Толибни йўқотдилар, ҳамдардлари бўлмиш аёли Ҳадичадан айрилдилар. Қамал қилинди, ҳатто у зот ўз асқоблари билан дарахт баргларини ейишга мажбур бўлишди. У зот ҳаётлик чоғида қизлари вафот қилди, ўғли Иброҳим у зотнинг қўлида жон берди. Уҳудда мағлуб бўлди. Амакиси Ҳамзанинг тани парчаланди. Ўзи эса турли суиқасдларга тўқнаш келди. Очликдан қорнига тош боғлади. Баъзан ейиш учун арпа нон ёки хурмо ҳам топа олмади. Ғусса ютди, изтироб косасини қултумлаб ичди. Яна у зот золимларнинг димоғдорлиги, мутакаббирларнинг инжиқликлари, аъробийларнинг ёмон хулқлари, бойларнинг манмансирашлари, яҳудийларнинг гина-адоватлари, мунофиқларнинг макрлари ва инсонларнинг сусткашликлари билан имтиҳон қилинди. Аммо оқибат у зотники эди. Ғалаба ҳамроҳи эди, зафар йўлдоши эди. Оллоҳ динни ғолиб қилди, бандасига ёрдам берди, фирқаларни бир Ўзи парчалади. Душманларини тор-мор қилди, шарманда қилди, ёрдамсиз қолдирди. **«Оллоҳ Ўз ишида Ғолибдир** (яъни, Уни Ўзи хоҳлаган ишни қилишдан ҳеч ким ман қила олмайди) **лекин одамларнинг кўплари** (буни) **билмайдилар»**. (Юсуф сураси, 21-оят).

Абу Бакр қийинчиликларни кўтариб, дини Ислом йўлида барча машаққатларни енгил санади, молдавлатини инфоқ қилди, обрўсидан кечди, Оллоҳнинг йўлида арзону қиммат барча нарсасини инфоқ қилди. Ҳатто у зот Сиддиқ лақаби билан зафар топди.

Ҳаётини жиҳод, чиройли амал, зоҳидлик, ўзни қурбон қилиш, тарки дунё, инсонлар орасида адолатни барпо қилиш билан ўтказган зот – Умар ибнул Хаттоб меҳробда чоғида ўз қонига беланди.

Усмон Қуръонни тиловат қилаётган ҳолда қурбон қилинди.

Ўзни қурбон қилиш, ғалаба, фидокорлик ва рост-гўйликдан иборат бўлган улуғ мақомларга эга бўлган Али ибн Абу Толибга масжидда турган чоғида хоинлик қилишди.

Хусайн ибн Алини Оллоҳ шаҳидлик мақоми билан сийлади, у зулм ва адоват қиличи билан ўлдирилди.

Олим ва зоҳид бўлган Саъийд ибн Жубайрни Ҳажжож ўлдириб, гуноҳкор ҳолида қолди.

Ибнуз-Зубайрга золим Ҳажжож ибн Юсуфнинг қўлида ҳарамда турган ҳолида шаҳид бўлиш шарафи билан қам қилди.

Ҳақни айтган Аҳмад ибн Ҳанбал қамоққа олинди, қамчиланди ва у аҳли сунна вал-жамоанинг имомига айланди.

Суннатга чорлаган Восиқ имом Аҳмад ибн Наср ал-Хазоий Ҳақни айтгани учун ўлдирилди.

Шайхул ислом Ибн Таймийя қамоққа олинди, аҳли-оиласи, дўстлари, китобларидан мосуво қилинди ва Оллоҳ унинг номини бутун оламга ёйди.

Имом Абу Ҳанифа Абу Жаъфар ал-Мансур томонидан қозилик мансабини қабул қилмагани учун қамчиланди.

Олимур-Раббоний бўлган Саъийд ибн ал-Мусаййибни Мадина амири қамчилади.

Дорул Ҳижрат имоми бўлган Молик ибн Анас Мадина волийси томонидан қамчиланди.

Муҳаддис олим бўлган имом Абдуллоҳ ибн Авни Билол ибн абий Барда урди.

Агар қувғин, қамоқ, қамчиланиш, ўлдирилиш, озорлар билан имтиҳон қилинган инсонларнинг номини айтишни давом эттираверсак, кўп жойни эгаллайди, сўз кўпаяди. Айтганларимизнинг ўзи ибрат учун кифоядир.

Сўнгсўз ўрнида сизга икки дунё саодатини тиловчи биродарингизнинг дуою саломини қабул қилгайсиз.

Оллоҳим, Сени поклайман, Сенга ҳамд айтаман. Ўзинг ёлғиз Илоҳ эканлигингга гувоҳлик бераман, Сендан мағфират сўрайман, Сенга тавба қиламан.

Ал-Қарний, Шайх Оиз.
Қ-24 Маҳзун бўлма (Матн) / Шайх Оиз ал-Қарний; араб тилидан З. Мансур таржимаси. – Тошкент: «O‘zbekiston» НМИУ, 2020. – 240 б.

ISBN 978-9943-25-734-4

УЎК 28
КБК 86.38

Диний-маърифий нашр

ШАЙХ ОИЗ АЛ-ҚАРНИЙ

МАҲЗУН БЎЛМА

Иккинчи нашри

Муҳаррир *Л. Игамова*
Рассом-дизайнер *Р. Маликов*
Техник муҳаррир *Л. Хижова*
Кичик муҳаррир *М. Салимова*
Мусахҳиҳ *М. Ишонханова*
Компьютерда саҳифаловчи *К. Голдобина*


Нашриёт лицензияси АИ № 158. 14.08.2009.
Босишга 2020 йил 19 февралда рухсат этилди. Бичими 60×90^{1/16}.
Офсет қоғози. «Cambria» гарнитурасида офсет усулида босилди.
Шартли босма табоғи 15,0. Нашр табоғи 12,98.
Адади 5000 нусха. (2-завод). Буюртма № 20-122.

Ўзбекистон Республикаси Президенти Администрацияси ҳузуридаги
Ахборот ва оммавий коммуникациялар агентлигининг
«O‘zbekiston» нашриёт-матбаа ижодий уйи.
100011. Тошкент, Навоий кўчаси, 30.

Телефон: (371) 244-87-55, 244-87-20.
Факс: (371) 244-37-81, 244-38-10.

e-mail: iptduzbekistan@iptd-uzbekistan.uz
www.iptd-uzbekistan.uz

47500



«O'ZBEKISTON»

ISBN 978-9943-25-734-4

9 789943 257344